


# Nyangumarta Bible



Portions of the Holy Bible in the Nyangumarta language of  
Australia

## Nyangumarta Bible

### Portions of the Holy Bible in the Nyangumarta language of Australia

copyright © 1980-2010 Wycliffe Bible Translators, Inc.

Language: Nyangumarta

Bible translation copyright © 1980-2010 Wycliffe Bible Translators, Inc. Reader Series (book XXC) copyright © 1996 Bible Society Australia. Bible overview (XXA) copyright © 1996 Mission Publications of Australia (PO Box 21, Lawson NSW 2783)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-12

---

PDF generated using Haiola and XeLaTeX on 18 Mar 2025 from source files dated 31 Aug 2023  
469e8210-9f0b-5399-9f0b-cc22ce5975b8

## Contents

Genesis . . . . .	1
Exodus . . . . .	89
Job . . . . .	97
Psalms . . . . .	98
Proverbs . . . . .	101
Ecclesiastes . . . . .	102
Isaiah . . . . .	103
Jeremiah . . . . .	104
Matthew . . . . .	105
Mark-ju . . . . .	109
Luke . . . . .	143
John . . . . .	146
Acts . . . . .	148
Romans . . . . .	149
1 Corinthians . . . . .	150
Galatians . . . . .	155
Ephesians . . . . .	158
1 Thessalonians . . . . .	159
2 Thessalonians . . . . .	168
1 Timothy . . . . .	173
2 Timothy . . . . .	174
Titus . . . . .	175
Hebrews . . . . .	176
James . . . . .	177
1 Peter . . . . .	178
1 John . . . . .	180
Revelation . . . . .	181
Overview . . . . .	182
PINAKARRÜLUMAN! . . . . .	187
Bible Stories . . . . .	193
Drunkenness . . . . .	206

## Genesis

Copy for community checking - not fully consultant checked. (Gen 1-5, 6-9 and 11 are consultant checked and have audio files)

### *KARRPURRANGUNGA 6-NGA WIYIRR JIRNI NGARRKALU (1:1—2:3)*

- <sup>1</sup> Walangkarrangu purlpi parlparrpa jungka jirni Ngarrkalu.
- <sup>2</sup> Pala jungka puru waninyikinyi, ngapapurni waninyikinyi, wiyyir yamarnakinyi janpalu. Waninyikinyi ngunarrijirri warrukurlajartu. Palinymili Pirlurr yananyikinyi ngapanga kankarni.
- <sup>3</sup> Wurrarna Ngarrkalu, “Tili jarra.” Palaja tili jarrinyi palinymili muwarrjaja.
- <sup>4</sup> Yirrirnakanu wurrarna “Ngalypa.” Jinta pirnipulinyi tilipa warrukurla.
- <sup>5</sup> Warrukurla yini marna “Warrukartingarra”, tili yini marna “tilingarra”. Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.
- <sup>6</sup> Wurrarna palanga, “Parlparr jarra, jinta pinaku ngapakupa mujunguku.”
- <sup>7</sup> Pala jarrinyi. Kankarrkurnu yanayi mujungu, ngapa kaniny yakarnaya.
- <sup>8</sup> Pala parlparr yini marna “Parlparrngarra”. Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.
- <sup>9</sup> Wurrarna palanga, “Ngapa kaniny jarra, warajanga jarra, jungka punarra turlpa, ngayarta jarra.” Pala jarrinyi. Kaniny jarrinyi ngapa, jungka yakarna ngayarta.
- <sup>10</sup> Pala jungka punarra yini marna “Warrarnngarra”, pala ngapa wirtujina yini marna “Kujungurrungarra.” Yirrirnakanu wurrarna “Ngalypa.”
- <sup>11</sup> Palaja wurrarna, “Turlpayi mungka warinypa wariny, warrulypa warinypa wariny.” Pala jarrinyi.
- <sup>12</sup> Jungkaja mungka warinypa wariny turlpaniyi, jinta mayijartiny, jinta munu. Warruly pukurl warinypa wariny turlpaniyi, jinta mayijartiny, jinta munu. Yirrirnakanu wurrarna “Ngalypa.”
- <sup>13</sup> Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.
- <sup>14-15</sup> Wurrarna palanga, “Tili jarrayi kanka parlparrja, tili jinaku warrarnja. Palarrangulu warrukartingipa karrpungu tili yinganyaku, partunukupa yurrangaku yinku kalkunaku pukurl.” Pala jarrinyi.
- <sup>16</sup> Wirtujinajirri jinapulinyi, janyjapa wirlarra jinapulinyi. Wirtulu tili jinaku yijalu pirrpa-pirrpaja warrurl-warrulkartijakun, wupartulu tili jinaku yijalu warrukartingi. Panikatarrangu pukun jirnijaninyi.
- <sup>17-18</sup> Parlparrja wirrirnijaninyi warrarnku tili jinaku, warrukartikupa karrpuku jinta pinaku pukun. Yirrirnakanu wurrarna “Ngalypa.”
- <sup>19</sup> Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.
- <sup>20</sup> Wurrarna palanga, “Ngapakarringu yintangapa kujungurrungu kurrrngal warinypa wariny jarrayi. Wirrujartiny jarrayi kanka yananyaku.”
- <sup>21</sup> Palaja kujungurrungu kuwiyi wirtujina jirnijaninyi yijangarra. Janpamalu pukun wirturrangupa wuparturrang, warinypa wariny jirnijaninyi. Pijungapa yintanga janpamalu jirnijaninyi warinypa wariny. Jintapa

wiyirr ngapakarringu jirnijaninyi, yintangapa kujungurrungu. Wirru-jartiny jirnijaninyi warinypa wariny pukun. Yirrirnakanu wurrarna "Ngalypa."

<sup>22</sup> Ngalypalu muwarr pirnijanaku. Wiyirru wurrarnajanaku, "Kalkulumarnanyurrinyi ngajulu. Kurrngal jarrulinyurru yija, partanykarrangupu kurrngal kalkulkulinyurrujaninyi yija-yiji."

<sup>23</sup> Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.

<sup>24</sup> Wurrarna palanga, "Jungkanga kuwiyyirrangu warinypa wariny jar-rayi, warrarnja waninyaku, marnti yananyaku jungkanga, kuwiyyirrangu parlkarrkarringupu warnkukarringu, wirturrangupu wuparturrangu." Pala jarrinyi.

<sup>25</sup> Wiyirr jirnijaninyi. Yirrirnakanu wurrarna "Ngalypa."

<sup>26</sup> Palaja wurrarna, "Marrngu jilaminyijaninyi nganyjurrukapanali. Nyampali wantulupiyi kuwiyyirranguku wiyyirru, janpamalukupa wirru-jartinykupa jungkanga yananyakatarrangukupa."

<sup>27</sup> Marrngu jirni Ngarrkalu palinykapali. Pirirripa mirtawa jirnipulinyi.

<sup>28</sup> Ngalypalu muwarr pirnipulaku. "Kurrngal partanykarrangupu kalkulkulinyumpulu yija, yija marrngurrangu wantulupiyi ngunarrijirri. Wiyirru kuwiyyiku nyampali jarrulinyurrujanaka. Nyampali wantulinyurrujanaka janpamalurrangukupa wirrujartinyarrangukupa wiyyirru kuwiyyirranguku."

<sup>29</sup> Warinypa wariny mayi jinarninyurruka, mungkajapa warrulyja mayirrangu wiyyirr yinganyarnanyurrinyi.

<sup>30</sup> Kuwiyyirranguku wirrujartinyarrangukupa wiyyirru jungkanga yananyakatarranguku warruly jinarnijanaka mayijartinyipa. Yakarnarna-janaka."

<sup>31</sup> Yijalu jirnijaninyi. Jipi jinaja yirrirnijaninyi wiyyirr Ngarrkalu. Wurrarna, "Ngalypakata yiji."

Wiyirr palajun jirnijaninyi. Palarrangungu karrpurrangungu, parirr warajakartingipa warajanga, jirnijaninyi wiyyirr. Palaja warrukarti jarrinyi, palaja pirrpa-pirrpa jarrinyi. Karrpu wariny turlpanya.

## 2

<sup>1-3</sup> Nyungu warinymaljanga, karrpu 7, munu wariny jinama. Wurrarna pala karrpu, "Purlpi wiyyirr jipi jirnirnijaninyi. Warrkamu jarrinyikinyirni, kuwarri warrkamu yakarnarna. Nyungu kuwarri yija munu nganipa wariny jinamarna. Palaja nyungu karrpu wariny, warrkumumajirri. Warrkamu yakarnarna kuwarriku."

### *NGANIKAPALI WALANGKARR (2:4-6)*

<sup>4</sup> Palajun jirni Ngarrkalu walangkarr, parlparrpa jungka jirni. Kuwarri wurralamarnanga marrngurranguku, ngani jirnakinyayi.

<sup>5</sup> Walangkarr yija marrngumili mayi pirraja munu turlpanyamayi, munu wheat-pa rice-pa jinta jijirrarrangu marrngumili. Ngarrka munu ngakarnama ngapa mujunguja, marrngumajirri jungka karlinskyaku, warrulyja mayi jungkanga wirrinaku, grow-am jinaku.

<sup>6</sup> Januku jungkaja turlpanyayi, purlpurl jarrinyiyi, wirrirniyi ngapa jungkanga kanka.

*MARRNGU YINTANGA NGALYPAKATANGA WIRRIRNI NGARRKALU  
(2:7—2:25)*

<sup>7</sup> Yuu, yakujun jirni marrngu Ngarrkalu. Kurlurlu mana jungkaja. Pirirri jirni kurlurluja palaja. Pala pirirri milyanga nganyjurnulu palinyju. Palanga pirirringi ngalpanyala wangal Ngarrkaja. Palajalu pirirri wanka jarrinyi. Yini pala pirirri "Adam".

<sup>8</sup> Palaja warrarnja, yini pala warrarn Eden, palanga Ngarrkalu wirrirni yinta wirtu, ngalypakata yija. Pirirri yarni manaja, palanga yintanga wirrirni.

<sup>9</sup> Palanga yintanga mungkarrangu ngalypakatarrangu warinypa wariny wirrirnijaninyi. Mayijartinyarrangu ngalypakatarrangu palanga warinypa wariny. Mungkarrangungu waraja partijirri kaniny wirrirni. Pala mungka yini marna, "Marrngu Wanka Kalkunakata." Palajangarra marrngulu ngananya, wankanyu wantuliny ngarramarnti, marlkarrimajirri wantuliny.

Wariny mungka partijirri kaniny jintanga wirrirni, miranu jinapinti pala. Nyungu wariny mungka yini marna "Marrngu Miranu Jinakata Ngalypakupa Kurluku."

<sup>15</sup> Pirirri nyarra yintanga Eden-ja wirrirni, jungkakupa karlinskyaku yintakupa kalkunaku.

<sup>16</sup> Palinyja wurrarnala, "Yintanga mungkarranguja wiyyirra mayi ngalkulumanjaninyi.

<sup>17</sup> Warajaja mungkajaja yakalaman, munu ngananya, palaja mungkajaja miranu jinapintija. Yini marnarna pala 'Marrngu Miranu Jinakata Ngalypakupa Kurluku.' Palaja mungkaja munu ngananya. Ngananya, palajaja, yija-yiji marlkarri jarrulumana."

<sup>18</sup> Palaja wurrarna palinyju, "Munu kujurl waninyaku pirirri. Jarrurl jilkurnalnu, jarrurljartinyarta wantuliny."

<sup>19-20</sup> Purlpi jungkaja kuwiyyirrangup wirrujartinyarrangu wiyyirr jirnijaninyi Ngarrkalu. Pirirrikarti kanyajaninyi, yini yinganyaku palarranguku. Palalu pirirrilu yini yinyajaninyi kuwiyyipa wirrujartintypa nganinnganin. Pirirrija palaja yini kalkurnayi. Palarrangungu wiyyirra munu waraja pirirrikapali, palinyku jarrurl.

<sup>21</sup> Palaja pirirri kupalya jirni Ngarrkalu, raminyja pirirrija kunya manali, palaja pirla yamarna majangulu.

<sup>22</sup> Palaja kunyajaja mirtawa jirni, kanyalu pirirrikarti.

<sup>23</sup> Palaja wurrarna pirirrilu, "Yartikarra, nyungu ngajukapali! Kawuja ngajuja jirni. Yini 'Mirtawa'."

<sup>24</sup> Palajalu nyungu jina yakarnanganyjurruka Ngarrkalu: Pipipa japatru yakalkulinypulinyi pirirrilu, nyupamarnintypa warajanga jarrulinypulu, warajangangarra yija wantulinypulu.

<sup>25</sup> Palanga yintanga Eden-ja waninyikinyipulu nyuparra, Adam-pa, waninyikinyipulu kurta, ngalypa waninyapulu, kurta pulany.

### 3

#### *MUNU PINAKARRIMAPULALU NGARRKAKU (3:1-24)*

<sup>1</sup> Kuwiyyirrangungu jintangapa jurru mirlkawarrangu waninyikinyi. Mirtawa japiirr marna jurrulu, "Ngani wurrarnangu Ngarrkalu? 'Mayi munu ngananya, wiyyirra mungkarranguja yintanga'?" Palajun muwarr pirningu?"

<sup>2</sup> Yimpirlili mirtawalu, "Jintarranguja mungkaja yintaja ngalkulupalayi.

<sup>3</sup> Wurrarnangalayaku Ngarrkalu, ‘Waraja mungkajakun yintanga waninyi, partijirri kaninya, mungka marramarranga, palaja munu ngananyaku mayi, munu warlinakupa pala mungka, marlkarringimarra’.”

<sup>4</sup> Jurrulu wurrarnala, mitu marna, “Nyuntu munu marlkarri jarruluman.

<sup>5</sup> Palamaja mungkaja ngalkuluman, Ngarrkakapali jarruluman, miranu ngalypakupa kurluku. Palaku Ngarrka malyparr karrinyi. Palangamarra wurrarnangu, ‘Munu palamaja mungkaja ngananyaku’.” Mitulu wurrarnalu jurrulu, “Munu pinakarra Ngarrkanga.”

<sup>6</sup> Mayi parrijarn-parrjarnikinyi mirtawalu, kurlkalkalu parrjarnakinyi, ngalypakata. Kurlkali marnakinyi, “Miranu jiliminyi palamalu mayili.” Ngarrkakapali miranu jarrinyaku karrinyikinyi mirtawa. Palaja nyarrakarti mungkakarti yana, mayi ngartarna, ngana. Jinta nyupanga palinymilingi yinyali. Palinyju pukurl ngana.

<sup>7</sup> Kurlkapirli jarrinyipulu, yirrirnipularninyi kurta waninyikinyipulu. Palaja kurntany jarrinyipulu. Palajalu yarni marnapularninga jirriji parrkajalu wirtujalu.

<sup>8</sup> Jarurrukartingi Ngarrka jina pinakarrinyipulu jakarr-jakarrarra yintanga marntija. Wirntijartiny kuku jarrinyipulu mungkarrangungu Ngarkangamarra.

<sup>9</sup> Pirirriku kamarnalu Ngarrkalu, “Wanyjarningi nyuntu?”

<sup>10</sup> Puntaju marnalu, “Yuu, yintanga pinakarrinyarnanta nyuntu marn-tija. Kurta waninyikinyirni. Palajalu wirntijartiny ngaju, kuku jarrin-yarnangu.”

<sup>11</sup> Japirr marna Ngarrkalu, “Nganija miranu jarrinyan kurta waninyikinyin? Nyarraja mungkaja, ‘Marrngu Miranu Jinakata Ngalypakupa Kurluku’, palaja mayi nganan nyuntulu?”

<sup>12</sup> Pirirrilu wurrarnalu, “Nyuntulu mirtawangarra yinyanyin nyungu. Palaja mungkaja yinyanyi palinyjungarra, mayi nganarna.”

<sup>13</sup> Mirtawa japirr marna Ngarrkalu, “Ngani jirnin nyuntulu?” Wurrarnala, “Jurrulu mitu marnanya, palinya muwarrja nganarna.”

<sup>14-15</sup> Jurrungu wurrarnala Ngarrkalu, “Kurlu yija jirnin nyuntulu. Puntaju kurlu jilamarnanga yija, munu jinta kuwiyyirranguku, nyuntukujakun. Ngarlungungarra yankuluman.

Kurlurlu ngalkuluman ngaramarnti.

Malyparr jilamarnanta mirtawaku,

Mirtawa malyparr jilamarnanga nyuntuku.

Partanykarrangupa nyuntumili mirtawamilipa kulilu yirrilipiyarninyi.

Jurnturtu nyuntu pijurnanga jilamanta yija mirtawamilalu partanyjupa, Jina paliny pijurnanga jilaman yija nyuntulu.”

<sup>16</sup> Mirtawanga wurrarnala,

“Parra-parra wirtu yungkulumarnanta yija partanya kanganya.

Miranungarra nyuntu partanya kanganya ja parra-parraku,

yirru yiji pirirriku marrapa karrirrulumanpalu.

Nyampali wantulumangu yija nyuntuku.”

<sup>17-19</sup> Palaja pirirringi wurrarnala Ngarrkalu,

“Mayi nyarra wurrarnarnangu munu ngananyaku.

Munu pinakarrimajinpa nyuntulu.

Nyuntumilia mirtawaja muwarrja mayi nganan nyuntulu

palaja mungkaja.

Puntaju warrarn kurlu jilamarna yija ngajulu.

Turlpulupiyi parupa jiripa nganin-nganinpa.  
 Nyuntulu mayiku kanyjilamanpa ngarramarnti.  
 Mayiku pirti marrjalu karlinyarruluman,  
 karrpurrangu karrpurrangu ngartarnarruluman,  
 yijalu jirrmilju ngalkulumanta.  
 Marlkarrija, jungka jarruluman.  
 Jipi jirnirninti jungkaja,  
 Kurlurluja jirnirninti.  
 Marlkarrija, jungka jarruluman yarranakanu.”

<sup>20</sup> Piririmarninyju yini marna palinymili mirtawa, “Eve”. Pipi nganyjurruku wiyyirku.

<sup>21</sup> Palaja wurru karnuja kuwiyyija yarni marnapuluka Ngarrkalu, wirrirnipuluku palinyju, Adam-kupa palinymili mirtawaku.

<sup>22</sup> Palaja Ngarrkalu wurrarna, “Marrngulu munu pinakarrimiji. Mungkaja Marrngu Miranu Jinakataja purlpi ngana. Paliny kuwarri nganyjurrukali, kurlkapirli waninyi ngalypakupa kurluku. Ngalali palamaja warinyjapa mungkaja, wankanyu kalkunakataja. Palaja wankanyu wantuliny ngarramarnti, marlkarrimajirri wantuliny. Ngampa pilamarna ngajulu ngananyangamarra.”

<sup>23</sup> Palajangarra Eden-jangarra yintaja ngakarnapulinyi Ngarrkalu. Jalanga ngakarnapulinyi, karlinyaku jungkaku, mayirrangu jungkanga wirrinaku, mayiku pulanymilaku turlpanya jinaku.

<sup>24</sup> Palaja Ngarrkalu wirrirni angel, kakarra palanga yintanga, wirtu pukun wirrkanapinti. Milya warinykurnu warinykurnu yananyikinyi pala wirtu wirrkanapinti, parrparrpa karra marninyi. Palanga angel-ja wurrarnala Ngarrkalu, “Nyuntulu ngampa pinaku marrngu ngalpanyajaku wangka pala mungkakarti, pala wankanyu kalkunakatakarti mungkakarti.”

## 4

### *ABEL WIRLARNA MARLKARRI CAIN-JU (4:1-16)*

<sup>1</sup> Adam-pa Eve yanapulu palaja Yitinja. Palaja Eve-lu pujamu kanya. Karra marna, “Partany yinyanyi Ngarrkalu.” Yini paliny Cain.

<sup>2</sup> Palaja wariny kanya. Yini paliny Abel. Wirtu jarrinyapulu. Pirirrijirri jarrinyapulu. Abel-ju kalkurnakinyijaninyi kukurnjarirrang. Cain-ju karlinyikinyi jungka. Mayirrangu wirrirnikinyijaninyi jungkanga, turlpanyikinyiyi, ngarnipirnikinyijaninyi.

<sup>3</sup> Karrpungu warajanga Cain-ju kanya mayi, Ngarrkanga yinyali.

<sup>4</sup> Palinymilalu marrkalu kanya kukurnjari, marlkari jirni, kutarrangu ngalypa Ngarrkanga yinyali. Ngarrka ngarlu pikaly jirni Abel-ju.

<sup>5</sup> Munu pikaly jirnima Cain-ju. Palajalu Cain kuli jarrinyikinyi. Ngumpa wariny jarrinyi.

<sup>6</sup> Ngarrkalu wurrarnalu, “Nganija nyuntu kuli jarrinyijin? Nganija ngumpa wariny jarrinyijin? Munu yunturi jarranpili.

<sup>7</sup> Yinku jinaman, pikaly jarri man. Kurlu jirnikinyin. Yirrkulu nyuntulu jilamanparninyi ngalypa jinaku. Palajalu pikaly jinaluminyin. Munujalu, jiti kurlujartiny jinaluman.”

<sup>8</sup> Ngarrkaku Cain-ju munu pinakarrimalu. Yunturi jarrinyikinyi. Palajalu wurrarnalu marrkaku, “Yankuli jalakarti ngurnungu.” Jalakarti yanapulu. Palaja Cain-ju wirlarna marlkari marrka palinymili.

<sup>9</sup> Palajalu Ngarrkalu japirr marna, "Wanya marrka nyuntumili?" Murrkangunyamarninyju mitu marna, "Munumparla ngaju. Munurla tuku jinakarni."

<sup>10</sup> Wurrarnili Ngarrkalu, "Nyuntu mitu karrinyan. Nyuntulu wirlarnan marlkarri. Jungkanga palinymili pijirri waninyi. Nyuntulu yija kurlu jinan."

<sup>11</sup> Puntaju ngajulu kurlu jilamarnantalu. Jungka kurlu wantulamanga.

<sup>12</sup> Mayirrangupa munu turlpulupiyingu. Kaja ngakalamarnanta. Wirntijartiny yankun-yankulumana warinykartirrangu."

<sup>13</sup> Cain-ju wurrarnalu, "Kararr nganimarta jinajinpa.

<sup>14</sup> Yankun-yankulumarna warinykartirrangu. Ngurnipali warinyjupa marlkarri wirlalanyili."

<sup>15</sup> Ngarrkalu wurrarnili, "Warinyju wirlalantili, ngajulu yijalu wirlala-marnanga."

<sup>16</sup> Palajalu Cain yana ngunarri. Kakarrakurnu waninyikinyi kaja Yitinja. Ngurnungu warrarn yini marnayi "Parra Yaninyikinyi."

#### *CAIN-MILI NYIRRIRNIKARTIJARRANGU (4:17-24)*

<sup>17</sup> Nyupa Cain-mili partany kanya, yini Yinuku. Tawun yarni marna Cain-ju, nyaparu jirni pala tawun partanyku palinymilaku, yini marna pala tawun Yinuku pukun.

<sup>18</sup> Enoch japatu jarrinyi partany pirirriku, yini Irad. Irad japatu jarrinyi partany pirirriku, yini Methushael. Methushael japatu jarrinyi partany pirirriku, yini Lamech.

<sup>19</sup> Pala Lamech kujarra mirtawajirri kalkurnapulinyi, Adah-pa Zillah.

<sup>20</sup> Adah-lu partany pirirri kanya, Jabal. Walangkarr nyarra Jabal kuwiyyirrangu kalkunakatarrangu, mayamajirri, yana-yanikinyiyi tent-arrangujartiny warinyja warinykart, warruly kanganyaku janamilaku kuwiyyiku.

<sup>21</sup> Markamarniny palinymili yini Tubal. Walangkarr nyarra Tubal musical instruments yarni manakatarrangu, harp-pa flute-pa nganinnganin.

<sup>22</sup> Zillah-lu partany pirirri kanya, yini Tubal-Cain. Palinyju yarni marnikinyi yarni manapintirrangu bronze-japa iron-ja. Zillah-lu partany mirtawa kanya pukun, yini Naamah.

<sup>23</sup> Lamech wurrarnapuluku mirtawakujirri palinymilaku,  
"Adah-pa Zillah, pinakarrajipulu ngajuku!"

Wangalangulu ngaju wirlanaja, paliny wirlarnarna marlkarri.

<sup>24</sup> Ngarrkalu wurrarna nganurtulu Cain marlkarri wirlalkuliny, paliny Ngarrkalu wirlalkuliny seven times. Nganurtulu ngaju marlkarri wirlanaja, paliny warinyju wirlalkuliny seventy-seven times!"

#### *SETH-PA ENOSH (4:25-26)*

<sup>25</sup> Abel marlkarri waninyaja, Eve-lungarra wariny partany kanya. Karra marna, "Abel wirlarna marlkarri Cain-ju. Ngarrkalu puntaju yinyanyi pujamu wariny." Yini marna "Seth".

<sup>26</sup> Seth japatu jarrinyi Enosh-ku. Palajaja marrngurrangulu ka-marnikinyiyi Ngarrkakupa ngarluja nyurra marnikinyiyi paliny.

<sup>1</sup> Nyungu muwarr yarntarnayi purlpija, Adam-milaku partanykarrangupa karlujipa jamujirrangupa nyirrirnikartijarranguku.

<sup>2</sup> Ngarrkalu marrngurrangu yarni manajalu, palinykapali yarni marnajaninyi. Pirirripa mirtawa yarni marnajaninyi, ngalypa jirnijanaku, ngalypa wurrarnajanaku, yini marnayi "marrngu".

<sup>3</sup> Adam 130 partunurrangujartiny jarrinya, japartu jarrinyi partany pirirriku. Palinymili partany palinyngarrakapali. Yini marna palinymili partany "Seth".

<sup>4</sup> Seth ngayarta jarrinya, Adam wanka jarrinyikinyi 800 partunurrangu, partanykarrangu pirirripa mirtawa kanyapulujaninyi Adam-jupa Eve-ju.

<sup>5</sup> Adam wanka jarrinyi 930 partunurrangu, palaja marlkarri jarrinyi.

<sup>6</sup> Seth 105 partunurrangujartiny jarrinya, japartu jarrinyi partany pirirriku, Enosh.

<sup>7</sup> Enosh ngayarta jarrinya, Seth wanka jarrinyikinyi 807 partunurrangu, partanykarrangu pirirripa mirtawa kanyajaninyi.

<sup>8</sup> Seth wanka jarrinyi 912 partunurrangu, palaja marlkarri jarrinyi.

<sup>9</sup> Enosh 90 partunurrangujartiny jarrinya, japartu jarrinyi partany pirirriku, Kenan.

<sup>10</sup> Kenan ngayarta jarrinya, Enosh wanka jarrinyikinyi 815 partunurrangu, partanykarrangu pirirripa mirtawa kanyajaninyi.

<sup>11</sup> Enosh wanka jarrinyi 905 partunurrangu, palaja marlkarri jarrinyi.

<sup>12</sup> Kenan 70 partunurrangujartiny jarrinya, japartu jarrinyi partany pirirriku, Mahalalel.

<sup>13</sup> Mahalalel ngayarta jarrinya, Kenan wanka jarrinyikinyi 840 partunurrangu, partanykarrangu pirirripa mirtawa kanyajaninyi.

<sup>14</sup> Kenan wanka jarrinyi 910 partunurrangu, palaja marlkarri jarrinyi.

<sup>15</sup> Mahalalel 65 partunurrangujartiny jarrinya, japartu jarrinyi partany pirirriku, Jared.

<sup>16</sup> Jared ngayarta jarrinya, Mahalalel wanka jarrinyikinyi 830 partunurrangu, partanykarrangu pirirripa mirtawa kanyajaninyi.

<sup>17</sup> Mahalalel wanka jarrinyi 895 partunurrangu, palaja marlkarri jarrinyi.

<sup>18</sup> Jared 162 partunurrangujartiny jarrinya, japartu jarrinyi partany pirirriku, Enoch.

<sup>19</sup> Enoch ngayarta jarrinya, Jared wanka jarrinyikinyi 800 partunurrangu, partanykarrangu pirirripa mirtawa kanyajaninyi.

<sup>20</sup> Jared wanka jarrinyi 962 partunurrangu, palaja marlkarri jarrinyi.

<sup>21</sup> Enoch 65 partunurrangujartiny jarrinya, japartu jarrinyi partany pirirriku, Methuselah.

<sup>22</sup> Methuselah ngayarta jarrinya, Enoch marnti jarrikinyapulu Ngarrka, wirrirni Ngarrka ngarlungu yija [lived in close fellowship with God]. Wanka jarrinyikinyi 300 partunurrangu, partanykarrangu pirirripa mirtawa kanyajaninyi.

<sup>23</sup> Enoch wanka jarrinyi 365 partunurrangu,

<sup>24</sup> marnti jarrinyapulu Ngarrka, [walking in close fellowship with God], palaja karrpu warinya partarl parrjarnamayi, palanga munu wanim, kanya Ngarrkalu.

<sup>25</sup> Methuselah 187 partunurrangujartiny jarrinya, japartu jarrinyi partany pirirriku, Lamech.

<sup>26</sup> Lamech ngayarta jarrinya, Methuselah wanka jarrinyikinyi 782 partunurrangu, partanykarrangu pirirripa mirtawa kanyajaninyi.

<sup>27</sup> Methuselah wanka jarrinyi 969 partunurrangu, palaja marlkarri jarrinya.

<sup>28</sup> Lamech 182 partunurrangujartiny jarrinya, japartu jarrinyi partany pirirriku.

<sup>29</sup> Lamech-ju partany yini marna Noah, wurrarna, . . . . . [“May he bring us relief from our work and the painful labour of farming this ground that the Lord has cursed.”]

<sup>30</sup> Noah ngayarta jarrinya, Lamech wanka jarrinyikinyi 595 partunurrangu, partanykarrangu pirirripa mirtawa kanyajaninyi.

<sup>31</sup> Lamech wanka jarrinyi 777 partunurrangu, palaja marlkarri jarrinya.

<sup>32</sup> Noah 500 partunurrangu jarrinya, japartu jarrinyijanaku Shem-pa Ham-pa Japheth.

## 6

### *MARRNGURRANGU WIYIRR KURLU JINAKATARRANGU JARRINYIYI (6:1-12)*

<sup>1</sup> Punjaja marrngurrangu kurrgal waninyayi, jirrja yanayi, ngunarrijirringi waninyayi.

<sup>2</sup> Palaja mirurrurrangulu Heaven-ja pungkanajalurrangu yirrirniyijaninya kurrirrangulu, ngalypa yiji yirrinaku, kurlanaku kanyayijaninyi.

<sup>3-4</sup> Partanykarrangu turlpanyayi, janamili japartu mirurrupa pipi kurri. Wirtupa mirlkakatapa kurlukata waninyayi. Wiyirru pinakarrinyijanaku, nyurra marnayijaninyi wiyyirru. Palaja wurrarna Ngarrkalu, “Pirlurr Ngaju munu wantuliny marrngurrangunga ngaramarnti. Ngampa pilkulumanjaninyi kurlujartiny jinamarra, partunurrangunga 120.”

<sup>5</sup> Marrngurrangu wiyyirr kurlu yija jarrinya, munu pinakarrimiyi Ngarrkanga, panypanyikinyiyili. Wurrarnakinyayarninyi ngarrakuny kurlujartiny jinaku.

<sup>6</sup> Palajalu wurrarna Ngarrkalu, “Marrngurrangulu wiyyirru kurlujartiny jinayi. Wurrarnakinyayi ngarrakuny kurlujartiny jinaku. Ngajulu jinajaninyi ngalypa. Kuwarri kurlu yija jarrinyiyi. Palajalu ngarlu wurnmanyarna.

<sup>7</sup> Marlkarri jilamarnajaninyi marrngurrangu wiyyirr, kuwiyyirrangupa wirrujartinyarrangu pukun.”

<sup>8</sup> Warajalujakun marrngulu pikaly jirni Ngarrka. Yini paliny Noah.

<sup>9</sup> Noah Ngarrkanga pinakarrinyikinyi, ngalypa jirnikinyi. Munu kurlu jinama palinyju.

<sup>10</sup> Partanykarrangujartiny kujarrapa waraja, piririmartarrangujartiny, yini Shem, Ham, Japheth.

<sup>11-13</sup> Noah-nga wurrarnalu Ngarrkalu, “Jinta wiyyirr marrngurrangu kurlujartiny yija waninyikinyayi. Panypanyakinyijiya, munu pinakarimijiya. Wurrarnakinyayarninyi ngarrakuny kurlujartiny jinaku, wirlarnakinyayarninyipa. Palajalu wirlalamarnajaninyi marlkarri wiyyirr.

### *BOX WIRTUJINA YIJA (6:13-22)*

<sup>14-16</sup> Box wirtujina nganimarta yarni malaman nyuntulu, boat-ku, mangkurtungamarra. Mungkaja yarni malaman. Kankarni kangkuliny mangkurtulu. Wirtu jilaman yija, makanupa walpurra yarni malaman.

<sup>17</sup> Mangkurtu jilamarnajanaka wirtu. Wirtulu ngapalu kunulinyjaninyi. Nyuntu wanka kalkulumarnanta.

**18** Ngalpuluman, nyuntupa nyupa nyuntumilipa partanykarrangu nyumpalamilipa nyuparrangu janamili.

**19-20** Kunmu jilijaninyi kuwiyyirrangupa wirrujartinyarrangu, wiyyir jungkanga marnti yananyakatarrangu ngalpa jilamanjaninyi boat-ja wirtujinanga. Kunmu jilamanjaninyi kuwiyyirrangup, nyupangkanya nyupangkanya. Warinypa wariny mankulumanjaninyi, ngalpa jinaku boat-ja wirtujinanga. Wankangarra kalkulumarnajaninyi mangkurtungumarra.

**21** Mayikupa warinypa wariny ngarnipilijanaka, nyurraku pukun mayi boat-ja wuru jilinyurruka."

**22** Yijalmarta jirnili Ngarrkanga Noah-lu, boat wirtu yiji yarni marna. Mungkaja yarni marna, makanupa walpurra. Mayipa wirtu warinypa wariny kuru marnapa ngalpa jirni. Yijalu wiyyir jirni Noah-lu muwarrja Ngarrkamilija.

## 7

### *MANGKURTU WIRTU NGAKARNA NGARRKALU (7:1-24)*

**1** Palaja wurrarnalu Ngarrkalu, "Jampa pungkaliny ngapa wirtu nyarra. Nyampa jarrayi, boat-ja ngalpayi, nyuntupa nyuntumilirrangup. Nyuntujakun ngalypakata, nyuntujakun pinakarrinyikinyjin. Palajalu nyuntupa nyuntumilirrangup wanka kalkulumarnanyurrinyi.

**2-3** Nyarrarrangup kuwiyyirrangup yini marnarna 'clean' kaninykurtungi 7 kawajaninyi, nyupangkanya nyupangkanya, pirirripa mirtawa, ngalpa jilijaninyi. Nyarrarrangup kuwiyyirrangup yini marnarna 'unclean' kaninykurtungi waraja nyupangkanya kawapulinyi, pirirripa mirtawa, ngalpa jilijaninyi. Nyarrarrangup wirrujartinyarrangup pukun 7 kawajaninyi nyupangkanya nyupangkanya, pirirripa mirtawa, ngalpa jilijaninyi. Mangkurtu wirtujina yanayajalu, nyirrirkartijarrangup janamili jirrja yankulupiyi warrarnja nyarrakurnujirri.

**4** Karrpurrangup 7-ja ngapa wirtu yiji ngakalamarna, jurrirti pilkuliny karrpurrangup karrpurrangup, 40 karrpurranguku yija. Jalakartirrangup boat-ja mangkurtulu wirtulu marlkarri wirlalkulinyjaninyi."

**5** Noah-lu wiyyir jirni muwarrja Ngarrkamilija.

**6** Mangkurtu milpanyaja warrarnja wakanya, Noah 600 partunurrangujartiny.

**7** Ngalpanayai Noah-pa mirtawa palinymilipa partany piritri janamili kujarrapa warajapa mirtawarrangup janamili, palarrangujakun, boat-ja ngalpaniyi mangkurtu ngapajamarra.

**8-9** Boat-ja kaninykurtunga kanyayi kuwiyyirrangup wirrujartinyarrangup, "clean"-pa "unclean", jungkanga marnti yananyakatarrangup, pirirripa mirtawa, Ngarrkamilija muwarrja.

**10** Karrpurrangup 7-ja mangkurtu wirtujina turlpanya.

**11** Noah 600 partunurrangujartiny jarrinya, wirlarraja warajaja, wirlarranga warinya partijirringa, karrpu 17-ja, kaninykartija jungkaja purlpurlpukarra ngapa wirtu turlpanya, mujunguja ngapa pungkanya pukun, mangkurtu wirtu yiji turlpanya.

**12** Ngapa pungkanya 40 karrpu, pungkanya kawarnikinyi, jurrirti pirknikinyi, pungkanyikinyi.

**13** Palangarra Noah-pa mirtawa palinymilipa partany piritri janamili kujarrapa warajaja, Shem-pa Ham-pa Japheth, janamili mirtawarrangup pukun, boat-ja ngalpaniyi.

<sup>14-15</sup> Wiyirra kuwiyi, wirtupa wupartu, jarntupa wariny, wirrujartintypa jungkanga yananyakata, pirirripa mirtawa, ngalpanyiya boat-ja

<sup>16</sup> muwarrja Ngarrkaja. Palaja jawapirti yamarna Ngarrkalu.

<sup>17-20</sup> Mangkurtu 40 karrpuwaninyi. Kankarrkurnu boat ngapalu kanya, ngapanga kankarningi waninyikinyi. Warnkupa mungkapa parlpu yamarnikinyi mangkurtulu. Ngapa raa karntinyi:::, 8 metres kanka warnkumarramarranga. Mangkurtu wirtujina yija. Marntiyarrakartipa nyuparrangu janamilipa kuwiyyirrangu boat-ja waninyikinyi wanka.

<sup>21</sup> Jinta marlkarri jarrinyiyi, kuwiyyirrangua wirrujartintyarrangupa jungkanga marnti yananyakatarrangupa marrngurrangu pukun, wiyyirr jalakartija, mangkurtulu marlkarri jirnajaninyi.

<sup>22</sup> Wiyyirr jungkanga punarranga ralyu-ralyujartiny marlkarri jarrinyi, mangkurtulu marlkarri kunanyajaninyi wiyyirr.

<sup>23</sup> Ngarrkalu jungkaja marlkarri wiyyirr. Yirrkulu Ngarrkalu kalkurnukinyjaninyi boat-ja Noah-nga.

<sup>24</sup> Pala mangkurtu yirrku waninyi kanka 150 karrpurrangunga.

## 8

### *MANGKURTU JIPI JARRINYI (8:1-19)*

<sup>1</sup> Ngarrkalu munu kakurnamajaninyi Noah-pa wiyyirr kuwiyyirrangua wirrujartintyarrangupa boat-ja. Wangal ngakarna. Ngapa kaniny jarrinyikinyi jinu, kujarrapa kujarra wirlarrarrangungu.

<sup>2</sup> Pala ngapa purlpurlpa jarrinyikinyi jipi jirni Ngarrkalu, pala ngapa pungkanya mujunguja jipi jirni pukun.

<sup>3</sup> Mangurtu kaniny jarrinyikinyi jinu, 150 karrpurrangunga.

<sup>4</sup> Wirlarranga 7-ja, karrpu 17-ja, boat warnkunga kankajirringi kajarna, warnkumarramarranga kankarni, ngapinga, Ararat-ja.

<sup>5</sup> Yirrkulu ngapa kaniny jarrinyikinyi, kaniny jarrinyikinyi, wirlarranga 10-ja, karrpu 1-ja, miral jarrinyiyi warnkurrangu jurnturtu, ngapapurnija.

<sup>6-7</sup> Palaja, karrpuja 40-ja kaarnka ngakarna Noah-lu. Kaarnkalu kanyjirnikinya jungkaku punarrakupa mungkaku. Ngarrakuny yana, munu kulpama. Kanka marra jukurti pirnikinyi. Yarti ngapa yananyajapa jungka punarra jarrinyi, pala kaarnka ngalypa.

<sup>8-9</sup> Palaja, karrpuja 7-ja, Noah-lu wariny wirrujartiny ngakarna, kurlukuku. Partarl kanyjirnikinya jungkaku punarraku. Jampa kulpanya boat-karti. Parirr jirrarna Noah, kajarna kurlukuku parirrja, ngalpa jirni kaninykarti boat-ja Noah-lu.

<sup>10</sup> Karrpungu 7-ja mimarnakinya Noah. Palaja yarrana ngakarna kurlukuku.

<sup>11</sup> Ruka-ruka kulpanya boat-karti, parrka kanya jawanga. Noah-lu wurrarna, "Ngapa kaniny jarrinya kawaninyi."

<sup>12</sup> Palaja karrpuja 7-ja, yarrana yakurr marnalu kurlukukuku. Ngarrakuny yana, munu kulpama. Yirrirni jungka.

<sup>13</sup> Noah 601 partunurrangujartiny, wirlarra1-ja, karrpu 1-ja, ngapa yana, jungka punarra jarrinyikinyi.

<sup>14</sup> Palaja Noah yamanapinti boat-mili yinyji pirni, parrjarn-parrjarna. Jungka yijalu punarra jarrinyikinyi, kararr waninyi jungka.

<sup>15-17</sup> Palaja Noah-nga wurrarnalu Ngarrkalu, "Katukalkulinyurru, kuwiyyirrangua wirrujartintyarrangupakatu jilkulinyurrujaninyi. Jirrja jarrinyaku jana, kurrngal jarrinyaku ngunarrijirringi."

**18-19** Palaja katukarnayi boat-ja Noah-pa palinymili mirtawapa partanykarrangupa ngarrayarrangupa, nganin-nganin kuwiyirrangupa wirru-jartinyarrangu.

***NGARRKA YINYALI KUWIYIPA WIRRUJARTINYARRANGU NOAH-LU (8:20-22)***

**20** Warnkurrangu wuru jirnijaninyi Noah-lu. Kujarraapa waraja manajaninyi “clean” kuwiyirrangupu jarnturrangupu kujarraapa waraja “clean” wirrujartinyarrangu jarnturrangupu, Ngarrkanga yinganyaku. Wirlaranajaninyi, warnkunga wurunga kankarni winyjapa majangu kam-parnajaninyi tikirlkartijakurl, jurnpakartijakurl. Palajun jirnikinyayi walangkarrangu, Ngarrka pikaly jinaku.

**21** Puntaju Ngarrkalu wurrarnarninyi yija, “Marrngurrangulu kurlu jirnikinyiyi yija. Palajalu kurlu jirnirni warrarnku wakanyku. Munu yarrana palajun jilamarna. Marrngurranguku miranu ngaju. Partany waninyaja kurlujartinyngarrjakun jirnaku kurrngarnakinyiyarningu. Munu yarrana marlkarri wirlalamarnajaninyi marrngurrangupu kuwiyirrangupu wiyyir yija, marrngurrangulu kurlu jinaja. Warajamalja jirnirni. Munu yarranakanu.

**22** Kuwarringa yurragapa partunu yajalkulinypularninyi, karrpupa warrukarti yajalkulinypularninyi, parrpakarraapa wararri yajalkulinypularninyi. Palajunngarra jarrulupiyi ngarrakuny.”

## 9

***NGARRKALU TARN-TARN MUWARR YINYALU NOAH (9:1-19)***

**1** Noah-ngapa partanykarrangungu ngalypalu muwarr pirnijanaku Ngarrkalu. “Partanykarrangu kurrngal kangkulinyurru. Ngunarrijirringi wantulupiyi.

**2** Kuwiyirranguku wiyyirku nyampali wantulinyurru, wirnti wantulupiyi nyurraju kuwiyipa wirrujartinya marnti yananyakatapa janpamalu.

**3** Kuwarri yinganyarnanyurrinyi ngananyaku jana wiyyirr, janpamalupa kuwiyirrangupu wirrujartinyarrangu. Purlpi mayijakun nganinyikinyinyurru. Kuwarringi kuwiyi pukurl ngalkulinyurru.

**4** Pijirri munu ngananyaku nyurralu. Kuwiyi ngananyarrulinyurru, pijirri yakarnarrulinyurra ngananyawayi.

**5-7** Marlkarri wirlanaku marrnguku munu. Ngalypaku wantayi marrngukarra. Marrngurrangupu ngajukapali jinarnajaninyi. Palajalu munu marlkarri wirlalinyurrulu marrngu. Nganurtulu marlkarri wirlanaja marrngu, palinyngarra marlkarri wirlalkuliny nyurralu puntaju. Kuwiylupa marlkarri wirlanaja marrngu, puntaju marlkarri wirlalkuliny nyurralu.”

**8-10** Muwarr wurrarnajanaku yarrana Ngarrkalu, Noah-ngapa palinymili partanykarrangungupu. “Nyungu muwarr yinganyarnanyurrinyi, nyurrapa, nyurramilirrangupu, kuwiyirrangupu, wiyyirku jungkangaku.

**11** Nyungujalu muwarrjalu ngajumilijalu munu marlkarri wirlalamarnajaninyi marrngurrangupu kuwiyirrangupu nganin-nganin mangkurtulu.

**12** Nyungujajakurl, jipi wantulinypa. Muwarr kuwarri yinganyarnanyurrinyi,

**13** ngurnungu wirrirnirni ngajumili rayinpuwu mujungungu.

**14-17** Ngakarnarrulumarna nyurraju mujungurrangupu ngapajartiny, palanga rayinpuwu ngajumili wirrilamarna mujungungu. Yija yirrlamarna pala. Yirrinaja, yija kurlka jarrulumarna muwarr nyarra ngajulu

wurrarnarna. Pala rayinpuwu mujungunga kurlkali marnapinti muwarrku ngajumilaku nyarraku. Pala tarn-tarn muwarr ngajumili nyurrakupa kuwiyyirrangukupa, jungkangaku wakanyku. Munu wiyyirr marlkarri wirlalamarnajaninyi mangurtulu. Palajjakunngarra wantulinypa.”

<sup>18-19</sup> Palarrangu Noah-mili partanykarrangu, Shem-pa Ham-pa Japheth, boat-ja milpanyayi. (Ham-ngarra japartu Canaan-ku.) Partany kanyayi-janinyi kurrrgal. Nganyjurru kuwarri palajarrangu wiyyirr milpanyinyi.

### *NOAH KARIJA JARRINYI (9:20-21)*

<sup>20</sup> Mangkurtuja wirtujinaja Noah jungka karli-karlinskyikinyi, vineyard wirrirni, grapes-ku.

<sup>21</sup> Grapes-ja wayin yarni marna. Karrpu warajanga, wayin minpinaja, karija jarrinyi. Kalikungu karta karrinyi, kurta.

### *HAM-JU KURLU JIRNI (9:22-23)*

<sup>22</sup> Ham, Canaan-mili japartu, yirrirni japatumarniny Noah kurta waninyi. Kaliku jalakarti yana, marrkajirringi wurrarnapulaku.

<sup>23</sup> Palaja Shem-pa Japheth ngapi manapulu, ngurriny manapulu, ngurntinga kanka kanyapulu, purl-purl marnti yanapulu, japatumarniny wartu jirnipulu. Palajunju jinaja warinykartu parrjarnapulu, japartu kurta yirrinangamarra.

### *YUMPU CANAAN-JA WIRRINALA NOAH-LU (9:24-29)*

<sup>24</sup> Kananakanu karijaja Noah miranu jarrinyi palaku, palajun jirni nyirtingunyalu palinymilalu Ham-ju.

<sup>25</sup> Palaja yumpu wIRRINALA Canaan-ja, Ham-mili partany.  
“Canaan-ku yumpu jarrulkuliny.

Warrkamukatapirrayi wantujanakuli mamajirranguku.”

<sup>26-27</sup> Palaja wurrarna Noah,  
“Ngarrka nyurra malayili marrngurrangulu,  
Nyampali Shem-ku,  
wantulali warrkamukata palinymili Canaan!  
Ngarrkalu warrarn Japheth-mili jirrali!  
Japheth-pa Shem nganiwarralpirtijartiny  
jarrupululu,  
Shem-ku warrkamukata jarrulula!”

<sup>28</sup> Mangkurtuja wirtujinaja Noah 350 partunurrangungu waninyi.

<sup>29</sup> Partunurrangu 950 waninyi, palaja marlkarri jarrinyi.

## 10

<sup>1</sup> Noah-mili partanykarrangu kujarrapa waraja, (malyurta) Shem-pa (nyirtingunya) Ham-pa (murrkanguny) Japheth. Mangkurtuja wirtujinaku partanyarrangu turlpanyayijanaku.

### *JAPHETH-MILI NYIRRIRNIKARTIJARRANGU (10:1-5)*

<sup>2</sup> Japheth-mili partanykarrangu: Gomer, Magog, Madai, Javan, Tubal, Meshech, Tiras.

<sup>3</sup> Gomer-mili partanykarrangu: Ashkenaz, Riphath, Togarmah.

<sup>4</sup> Javan-mili partanykarrangu: Elishah, Tarshish, Kittim, Rodanim.

<sup>5</sup> Nyirrirnikartijarrangu janamili kujungurruwarrangu, boat-ku yarni-yarnirrang. Jirrja yanayi warrarnarrangukarti. Warajapa waraja warrarn walja ngurrju marnayi, muwarr walja muwarr pinayi.

### *HAM-MILI NYIRRIRNIKARTIJARRANGU (10:6-20)*

- <sup>6</sup> Ham-mili partanykarrangu: Cush, Egypt, Put, Canaan.  
<sup>7</sup> Cush-mili partanykarrangu: Seba, Havilah, Sabtah, Raamah, Sabteca. Raamah-mili partanykarrangu: Sheba, Dedan.  
<sup>8</sup> Cush japartu jarrinyi Nimrod-ku. Nyarra Nimrod nyampalikata jarra-jarrinyi, kamparta, juji-jujirnikinyi Ngarrka. [His name means "Let us revolt!"]  
<sup>9</sup> Kuwiylimartapa yija paliny. Yarti wurrarnikinyiyalu palinyku, "Nyungu pirirri Nimrod-kapali, kuwiylimarta yija, Ngarrka juji-jujinakata."  
<sup>10</sup> King jinarninyi warrarnja Babylonia. Palanga warrarn nyungurrangu cities: Babel, Erech, Akkad, Calneh.  
<sup>11</sup> Palaja warrarn jirrarnarningu Assyria-karti. Yarni marna cities, ngapirrangu, Nineveh, Reheboth-Ir, Calah,  
<sup>12</sup> Resen. (City wirtu yiji pala, partijirri Nineveh-pa Calah).  
<sup>13-14</sup> Egypt-mili partanykarrangu: Lud, Anam, Lehab, Naphtu, Pathrus, Casluh, Caphtar. (Palarrangu Philistines Casluh-mili nyirrirnikartijarrangu.)  
<sup>15-18</sup> Canaan japartu Sidon-ku, murrkangunya palinymili, Heth pukun. (Pala Sidon japartu jarrinyijanaku Sidonians-ku.) Nungujajirri Canaan-mili nyirrirnikartijarrangu: Jebus, Amor, Girgash, Hivi, Arki, Sini, Arvad, Zemar, Hamath. Yarti nyungurrangu wiyyirr jirrja yanayi:::  
<sup>19</sup> janamili warrarnarrangu Sidon-ja Gerar-karti [but not as far as] Gaza-kartijakun. Ngurnunguja kakarrakurti Sodom-kartipa Gomorrah-pa Admah-pa Zeboiim, Lasha-martaji.  
<sup>20</sup> Nyarrarrangu Ham-mili nyirrirnikartijarrangu, waraja-waraja clan-jartiny walja, warrarnjartiny walja, muwarrjartiny walja.

### ***SHEM-MILI NYIRRIRNIKARTIJARRANGU (10:21-31)***

- <sup>21</sup> Shem japartu jarrinyijanaku partany piririmarta pukun. Shem japartu wiyyirku marrngurranguku warrarnja Eber-nga waninyiyi.  
<sup>22</sup> Shem-mili partanykarrangu: Elam, Asshur, Arphaxad, Lud, Aram.  
<sup>23</sup> Aram-mili partanykarrangu: Uz, Hul, Gether, Meshech.  
<sup>24</sup> Arphaxad japartu Shelah-ku. Shelah japartu Eber-ku.  
<sup>25</sup> Kujarra partany pirirri ngayarta jarrinyipulu Eber-ku. Waraja yini Peleg. Nyarra waninyaja marrngurrangu jirrja yanayi. [Separated, a reference to the confusing of the language at Babel.] Peleg-mili marrka Joktan.  
<sup>26</sup> Joktan-mili partanykarrangu: Almodad, Sheleph, Hazarmaveth, Jerah,  
<sup>27</sup> Hadoram, Uzal, Diklah,  
<sup>28</sup> Obal, Abimael, Sheba,  
<sup>29</sup> Ophir, Havilah, Jobab. Nyarrarrangu wiyyirr Joktan-ja.  
<sup>30</sup> Warrarnarrangu janamili Mesha-ja Sephar-karti, warnkumarraramarranga kakarrakurtinga.  
<sup>31</sup> Nyarrarrangu Shem-mili nyirrirnikartijarrangu, waraja-waraja family-nga waljanga, warrarnja waljanga, muwarr pirnikinyi muwarr janamili walja ["identified by their clans and languages, in their territories and nations."].  
<sup>32</sup> Nyarrarrangu clans Noah-milirranguja piririmartarranguja, palajun ["arranged by nations according to their lines of descent"].

<sup>1</sup> Palaja punja waraja muwarr ngarrany muwarr pirnikinyiyi marrngurrangulu.

<sup>2</sup> Kakarrakurnu yana-yananyikinyayi. Parlkarranga wirtungu turlpanayyi, kakarrakurnungu. Yini pala warrarn Babylonia.

<sup>3-4</sup> Muwarr pirnayarningu, "Munu jirrja yankuluminyi, ngunarrikur-nujirri. Kunmu wantuluminyi. Nyungungungarra wantuluminyi, ngatu. Ngurra wirtu yarni malaminya, warnkukapali pukurl wirtu yarni malaminyi, nganimarta yiji, kankakurnu, parlparrkartijakun. Wiyirruji ntarrangulu nganyjurru wurrapiyinganyjurrinyi. Wurrapiyi, 'Ngur-nungurrangu marrngurrangu Babylonia-nga, yalyjirr waninyayi, miranu yiji jana.' "

Parla maninyikinyiya, purikarrangu jirnikinyiya, kamparnakinyiyi wikanga kararr jinaku, kurrgal yarni marnakinyiyi yija. Kulurnu mantarnakinyayaninyi bitumen-ju. Yarni marnayi, yarni marnayi.

<sup>5-6</sup> Ngarrkangarra milpanya pala city-pa tower-ku yirrinaku. Miranu waninyikinyajanaku. Wurrarna palinyju, "Kunmu waninyayi, warajakun muwarrjartiny. Palajalu nyungungarra jirniyi. Yarti nganiwar-ralpirtiku karrinyayi, pala jilkulupiyi. Yarranakanu jiti kurlu jiliyili.

<sup>7</sup> Yuu, palangamarra katukalkunya, nyunypaly jilaminyajanaku muwarr, warinypa wariny muwarr pilipiyi. Palaja munu kurlkapirli wantulupi-yarningu."

<sup>8</sup> Palaja jirni Ngarrkalu. Nyunypaly jirni muwarr janamili. Wiyirr jirrja jirnajaninyi ngunarrijirri. Munu yarranakanu yarni marnamiyi ngurra wirtujina janamili, warnkukapalipa wirtujina yija. Yakarnayi kuta ngarrany, kakuputu yakarniya.

<sup>9</sup> Yini pala ngurra "Babel". Pala muwarr "Babel" wurraninyi, "Kakurnayarningu Muwarr Yajarri." Ngurnjurn-ngurnjurnayarningu muwarrku.

### ***SHEM-MILI PARTANY ARPACHSHAD NYIRRIRNIKARTIJARRANGU KANYAJANINYI (11:10-26)***

<sup>10</sup> Nyungurrangu nyirrirnikartijarrangu Shem-mili Arpachshad-ja. Mangkurtu jarryaya kujarra partunujirrija, Shem 100 partunurrangujartiny, japartu jarryyi pirirriku partanyku, yini marna Arpachshad.

<sup>11</sup> Palaja Shem wanka jarryikinyi 500 partunurrangu, partanykarrangu pirirripa mirtawa kanyajaninyi.

<sup>12</sup> Arpachshad 35 partunurrangujartiny jarryaya, partany pirirri kanya, Shelah.

<sup>13</sup> Palaja Arpachshad wanka jarryikinyi 403 partunurrangu, partanykarrangu pirirripa mirtawa kanyajaninyi.

<sup>14</sup> Shelah 30 partunurrangujartiny jarryaya, partany pirirri kanya, Eber.

<sup>15</sup> Palaja Arpachshad wanka jarryikinyi 403 partunurrangu, partanykarrangu pirirripa mirtawa kanyajaninyi.

<sup>16</sup> Eber 34 partunurrangujartiny jarryaya, partany pirirri kanya, Peleg.

<sup>17</sup> Palaja Eber wanka jarryikinyi 430 partunurrangu, partanykarrangu pirirripa mirtawa kanyajaninyi.

<sup>18</sup> Peleg 30 partunurrangujartiny jarryaya, partany pirirri kanya, Reu.

<sup>19</sup> Palaja Peleg wanka jarryikinyi 209 partunurrangu, partanykarrangu pirirripa mirtawa kanyajaninyi.

<sup>20</sup> Reu 32 partunurrangujartiny jarryaya, partany pirirri kanya, Serug.

<sup>21</sup> Palaja Reu wanka jarryikinyi 207 partunurrangu, partanykarrangu pirirripa mirtawa kanyajaninyi.

<sup>22</sup> Serug 30 partunurrangujartiny jarrinya, partany pirirri kanya, Nahor.

<sup>23</sup> Palaja Serug wanka jarryikinyi 200 partunurrangu, partanykarrangu pirirripa mirtawa kanyajaninyi.

<sup>24</sup> Nahor 29 partunurrangujartiny jarrinya, partany pirirri kanya, Terah.

<sup>25</sup> Palaja Nahor wanka jarryikinyi 119 partunurrangu, partanykarrangu pirirripa mirtawa kanyajaninyi.

<sup>26</sup> Terah 70 partunurrangu jarryi, palaja japartu jarryi Abram-kupa Nahor-pa Haran.

#### *TERAH, ABRAM-MILI JAPARTU (11:27-32)*

<sup>27-28</sup> Punjaja nyarraja mangkurtuja wirtuja pirirri turlpanya, yini paliny Terah. Ngurrara paliny warrarnja Chaldea-nga. Tawunja waninyikinyi, yiningi Ur-unga. Paliny partanykarrangujartiny kujarrapa waraja, yini Nahor-pa Abram-pa Haran. (Nyarra Haran partanykarrangujartiny, partany yini Lot, kurntaljirri yinijirri Milcah-pa Ishcah.) Wankanyungu Terah-nga, Haran marlkarri jarryi, palinymilingi warrarnja, palanga tawunja Ur-unga.

<sup>29</sup> Warajanga jarryipulu Nahor-pa Haran-mili kurntal, Milcah. Warajanga jarryipulu Abram-pa Sarai, nyungujirri. [??Translation Team to decide.]

<sup>30</sup> Sarai-lu munu partany kangama, partanymajirri waninyikinyi.

<sup>31</sup> Palaja Terah-lu yakarna pala tawun. Kanyajaninyi palinymili partany, Abram, palinymili ngarraya, Sarai, palinymili karluji, Lot, janjakun. Karakurnu yananyikinyiyi warrarnkartu warinykartu, Canaan-karti. Partijirri kajarnayi, tawunja yiningi Haran-ja. Palamanga ngatu waninyiyi punja.

<sup>32</sup> Palamangangarra marlkarri jarryi Terah, Haran-ja. Ranyji yija-yiji paliny, partunurrangujartiny kurrngaljartiny, 205-jartiny.

## 12

#### *ABRAM-KU MUWARR PIRNALU NGARRKALU (12:1-3)*

<sup>1</sup> Purlpi Ngarrkalu wurrarnili Abram-ja, "Yakalaman warrarn nyuntu-mili, yakalamanjaninyi jarntu marrngurrangu, yakalaman ngurra japatu-mili. Warrarnkartu warinykartu yankuluman, jurti jilamarnangu, nyuntu palanga turlpanyajalu wurralamarnangu, 'Nyungungarra nyarra warrarn.'

<sup>2</sup> Yungkulumarnanta jamuji karlujirrangupa kurrngal yiji jarrulupiyi, nyirrirnikartijarrangu pukun. Nyuntu wirtu nyampali jilamarnanta, ngalypa yiji jilamarnangu.

<sup>3</sup> Jintalupa ngalypa jilipiyingu, puntaju ngalypa jilamarnajanaku ngajulu. Jintalupa kurlu jilapiyingu, puntaju kurlu pilamarnajanaku ngajulu. Nyuntumilirranguja ngalypa jilamarnajanaka wiyyirku marrngurranguku, wiyyirra ngunarrijirri warinyja warrarnjarrangu."

#### *CANAAN-KARTI YANA ABRAM (12:4-9)*

<sup>4-5</sup> Palaja Abram yana, Ngarrkamilija muwarrja. Palanga mirtanya paliny, partunurrangujartiny 75-jartiny. Kanyajaninyi mirtawa palinymili, Sarai, palinymili marrkamili partany pukun, Lot, kanyajaninyi kuwiyirran-gupa wurukarra palinymili. Marrngurrangu pukun kanyajaninyi, wiyyirr warrkamukatarrangu palinymili, ngurrju marnajaninyi palanga tawunja, Haranja. Yakarnaya Haran, yananyikinyiyi kurilakurnu, warrarnkartu

Canaan-karti. Ngurrarrangu ngurra yananyikinyiyi. Kajarniyi palanga, warrarnja Canaan-ja.

<sup>6</sup> Yaninyikinyiyi. Partijirri Canaan-ja ngarrany karta karrinyiyi wirtungu mungkamartaji, yarta jirniya ngapingi, palamartaji mungkamartaji yini Moreh. Tawunmartaji Shechem-martaji mungka pala. (Palanga ngarrany kajarniyijanaku palanga warrarnja Canaan-ja ngurrararrangu.) [??Translation Team to decide.]

<sup>7</sup> Palaja Abram-ku miral jarrinyalu Ngarrka, wurrarnili, "Nyungungarra warrarn yungkulumarnajaninyi jamuji karlujirrangu nyuntumili." Palajalu palanga warnkurrangu kuru marna Abram-ju, wuru jirni. Palanga ngarluja nyurra marna Ngarrka.

<sup>8</sup> Palaja yanayi kurilakurnu, warnkumarramarrakarti, kakarra ngapija, Bethel-ja. Ngurra yarta jirniyi partijirri Bethel-japa Ai-ngi, palanga kaliku janamili yarni marnayi. Yarrana warnkurrangu kuru marna, wuru jirni, palanga ngarluja nyurra marna Ngarrka.

<sup>9</sup> Palaja kurilakurnu yananyikinyiyi, ngurrarrangu ngurra, yananyikinyiyi pirrakarti.

#### *ABRAM EGYPT-KARTI YANA (12:10-20)*

<sup>10</sup> Palaja pala warrarn punarra jarrinyi, ngapamajirripa mayimajirri. Kurluny-kurlunyja waninyikinyiyi Abram-pa palinymilirrangku kuwiyr-rangu. Palaja Abram-jupa palinymilirrangulu yakarniyi pala warrarn, karakurnu yanayi palakarti warrarnkartu, ngapikarti, Egypt-karti, ngurraku yarta jinaku palanga. [??Translation Team to decide.]

<sup>11</sup> Yananyajalu Abram-ju wurrarnili mirtawanga palinymilingi, "Nyuntu ngumpa ngalypa.

<sup>12</sup> Ngurnungurrangulu piririmartalu Egypt-ja parrjanajalu, nyuntuku karrulupiyingu. Yijapa wurralapiyarningu, 'Pala mirtawa palinymili. Pirirri wirlalkunyalu, mirtawa wankanyu kalkuluminyi.'

<sup>13</sup> Palangamarra wurralamanjanaku, 'Nyungu mamaji ngajumili.' Palajun jinajalu, munu wirlalaminyiyi, ngalypalu parrjana wirrilaminyiyi.'

<sup>14</sup> Palanga warrarnja kajarnapulu, Egypt-ja. Ngurrararrangulu Sarai yirrirniyi. Wurrarnikinyiyi, "Pala mirtawa ngumpa ngalypa."

<sup>15</sup> Warinyarrangulu wirtulu parrjarnikinyiyi paliny, nyampalingi wirtungu janamilingi wurrarniyili, "Payi! Pala mirtawa, marrka Abram-umili, yija-yiji ngumpa ngalypa." Nyampalilu karra marnajanaku, "Pala mirtawa ngajuku kangkulupijinyurru." Kanyayalu Sarai nyampalikarti.

<sup>16</sup> Puntaju Abram yinyala nyampalilu kurrgal kukurnjaripa purlikapa tangkipa kamal, marrngurrangu warrkamukatarrangu, piririmartapa mirtawanyjarri.

<sup>17</sup> Sarai waninyikinyi wirtungu nyampalimilingi ngurranga. Palajunjalu Ngarrkalu nyampalipa wurrku jirnijaninyi palinymilirrangku. Wurrku wirtu yija jarrinyiyi.

<sup>18</sup> Palaja nyampalilu muwarr ngakarnalu Abram-ku, "Kurtali." Warnta marna, "Kurlu jirnijin, nyuntulu! Mitu marnanyin, nyungu mirtawa nyuntumili. [??Translation Team to decide.]

<sup>19</sup> Nganijalu muwarr pirnin, 'Marrka ngajuku'? Nyuntumilia muwarraja kanyarna mirtawaku. Nyungungarra mirtawa nyuntumili. Kawa! Jipi yarrapulu ngarrakuny!" [??]

<sup>20</sup> Wurrarnajanaku piririmartanga palinymilingi jurtu ngakalapiyi Abram. [?? Translation Team to decide.]

## 13

### *ABRAM KULPANYA BETHEL-KARTI (13:1-7)*

- <sup>1</sup> Palaja Abram-ju yakarna Egypt, pirrakarti warrarnkarti Canaan-karti kulpanyi. Kanya palinymili mirtawapa palinymili marrkamurninymili partany, Lot, kanyajaninyi warrkamukatarrangupa wurrukarra wiyirr.
- <sup>2</sup> Palanga Abram currngaljartiny yija-yiji kuwiyyirrangujartiny, kukunjari, nanikutu, purlika, tangki, kamal, miji-mijipa warnku, ngani waralpirti.

<sup>3</sup> Ngurrarrangu ngurra yaninyikinyiyi, kulpanyiyi nyarrakarti ngurrakarti Bethel-martaji.

<sup>4</sup> Palangangarra purlpilu Abram-ju kuru marna warnkurrangu, muwarrpirnikinyalu Ngarrkaku. Kulpanyajalu yarrana ngarluja yiji nyurra marna Ngarrka.

<sup>5</sup> Lot pukun palanga waninyikinyi, kuwiyyirrangupa warrkamukatarrangu, currngaljartiny paliny. (Palanga jinta ngurrararrangu pukun nyarranga warrarnja waninyikinyiyi, Canaan-milirrangupa Periz-milirrang.) [Translation Team to decide: should we use "Canaan-mili" or "Canaanite-mili" ??]

<sup>6</sup> Kuwiyyirrangup munuyiji palanga warrarnja. Abram-milalu warrkamukatarrangulupa Lot-milalu warrkamukatarrangulu partarl warrulyku kanyjirnikinyiyi kuwiyyirranguku.

<sup>7</sup> Palajalu pulnymilalu warrkamukatarrangulu kulilu yirrirnikinyiyarninyi.

### *JINTA PIRNIPULARNYI ABRAM-PA LOT (13:8-18)*

<sup>8</sup> Abram-ju wurrarnili Lot-ja, "Ngali waljajirri. Kulimajirri wantuli, kulimajirri wantulupiyi ngajumilipa nyuntumili warrkamukatarrangu.

<sup>9</sup> Nyungu warrarn wirtu. Jinta pilkularninyi. Ngurrju malaman warrarn nyuntumili. Mankuluman nyuntulu palaji warrarn, ngaju yankulumarna warinykurnu."

<sup>10</sup> Lot-ju parrjarn-parrjarna warrarn kakarrakurnu, yirrirni parlkarra pijumartaji, yini pala piju Jordan. Pala warrarn ngalypa yiji, ngapa wirtujartiny, Zoar-kartijakun, Ngarrkamilikapali Garden-kapali, warrarnkapali Egypt-kapali. Palanga parlkarranga waninyikinyipulu tawunjirri, ngapi-jirri, Sodom-pa Gomorrah.

<sup>11</sup> Ngurrju marna palangarra warrarn Lot-ju, kakarrakurnu yana. Palajun jinta pirnipularnyi Abram-pa Lot.

<sup>12</sup> Abram Canaan-ja warrarnja waninyikinyi, Lot-ju parlkarranga ngurra jirni nyarrajirri tawunmartajirri, wangka Sodom-martaji ngurra jirni.

<sup>13</sup> Palarrangu marrngurrangu Sodom-ja panypanyikinyiyili Ngarrkanga. Yija-yiji kurlujartinyarrangu jana. (Yarti Ngarrkalu wirlarnapulinyi palajirri yintajirri, Sodom-pa Gomorrah.)

### *ABRAM HEBRON-KARTI YANA, NGARRKALU WURRARNILI (12:14-18)*

<sup>14</sup> Palaja Abram-aja wurrarnili Ngarrkalu, "Nyunguja parrjalaman wiyyirr ngunarrijirri, yalinyjakurnupa, kurilakurnu, kakarrakurnupa karakurnu.

<sup>15</sup> Nyungu warrarn wakany yungkulumarnanta, nyuntukupa nyuntumilirranguku jamuji karlujjirrangukupa nyirrirnikartijarranguku, ngaramarnti.

<sup>16</sup> Kalkulumarnajanaku, currngal yiji jarrulupiyi. Nyuntumilirrangup partarl yinipa wirrilipiyijaninyi jintalu.

<sup>17</sup> Jipi yanka-yankuluman nyungungu warrarnja, parrjalaman. Wiyirr nyuntumilingarra. Yungkulumarnarnta ngajulu." Palajun wurrarnili Abram-ja.

<sup>18</sup> Palaja Abram-ju yakarna pala ngurra, warinykartu ngurrakarti yana, mungkarrangungu Mamre-nga waninyikinyi, tawunmartaji, Hebron-martaji. Yarrana wuru jirni warnkurrangu, ngarluja nyurra marna Ngarrka.

## 14

### *4 KINGIRRANGUPA KULIPATIRNAYIYARNINYI 5 KINGIRRANGU (14:1-12)*

<sup>1-4</sup> Palaja 4 kings, marrngurrangu kakarnija, ngajarriirrangu, kunmu jarrinyiyi, milpanyiyi wirlanaku Sodom-martajku ngurrararranguku. Yini janamili King Amraphel Babylonia-ja, King Arioch Ellasar-ja, King Chedorlaomer Elam-uja, King Tidal Goiim-uja. Nyarra King Chedorlaomer-lu purlpi nyampali jinarninyi janaku marrngurranguku Sodom-kurtirrirrangu. Jakurlirnijaninyi kulilu yinganyaku warnkuku wirtuku. Palarrangulu Sodom-kurtirrirrangu warnku yinganyikinyiyalu punja, 12 partunurrangu. Yartikarra karra marnayarningu, "Kuwar-ringulu munu yungkuluminya warnku Chedorlaomer, jamiliminyi. Munu pinakarruluminyalu."

<sup>5</sup> Palajalu King Chedorlaomer Elam-uja nyampalipa warinyarrangu kingirrangu kakarnija kunmu jirniyijaninyi piririmarta kulikatarrangu janamili. Palaja yanayi palarrangu wiyyirr kulipartinaku Sodom-kurtirriku ngurrararranguku. Kurilakurnu yananyikinyiyi, Sodom karrkarnayi, pala kara waninyi janaku. Wirlarnayijaninyi Rephaim Ashteroth-Karnayimunga, Zuzim Ham-unga, Emim parlkarranga Kiriataim-unga,

<sup>6</sup> Horites warnkumarramarranga Edom-unga. Purrja pirniyijaninyi Elparan-kartijkun, pirrakartijkun.

<sup>7</sup> Palaja warlirniyi, turlpanyayi Kadesh-karti. (Purlpi pala Kadesh-mili yini Enmishpat.) Wirlarnayi warrarn wakany Amalekite-mili, wirlarnayi Amorites Hazazon Tamar-nga. Yartikarra kurningumarra milpanyiyi Sodom-karti.

<sup>8-9</sup> Palaja kingirrangu nyarra tawunjarrangu, ngapija, Sodom-ja, Gomorrah-ja, Admah-ja, Zeboiim-uja, Bela-ja, palarrangulu 5 kingirrangu kunmu jirniyijaninyi kulikatarrangu janamili, jantujartiny. Purrpi yanayijanaku palarrangu 4 kingirrangu kakarnijarrangukarti.

<sup>10</sup> Kulipartirnayarninyi Siddim Valley-nga, Dead Sea-martaji, warrarn-ja mawurla-mawurlanga. Partijirringa martuwaringi pirtirrangku kurrngal, ngapijartiny, bitumen-jartiny. Sodom-japa Gomorrah-ja kingijirri kulingimarra mirti jarrinyaya, pirtirrangungu pungkanyiyi. Jinta 3 kingirrangu warnkumarramarrakarti mirti jarrinyiyi.

<sup>11</sup> Palaja palarrangulu 4 kingirrangu kakarnijarrangulu wiyyirr mayipa wurrukarra kanyayarningu Sodom-japa Gomorrah-ja.

<sup>12</sup> Nyarra Lot, Abram-mili marrkamili partany, Sodom-ja wanikinyi. Kanyayi Lot-pa kanyayi Lot-mili wurrukarra wiyyirr pukun. Jinta marrngurrangu pukun kanyayijaninyi. Yakarniyi yananyaku janamilikartiku warrarnkartiku.

*ABRAHAM-JU WIRLARNAJANINYI KAKARNIJARRANGU, KULPANYA MANAJANINYI LOT-PA JINTA (14:13-16)*

<sup>13</sup> Palangangarra Abram waninyikinyi mungkamartaji Mamre-milimartaji. Mamre-pa palinymili marrkajirri, Eshcol-pa Aner, jana jarntu Abram-uku. Waraja pirirri kulipartinaja mirti jarrinyi, milpanyalu Abram-karti, wurrarnili, "Palarrangulu kulikatarrangulu kakarnijarrangulu kanyayi pujamu nyuntumili, paliny jananga kanyayi."

<sup>14</sup> Pala muwarr pinakarrinyajalu Abram-ju kunmu jirnijaninyi piririmarta kulikata palinymilirrangu. Palarrangu 318 yanayi Abram-ja. Yajarniyijaninyi palarrangu kakarnijarrangulu. Mamre-pa Eshcol-pa Aner pukurl yanayi. Nyirrirnilu yajarnakinyiyijaninyi, kaja yalinyjikurnu yanayi, palakarti warrarnkartijakun, Dan-kartijakun.

<sup>15</sup> Warrukartingi Abram-ju jinta pirnijaninyi piririmarta palinymili, jirrja jirnijaninyi. Palangangarra kakarnijarrangulu marrjalu wirlarniyijaninyi, mirtingi jirnijaninyi ngaramarnti, purrja pirniyijaninyi yalinyjikurnu warrarnkartu warinykarti, Hobah-kartijakun, yalinyjikurnu ngapi, Damascus-ja.

<sup>16</sup> Palaja Abram-milalu Sodom-japa Gomorrah-ja ngurraramili wurrukarra wiyyir kulpanya manayijaninyi, Lot-pa wurrukarra palinymili, mirtawarrangupa jinta jinmurntuja pukun wiyyir. Palaja kulpaniyi wiyyir kurilakurnu.

#### *ABRAHAM-JU KUWIYIRRANGUPA WURRUPA YINYALU MELCHIZEDEK-JA (14:17-24)*

<sup>17</sup> Abram ngurrakarti jampa kulpanikinyi, nyarra Sodom kingi purrpi yana, parlkarranga partijirri kaniny mawurlangarrangulu, yiningi Shaveh Valley (wariny yini King's Valley.)

<sup>18</sup> Pirirri wariny, yini Melchizedek, paliny pukun palanga milpanyalu, Abram-ku kanyalu karlu-karlupa wayin. Nyarra Melchizedek nyampali pala tawunku, Salem-ku. Purlpija paliny pukun yatil waninyikinyi Ngarrkaku, palaku Kankajirri Nyampaliku.

<sup>19-20</sup> Nyungulu yatilju Melchizedek-ju wurrarnala Abram-ja, "Miranu nyuntu Ngarraku. Kankajirri Nyampali paliny. Parlparpa jungkapa kujungurrupa wiyyir pukun jirnijaninyi palinyjungarra. Japirr marnarna Ngarrka ngalypa jilkulumanga. Nyurra malkunyi Ngarrka, Kankajirri Nyampali. Palinyu kartuwarra marnanta, nyuntuku kulikata kakarnijarrangulu wirlarnajaninyi ngaramarnti."

Palaja Abram-ju wurrukarraja kulpanya jinaja yinyali. 10-ja purlikarranguja yinyali waraja, 10-ja kukurnjarirranguja yinyali waraja, palajun kuwiyirrangupa wurrupa yinyala Melchizedek.

<sup>21</sup> Palalu Sodom-ju kingili wurrarnili Abram-ja, "Wurru kulpanya jinajarrangulu kalkulumamanparningu. Ngajumili marrngurrangukujakun karrinya."

<sup>22-23</sup> Puntaju karra marnalu Abram-ju, "Munu kalkulumarnangu wurrukarra nyuntumili, munu yiji. Ngarrka nyampali wiyyirku, palinyjungarra wiyyir jirnijaninyi, parlparpa jungkapa kujungurru pukun. Purlpi wurrarnarnalu Ngarrkanga munu kalkulumarnangu wurrukarra nyuntumili, munu wupartupa wara. Nyuntulu wurralanpili, 'Ngajulu yija yinyarnalu Abram wurrukarra palinymili wiyyir.'

<sup>24</sup> Palajun wurralanpili. Palangamarra munu kangkulamarnangu wurrukarra. Puru mayjakun kalkulamarnanaku wangalanguku ngajumilaku. Nyungurrangulu jinta pukun kanyarnajaninyipa ngajungu, Aner-pa Eshcol-pa Mamre. Yuwajaninyi wurrukarra palarrangu piririmarta."

# 15

## *ABRAM-JA MIRAL JARRINYILI NGARRKA (15:1-21)*

<sup>1</sup> Palaja kapukarringi Abram-ja miral jarrynili Ngarrka. Wurrarnala, "Abram-kayi, wirntiwayi. Kalkulumarnanta ngaramarnti ngajulungarra. Yijalu wurrukarra wirtu yungkulumarnanta."

<sup>2</sup> Abram-ju puntaju karra marnalu, "Nyuntukurra nyampali wiyyirku. Nganijalu yungkuliminyin wurrukarra wiyyir nyuntulu? Yirrku partany-majirri waninyarna. Marlkarri waninyaja ngaju, warrkamukatalu ngajumilalu, Eliezer-lu, Damascus-jirrilu, palinyungarra mankuliny wurrukarra ngajumili.

<sup>3</sup> Munu yingamanyin partany. Ngajumili wurrukarra wiyyir mankuliny warrkamukatalu ngajumilalu."

<sup>4</sup> Puntaju wurrarnala Ngarrkalu, "Munu warrkamukata nyuntumili, munu Eliezer, munu palinyju mankuliny wurrukarra nyuntumili. Partanyju nyuntumilalu waljalungarra, palinyungarra mankuliny nyuntumili wurrukarra."

<sup>5</sup> Palaja jalakarti kayi marna Abram, wurrarnala, "Parrjala kanka, ngurnungurrangu parrjalajaninyi panikatarrangu. Kurrngal yiji. Munu yinipa wirrirnakanjaninyi, kurrngal. Nyuntumili jamuji karlujirrang waljapa nyirrirnikartijarrangu pukun kurrngal yiji jarrulupiyi. Munu yinipa wirrilamanjaninyi, kurrngal yiji." Palajun wurrarnala Ngarrkalu.

<sup>6</sup> Abram-ju pinakarrinyi, yijalu yijalmarta jirnili Ngarrkanga. Palajalungarra Ngarrka pikaly jarrynili, wurrarnarningu, "Kulimajirralu yirrilamarna Abram, wurralamarna, 'Jurtu yija paliny'."

<sup>7</sup> Yarrana Ngarrka muwarr pirnili. "Ngajulungarra purlpi wurrarnarnangu warrarnja Chaldea-nga nyuntumili ngurra yakanaku. Nyungukarti milpanyan ngajumilija muwarrja. Nyungungarra warrarn yungkulumarnanta, nyuntumili wantuliny ngaramarnti."

<sup>8</sup> Karra marnalu Abram-ju, "Ngarrkakurra, nyampali wiyyirku nyuntu. Wunyjurru miranu jarrulumarna palaku muwarrku, yija pala?"

<sup>9</sup> Puntaju Ngarrkalu wurrarnala, "Kuwiyyirrangu kangkulupijin, waraja purlika, waraja nanikutu, waraja yuramu. Kangkulupijin pukun waraja kurlukukupa waraja jarrala parl-parl."

<sup>10</sup> Palarrangu kuwiyyirrangu kanyajaninyi Abram-ju, Ngarrkamilija muwarrja. Wirlarnajaninyi wiyyirr, palaja purlikapa nanikutupa yuramu parrkarl pirnianinyi, jinta pirni. Wirrujartiny munu parrkarl pirnimapulinyi.

<sup>11</sup> Ngurlarn milpanyiyi, kajarniyi kuwiyingi. Abram-ju wirntiji pirnikiny-ijaninyi, yanayi.

<sup>12</sup> Kara ngalpanyajanga panja karta karrinyi yiji Abram. Kapukarringi kartajalu wirnti yiji turlpanyala.

<sup>13-15</sup> Wurrarnala Ngarrkalu, "Pinakarra. Ranyji jarruluman, marlkarri jarruluman warrarnja nyungungu, jungkaranga wirrilipiyinti warrarnja nyungungu. Yarti jamuji karlujirrang nyuntumili yankulupiyi warinykarti warrarnkarti. Munu janamili warrarn, ngajarrimili warrarn.

Palangangarra punja wantulupiyi, partunuku 400-ku. Nyarranga warrarnja ngurrararrangulu marrjalu warrkamuku jilipiyijaninyi, warnkuma-jirriku, puru mayikujakun. Yijalu nyuntumilirrangu punja kalkulupiyijaninyi kurluny-kurlunyja yiji. Palaja puntajulu palarrangu ngurrararrangu wirlalamarnajaninyi. Palaja nyuntumilirrangu walarni jilamanajaninyi nyungukartijakun, wurrukarra wirtu kangkulupiyi palaja warrarnja.

<sup>16</sup> Palanga warrarnja wantulupiyi 400 partunurrangu, palaja kulpulupiyi nyungukarti. Munu kuwarri yungkulumarnajaninyi nyungu warrarn. Yartiku. Kuwarringarra palarrangu ngapirrangu, Amorites, jana nyungungu waninyiyi. Nyungu janamili warrarn. Yarti kurlu jinakatarrangu jarrulupiyi, kurlu yiji. Palajangarra wirlalamarnajaninyi, yija nyungu warrarn yungkulumarnajaninyi nyuntumilirrangu.” Palajun wurrarnala Ngarrkalu.

<sup>17</sup> Karrpu kara ngalpanyajalu, warrukarti jarryajalu, ngapijirri yirrirni Abram-ju, wikipinti jungankatapa tilijartiny, partijirringi kuwiyingi kutarrangungu yananyapulu.

<sup>18</sup> Palanga minyirru wurrarnala Ngarrkalu, “Yija-yiji nyungu warrarn yungkulumarnajaninyi nyuntumilirrangu. Warrarn nyunguja ngurnarrikurnujirri yungkulumarnajaninyi, karakurnu Pijukartijakun Egypt-ja, kakarrakurnu pijukartijakun, palakarti Euphrates-kartijakun.

<sup>19-21</sup> Kuwarri nyungu warrarn jintamili marlumili. Palarrangu miralamarnajaninyi warrarnku, yungkulumarnajaninyi nyuntumili jamuji karlujirrangupa nyirrirkartijarrangu.”

## 16

### *SARAI-LU WURRARNALA ABRAM-JA “KARTA KARRULINYUMPULU NGAJUMILI MIRTAWA WARRKAMUKATAPA.” (16:1-6)*

<sup>1</sup> Palanga warrarnja, Canaan-ja, Abram 10 partunurrangu waninyikinyi. Partanymajirri ngarrany. Pala mirtawa palinymili, Sarai, munu partany kangamalu. Wariny mirtawa kalkurnikinyi Sarai-lu, warrarn warinyja, Egypt-ja, warrkamukata mirtawa Sarai-ku, yini paliny Hagar.

<sup>2</sup> Palanga Abram-ja wurrarnala Sarai-lu, “Nyupakayi, partanymajirri ngaju. Ngarrkalu jamirnanyi partanyku. Ngajumili warrkamukata mirtawa kangkuluman, mirtawaku kawa, nyumpala karta karrapulu. Yijapa partany kangkulupiji.” Puntaju, “Yuu.”

<sup>3</sup> Palaja Sarai-lu yinyali Abram pala mirtawa Hagar mirtawaku.

<sup>4</sup> Karta karrinyipulu, Hagar-pa Abram. Palaja Hagar ngarlungka jarrynyi. Palajalu raka jarrynyalu nyampalingi palinymilingi, Sarai-ngi. “Puru yiji paliny”, wurrarna Hagar-lu.

<sup>5</sup> Palaja Sarai yunturi jarrynyalu Abram-ku. “Yinyarnanta ngajumili warrkamukata mirtawa ngurranga kalkunaku. Kuwarri ngarlungka jarrynya raka jarrynyiji. Kurrparninyin nyuntulurla. Wurralamangu Ngarrkalu, ngaju yiji yija waninyirni.”

<sup>6</sup> Abram-ju karra marnalu, “Paliny nyuntumili warrkamukata, nyuntu nyampali palinyku. Nganikupa karrinyanpalu, pala jilamanpalu.”

Palaja Hagar kurluny-kurlunyja kalkurnukinyi Sarai-lu. Palajalu pirrakarti mirti jarrynyi Hagar.

### *NGARRKALU MIRAL JARRYNYILI HAGAR-NGA (16:7-16)*

<sup>7</sup> Palanga pirranga warrarnja punarranga kajarna Hagar, janukumartaji. Ngarrkalu miral jarrynyili Angel-kapali.

<sup>8</sup> Palanga wurrarnala, "Hagar-kayi, warrkamukata mirtawa nyuntu Sarai-mili. Wanyjarnija nyuntu milpanyan? Wanyjarnikarti yaninyan?" Puntaju karra marnalu Hagar-lu, "Wirnti mirti jarrinyarnalu nyampalingamarra."

<sup>9</sup> Wurrarnala, "Kulpa nyuntumili mijijkarti, pinakarralu.

<sup>10</sup> Kurrngal yiji jamuji karlujirrangu yungkulmarnanta, partarl yini malamanjaninyi, kurrngal yiji.

<sup>11</sup> Ngarlungku nyuntu. Partany kangkuluman, punulku. Yuu, ngangkurl jirnikinyin, pinakarryarnanta. Palajalu yini malaman Ishmael.

<sup>12</sup> Wirtu jarrinyaja paliny kulikata jarrulinyjanaku wiyyirku marrngurranguku, jana wiyyir kulikatarrangu wantulupiyalu palinyku. Kujurlkarri ringu wantuliny paliny."

<sup>13</sup> Palaja wurrarna Hagar-lu, "Yijalu yirrirnirni Ngarrkangarra, wankanyu waninyarni yija, munu marlkarri wirlarninyi." Yini marna Ngarrka, "Palinyju Yirrkulu Parrjaninyi".

<sup>14</sup> Palajunjalu yini marnayi pala januku, "Wankanyulu Yirrininyi".

<sup>15</sup> Palaja Hagar kulpanya Sarai-karti. Palaja partany kanyalu Abram-ku, punulku.

<sup>16</sup> Abram 86 partunurrangujartiny. Palangangarra Hagar-lu partany kanya. Abram-ju yini marna Ishmael.

## 17

### *ABRAHAM JARRULINY KURRNGALKU JAPARTU (17:1-27)*

<sup>1</sup> Ranyji jarrinyi Abram, partunurrangu 99-jartiny. Palaja yarrana ngayarta jarrinyili Ngarrka. Wurrarnala, "Ngaju Wariny Yiji, marrjapanu yiji. Jinta wiyyir manyurla yiji ngajungu. Pinakarraji ngajuku, ngungkulu jili ngalypa ngarrakuny.

<sup>2</sup> Karluji jamujirrangu kurrngal yungkulmarnanta. Muwarr yija-yiji pala yinyarnangu."

<sup>3</sup> Murtingi jurlpi-jurlpi jarrinyalu pirriri jungkanga kaniny Abram.

Ngarrkalu wurrarnala,

<sup>4</sup> "Nyungu muwarr ngajumili wirrirnarnangu, yija nyuntu karluji wantulumanjanaku kurrngal marrngurranguku. Nyuntumili karluji jamujirrangupa nyirrirnikartijarrangu jirrja jarrulupiyi warinypa wariny warrarnarrangunga.

<sup>5</sup> Palajalu kuwarri yini wariny yini marnarnanta. Kuwarringulu nyuntumili yini Abraham. Palalu yinilu wurrarninyi, "Kurrngalku Japartu".

<sup>6</sup> Yuu, kurrngal karluji jamujirrangupa nyirrirnikartijarrangu yungkulmarnanta. Jirrja yankulupiyi kurrngal warrarnarrangukarti kajapa wangka. Palarranga ja jinta wirtu nyampalirrangu jarrulupiyi.

<sup>7</sup> Nyungu muwarr nyuntukupa partanykarranguku nyirrirnikartijarranguku, wantuliny ngarrakuny. Japartu wantulumananyurruku ngaju.

<sup>8</sup> Yuu, nyungu warrarn, yini marnayi Canaan warrarn, nyuntupa nyuntumili karluji jamujirrangupa nyirrirnikartijarrangu yungkulmarnanyurriyti. Kuwarri nyungungu warrarnja waninyan ngajarrikapali. Yarti nyungu warrarn wiyyir nyuntumilirrangumili wantuliny ngaramarniti, japartu wantulumanajanaku.

<sup>9-11</sup> Nyuntupa nyuntumilirranguku nyirrirnikartijarrangu yijalmarta jinaku ngarrakunyu ngajumilaku muwarrku. Kuwarringulu pirirri wiyyir nyurramili partanyja pirirri jilipiyijaninyi. Palajun jinajalu miranu

jarrulupiyi marrngurrangu wiyirr nyurraku, ngajumili marrngurrangu nyurrangarra.

<sup>12-13</sup> Wupartupani karrpurrangu 8-jartinyngarra waninyajanga pi-  
lyi malkulunyurrujaninyi wiyirr. Nyurramili warrkamatarrangu  
pukun wirrkalkulunyurrujaninyi. Yijapa warrkamatamili partany  
pirirri ngayarta jarrulupiyi nyurramilingi ngurrangarrangu. Palarrangu  
wirrkalkulunyurrujaninyi. Yijapa warnkulu mankulamanjaninyi warrka-  
mukatarrangu warrarnjarrangu ngajarrimilijarrangu. Palarrangu pukun  
wirrkalkulunyurrujaninyi. Palajun julkulunyurru. Yijalmarta jiliyi nyun-  
gungu muwarrja ngajumilingi.

<sup>14</sup> Palarrangu munu yijalmarta jinajarrangu munu ngajumilirrang  
wantulupiyi. Panypanyajiyi ngajumilingi muwarrja. Palajalu munu  
japartu wantulumarnajanaku.

<sup>15</sup> Nyungu wariny muwarr wurrarnarnangu. Mirtawa nyuntumili, Sarai,  
wariny yinijartiny jarruliny. Kuwarringulu munu Sarai yini malaman. Yini  
malaman Sarah.

<sup>16</sup> Ngalypa jilamarnalu palinyku, partany yungkulumarnanyumpulinyi,  
partany kangkulumanga Sarah-lu. Sarah-mili nyirrirnikartijarrang  
kurrngal jarrulupiyi. Ngunarrikurnujirri jirrja yankulupiyi, warinypa  
warinya warrarnjarrangu kajalapiyi. Jinta palarranguja nyampalirrang  
wirtu jarrulupiyi.”

<sup>17</sup> Murtingi jurlpi-jurlpi jarrinyalu Abram, pirrirn jungkanga kaniny  
jarrinyalu. Nyarru pирнarningu, wurrarnarningu, “Ranyji yija-yiji ngaju,  
100 partunurrangu. Wunyjurru kuwarri japartu jarrulumarna partanyku  
ngajungarra? Sarah ranyji pukun, 90 partunurrangu. Wunyjurru partany  
kangkuliny palinyjungarra?”

<sup>18</sup> Palaja Abraham-ju karra marnalu, “Ngarrkakayi, yijapa ngalypa  
jilamanpalu partanyku ngajumilaku, Ishmael-ku.”

<sup>19</sup> Puntaju Ngarrkalu karra marnalu, “Yijalu mirtawalu nyuntumilalu,  
Sarah-lungarra, partany kangkulumanga. Yini malkuluman Isaac. Paliny  
kalkulumarna ngajulu, ngajumilia muwarria, palinyngarrappa palinymilir-  
rang nyirrirnikartijarrangu. Ngajumili marrngurrangu wantulupiyi  
ngarrakuny.

<sup>20</sup> Japirr marnanyin ngalypa jinaku Ishmael-ku. Yuu, pinakarrinyirninti.  
Ngalypa jilimarnalu palinyku pukun, yungkulumarna kurrngal marrngur-  
rangu. Partanykarrangujartiny pirirrijartiny 12-jartiny jarruliny paliny.  
Wirtu nyampali jarrulupiyi. Janamili nyirrirnikartijarrangu kurrngal  
jarrulupiyi.

<sup>21</sup> Isaac nyarra, palinyngarra ngajumili wantuliny ngarrakuny, wantu-  
lumarnalu japartu palinykungarra. Sarah-lu kangkulumanga kuwarrika-  
pali partunu warinya.” Palajun Abraham-ja wurrarnala Ngarrkalu.

<sup>22</sup> Jipi muwarr pinaja Abraham-ku Ngarrka yana.

<sup>23-27</sup> Piririmarta Abraham-milirrang palinymilingi ngurranga kurrn-  
gal yiji, warrkamatata piririmarta pukun, jinta purli manajaninyi  
warnkulu, jinta purli ngurli-ngurlija wirtu jarrinyiyi palinymilingi ngur-  
ranga. Palangarra karrpungu Abraham-ju kunmu jirnijaninyi piriri-  
marta wiyyirr palinymilingi ngurranga, mirtanyarrangupa partanykar-  
rangu. Palangangarra karrpungu Ngarrkamilija muwarrja Yayipiraya-  
mulu wirrkarnajaninyi piririmarta wiyyirr. Warinyju wirrkarna paliny  
pukun. Palanga Abraham ranyji pirirri, 99 partunurrangujartiny. Partany  
palinymili, Ishmael, 13 partunurrangujartiny. Palangangarra warajanga

karrpungungarra wirrkanajajirri pirirri jarryipulu, Abraham-pa partany palinymili, Ishmael.

## 18

### *NGARRKA MILPANYI ABRAHAM-KARTI NGURRANGA PALINYMILINGI (18:1-15)*

<sup>1</sup> Palaja yarrana Abraham-ja miral jarryili Ngarrka. Abraham ngurranga waninyikinyi wirturrangunu mungkamartaji Mamre-ngi. Karrpu kanka. Parrpakarranga waninyikinyi kalikingi palinymilingi, jawapirtingi.

<sup>2</sup> Parrjarna, piririmarta kujarrapa waraja yirrirnijaninyi, wangka wararr karrinyiyi.

Wararr karrinyi Abraham, mirti jarryijanaku, murtingi jurlpi-jurlpi jarryijanaku.

<sup>3</sup> Wurrarnajanaku, "Munu pipurru yankulunyurru.

<sup>4</sup> Jampakurra nyungungu kajalkulunyurru mungkanga mirranja. Mankulumarnanyurraku ngapa, jina ngulyalkulunyurrarninyi.

<sup>5</sup> Mayi pukun kangkulumarnanyurraku. Nganinyaja yankulunyurru." Wurrarniyili, "Yuu. Ngalypa."

<sup>6</sup> Kalikukarti mirti jarryi Abraham, Sarah-nga wurrarnala, "Nyampa jarra! Yuntara marra, martumpirri kampalajanaku."

<sup>7</sup> Palaja jalakarti yana, purlika mana, yangupala, jinjimama. Wurrarnala warrkamukatanga, "Nyampa jarra! Nyungu kuwiyi wirlala, kampala."

<sup>8</sup> Palajun jinaja Abraham-ju kanya kuwiypa ngama, yinyajaninyi. Nganinyikinyiyi piririmartalu, Abraham mungkamartaji wararr karrinyikinyi.

<sup>9</sup> Waraja palarrangunu piririmartanga Ngarrkangarra. Wurrarnala Abraham-ja, "Wanyjarningi mirtawa nyuntumili, Sarah?" "Kalikungu kaninykart paliny."

<sup>10</sup> Karra marnalu Ngarrkalu, "Yija warajaja partunuja kulpulumarna, partany kangkuliny Sarah-lu, pirirri kangkulumanga."

Wangka, kaninykart kalikungu, pinakarrinyikinyi Sarah-lu.

<sup>11-12</sup> Nyarru pirnikinyirningu, wurrarnarningu, "Ranyji ngaju, ngajumili pirirri pukun ranyji. Ngaju ranyjimarta yiji, munu partany ngajulu kanganyakarni!"

<sup>13</sup> Ngarrkalu wurrarnala Abraham-ja, "Nganija nyarru pirni Sarah? Nganija wurrarnarningu, 'Ranyji yiji ngaju, munu partany ngajulu kanganyakarni.'?

<sup>14</sup> Munu ngurnjurl yiji ngajuku. Yijalu palajunmarta jilamarnalu. Kulpulumarna warajaja partunuja, yijalu partany kangkuliny Sarah-lu." Palajun Abraham-ja wurrarnala Ngarrkalu.

<sup>15</sup> Wirntilu mitu marnalu Sarah-lu, "Munu nyarru pirnamarna." Puntaju karra marnalu, "Yija, nyarru pirnin."

### *ABRAHAM JAPIRR MARNA NGARRKA SODOM-PA GOMORRAH-KU (18:16-33)*

<sup>16</sup> Palaja nyarrarrangu kujarrapa waraja wararr karrinyiyi, yanayi, parrjarnikinyiyi Sodom-karti. Jananga yana-yananyikinyi Abraham.

<sup>17</sup> Yananyajanga Ngarrkalu kurlkarri marnikinyirnangu, "Palarrang marrngurrangu ngurnnungujirri tawunjajirri, Sodom-japa Gomorrah-nga ngurrara, kurlujartiny yiji jana. Yijapa marlkarri wirlalamarnajaninyi ngarrakuny. Wunyjurru, wurralamarnalu Abraham-ja palajunmarta jilirnili? Yuu. Wurralamarnala.

<sup>18-19</sup> Ngurrjungulu marnarna Abraham, wurralkulinyjanaku palinymilirranguku pinakarralupijyi ngarrakunyu, ngungku yiji jilipiyi ngaramarnti. Janalu palajun jinaja ngajulu ngalypa jilamarnajanaku ngajumilija muwarrja. Palajalu ngalypa yiji jilamarnajanaku wiyyirru marrngurraguku, warrarnjarrangu wiyyirra. Abraham yungkulumarnalu jamuji karlujirrangupa nyirrirnikartijarrangu kurrngal, palinymilirrangup kurrgal yija-yiji jarrulupiyi, wirtu nyampalirrangup jarrulupiyi.”

<sup>20</sup> Palaja Abraham-ja wurrarnala, “Mirantu nyuntu palarranguku marrngurraguku Sodom-japa Gomorrah-nga. Pinakarrinyirnajanaku, yirrkulu kurlu yiji jirnikinyiyi.

<sup>21</sup> Palaja muwarrja yankulumarna, yirrilimarna. Yijapa pala muwarr pinakarrinyaya yija. Munujalu, mirantu jarrulumarna.”

<sup>22</sup> Palaja palajirri warinyirri pipurru yanapulu Sodom-karti. Ngarrkapa wararr karrinyipulu Abraham.

<sup>23</sup> Wurrarnala Abraham-ju, “Yijapakurra jinta Sodom-ja ngalypa jinayi, jurtungu yaninyayi. Wunyjurru? Marlkarri wirlalamajaninyi palarrangupukun?”

<sup>24</sup> Yijapa 50 marrngu palanga ngalypakata waninyayi. Wiyyirr Sodom-ja ngurrararrangup marlkarri wirlalamajaninyi?

<sup>25</sup> Munu wirlanaku ngalypakatarrangu, kurlukatarrangujakun wirlanaku. Ngalypajakun jinaku nyuntulukurra.”

<sup>26</sup> Karra marnalu Ngarrkalu, “Marrngurraguku ngalypa jinakataku 50-ku munu wirlalamarna pala tawun. Puru yakalamarnajaninyi wiyyirr.”

<sup>27</sup> Karra marnalu Abraham-ju, “Puru ngaju, munu japiirr manaku ngajulupirrayi.

<sup>28</sup> Yijapa 45-jakun ngalypakata palanga tawunja. Wunyjurrukurra? Marlkarri wirlalamajaninyi wiyyirr tawunja?” “Marrngurraguku ngalypakataku 45-ku munu wirlalamarna pala tawun.”

<sup>29</sup> Yarrana Abraham muwarr pirnalu, “Yijapa 40 ngalypakata palanga waninyayi.” “Ngalypakataku 40-ku munu wirlalamarna pala tawun.”

<sup>30</sup> Palaja wurrarnala Abraham-ju, “Yarrana japiirr malamarnanta, munukurra kulilu yirriliminyinpa, yijapa 30-jakun ngalypakata palanga?” “30-ku ngalypakataku munu wirlalamarna pala tawun.”

<sup>31</sup> Yarrana Abraham marrpalya waninyi. “Yijapa 20-jakun ngalypakata palanga.” “20-ku ngalypakataku munu wirlalamarna pala tawun.”

<sup>32</sup> Palaja karra marnalu Abraham, “Yarranakurra warajamaljakun japiirr malamarnanta. Munukurra kuli jarrulupijin. Yijapa 10-jakun ngalypakata palanga waninyayi.” Puntaju karra marnalu Ngarrkalu, “Yijalu 10-ku munu wirlalamarna pala tawun.”

<sup>33</sup> Palaja Abraham-ku muwarr pinaja, Ngarrka yana, Abraham ngurrakarti kulpanya.

## 19

### *ANGEL-JIRRI NGURRA JIRNIPULU LOT-JA SODOM-JA (19:1-29)*

<sup>1</sup> Sodom-karti pipurr yanapulu nyarrajirri warinyirri. Ngakarnapulinyi Ngarrkalu, miyu marrngujirri pulany, yija angel-jirri palajirri. Jarurrukartingi tawunja kajarnapulu.

Palanga Lot, nyarra Abraham-mili marrkamili partany, tawunja kayitingi kajarnakinyi. Yirrirnipulinyi, purrpi yanapulaku. Pirntil kanka jarrinyipulaku, milya kaninyju.

<sup>2</sup> Wurrarnapulaku, "Milpapulukurra ngurrakarti ngajumilikarti. Jina ngulyalkulunyumpularninyi, wantulunyumpulu mayanga ngajumilingi. Marntungu yankulunyumpulu wanyjarniku karrinyaku yaninyaku nyumpala." Puntaju karra marnapulalu, "Puru wanta. Nyungungarra parlkarranga wantulupalayi warrukartiku."

<sup>3</sup> Yirrkulu japiirr marnikinyipulinyi Lot-ju palinymili mayanga kajanaku. Palajalu yanapulu ngurrakarti palinymilikarti. Martumpirri lalypapa warinypa wariny ngalypa mayi kanyapulaku. Nganinyikinyipulu.

<sup>4</sup> Kajarnakinyipulu palanga, Sodom piririmarta mayakarti milpanyiya. Wangalangurrangupa mirtarrangu, Sodom piririmarta wiyyirr, jalakarti ngunarrijirri wararr karrinyikinyiyi.

<sup>5</sup> Lot-ku kamarniyalu, "Wanyjarningi palajirri pirirrijirri nyuntumilikarti ngurrakarti milpanyapulu? Kawapulinyi nganarnaku!" Palarrang Sodom piririmarta kurla-kurla yiji, palajirriku karrinyiyipulaku.

<sup>6</sup> Jalakarti yana Lot, jawapirti nyirrikartijatamapu jirni.

<sup>7</sup> Wurrarnajanaku, "Munu palajunmarta jiliyi! Kurlu yija pala.

<sup>8</sup> Pinakarrayi yiji. Kurntaljirri ngaju, kurrijirrijartiny. Munu pirirringi karta karrimapulu. Kangkurnupulinyi nyurraku palajirri kurntaljirri. Nganikupa karrulunyurru julkulunyurrupulinyi. Palajirri pirirrijirri ngajarrijirri, yakaliyipulinyi. Ngurrakarti milpanyapulu ngajumilikarti. Yijalu ngajulu kalkulumarnapulinyi."

<sup>9</sup> Pala muwarr pinakarrinyaaja kuli jarrinyiyi. "Yarra! Yarra! Kajaja nyungukarti milpanyan, kuwarri nyampali jilamanparninyi nganarnaku. Kurlu jilipiyrnangu yija." Lot warinykurnu jujirniyi, partarl jawapirti ngartarnayalu.

<sup>10</sup> Palaja palalujirri angel-jujirri purrirnipulu Lot kaninykartijatamapu jirnipulu.

<sup>11</sup> Palaja pampuru jirnipulujaninyi palarrang Sodom piririmarta, munu yirrinakayi. Partarl kanyjirnikinyiyi jawapirtiku.

<sup>12</sup> Wurrarnapulalu Lot-ja, "Nyuntumilirranguja nganurtu nyungungu tawunja? Partanykarrangu? Pujamurrangu? Wurralajanaku nyungu tawun yakalapiyi.

<sup>13</sup> Jampa nyungu tawun wiyyirr yija kampalapalayi. Ngarrka miranu marrngurranguku nyungungu, kurlukata yiji jana. Palinyju nyungukartijitakapali, puru panpanyapulalu.

<sup>14</sup> Yana Lot pujamukartijirri, palinymili kurntalmilijirri pilyurrjirri, wurrarnapulaku, "Jampa nyungu tawun kampalkuliny ngarrakuny Ngarrkalu. Nyunguja janyin mirti jarrapulu, marlkarringimarra!" Wurrarnikinyipulu witijakapali, puru panpanyapulalu.

<sup>15</sup> Pirrpa-pirrpa jarrinyajalu Lot-ja wurrarnapulalu angel-jujirri, "Kawaninyi mirtawapa kurntaljirri nyuntumili, jalakarti nyungu tawunja wiyyirr mirti jarrulunyurru, marlkarringimarra!"

<sup>16</sup> Panpanyikinyipulaku Lot-ju, munu janyin jarrima paliny. Palaja palajirri angel-jujirri parirrgulu kanyapulujaninyi, janyin yanayi jalakarti tawunja. (Ngarrka paju karrinyalu Lot-ku, palajalu wanka jirnipulu.)

<sup>17</sup> Palaja wurrarnapulujanaku, "Mirti jarrayi, mirti jarrayi! Munu nyirrirni parrajaliyi! Munu partijirri parlkarranga kajaliyi. Warnkumararamarrakarti pipurru mirti jarrayi, marlkarringimarra!"

**18-19** Puntaju Lot-ju karra marnapulaku, "Nyumpalakurra pajulu ngalypa jirnijinyumpulu, wankanyu jirninyinyumpulu. Pinakarrajipulu. Warnku-marramarra kaja yiji. Munu mirti yaninyakarna ngurnungukartijakun. Marlkarri jarrarnili partijirri.

**20** Yirrirnanyumpulu pala tawun, pala wupartu tawun palanga? Mirti jarrulumarna palakartijakun. Tuku wantulumarna palangangarra."

**21** Warajalu wurrarnala, "Yuu. Nyurra palakarti yarrayi. Munu kampalamarna pala wupartu tawun.

**22-23** Jampa mimalamarnanyurrku. Jampa nyurra palangangarra ka-jarnaja, jinta warrarn kampalamarna. Palajalu mirti jarrayi!" Karrpu milyapal jarrinyaja Lot-pa kurntaljirri palinymilijirri kajarniyi palanga tawunja. Yini pala wupartu tawun Jawa.

**24-25** Palaja parlparrja Ngarrkalu ngakarna warnkukapalirrangu wika-jartiny, palajun wirlarnapulinyi palajirri tawunjirri, Sodom-pa Gomorrah. Ngurrararrangu wiyyirr markarri jarrinyiyi. Parlkarra pukun wirlarna Ngarrkalu, warrarn kurluny-kurluny jarrinyi, warrulymajirri, mungkama-jirri.

**26** Mirtawalu Lot-milalu panypyanyapulaku angel-milijajirri muwarrja. Sodom-karti nyirrirnikarti parrjarna palinyju, yamarna karamartalu. Pala mirtawa markarri jarrinyi, paliny yamarna karamartalu, marlajakapali jirni.

**27** Marntungu pirrpa-pirrpanga Abraham kulpanya nyarrakarti, palakarti muwarr pirnikinalupa Ngarrkanga.

**28** Warnkumarramarraja parrjarna parlkarrakarti, Sodom-kartipa Gomorrah-karti. Jungan kankakurnu yananyikinyi ngurnarrijirri.

**29** Palajun pala parlkarrangajirri tawunjirri kamparnapulinyi ngarrakuny Ngarrkalu, wirlarnajaninyi markarri ngurrararrangu wiyyirr yiji. Lot-jakun ngakarna jalanga Sodom-ja markarringamarra. Abraham-ku pinakarrinyalu Ngarrkalu, wankanyu jirni Lot.

### *LOT-MILALU KURNTALJUJIRRI KURLU YIJI JIRNIPULU (19:30-38)*

**30** Lot wirnti Zoar-nга waninyaku. Palajalu yakarna pala wupartu tawun, Zoar, yana warnkumarramarraja. Palinypa palinymili kurntaljirri jurntingi wananyikinyiyi.

**31** Yarti marrkanga wurrarnala murrkangunyalu, "Japartu ngalimili ranyji, ngali waninyali piririmajirri. Nyungungu warrarnja yija munu waraja pirirri.

**32** Japartu yungkuli minpinaku wayin. Palaja, yawurr jarrinyaja, palinyja karta karrulupalili. Palajunju partany kangkulupali japartuja ngalimilija."

**33** Warrukartingi wayin yinyapulali. Yawurr jarrinyaja murrkangunyu palinykarti yana, palinyja karta karrinyili. Turlpanyajapa yananyajapa munumpa waninyi Lot.

**34** Warinymaljanga marrkanga karra marnalu murrkangunyalu, "Warinyja warrukartingi japartungu karta karrinyirnili. Kuwarringi warrukartingi yarrana wayin yungkulupali. Palaja palinyja karta karruluman nyuntu, palinyja partany kangkuluman."

**35** Palanga warrukartingi yarrana japartu pulanymili wayin yinyapulali. Palaja pala nyirti palinyja karta karrinyili. Turlpanyajapa yananyajapa munumpa waninyi Lot.

**36** Palajun ngarlungka jarrinyipulu Lot-mili kurntaljirri japartumarninyja pulanymilija.

<sup>37</sup> Partany kanya murrkangunyalu, punulku, yini marna Moab. Palinymili nyirrirnikartijarrangu yini marnayijaninyi Moabites.

<sup>38</sup> Nyirtingunyalu pukun partany kanya, punulku. Yini marna Ben-ammi. Palinymili nyirrirnikartijarrangu yini marnayijaninyi Ammonites.

## 20

### *ABRAHAM-PA ABIMELECH (20:1-18)*

<sup>1</sup> Abraham yana Mamre-ja kurilakartikurtirri Canaan-ja. Waninyikinyi palangajirri partijirri ngapinda, Kadesh-pa Shur. Yarti waninyikinyi Gerar.

<sup>2</sup> Palanga Sarah wurrarnikinyi palinymili mirtawamarniny marrka. Palanga partunurrangu Abimelech nyampali wirtu Gera-ku. Palinju warrkamukatarrangu ngakarnajaninyi maninyaku Sarah-ku. "Ngajukarti kanganyaku mirtawa ngajumili jarrinyaku."

<sup>3</sup> Warajanga warrukartingi Ngarrka ngayarta jarrinyi kapukarringi. Wurrarnala, "Nyuntulu kanyan nyungu mirtawa. Pala mirtawa pirirri-jartiny. Palajalu marlkarri jarruluman."

<sup>4</sup> Abimelech munu ngarrany karta karrimapulu pala mirtawa. Karra marnala, "Nyampali, ngaju munu kurlu jinaja! Yijalu munu wirlalaman-anganinyi ngajumilirrangu marrngupa.

<sup>5</sup> Abraham-jungarra wurrarna pala palinymili mirtawa marrka. Palangarra muwarr pirni Sarah-lu. Pala jirnirni yijalu wurrarnarna 'ngalypa'."

<sup>6</sup> Ngarrkalu puntajulu wurrarnala kapukarringa, "Yuu, ngaju mirantu pala jirnin ngalypakapali wurrarnikinyin, palajalu ngampa pirnirninti jinaku kurlujartinyku ngajuku. Ngampa pirnirninti warlinaku palaku mirtawaku.

<sup>7</sup> Kuwarri, pala mirtawa kulpanya yuwalu palinymili pirirringi. Pala Abraham muwarr pinakata ngajumili. Paliny muwarr pilipiji nyuntuku palajunjamarra, munu marlkarri jarruluman. Wurrarnarnangu palanga minyirri, munujalu nyuntupa nyuntumilipa marrngurrangu marlkarri jarrulunyurru."

<sup>8</sup> Karrpu jarrinyajalu warinyja marntungungu Abimelech-ju kuru mar-najaninyi nyampalirrangu wiyyir palinymili, wurrarnajanaku Ngarrkaja muwarr. Jana wirnti karrinyiyi yiji.

<sup>9</sup> Muwarr ngakarnalu Abraham-ku. Minyirru wurrarnala, "Ngani kurlujartiny jirnarnanga, puntajulu nyuntulu kurlujartinyju jirnin nganarnaka wiyyirku? Yija yiji munu jintalupa jirnamayi palajun ngajuku. [Work on this: it misses the point that no-one ever SHOULD do that to ANYBODY.]

<sup>10</sup> Nganiku jirninpa?"

<sup>11</sup> Abraham-ju puntajulu, "Wurrarnarnaji, 'Munu nyarralanga war-rarnja pinakarramayalu Ngarrkaku. Wirlalanyiyili marlkarri mankulupiyi ngajumili mirtawa.'

<sup>12</sup> Yuu, yija ngajumili marrka pala mirtawa. Paliny ngajumili japatumili partany, munu ngajumili pipimili partany. Pala mirtawa ngalayi warajanga jarrinyalayi.

<sup>13</sup> Purlpilu Ngarrkalu wurrarnaji, 'Yankuluman warinykartirrarnka.' Ngajulu wurrarnarnala Sarah-nga, 'Ngalypa jilipjin. Yananya warinykartirrangu warrarnkartirrangu, wurralamjanaku marrngurrangungu, "Ngajumili Abraham mamaji".'

<sup>14</sup> Palaja Abimelech-ju kulpanya jinalu mirtawa Abraham-ja, yinyalu warinyarrungupa kukurnjaripa purlikapa warrkumukata piririmartapa mirtawanyjaripa.

<sup>15</sup> Wurrarnala Abraham-ja, "Nyungungu nganarnamili warrarn, nyurra puru wantayi palanga warrarnjakurtirri, munu wirnti karrulunyurru."

<sup>16</sup> Wurrarnala Sarah-ngi, "Ngajulu yungkulumarnalu mamajinga nyuntumilinga 1,000 warnkurrangu. Palajalu nyuntumili marrngurrangu miranu wantulupiyingu munu nyuntulu kurlujartiny jirnaman."

<sup>17-18</sup> Purlpilu Ngarrkalu ngampa pirnajaninyi Abimelech-mili mirtawanyjarri partany kanganyaku, Sarah-ngamarra. Kuwarri Abraham-ju japirr marna Ngarrka, Ngarrkalu wankanyu jirni Abimelech, wankanyu jirnijaninyi mirtawa palinymilipa warrkamukatarrangu mirtawanyjarri, yarrana partanyku kanganyaku.

## 21

### *SARAH-LU PARTANY KANYA (21:1-8)*

<sup>1-2</sup> Palaja Ngarrkalu ngalypalu jinalu Sarah-ku. Palinymili muwarr yija jarrinyalu palinyku. Purlpi Abraham-ja wurrarnala Ngarkalu, "Yija warajaja partunuja kulpulumarna, partany kangkuliny Sarah-lu, piriri kangkulumanga." Yijarla pala muwarr. Ngarrkamilija muwarrja partany kanyalu pirirriku Abraham-ku.

<sup>3</sup> Pala partany palinymili Abraham-ju yini marna Isaac.

<sup>4</sup> Karrpu 8-jartiny jarrinyaja Abraham-ju wirrkarna, Ngarrkamilija muwarrja.

<sup>5</sup> Palanga Abraham ranyji yija, 100 partunurrangujartiny.

<sup>6</sup> Pikaly yiji Sarah, nyarru pirni. "Ngaju pikaly jirninyi Ngarrkalu. Jinta pinakarrinyaja pikaly jarrulupiyi, nyarru pilipiyi pukun.

<sup>7</sup> Wurrarnikinyiyi wiyyirru partanymajirri wantulumarnalu Abraham-ku. Kuwarri partany kanyarnalu ranyji jarrinyajaku."

### *SARAH-LU JURTU NGAKARNAPULINYI HAGAR-PA ISHMAEL (21:9-21)*

<sup>8</sup> Wirtu jarrinyi jukurtu, ngama yakarna. Palanga Abraham-ju wurrarnajanaku warrkamukatanga palinymilingi mayi wirtu kampalapiyijanaku kurrngalku marrngurranguku. Palaja wiyyirr milpanyiyi ngurrikarti Abraham-milikarti, pala mayi ngananyikinyiyi, pikaly waninyikinyiyi.

<sup>9</sup> Ishmael, Hagar-milipa Abraham-mili partany, witolu nyurni marnikinyi Isaac. Palajirri yirrirnipulinyi Sarah-lu, ngarlu kurlu jarrinyi.

<sup>10</sup> Wurrarnala Abraham-ja, "Nyuntu marlkarri jarrinyaja ngajumilalu partanyju, Isaac-ju, wurrukarra nyuntumili mankuliny palinyujakun. Pala wariny partany, warrkamukata mirtawamili partany, munu palinyju wurrukarra mankuliny nyuntumili. Pala warrkamukata mirtawapa partany palinymili jurtu ngakalapulinyi ngaramarnti."

<sup>11</sup> Abraham ngarlu kurlu jirni Sarah-lu muwarrju. Munu jurtu ngakanaku karrinyalu partanyku, palinymilaku waljaku.

<sup>12</sup> Wurrarnala Ngarrkalu, "Munu ngarlu kurlu wantuluman Ishmael-kupa pipiku palinymilaku. Pinakarrulumanpalu Sarah-ku, palinymilija muwarrja jilkuluman. Purlpi wurrarnanga yungkulumarnanta karluji jamujirrangupa nyirrirnikartijarrangu kurrgal. Isaac-jangarra milpulupiyi jana.

<sup>13</sup> Ishmael pukun partany nyuntumili. Palajalu ngalypa jilamarnalu palinyku pukun, karluji jamujirrangupa nyirrirnikartijarrangu kurrgal yiji yungkulumarnalu."

<sup>14</sup> Marntungu pirrpa-pirrpa Hagar-nga mayipa ngapa yinyala Abraham-ju. Ngapapinti Hagar ngurntingi wirrirnili. Palaja jurtu ngakarnapulinyi.

Yana-yaninyikinyipulu pirranga, ngapimartaji, Piyajipakurtirri.

<sup>15</sup> Ngapa munu jarrinyipulaku. Palaja partany yakarna Hagar-lu mungkamartaji.

<sup>16</sup> Wangkamarta yana, kajarna. Wurrarnarningu, "Yija ngajumili partany jampa marlkarri jarruliny. Munu palaku yirrinaku karrinyarnalu." Ngangkurl jirnikinyi yija partanyku.

<sup>17</sup> Murrukurru ngangkurl jirnikinyi, pinakarrinyi Ngarrkalu. Parlparrja kamarnala, "Hagar-kayi, munu ngarlu kurlu jarruluman, munu wirnti karruluman. Murrukurru pinakarrinyirni ngangkurl jinaja ngajulu.

<sup>18</sup> Paliny kalkulumarna ngajulu. Kurrngal yiji jamuji karlujirrangupa nyirrirnikartijarrangu yungkulumarnalu. Kuwarri palinykarti yankuluman, parirrngulu kangkuluman, wararr jilaman." Palajun wurrarnala Ngarrkalu.

<sup>19</sup> Palaja Hagar-lu yirrirni, jurti jirnili ngapa Ngarrkalu, purlpurlpu jarrinyikinyi ngapa. Palakarti yana, ngapapinti winya jirni, murrukurruku kanyalu, yinyala ngapa.

<sup>20</sup> Ishmael wirtu jarrinyikinyi, Ngarrkalu kalkurnukinyi. Kuwiymarta jarrinyi.

<sup>21</sup> Pirranga waninyikinyi, warrarnja yiningi, Paranja. Pipilu mirtawa manalu Egypt-ja.

#### *ABRAHAM-JUPA ABIMELECH-JU MUWARR WIRRARNIPULARNINGA (21:22-34)*

<sup>22</sup> Palanga Kingi Abimelech-pa palinymili army-ku nyampali, yini Phicol, yanapulu Abraham muwarr jinaku. Abimilech wurrarnala Abraham-ja, "Ngani warralpirti jirnan nyuntulu, Ngarrka ngalypa jirnangu.

<sup>23</sup> Ngarrkalu parrjarnanganyjurrinyi kuwarri, tarn-tarn muwarr yingkuluman, nyuntu munu mitu marnakanyi, ngajupa ngajumili partanykarrangupa nyirrirnikartijarrangu. Ngajulu ngalypa jirnarnangu. Puntajulu tarn-tarn muwarr yingkuluminyin, nyuntulu ngalypa jilkuluminyin ngajuku, ngalypa jilkuluman nyunguku warrarnku pukun."

<sup>24</sup> Abraham-ju wurrarnala, "Yuu, palajun wurrarnarnangu, Ngarrka miranu palaku muwarrku."

<sup>25</sup> Abraham-ju wurrarnalu Abimilech well-ku, Abraham-mili warrkamukata karlinskyayi, Abimilech-mili warrkamukatarrangulu manayi janaku-jakun.

<sup>26</sup> Karra marnalu Abimilech, "Munumpa ngaju palaku. Munu wurrarninyin nyuntulu, kuwarrijakunja pinakarrinyinyi."

<sup>27</sup> Palaja Abraham-ju yinyalu kukurnjarirrangupa pulikarrangu, Abrahama Abimilech muwarr jinipulu.

<sup>28</sup> Abraham jinta pirnijaninyi 7 kukurnjarirranglu waraja partunujartiny.

<sup>29</sup> Palaja Abimilech japiirr marna, "Nganiku palujun jirnan?"

<sup>30</sup> Karra marnalu Abraham-ju, "Mankuluman nyungurranglu 7 kukurnjarirranglu. Palajun jirnajalu, wurralaman karlinskyarna nyarra well ngajulungarra."

<sup>31</sup> Palaja pala well yini marnayi "Beersheba", "Tarn-tarn Muwarr Well".

<sup>32</sup> Pala tarn-tarn muwarr jirnaja, Abimilech-pa Phicol yanapulu, kulpanyapulu Philistia-karti, warrarnkarti pulnymilikarti.

<sup>33</sup> Palanga Abraham-ju Beesheba-nga jarnti jirni mungka, tamarisk mungka, ngarluja nyurra marna Ngarrka, paliny LORD ngarramarntiku.

<sup>34</sup> Abraham-ju kaliku palinymilirranglu jarnti jirnikinyi warrarn-ja Philistia-nga punja yija.

## 22

### *ABRAHAM YAKURR MARNA NGARRKALU (22:1-19)*

<sup>1</sup> Punjaja Abraham yakurr marna Ngarrkalu. Karra marnalu, "Abraham-kayi." "Yu?"

<sup>2</sup> Wurrarnala, "Partany walja nyuntumili, pala Isaac, yija ngarlungu nyuntungu paliny. Paliny kangkuluman, kajakarti yankulunyumpulu, warrarnkarti Murayakarti. Warnkumarramarranga waraja warnku jurti jilamarnanta. Palangangarra partany walja nyuntumili marlkarri wirlalaman, kawu palinymili wikanga wirrilaman, kampalaman tikilkartijakun. Palajun jilaman ngajuku." Pinakarrinyalu Abraham-ju.

<sup>3</sup> Pirrpa-pirrpanga kartaja wararr karrinyi Abraham. Wika mana, wirrirni tangkingi. Palaja Abraham-pa warrkamukatajirripa Isaac yanayi, ngurnungukarti warrarnkarti, Moriah-karti yananyikinyiyi.

<sup>4</sup> Kujarraja ngurraja yirrirniyi warnku pala, kajangulu.

<sup>5</sup> Palinymilingi warrkamukatajirringi wurrarnapulaku, "Nyungungungarра wantapulu tangkipukun. Ngalaya yankulupulayi partanypа ngurnungukarti, palanga kuwiyi yungkulupulayili Ngarrkanga. Palaja nyumpalakarti kulpulupulayi."

<sup>6</sup> Abraham-ju wika punyjanga wirrirnili Isaac-ja. Wirrkanapintipa panijartu kanya Abraham-ju. Palaja yanapulu.

<sup>7</sup> Japartumurninyja wurrarnala Isaac-ju, "Japartukayi!" "Yu?" "Wikapa panijartu kanganyali. Wanyjarningi pala kukurnjari Ngarrkaku wirlalapali?"

<sup>8</sup> Karra marnalu Abraham-ju, "Ngarrkalungarra kukurnjari yungkulinyngalinyi kampanaku tikirlkarti." Yaninyikinyipulu.

<sup>9</sup> Kajarnapulu palanga warnkunga, Moriah-nga, purlpi Ngarrkalu wurrarnala Abraham-ja pala. Warnkurragu kuru marna Abraham-ju, wika kankarni wirrirni, munu jakarnama. Kunymarna partany palinymili, paliny wirrirni wikanga kankarni.

<sup>10</sup> Palaja wirrkanapinti mana partanyku marlkarri wirlanaku.

<sup>11</sup> Parlparrja kamarnalu Ngarrkalu, "Abraham! Abraham!" "Yu?"

<sup>12</sup> "Yakala! Munu nyuntumili partany wirlalaman! Puru yakurr marnikinyirninti. Purlpi wurrarnarnangu partany nyuntumili wirlalaman, ngajuntu yungkulupijin. Palinyku munu jamirnaminyin. Palaja nyuntuku miranu jarrinyarnanga, nyuntulu yirrkulu wurranajalu jinan ngajuntu muwarrja." Palajun Abraham-ja wurrarnala Ngarrkalu.

<sup>13</sup> Parrjarna Abraham-ju, wangka yuramu yirrirni, palamili kutajirri mungkanga, mantalji waninyikinyipulu, munu purrirnakarningu. Mana pala kuwiyi, Ngarrkaku marlkarri wirlarnalu. Munu wirlarnama palinymili partany walja, paliny wanka kalkurnu Ngarrkamilija muwarrja.

<sup>14</sup> Palaja pala warnku yini marna Abraham-ju "Ngarrka Yinganyakata". Palajalu kuwarrikartijakun wurrarnayi, "Warnkungu Ngarrkamilingi yungkulinynganyjurrinyi Ngarrkalu."

<sup>15</sup> Yarrana Abraham-ku kamarnalu parlparrja Ngarrkalu.

<sup>16</sup> "Ngajuku pinakarrinyijin nyuntulu, partanyku waljaku nyuntumilaku munu jamirnaminyin. Palajalu wirrirnarnanga muwarr ngajumili, pala muwarr nyuntuku wantuliny ngarrakuny yija.

<sup>17</sup> Ngalypa yiji jilamarnanga, yungkulumarnarnta kurrngal karlujirrangupu jamujirrang. Panikatarrangu parlparrja kurrngal yiji, nyuntumilirrangupu karlujirrangupu pukul kurrngal yiji jarrulupiyi. Jinta malyparr jarrayijanakalu nyuntumilirranguku, wirrilamarnajaninyi warrkamukata

nyuntumilirrangku. Nyuntumili marrngurrangu wirrilimarnajanaku nyampalirrangku jintaku.

<sup>18</sup> Nyuntumilirrangulu ngalypa jilipiyijanaku wiyyirku marrngurran-guku ngunarrikurnujirringi. Yijalmarta jirnijin nyuntulu. Palajalu ngalypa jilamarnanga palajun.” Palajun muwarr pirlili Ngarrka.

<sup>19</sup> Palaja Abraham-pa Isaac warrkamukatajirrikarti kulpanyapulupu-laku. Palaja yanayi Beersheba-karti. Palanga waninyikinyi Abraham.

### *NAHOR-MILI NYIRRIRNIKARTIJARRANGU (22:20-24)*

<sup>20</sup> Yarti pinakarrinyi Abraham-ju palinymili marrka Nahor partanykar-rangku 8-jartiny, Milcah-lu kanyajaninyi.

<sup>21</sup> Uz (murrkangunya), Buz (palinymili marrka pirirri), Kemuel (Yaramu-mili japartu),

<sup>22</sup> Chesed, Hazo, Pildash, Jidlaph, Bethuel

<sup>23</sup> (Rebecca-mili japartu). Milcah-lu kanyajaninyi nyungurrangu par-tanykarrangu piririmarta Nahor-ku, Abraham-milaku marrkaku.

<sup>24</sup> Ruma, Nahor-mili yarungumarniny, palinyju kanyajaninyi Tebah, Gaham, Tahash, Maacah.

## 23

### *SARAH MARLKARRI JARRINYI (23:1-2)*

<sup>1-2</sup> Palaja mirtawa Abraham-mili, pala Sarah, marlkarri jarrinyi. Ranyji yiji paliny, 127 partunurrangujartiny. Wurrjirni palanga, Hebron-ja, warrarnja Canaan-ja. Ngangkurl jinalu Abraham-ju.

### *ABRAHAM-JU WARNKULU MARNA JURNTI JUNGARAKU (23:3-20)*

<sup>3</sup> Ngangkurl jinaja tawunmilikarti nyampalirrangukarti yana. (Palar-rangku marrngurrangu palanga Yitimilirrangku.) Palarrangku muwarr pirlidianaku Abraham.

<sup>4</sup> “Ngajuku miranu nyurra. Kajaja milpanyarna. Nyungu warrarn munu ngajumiliwayi. Nyungu ngajarrikapali ngaju. Yijapa warrarnkurra yungkuluminyinyurru, palanga kurtu jarrinyija wirrilamarna ngajumili nyupa.”

<sup>5-6</sup> “Yuu, jurnti nyuku jilaman. Wirtu nyampali nyuntu nganarnaku. Jurnti ngalypa mankuluman, palanga mirtawa nyuntumili wirriliman. Munu jamilipiyirninti warrarnku.”

<sup>7</sup> Pirntil kanka jarrinyijanaku Abraham.

<sup>8</sup> Karra marnajanaku, “Muwarrkurra pilkulunyurrulu palaku pirirriku, Zohar-milaku partanyku, Ephron-ku.

<sup>9</sup> Yijapa japirr malkulunyurru jurnti yungkulupiji ngapingi, Machpelah-nga. Pala jurnti warrarnja palinymilingi. Nganiku warnkuku karrinyi palaku, yungkulumarnalu. Yungkulumarna warnku nyungungu, yirrilku-lunyurru nyurraru wiyyirju. Palaja pala jurnti ngajumili jarruliny.”

<sup>10-11</sup> Pirirri nyarra palangangarra kajarnikinyi, pala Ephron. Wurrarnala Abraham-ja, jintalu piririmarta pinakarrinyikinyiyi, “Mirtanyakurra, yungkulumarnanta pala jurnti, pala warrarn jurntimartaji pukun. Mirtawa nyuntumili wirriliman palanga. Wiyyirju nyungurrangulu pirirrimartalu pinakarrinyanyiyi muwarr pirlaja.”

<sup>12</sup> Yarrana ngurrararrangku piririmartaku pirntil kanka jarrinyi-janaku Abraham.

<sup>13</sup> Wurrarnala Ephron-ja, "Munu. Warnku yungkulumarnanta warrarnku palaku. Kawa ngajuja nyungu warnku. Palaja pala warrarn ngajumili wantuliny, marlkarri wirrilmarna palanga."

<sup>14-15</sup> Palalu Ephron-ju wurrarnala, "Mirtanyakurra, pinakarraj. Jintalu wuparturla yuwanyiyili, puru warnkurrangu 400. Ngurnipali japirr malarnantala yungkuluminin warnkurrangu wupartu. Munurti. Munu palajun jilamarna, pala warrarn yungkulumarnanta warnkumajirriku. Jurntingi wirrinaku marlkarri nyuntumili."

<sup>16</sup> "Munu, warnku yungkulumarnanta yiji." Palangangarra 400 warnku Ephron yinyala Abraham-ju, Ephron-ja muwarrja.

<sup>17-18</sup> Palajalu pala jurnti Machpelah-nga Abraham-mili jarrinyi, pala warrarn jurntimartajipa wiyyirr mungkarrangu pukun nyarranga warrarnja. Palarrangulu wirtu nyampalirrangulu yirrirnikinyiyi. Miranu jana wiyyirr, warrarn nyarra mana warnkulu Abraham-ju.

<sup>19</sup> Palaja palanga jurntingi marlkarri mirtawa palinymili wirrirni Abraham-ju, jurntingi Machpelah-nga, Mamirija kakarrakurnu, warrarnja Canaan-ja.

<sup>20</sup> Palajun pala jurntipa warrarn jurntimartaji Abraham-mili jarrinyi ngarramarnti, jungkaraku.

## 24

### MANALU MIRTAWA ISAAC-KU (24:1-67)

<sup>1</sup> Palanga ranyji yija Abraham. Ngalypa kalkurnikinyi Ngarrkalu, kuwiyirrangupa wurukarra munu yiji yinyalu, yijalu ngalypakata jirnili.

<sup>2-4</sup> Warajanga karrpungu pirirri kamarna Abraham-ju, mirtanya yiji, warrkamukata wirtu palinymili. Paliny nyampali wiyyirru jintaku warrkamukata Abraham-mili. Palanga warrkamukatanga wurrarnala, "Yankuluman mirtawa kanganyaku partanyku ngajumilaku. Yijalu munu kanganyaku ngurrara mirtawa nyunguja warrarnja. Munurti. Ngajumili walja warrarnkartu yankuluman. Palinyku mirtawa kangkuluman ngajumilirranguju. Parirr wirriliman ngajungu kalpartingi, muwarr yija yungkuluman, palajun jilaman ngajuja muwarrja. Nyuntu miranu Ngarrkaku, parlparrpa jungka jirni palinyjungarra. Nyuntumili muwarr pinakarruliny palinyju. Yijapa panypajinpili, miranu jarrulumangu palinyngarra."

<sup>5</sup> Warrkamukatalu nyarralu puntaju karra marnalu, "Yijapa munu milpuliny pala mirtawa. Wurrabajili 'Munurti'. Palaja wunyurru jilamarna ngajulu? Partany nyuntumili kanganyaku warrarnkartu nyuntumilikarti?"

<sup>6</sup> Karra marnalu Abraham-ju, "Munurti. Munu kangkuluman partany ngajumili ngurnungukarti.

<sup>7</sup> Ngarrka, kanka waninyi paliny, purpilu yiji wurrarnaji palinyju ngajumili warrarn yakanaku. Palinymili muwarr yija yinyaji, 'Yijalu nyungu warrarn yungkulumarnajaninyi nyuntumili karluji jamujirrangupa janamili nyirrirnikartijarrangu.' Angel palinymili ngakalkuliny walangkarr nyuntuku; jurti jilamangu mirtawa ngajumilaku partanyku palinyjungarra.

<sup>8</sup> Yijapa wurralamangu palalu kurrilu, 'Munu yajalamarnanta, ngajumilingi waljanga warrarnja wantulumarna.' Palajun wurranaaja puru yakalaman, kulpuluman palinymajirri. Munu yiji kangkuluman partany ngajumili ngurnungukarti warrarnkartu mirtawa mananyaku palinyku."

<sup>9</sup> Palaja kalpartingi Abraham-ja parirr wirrirni warrkamukatalu nyarralu, palinymili yija muwarr yinyali, wurrarnala, "Yijalu palajun jilamarnanga."

<sup>10</sup> Palaja warrkamukatalu nyarralu wurrukarrapa miji-mijipa nganin-anganin kuru marna Abraham-milija. Yijapa kurri Isaac-ku mankuliny, yungkulinyjaninyi pala kurripa palinymili japartupa pipi. Palaja 10 kamalarrangu Abraham-milirrang manajaninyi, yana ngurnungu war-rarnkarti, Mijuputamiyakarti. Yananyikinyi ngurrarrangu ngurra palakart-tjakun tawunkarti, ngapikarti, Abraham-mili marrka Nayiyu palanga waninyikinyi.

<sup>11</sup> Warajanga karrpungu, jarurrukartingi, kajarna janukumartaji, jalakarti tawunja. Ngapa purlpurlpukarra marnikinyi palanga. Murtingi jurlpi-jurlpi jirnijaninyi kamal pala janukumartaji. Palakarti milpa-nikinyiyi mirtawarnjarri tawunja jarurrukartingi ngapaku mananyaku.

<sup>12</sup> Ngarrkaku muwarr pirlili. "Ngarrkakurra, ngaramarntilu nyuntuku pinakarrinyingu nyampalilu ngajumilalu, Abraham-ju. Yijalu kalkurnan paliny. Ngalypakurra kuwarringi jilimanpalu. Jurti jilipijinpalu kurri partanyku palinymilaku.

<sup>13</sup> Nyungu ngapamartaji ngaju. Tawunja nyungukarti milpanyayi kuwarringarra ngapaku kurrirrangu.

<sup>14</sup> Waraja japiirr malamarna ngapaku wupartku ngajungu yinganyaku. Yijapa wurrabalipi, 'Yuu, nyuntuku nyungungarra ngapa. Kangkulumarna ngapa kamalku nyuntumilirrangku pukun.' Kurrilu muwarr pilkuliny kamalku ngapa yinganyaku, palangarra mirtawa Isaac-ku. Palajun jurti jiliminyin pala kurri. Palajalu miranu jarrulumarnangu nyuntuku, Abraham tuku jinan."

<sup>15</sup> Ngarrkaku muwarr pinajangangarra, milanya Rebekah. (Rebekah-mili jpartu yini Bethuel. Bethuel-mili pipi yini Milcah, jpartu yini Nahor. Nyarra Nahor marrkamurniny Abraham-mili.)

<sup>16</sup> Kurri nyarra ngumpa ngalypakata. Munu karta karrima pirirringi. Pilyurrmajirri paliny.

Rebekah-lu ngapapinti ngurntingi kanganyikinyi. Janukukarti yana, katukarna kaninykurnu, ngapapinti winya jirni, kulpanya karntinyi kankakurnu.

<sup>17</sup> Jampa purrpi yanalu mirtanya, wurrarnala, "Ngapapintija yuwa-jikurra ngapa wupartu."

<sup>18</sup> "Yuu, mirta, nyuntuku nyungungarra ngapa." Jampangarra ngapap-inti ngurntija parirrja wirrirni, ngapa jurtirnalu palinyku. Minpirni.

<sup>19</sup> Palaja wurrarnala kurrilu, "Mankulumarnajanaku ngapa kamalku pukun, minpilipiyi marlkaku."

<sup>20</sup> Jampa ngapa jurtirni kuwiylimilingi minpinapintingi. Palaja mirti kulpanya janukukarti, katukarna, yarrana ngapa nyinirni, kulpanya, ngapa kanganyikinyijanaku kamalarrangku wiyyirru.

<sup>21</sup> Jamalu parrjarnikinyi palalu mirtanyalu. Wurrarnikinyarningu, "Yijapa nyungu kurri mirtawa Isaac-ku."

<sup>22</sup> Ngapa marlkaku kamalarrangulu minpirniyi. Palaja mirtanyalu kur-tanja mana milyapinti miji-miji, parirrpintijirri miji-miji pukun, wirrirnili.

<sup>23</sup> Karra marnalu, "Nganurtu jpartu nyuntumili? Yijapa waraja war-rukarti ngajupa ngajumili warrkamukatarrangu ngurranga nyuntumili jpartumilingi karta karrulupiyirni?"

<sup>24</sup> Puntaju karra marnalu, "Japartu ngajumili Bethuel. Nahor-mili partany paliny, pipi palinymili Milcah.

<sup>25</sup> Nganarnanga ngurranga wantulunyurru. Ngurra palparri nganarnamili. Warrulyjartiny kamalkupa nyurramilaku."

<sup>26</sup> Mirtanya milya kaniny jarrinalu Ngarrkaku, ngarluja nyurra marna, muwarr pinalu,

<sup>27</sup> "Ngarrkakurra, ngalypa nyuntu. Yarranja, wanka jinannganinyi. Nyuntumili muwarr yinyan ngajumili nyampali Abraham. Yijalu kalkurnanpalu pala muwarr. Pipurrulu kanyanyin nyungukarti, ngajumilikarti nyampalimirrangukarti, palinymili waljarrangukarti."

<sup>28</sup> Palaja pala kurri ngurrakarti pipimilikarti mirti jarrinyi, yimpirnajanaku muwarr mirtanyamili.

<sup>29-30</sup> Mamaji Rebekah-mili, yini Laban palanga, palinyju yirrirni palajirri parirrpintijirripa milyapinti. Marrkamurninymili muwarr pinakarrinyi. Palaja mirti jarrinyi mirtanyakarti. Paliny wararr karrinyikinyi janukumartaji, kamalja wangka.

<sup>31</sup> Laban-ju karra marnalu, "Pikaly waninyangu Ngarrka. Munu wantuluman nyungungu. Kurtali, nganarnamilikarti ngurrakarti milpuluman. Kaninypirtilu parljurnarnanyurraku nyuntukupa warrkamukatarranguku nyuntumilaku. Palanga karta karrulupiyi nyuntumili kamalarrangu pukun."

<sup>32</sup> Yanayi wiyyirr Laban-milikarti ngurrakarti. Palanga Laban-ju yinyji pirni jalingipintirrangu kamalja, warruly yinyajaninyi. Palaja ngapa kanyajanaku mirtanyakupa warrkamukatarranguku, jina ngulyanaku.

<sup>33</sup> Palaja mayi kanyalu mirtanyakaku. Wurranala mirtanyalu Laban-japa palinymilinga japatungu Bethuel-ja, "Wurralkurnunyumpuluku nganiku milpanyarna. Palaja ngalkulumarna." "Yuu, wurralamanngalayiku nganiku milpanyan."

<sup>34</sup> Wurrarnapulaku mirtanyalu, "Warrkamukata ngaju Abraham-mili.

<sup>35</sup> Ngajumilaku nyampaliku yiji Ngarrkalu ngalypa jinalu. Wirtu nyampali jirni. Kuwiyyirrangku kurrngal yinyali, kukurnjaripa nanikutupa purlikapa kamalpa tangki. Miji-mijipa warnku yinyali, warrkamukata piririmartapa mirtawanyjarri pukun.

<sup>36</sup> Yuu, ranyji waninyikinyi, palinymilalu mirtawalu, Sarah-lu, partany pirirri kanyalu palinyku. Nyampalilu ngajumilalu wiyyirr warnkupa kuwiyyirrangupa wurrukarra yinyali palangarra partany.

<sup>37-38</sup> Minyirru wurrarnaji, 'Mirtawa kangkulumanpalu ngajumilaku partanyku. Munu mananyaku ngurrara kurri nyunguja warrarnja, Canaan-ja ngurrara. Ngajumilikarti japatumilikarti warrarnkartu yankuluman, ngajumilirrangukarti yankuluman. Ngurnungujangarra mankulumanpalu mirtawa ngajumilaku partanyku.' Palajun wurrarnaji nyampalilu ngajumilalu.

<sup>39</sup> Karra marnarnalu, 'Yijapa pala kurri ngajungu munu milpuliny.'

<sup>40</sup> Karra marnaji, 'Palinymili angel walangkarr ngakalamanga Ngarrkalu. Palalu angel-ju jurti jilamanta kurri, ngajumilingi japatumilirrangungu.

<sup>41</sup> Wurraliyingulu, "Munurti. Munu yungkulupiyirni mirtawaku partanyku Abraham-milaku." Palajunmarta wurranaja puru yakalaman, kurrimajirri kulpuluman.' Palajun wurrarnaji Abraham-ju.

<sup>42</sup> Kuwarri turlpanyarna janukungu tawunmartaji nyurramilimartaji. Ngarrkanga wurrarnarnalu, 'Ngarrkakurra, nyampali ngajumili, Abraham, nyuntuku pinakarrinyangu, nyuntumilirrangungu paliny. Kuwarri ngalypa jilipijin. Jurti jilipijin pala mirtawa Isaac-ku.

**43** Nyungunu ngaju janukumartaji. Kurrirrangu ngapaku milpanyaja waraja japiirr malamarna, "Yuwajikurra ngapa wupartu ngapapintija nyuntumilija."

**44** Yijapa puntaju karra malkulupiji, "Yuu, nyuntuku nyungungun-garra ngapa. Ngapa kangkulumarnajanaku nyuntumili kamalarranguku pukun." Palajun jinaja wantuliny mirtawa Isaac-ku. Jurti jilipijin palangangarra kurri.'

**45** Ngarrkaku muwarr pinajangangarra, milpanya Rebekah, ngapapinti ngurntingi kanganyikinyi. Ngapa mana. Palaja japiirr marnarna, 'Yuwajikurra ngapa minpinaku.'

**46** Nyampalu ngurntija kaniny jirni ngapapinti, karra marnaji, 'Yuu, nyuntuku nyungungungarra ngapa. Kangkulumarnajanaku ngapa nyuntumilirranguku kamalarranguku pukun.' Palaja minpirnarna, palinyju ngapa yinyajaninyi kamalarrangu pukun.

**47** Palaja japiirr marnarna, 'Nganurtu japartu nyuntumili?' Karra marnaji, 'Japartu ngajumili Bethuel. Nahor-mili partany paliny, pipi palinymili Milka.'

Palaja kurringi milyapinti wirrirnirnili, parirrpintijirri wirrirnirnili parirrjajirri palinyja.

**48** Mirtawa Isaac-ku jurti jirniji Ngarrkalu ngajumilija nyampalimilija waljarranguja. Palajalu milya kaniny jarrinyirni, ngarluja nyurra marnarna Ngarrka, wurrarnarnala, 'Yarranija. Wanka jirninyin.'

**49** Yuu, wunyjurru muwarr pilkulinyumpulu? Wurralkulinyumpulalu nyampaliku ngajumiliku, 'Yu'? Nyungu kurri partanyku palinymilaku yungkulunyumpulalu? Munujalu, warinykurnu jilimarna.'

**50** Puntaju karra marnapulalu Laban-jupa Bethuel-ju, "Nyungungarra jirni Ngarrkalu. Kurri nyarra yankuliny. Munu kunta jinakalayi yananya."

**51** Rebekah kangkuluman, yankulunyurru. Nyuntumili nyampalimili partanyku mirtawa jarruliny."

**52** Pulnymili muwarr pinakarrinyajalu pala mirtanya, Abraham-mili warrkamukata, murtingi julpi-jurlpi jarrinyi, Ngarrkanga wurrarnala, "Yarranija. Wanka jirninyin."

**53** Palaja Rebekah-nga yinyali miji-mijipa wurrukarra ngalypakata. Yinyapulinyi Rebekah-mili mamajipa pipi pukun warinypa wariny ngaly-pakata wurrukarra.

**54** Palaja mirtanyalupa palinymilalu warrkamukatarrangulu nganayi mayi, wayin minpirniyi. Karta karrinyiyi palangangarra.

Marntungu kartaja turlpanyaja mirtanyalu wurrarnapulaku Ripikamilinga mamajingipa pipinga, "Kuwarri ngajumilikarti nyampalikarti kulpulumarna ngaju, kurri pukun kangkulumarna."

**55** Karra marnapulalu, "Mimarn-mimalakurra! Pala kurri nyungungu jampa waninyaku, yijapa 10 karrpuku wantuliny. Palaja yankuluman, kurri kangkuluman."

**56** Karra marnapulaku, "Ngalypa jirniji Ngarrkalu. Kuwarri jampa kulpanyaku ngajumilikarti nyampalikarti. Munukurra kunta jil-iminyinyumpulu."

**57** "Mimalakurra. Kurri japiirr malkulayi, wunyjurru muwarr pilkuliny."

**58** Kamarnapulalu. Milpanyaja japiirr marnapulu, "Nyungunu mirtanyanga yankuluman?" Rebekah-lu karra marna, "Yuu."

**59** Palaja Rebekah ngakarniyi yananyaku mirtanyangapa palinymili warrkamukatarrangunga. Palanga mirtawa mirtawari, purlpi palinyju Rebekah partanya kalkuna wirtu jirnipa. Paliny pukun ngakarniyi.

**60** Ngalypa muwarr pirniyalu Rebekah-ku. "Yijalu ngalypa jilimanga Ngarrkalu. Karluji jamujirrangu nyuntumilipa nyirrirnikartijarrangu janamili kurrgal yiji jarrulupiyi. Yijapa malyparrkata jarrulupiyijanaku jinta, nyuntumilirrangu nyampali jarrulupiyijanaku palarranguku jintaku malyparrkataku."

**61** Palaja kamalarrangungu karntinyiyi Rebekah-pa kumpararrang palinymili, yajarniyi mirtanya. Palajun mirtanyalu Rebekah wiyi jirni, kulpanyikinyi palinymilikarti nyampalikarti.

**62** Palanga Isaac Canaan-ja warrarnja kurilakurnungu waninyikinyi, palakurtirringi yintanga, yiningi ngapingi, Lahai-Roi-ngi.

**63** Warajanga jarurrukartingi jalanga puru marnti yaninyikinyi, kamalarrangu yirrirnajaninyi palinyju, milpanyikinyiyi.

**64** Kajangulu Rebekah-lu yirrirni Isaac, kamalja katukarna.

**65** Mirtanya japiirr marna, "Nganurtu ngurnungu pirirri, milpayinyi nganyjurrukarti?" "Palangarra nyampali ngajumili, Isaac-ngarra." Wara ngumpapinti mana, ngumpa yamarnarninyi Rebekah-lu.

**66** Palaja mirtanyalu wiyirr yimpirlili Isaac-ja.

**67** Palaja Rebekah kalikukarti kanya Isaac-ju. Kaliku nyarra purlpi pipimili palinymili waninyikinyi. Ngarlu kurlu waninyikinyi pipijalu marlkarijalu. Kuwarri mirtawa palinymili jarrinyi Rebekah. Ngarlungu yiji jirni Isaac-ju. Palajangarra pikaly jarrinyi, munu paju karrinyamalu palinymilaku pipiku.

## 25

### *ABRAHAM-MILI WARINYARRANGU PARTANYKARRANGU (25:1-6)*

**1** Abraham-ju purlpi yiji mana wariny mirtawa, yaru. Palinymili yini Keturah.

**2** Kanyapulujaninyi 6 piririmarta, pulanymili partanykarrangu: Zimran, Jokshan, Medan, Midian, Ishbak and Shuah.

**3** Jokshan japartu jarrinyi Sheba-kupa Dedan-ku. Dedan japartu jarrinyijanaku Ashurites-kupa Letushites-kupa Leummites-ku.

**4** Midian-mili partanykarrangu Ephah-pa Epher-pa Hanok-pa Abida-pa Eldaah. Palarrangu wiyirr Keturah-mili.

**5-6** Palangangarra wirtu jarrinyiyi. Abraham-ju yinyajaninyi wurrukarra, palaja ngakarnajaninyi warinykartu warrarnkartu, kakarra, Isaacngamarra ngakarnajaninyi. Palaja wurrukarra jinta wiyirr palinymili yinyali Isaac, wurrukarra palinymili ngani warralpirti.

### *ABRAHAM MARLKARRI JARRINYI (25:7-11)*

**7-8** Abraham partunurrangu-partunurrangu waninyi, 175-ja. Palaja mirtanya jarrinyaja marlkarri jarrinyi.

**9-10** Palinymili partanyjirri Isaac-jupa Ishmael-ju wirrirnipulu pulanymili japartu jurntingi kaninykurti, Machpelah-nga. Purlpi palangarra jurnti waninyikinyalu warinymili. Abraham-ju mana warnkulu, warnkurrangu marlu yinyala Ephron palaku jurntikupa jungkaku. Purlpi marlkarri jarrinyaja palinymili mirtawa, Sarah, Abraham-ju wirrirni palanga jurntingi. Palangangarra jurntingi kuwarri palinymilalujirri partanyjirri wirrirnipulu paliny pukun.

<sup>11</sup> Palaja Ngarrkalu tuku jirnikinyi Isaac. Isaac-ju ngurra jirni yintanga, ngapangi, Lahai-Roi-ngi.

#### *ISHMAEL-MILI NYIRRIRNIKARTIJARRANGU (25:12-18)*

<sup>12</sup> Purlpi Abraham karta karrinyipulu Hagar, warrkamukata Egypt-ja Sarah-mili. Hagar-lu partany kanya, Ishmael.

<sup>13</sup> Ishmael japartu jarrinyijanaku pirirri partanykarrangu: Nebaioth, Kedar, Abdeel, Mibsam,

<sup>14</sup> Mishma, Dumah, Massah,

<sup>15</sup> Hadad, Tema, Jetur, Naphish, Kedemah

<sup>16</sup> Palarrangumili nyirrirnikartijarrangu 12 tribes, yini janamili yinyayi tawunkurrangupa ngurrarrangu.

<sup>17</sup> Ishmael 137 partunurrangu jarrinya, marlkarri jarrinyi.

<sup>18</sup> Ishmael-mili nyirrirnikartijarrangu warrarnja waninyayi Havilah-nga partijirri Shur-nga. Pala warrarn egypt-ja kakarrakurnu, Assyria-karti. Kaja waninyayi Abraham-milirrangu nyirrirnikarijarrangu.

#### *WURRALAMARNANGU ISAAC (25:19-20)*

<sup>19</sup> Nyungu muwarr Isaac-mili, partany Abraham-mili.

<sup>20</sup> Isaac 40 partunurrangu jarrinya, mirtawaku kanya Rebecca, Bethuel-mili kurntal. Bethuel Aram-jirri pirirri, Mespotamia-ja. Rebecca marrka Laban-ku.

#### *PARTANYJIRRI KANYAPULINYI REBEKAH-LU (25:21-26)*

<sup>21</sup> Isaac-pa palinymili mirtawa punja waninyipulu palanga partanyama-jirri. Isaac-ju japirr marna Ngarrka, "Partany yungkuluman ngajumili mirtawa." Pinakarrinyalu Ngarrkalu, palaja pala mirtawa ngayinykarra jarrinyi.

<sup>22</sup> Kalkurnikinyipulinyi kujarra partanyjirri ngayinyja. Jinarn-jinarn pirlakinyipulu. Rebekah ngarlu kurlu waninyikinyi. Japirr marna Ngarrka, "Nganja?"

<sup>23</sup> Ngarrkalu wurrarnala, "Kujarra kangkulumanpulinyi pirirrijirri. Wirtu jarrinya, jinta pilkulinpularninyi. Jamuji karlujirrangku kur-rngaljartiny yiji jarrulunypulu. Warinymilirrangku kulijarturrangku jar-rulupiyi, warinymilirrangku munu. Marrkamurninymilirrangku nyampali wantulupiyijanaku murrkangunyamurninymilirrangku."

<sup>24</sup> Palaja Rebekah-lu kanyapulinyi partanyjirri, pirirrijirri.

<sup>25</sup> Murrkangunyamurniny ngayarta jarrinyi pilyarripa mampuly-mampuly. Palajalu yini marnapulu Esau.

<sup>26</sup> Palaja marrkamurniny ngayarta jarrinyi. Warlirnikinyi mama-jimurninymili luku. Yini marnapulu Jacob. Palanga Isaac mirtanya waninyikinyi, 60 partunurrangujartiny.

#### *PILYARRI MAYI NGANA ESAU-LU (25:27-34)*

<sup>27</sup> Palajirri Esau-pa Jacob wirtu jarrinyipulu, pirirri jarrinyipulu. Esau kuwiymarta. Kuwiyiku yananyikinyi. Jacob ngatu yiji, waninyikinyi ngurranga, warrkamu jarrinyikinyalu japatumurninyku.

<sup>28</sup> Esau-lu kanganyikinyalu kuwiyi japatumurninyku ngananyaku. Murrkangunyamurniny Isaac-ja ngarlungu yija yiji. Nyirtingunyamurniny pipimurninyja ngarlungu yija yiji.

<sup>29</sup> Warajanga karrpungu kamparnakinyarninga mayi Jacob-ju, pilyarri mayi, pala yini lintil. Kulpanya kuwiykartija Esau. Janparrja paliny.

<sup>30</sup> Wurrarnala marrkamurninyja, "Ngaju janparr. Jinta yuwanyi pala pilyarri mayi. (Palajalu yini yinyayi wariny, Edom.)

<sup>31</sup> Jacob-ju puntaju karra marnalu, "Kulakurra! Wurratalapjin yija muwarr nyuntumili. Murrkangunya nyuntu. Yarti japatu ngalimili marlkarri jarrinya, wantulumanngalika nyampali nyuntu. Mankuluman wirtumarta wurrukarra. Ngajulu wupartumarta mankulumarna. Wurratalaji ngaju wantulumarnangu mamajikapali. Palajun muwarr pinajalu, mayi yungkulumarnanta."

<sup>32</sup> Esau-lu puntaju karra marnalu, "Mayimajirrija marlkarri jarrarnili. Palaja munu mankulumarna wurrukarra, munu mamaji wantulumarnangu. Puru yiji pala. Jinta yuwanyi pala mayi!"

<sup>33</sup> Jacob-ju puntaju karra marnalu, "Muwarrkurra yinkumarta yungkuluminin. Palaja yungkulumarnanta mayi."

Esau-lu ngarlungu karra marnarningu, puru nyampaliwayiku waninyaku palinyku, karrinyikinyi wartapirti waninyaku. Muwarr yinyali, "Yuu, nyuntu wanta mamajikapali."

<sup>34</sup> Palajalu Jacob-ju martumpirripa pilyarri mayi yinyali. Palaja Esau-lu ngana, minpirni, yana.

## 26

### *ISAAC YANA WARRARNKARTI PHILISTINE-ARRANGUMILIKARTI (26:1-22)*

<sup>1</sup> Purlpijangarra punja waninyayi ngapa munu pungkama Abraham-milinga warrarnjakurtirri, yana paliny Gerar-karti. Warinymal yarti waninyi ngapa munu pungkuma Isaac-ku. Paliny yana Gerar-karti, ngapikarti, Abimelech-karti, kingi paliny Philistine-arranguku.

<sup>2</sup> Ngarrka ngayarta jarrinyalu Isaac-ku, wurrarnala, "Munu yaninyaku Egypt-karti, wanta nyungungu warrarnja, wurrarnarnangupa.

<sup>3</sup> Nyungungu wanta, tuku jilamarnanta ngajulu, ngalypa jilamarnangu. Ngajulu yungkulumarnanta wiyyir nyungu warrarn, nyuntumili jamuji karlujirrangupa nyirrirnikartijarrangupa.

<sup>4</sup> Ngajulu kalkulumarna muwarr pala winyjinijalu Abraham-ja. Panikatarrangu kurrgal yiji, partarl yini malkulumanjaninyi. Jamuji karlujirrangupa nyirrirnikartijarrangu kurrgal yiji yungkulumarnanta, partarl yini malkulumanjaninyi. Yungkulumarnajaninyi nyungu warrarn wiyyir. Warinyarrangulu marrngukarralu janalu yirrilipiyi ngajulu ngalypa jirnirninyurrukapa tuku jirnirninyurrukapa. Janalu japirr malamanyiya palajunkapaliku jinaku janakupa.

<sup>5</sup> Abraham-ju ngajumili muwarr wirturrangu tuku jirnikinyijaninyi. Palajunjalu ngajulu nyungurrangu jilamarnanga."

<sup>6</sup> Palajalu Isaac palanga Gerar-nga waninyikinyi.

<sup>7</sup> Piririmartalu japirr marnaya palinymilaku mirtawaku, palinyju wurrarnajanaku, "Paliny ngajumili marrka." Munu wurrarnamanjanaku pala mirtawamurniny palinymili. Rebekah kumparakata yiji. Wirnti karrinyikinyi Isaac, "Palarrangulu piririmartalu marlkarri wirlalaminyili Rebekah mananyaku."

<sup>8</sup> Palanga Isaac waninyikinyi punja. Palaja Abimelech-ju parrjarna kaninykurnu mayangangulu, yirrirnipulinyi Isaac-pa Rebekah yarungu jirnikinyipularninyi.

<sup>9</sup> Abimelech-ju muwarr ngakarnalu Isaac-ku, "Ngajukarti milpuluman." "Pala Rebekah nyuntumili mirtawamurniny! Nganiku wurrarnanpa marrka nyuntuku?!" "Ngajulu kurlkarri marnakinyarninyi, wurrarlirnili

ngajumilingi mirtawanga, 'Nyuntuku mananyaku wirlalinyiyili marlkarri.'"

<sup>10</sup> "Ngani jirninannganinyi! Waraja ngajumili piriti yijapa karta karri mapulu nyuntumili mirtawa. Ngarrkalu wirlarnamanganinyi nyuntujalu mitujalu!"

<sup>11</sup> Wurrarnajanaku palinymilaku marrngurrangungu, "Munu jilkulinyurru kurlujartiny nyunguku pirirrikupa palinymilaku mirtawaku. Yijapa palajun jilkulinyurru marlkarri jarrulinyurru."

<sup>12</sup> Isaac-ju wilyki jungkanga wirrirnajaninyi. Ngarrkalu ngalypa jirnikinyalu, warajaja kurtanjaja wilykija mana 100 kurtanarrangu.

<sup>13</sup> Wurrukarrarrangu palinymili wirtu jarrinyikinyiyalu, munuku munu jarrinyaku, kurrngal yiji kukurnjaripa nanikutupa purlimanpa tangkipa kamalpa.

<sup>14</sup> Philistine-arrangu ngamppany jarrinyiyalu. Abraham-ja wankanyungu ngarrany palinymilalu warrkamatarrangulu pirti karlinyiyi ngapaku mananyaku. Yijalu ngapa manayi.

<sup>15</sup> Kuwarrilu marlkarijalu Abraham-ja Philistine-ju ngamppanyju yamar-nayanjaninyi pirtirrangu ngapajartiny.

<sup>16</sup> Abimelech-ju wurrarnalu Isaac-ja, "Yakalaman warrarn nganarnamili, nyuntu wirtu jarrinyin yiji, munu nganyjurru warajanga waninyaku."

<sup>17</sup> Isaac-ju pala warrarn yakarna, ngurra jarnti jirni partijirri kaniny kujarranga warnkungu, yini Gerar Valley. Punja waninyi palanga.

<sup>18</sup> Yarrana karlinyi Isaac-ju nyarrarrangu ngapapinti purlpi yamar-nalpiyi Philistine-ju. Yini waraja ngarrany yinyajaninyi warajangarra palinymilalu japatulu yinyaljaninyi.

<sup>19</sup> Palinymilalu warrkamatarrangulu karlinyiyi Gerar Valley-ngi pirti, ngapa warrkirnikinyi kaniny warnkungu ja.

<sup>20</sup> Kulipartirnayarninyi ngurrararrangulu japatu jirnakatalupa Isaac-milalu japatu jirnakatalupa. Ngurraralu wurrarnayanaku, "Nyungu nganarnamili ngapa!" Isaac-ju yini marna pala ngapapinti "Kulipartinap-itingi".

<sup>21</sup> Isaac-milalu warrkamatatalu karlinyiyi wariny pirti ngapapinti. Palangamarra kuli partirnayi. Palajunjalu yini marna "Malyparrjartinyu".

<sup>22</sup> Palaja yana, wariny karlinyi ngapapinti. Palangamarra munu kulipartirnayi. Yini marna pala ngapapinti, "Warrarn Ngurrku-ngurrkumajirri". "Ngarrkalu warrarn wirtu jirninganyjurruka yana-yananyaku, wirtu jar-ruliny nganarnaka kuwiyirrangu wiyyirr, nganyjurru pukun."

### *BEERSHEBA-NGA MUWARR YINYALU ISAAC YARRANA NGARRKALU (26:23-25)*

<sup>23</sup> Palaja Isaac yana Beersheba-karti.

<sup>24</sup> Palanga warrukartingi Ngarrka ngayarta jarrinyalu. "Ngajulungarra tuku jirninalu japatuku nyuntumilaku Abraham-ku. Munu wirnti karrinyaku, ngajulu kalkurnarnanta nyuntukupa. Ngajulu winyjirnirnilu Abraham-ja, palajulu ngajulu ngalypa jilamarnanga, ngajulu yungkulumarnanta marlu jamuji karlujirrangupa nyirrirnikartijarrangu."

<sup>25</sup> Isaac-ju kuru marna warnkurrangu, ngayinya nyurra marna Ngarrka. Ngurra jarnti jirni palanga, warrkamatatalu palinymilalu karlinyi pirti ngapapinti wariny.

### *ABIMELECH TURLPANYA ISAAC-MILINGI BEERSHEBA-NGA (26:26-33)*

<sup>26</sup> Abimelech tamarna, palinymilijartiny yatilpajartiny, Ahuzzath, Phicol pukun kanginyikinyi, nyampali palinymilaku kulikatarranguku.

<sup>27</sup> Isaac-ju japirr marna, "Nyuntulu kulilu yirrirninyin purlpilu, wurrarnijin yakalamarna nyuntumili warrarn. Nganiku kuwarri milpanyanpa yirrinaku ngajuku?"

<sup>28-29</sup> "Nganarnalu yirrirnayirni Ngarrkalu tuku jirninti. Winyjiliminyirnarninyi nganyjurru. Munu kurlu jirnimiyyirninga, ngalypalu jirniyirningu, murru marnayirninti kulimajirrilu. Nganarnalu kar-rinyiyirna nyuntuku nganarnaku munurla kulilu yirrinaku. Ngarrkalu ngalypa yiji jirninti."

<sup>30</sup> Isaac-ju manajaninyi mayirrangu marlu, mayikupa kuwiyyiku kampanaku, wiyyirku ngananyaku. Nganayi mayi, wayinpa minpirniyi warajanga.

<sup>31</sup> Warinyja karrpungu pirrpa-pirrpanga muwarr winyjirnayirnangu.

<sup>32</sup> Palaja, "Jipi yarrayi! Yuu, jipi wantiyi!" Jinta pirniyarninyi ngarlu pikalyju.

Palangangarra warajanga karrpungu Isaac-milirrangu warrkamukatar-rangu milpanyiyalu, wurrarniyili, "Karlinyiyirni wariny pirti, ngapa manayirni!"

<sup>33</sup> Yini marna pala pirti ngapajartiny, "Shibah", "Winyjinija Ngapapinti". Palajunjalu pala tawun yini marnayi palalu yinilu, Beersheba, kuwarrikartijakun.

### *ESAU-MILI NYUPAJIRRI (26:34-35)*

<sup>34</sup> Esau 40 partunurrangujartiny, manapulinyi kujarra mirtawajirri. Palajirri mirtawajirri ngurrara waninyikinyipulu, Hittite-milirranguja. [??]

<sup>35</sup> Isaac-pa Rebekah pikalymajirri waninyikinyipulu ngarrayangamarra-jirri. Ngarlu yija kurlu pirnipulupulinyi ngarrayalujirri.

## 27

### *JAPARTUMARNINY MITU MARNA JACOB-JU (27:1-29)*

<sup>1</sup> Mirtanya jarrinya Isaac pampuru jarrinyi. Warajanga karrpungu kamarnalu murrkangunyamurninyku, Esau-ku, "Murrkangunya, kurtali!" "Yuu, ngani?"

<sup>2</sup> Japartulu wurrarnala, "Pinakarra! Ngaju mirtanya jarrinyarni. Marlkarri jarrarnili kuwarri.

<sup>3-4</sup> Wankanyin wankanyungu ngajungu, wurralamarnangu muwarr nyuntungu, nyungu muwarr Ngarrkalu ngalypa jilamanga. Pinakarraj, kawaninyi jantu kuwiyyikartilu. Wirlanajalu kampalapijin juri yiji kuwiyyi ngajuku. Kuwiyyi ngananyajalu wurralamarnangu muwarr, marlkarri jarrinyamarninyju."

<sup>5</sup> Muwarr Esau-ngu wurranajalu, Rebekah-lu pinakarrinyikinyalu. Esau yana ngurraja kuwiyyikarti.

<sup>6</sup> Palaja Rebekah-lu wurrarnala nyirtingunyamurninyja, "Pinakar-rinyirni japartulu wurrarnikinyili mamajingi,

<sup>7</sup> 'Kuwiyyikarti yarra, wirlanaja kulpajayalu, kampalapijin juri yiji kuwiyyi. Ngananyajalu wurralamarnangu muwarr ngalypa nyuntungu, marlkarri jarrinyamarninyju.' Palajun wurrarnala mamajingi.

<sup>8</sup> Pinakarraj nyuntulu, nyirti.

<sup>9</sup> Yarra, marrapulinyi kujarra wupartujirri nanikutujirri. Wirlanajalu kangkulupijin. Kampalamarnalu japartuku juri yiji kuwiyyi, palnymili juri yiji.

<sup>10</sup> Nyuntulu kuwiyyi kangkulumanpalu japartuku. Palaja wurralamangu nyuntungungarra muwarr ngalypakata, marlkarri jarrinyamarninyju."

<sup>11</sup> Jacob-ju karra marnalu, "Pinakarraj! Mamaji ngajumili mampuly-mampuly, ngaju kapuraly, mampumajirri.

<sup>12</sup> Japartulu warlilanyili. Warlinaja miranu jarrajili ngaju nyirti, wurralaryili, "Mitu marnanyin nyuntulu!" Wurrallala Ngarrkanga, kur-palamar-narninyi Ngarrkanga!"

<sup>13</sup> Pipilu wurrarnala, "Wirntiway! Munu kurrpalamaparningu. Ngajulu ngalypa jilamarnanga. Ngajuku pinakarraj. Nanikutujirri kangkulupijin."

<sup>14</sup> Jacob-ju pinakarrinyalu pipimurninyku. Wirlarnapulinyi kujarra nanikutujirri, kanyapulinyi pipimurninykarti. Kamparnalu juri yiji kuwiyi palinymilaku pirirriku.

<sup>15</sup> Palaja Rebekah-lu mana ngalypakata wururrangu murrkangun-yamurninymili, Esau-mili, yinyali pala wurru nyirtingunyamurninyja. "Wirrilarningu nyungu wururrangu."

<sup>16</sup> Palaja manajaninyi kujarrapa waraja kutarrangu kiyrnarrangu nanikutuja, wirrirlili parirrjapa ngalyinga.

<sup>17</sup> Yinyali murla kuwiypa martumpirri Jacob-ja. "Kawalu nyungu mayi japatukarti."

<sup>18</sup> Palaja kanyalu mayi japatumurninykarti, karra marnalu, "Japartukayi!" "Yuu, nganurtu nyuntu?"

<sup>19</sup> Jacob-ju mitu marna, karra marnalu, "Ngaju murrkangunya, Esau. Yananyaja kulparyarnangu kuwiyyartiny, nyarrapa wurrarnajin. Kajala, ngala nyungu juri yiji kuwiyi. Ngananyajalu wurralapijin muwarr Ngarrkalupa ngalypa jilapiji."

<sup>20</sup> Isaac-ju karra marnala, "Payi! Nyampalu yiji manan kuwiyi!" Jacob-ju mitulu karra marnalu, "Nyampalilu nyuntumilalu Ngarrkalu nyampalu jurti jirniji kuwiyi."

<sup>21</sup> Isaac-ju karra marnalu, "Warinykapalirla muwarr pinan. Kurtali! Warlinajalu miranu jarrulumarnangu."

<sup>22-23</sup> Palaja wangka jarrinyalu, japatulu warlirni. Kiyrnalu palalu nanikutujalu mitu marna Isaac. "Nyuntu muwarr pinan Jacob-kapali, parirr nyuntu Esau-kapali."

<sup>24</sup> Yijalmartangulu japiirr marna japatumurninyju, "Yija-yiji nyuntu Esau?" "Yuu, ngaju Esau."

<sup>25</sup> "Karnaji pala kuwiyi. Ngananyajalu wurralamarnangu ngajumili muwarr." Jacob-ju kanyalu kuwiyi, yinyali minpinapinti pukurl, pilyarri wayin.

<sup>26</sup> Palaja ngananyajalu Isaac-ju karra marnalu, "Wangka kurtaliji, yampu malanyi."

<sup>27</sup> Milpanyalu, yampu marna. Isaac-ju parntirni Esau-mili wurru. Karra marnalu Jacob-ku, "Ngajumili partany, parntinyan nyuntu warrulykapali, parntinyan warrarnkapali warruly juri yiji. Ngarrkalu kalkurnikinyi pala warrarn."

<sup>28</sup> Ngarrkalu ngakalamangu ngapa warrarnku nyuntumilaku. Marlu mayi turlpulupiyi ngunarrijirri warrulyja nyuntumilingi warrarnja.

Yungkulmanta mayi marlupa ngapa minpinaku.

<sup>29</sup> Marrngu ngunarrija warrarnja warinyarranguja warrkamu jilapiyingu, pinakarrulupiyingu. Nyuntu wantulumanjanaku nyampali marrkamilirranguku, nyuntumili pipimili partanykarrangu murtingi jurpu-jurpu jarrulupiyingu jinanga nyuntungu.

Jinta panyu karrulupiyingu,  
japirr malapiyi Ngarrka kurlu jinaku nyuntuku.  
Puntaju kurlu jilkulinyjanaku Ngarrkalu.  
Jintalu ngalypa jilapiyingu.  
Puntaju ngalypa jilkulinyjanaku Ngarrkalu.”  
Palajun Jacob-ja wurrarnala Isaac-ju. Wurrarnala palajun ngalypa  
jilkuliny palinyku Ngarrkalu.

*ESAU KUWIYIKARTIJA KULPANYA. MIRANU JARRINYILI MITUKU  
(27:30-45)*

<sup>30</sup> Palaja Jacob yana, yakarna palinymili japartu palanga. Jampa Esau  
kulpanya kuwiyikartija.

<sup>31</sup> Kamparna kuwiyi jurikata. Kampanajalu kanyala japatukarti.  
“Japartukayi, kajala! Kuwiyi ngalkuluman nyungu ngajuja. Nganinyajalu  
wurralapijin Ngarrkamili ngalypakata muwarr. Ngarrkamilalu muwarrju  
ngalypa jilapijin ngajuku.”

<sup>32</sup> Isaac-ju japirr marna paliny, “Nganurtu nyuntu?” “Ngaju nyuntumili  
murrkangunya, Esau.”

<sup>33</sup> Jampa pinakarrinyi Esau-mili muwarr, jannganka pirni wirntijartiny.  
“Nganurtulu kuwiyi wirlanajalu yinyaji ngajungu? Jipi kuwiyi nganarna  
ngajulu, kuwiyi wiyyir. Yinyarnala ngajumili ngalypakata muwarr  
palinyja. Yuu, Ngarrkalu ngalypa jilkulinpalu muwarrja palaja.”

<sup>34</sup> Jampa Esau-lu pinakarrinyi pala muwarr ngarlu kurlu jarrinyi.  
Ngangkurl jirni marrja palanga paliny. Japirr marna japatumurniny  
palinyju, “Yuwanyi nyuntumili ngalypakata muwarr ngajungu pukun.”

<sup>35</sup> Palinyju karra marnalu, “Munu yiji! Ngajulu yinyarnala ngajumili  
ngalypakata muwarr. Nyuntumilalu marrkalu mitu marnanyi muwarrku  
palaku. Yinyarnala palinyja ngajumili ngalypakata muwarr. Munu yiji  
yinganyakarnanta pala muwarr.”

<sup>36</sup> Esau-lu karra marna, “Ngajumili marrka waninyi marrnguku mitu  
manaku. Yini yija-yiji ngalypakata Jacob palinyku. Kujarramal mitu  
marnanyi ngajumilalu marrkalu. Mitu marnanyi mamajikapali wur-  
rarnanyi ngaju. Mitu marnanta muwarrku Ngarrkamilaku, yinyanpili  
palinyja, munu yingamijin ngajungu. Yungkulupijinkurra ngajungu pukun  
nyuntumili ngalypakata muwarr! Palajun Ngarrkalu ngalypa jilapiji  
ngajungu pukun.”

<sup>37</sup> Isaac-ju karra marnalu, “Wunyjurrulu muwarrju wurralkurnungu,  
ngajumili partany? Ngajulu wirrirnirni nyuntumili marrka nyampali  
nyuntuku. Nyuntumilirranglu warrkamu jarrulupiyijanaku palinymilir-  
ranguku. Wurrarnarnala palinyja, palinyju mankuliny kurrngal mayipa  
wayin.”

<sup>38</sup> Esau-lu wurrarnala japatumurninyja, “Wupartu muwarr ngaly-  
pakata yuwa! Wurratalai warajajakun ngalypakata muwarr!” Ngangkurl  
jirni paliny marrja.

<sup>39</sup> Japatumurninyju karra marnalu, “Nyuntu wantuluman pujunungu  
warrarnja, ngapapa puru pungkulmangu wupartu nyuntumilingi war-  
rarnja.

<sup>40</sup> Waninyangkuluman kulikarra palanga. Marrka waninyangku-  
lumangu nyampali nyuntuku. Yartipa jinta kangkulumanpili. Palaja  
munu jakurlilamanta warrkamuku. Palangarra muwarr yinganyarninta,  
partany.”

<sup>41</sup> Palangulu Esau-lu kurlkarri marnikinyi japatumili ngalypakata muwarr Ngarrkaja, yinyali japatumurninyju Jacob-ja. Palajalu Esau panyu karrinyikinyalu marrkamurninyku palinymilaku. Kurlkarri marnikinyi palinyju, "Yartipa marlkarri jarruliny ngajumili japatu. Palinyku ngangkurl jilaminyalu. Palangulu marlkarri wirlalamarnaja marrka."

<sup>42</sup> Wariny palaku muwarrku Esau-milaku miranu jarrinyi, wurrarnala pipingi pulanymilingi. Marrkamurninyku kamarnalu Rebekah-lu, wurrarnala, "Nyuntumilalu mamajilu kurlkarri marninyi wirlanaku nyuntuku marlkarri. Puntajulu wirlalapiyi paliny pukun. Ngaju wantulumarna partanymajirri.

<sup>43</sup> Pinakaraji, marlkarringimarra. Yarra nyunguja. Yarra warrarn warinykartu, ngapikarti, Haran-karti, ngajumili mamajikarti, Laban-karti.

<sup>44</sup> Palanga wantulumanpili jampakurra.

<sup>45</sup> Yartipa mamajilu kakulkulinpili nyarrapa mitu marnan. Palaja mamaji ngalypa jarrulumangu nyuntuku, kulimajirri. Palaja muwarr ngakalamarnangu. Ngajulu karrinyarnanyumpuluku wankaku waninyaku, marlkarriwayi." Palajun Rebekah muwarr pirlili.

### *REBEKAH-LU WURRARNALA PIRIRRINGI YUNTURI JARRINYI MIRTAWANYJARRINGIMARRA HITTITE-MILIRRANGUNGUMARRA (27:46)*

<sup>46</sup> Palaja Rebekah-lu karra marnalu palinymili pirirriku, "Palajirri mirtawajirri Heth-milirranguja, mirtawajirri Esau-milijirri, malyparr jinanyipulu. Yijapa Jacob-ju mirtawa nyunguja warrarnja marrali, Heth-milirranguja. Yijapa palajun jarrinyajanga ngaju panyu karrulumarna wankanyuku waninyaku, marlkarri jarrulumarnajanaku janangamarra."

## 28

### *JACOB NGAKARNA ISAAC-JU WARINYKARTI WARRARNKARTI (28:1-5)*

<sup>1</sup> Isaac-ju kamarnalu Jacob-ku, muwarr pinalu ngalypalu, "Nyuntulu mankuluman mirtawa nyungujawayi, Canaan-jawayi.

<sup>2</sup> Nyunguja yankuluman ngunarri warrarn warinykartu, ngapikarti, Mesopotamia-karti. Yankuluman ngurrakarti ngapikarti, Bethuel-karti, nyuntumili jamujikarti. Mankulumanparnanga mirtawa palajangarra, kakajija nyuntumilia, Laban-ja.

<sup>3</sup> Ngarrkalu ngalypa jilamanga nyuntuku, yungkulumanta partanykar-rangu marlu, kurrngal yiji wantulkulinyurru.

<sup>4</sup> Ngarrkalu palajun jirni Abraham-ku. Nyuntuku palajun jilamanga, partanykarrangukupa. Yungkulumanta nyungu warrarn nyuntungu ngaramarntiku. Kuwarri waninyan ngajarrikapali nyungunu warrarnji. Yarti yungkulumanta nyungu warrarn ngaramarntiku Ngarrkalu. Purlpi wurrarnala Abraham-ja, "Nyungu warrarn wantuliny nyuntumilirranguku."

<sup>5</sup> Palajunja Isaac-ju ngakarna Jacob ngunarri. Palaja Jacob Mesopotamia-karti yananyikinyi, kakajiku kanyjirnikinyalu, Laban-ku, ngurranga ngapinga, warrarnja Aram-ja. Pala Laban partany Bethuel-mili.

### *ESAU-LU WARINY MIRTAWA WARAJANGA JINI, ISHMAEL-MILI KURN-TAL (28:6-9)*

<sup>6</sup> Kuwarri miranu Esau, japatulu palinymilalu Isaac-ju ngalypa muwarr Ngarrkaja yinganyajalu Jacob, ngakarna Paddan-Aram-karti mirtawa kanganyaku. Miranu Isaac wurrarnalu, "Munu mankulumanparningu Canaanite mirtawa."

<sup>7</sup> Miranu pukun, Jacob purlpi yana Paddan-aram-karti muwarrja pipipa japatuja muwarrja.

<sup>8</sup> Miranu yija jarrinyi Esau, japatu palinymili panyju karrinyajanaku ngurraraku mirtawanyjarriku, Canaanite mirtawanyjarriku.

<sup>9</sup> Palajalu Esau yana kakajimili ngurra, Ishmael-mili ngurra, kanya kurntal kakajimili mirtawaku. (Purlpi kanyapulinyi Canaanite-jirri mirtawajirri.) Nyungu kuwarrija mirtawa yini Mahalath. Kangkuji paliny Nebaioth-ku. Nyungu Mahalath Abraham-mili kaparlji, Ishmael-mili kurntal.

### *NGARRKA MIRAL JARRINYILI JACOB-JA KAPUKARRINGI (28:10-22)*

<sup>10</sup> Jacob-ju yakarna pala warrarn Beersheba, yananyikinyi paliny tawunkarti, Haran-karti.

<sup>11</sup> Karrpu kaniny jarrinyaja palinyju ngurra jirni partijirri. Paliny karta karrinyikinyi jurnturtu warnkunga.

<sup>12</sup> Palanga palinyju kartanga kapukarri marna. Yirrirni palinyju ngapi, karntinyapinti, katukarnikinyi jungkakarti. Ngarrkamili angel-arrangu jinta karntinyikinyiyi, jinta katukarnikinyiyi.

<sup>13</sup> Palanga kapukarringa yirrirni Ngarrka pukun, wararr karrinyikinyili wangka palinymartaji. Jacob-ja wurrarnala, "Ngarrka ngaju. Ngajulungarra kalkurnukinyirnipulinyi Abraham-pa Isaac, nyuntumili karlujipa japatu. Ngajumili pukun palajirri. Nyungu nawu warrarn yungkulumarnanta karta karrinyinpa, nyuntungupa nyuntumili partanykarrangungupa.

<sup>14</sup> Mankulumanjaninyi partanykarrangu marlu. Yankulupiyi ngunarijirri, karapa kakarra, yalinyjipa kurila. Nyuntumilalu partanykarrangulupa nyuntulu ngalyipa julkulinyurrujanaku marrngurranguku jintakupa warrarn warinyjarrangukupa.

<sup>15</sup> Ngaju wantulumarnanga nyuntungu wanyjarnipa yankuluman. Yarti kulpanya jilamarnanta nyungukarti warrarnkartu. Munu yakalamarnanta, ngaju wantulumarnanga. Ngajulu jilimarnanga nyarrapa wurrarnnar-nangu." Palajun muwarr pirnili Jacob-ku Ngarrkalu.

<sup>16-17</sup> Palaja kartaja parrily jarrinyi Jacob. Paliny wirnti karrinyikinyi. "Payi. Ngarrka nyungu waninyi, munumpa ngaju, puru karta karrinyikinyirni. Nyungulu ngurraru wirntiji pirninyi. Payi yija nyungu ngurra Ngarrkamili, nyungunu waninyi paliny!"

<sup>18</sup> Pirrpa-pirrpanga kartaja turlpanya Jacob. Palaja warnku pala mana, jurnturtulupa nyilkarnikinyi, pala wararr jirni, wuyil jurtirni palanga warnkunga. Palajun jirni kurlka jinaku palinyku palanga muwarr pinalu Ngarrkalu.

<sup>19</sup> Palinyju yini marna pala ngurra Bethel. Palalu yinilu wurrarna "Maya Ngarrkamili". (Palamartaji ngurramartaji tawun waninyikinyi wangka, purlpi yini marnikinyiyi Luz.)

<sup>20</sup> Palaja karra marnalu Ngarrkaku, "Nyuntulu wurrarnajin ngajungu wantulupijin, tuku jiliminyin, yungkuluminin wurrupa mayipa,

<sup>21</sup> nyuntulu tuku kalkuluminin, kulpanya jiliminyin ngajumilikarti japatumilikarti ngurrakarti. Ngajuku palajun jilaman, ngajulu pinakar-rulumarnanga nganipa wurratalipin.

<sup>22</sup> Ngajulu muwarr pilimarnangu nyungunu warnkupa nyungu wararr jirnirni. Yungkulumininpa 10 wurrukarra, palaja kulpanya yungkulumarnanta waraja." Palajun muwarr pinalu Ngarrkaku.

## 29

### *JACOB-PA LABAN (29:1-14)*

<sup>1</sup> Palaja Pijilja yana jinangu. Yartikarra turlpanyajanaku warrarnja warinyja, kakarranga.

<sup>2</sup> Palaja palinyju parrjarn-parrjarnikinyi, yijalu ngapa karlinaja yirrirni, yamarnikinyi warnkulu wirtulu. Palanga yirrirnijaninyi kujarrapa waraja kurrngalarrangu kukurnjayirrangu, ngapanga wangkamartaji karta-karta karrinyikinyiyi, mimarnikinyiyi ngapaku.

<sup>3</sup> Tuku jirnikinyijaninyi palarrangu kukurnjayirrangu, kanginyikinyiyijaninyi ngapa karlinskyajakarti. Jampa wiyyirr kajanaja ngapanga pala warnku purlu jirnikinyiyi. Minpinajalu kulpanya warnku wirrirnikinyiyi.

<sup>4</sup> Jacob-ju karra marnajanaku marrngu tuku kalkunukatarranguku, "Wanyjarnija nyurra?" Puntaju karra marnayalu palinyku, "Nganarna tawunja, ngapija, Haran-ja."

<sup>5</sup> Palinyju karra marnajanaku, "Nyurra miranu Laban-ku, Nahor-mili karluji?" "Yuu, nganarna miranu."

<sup>6</sup> "Ngalypangarra waninyi?" "Yuu, paliny ngalyipa waninyi. Parrjala, mirtawa partany palinymili turlpanya kuwarri kukurnjayirrangujartiny."

<sup>7</sup> Palinyju karra marnajanaku, "Pinakarrayi. Karrpu kanka ngarrany waninyi. Nganiku kanganyanyurrujaninyi kukurnjayirrangu karrpu kankanga? Nyampalu yuwayijaninyi ngapa, palaja nyampalu kulpanya kawayijaninyi warrulykarti."

<sup>8</sup> Puntaju karra marnayalu, "Munu yinganyakupa ngapaku, mi-malapiyirnijanaku jinta warinyku kukurnjayirrangu. Yijamarta palajalu warnku nyungu purlu jilipiyirni, palajunjalu yungkulupiyirnijaninyi ngapa."

<sup>9</sup> Muwarr pinajalu, kajarnajanaku Rachel japatumurninymili kukurnjayirrangujartiny. Palinyjungarra kalkurnikinyijaninyi.

<sup>10</sup> Jampa yirrirni Rachel-pa kukurnjayirrangu kakamurninymili, Jacob ngapa karlinskyajakarti yana, purlu jirni pala wirtu warnku kankakartija, ngapa yinyajaninyi kakamurninymili kukurnjayirrangu.

<sup>11</sup> Palaja Rachel yampu marna manyjarraja.

<sup>12</sup> Wurrarnala, "Nyuntumili japatu ngajumilaku pipiku mamaji. Pipi ngajumili Rebekah." Mirti jarrinyi Rachel pala muwarr wurranaku japatuku palinymilaku.

<sup>13</sup> Pala muwarr pinakarrinya nyampa yana Laban pujamu-murninykarti. Yampu marna, ngurrakarti kanya. Jacob-ju wurrarnala wunyjurru ngunarrija turlpanyaja warinyja warrarnja waljaja.

<sup>14</sup> Laban-ju wurranala, "Nyunturla pujamumurniny walja. Nyungungu wantuluman ngajungu." Palanga waninyi Jacob, warrkamu jarrinyi kakajimurninyku waraja wirlarra.

### *JACOB-JU WARRKAMU JARRINYIKINYILI KAKAJIMURNINYKU MIRTAWAPA YUNGKULINYPILI (29:15-30)*

<sup>15</sup> Palaja Laban-ju karra marnalu, "Pujamu nyuntu ngajumili walja. Warrkamu jarrinyikinyijin puru. Kuwarri warrkamu ja nganipa yungkulumarnanta?"

<sup>16-18</sup> Laban partanykarrangu kurntaljirripa pirirrirrangu. Wariny kurntal Leah, wariny Rachel. Leah jirtamarra kurluny-kurluny. Rachel kumparakata yiji. Jacob Rachel marru marnakinyi, karrinyikinyalu mirtawaku. Palajalu karra marnalu Laban-ku, "Warrkamu jarrulumar-nangu partunurranguku 7-ku. Palaja yungkuluminyin Rachel mirtawa."

<sup>19</sup> Laban-ju karra marnalu, "Yuu. Nyuntu yungkulumarnanta Rachel, jintawayinga. Yija nyungungarra wantuluman ngajungu."

<sup>20</sup> Palaja warrkamu jarrinyikinyalu kakamurninyku punja, partunurranguku 7-ku. Yija-yiji marru marnakinyi pala mirtawa. Palajalu warrkamu jarrinyikinyi mimarnakinyi partunurrangu 7, kurlkarri marnakinyi kar-ru kujarrapa warajakapali warrkamu jarrinyikinyi palaku mirtawaku.

<sup>21</sup> Palaja karra marnalu kakajimurninyku, "Warrkamu jarrinyarnangu partunurranguku 7-ku. Nyampa yuwaji pilyurr ngajungu."

<sup>22</sup> Laban-ju muwarr ngakarnajanaku palamartajiku marrngurranguku milpanyaku ngurrakarti palinymilikarti. "Mayi ngalkuluminyipulaku nyungukujirri kulunuja wantulinypulu pirirripa mirtawa." Warrkamukatarrangulu palinymilalu mayi wirtu kamparnayajanaku ngananyaku.

<sup>23</sup> Warrukarti jarrinyaja Laban-ju pujamumurninykartu kanyalu Leah, Rachel-mili kangkujimurniny, wurrarnala, "Nyungu nawu pilyurr nyuntumili."

<sup>24</sup> (Laban-ju wariny mirtawa warrkamuku yinyali Leah-nga, yini Zilpah.)

<sup>25</sup> Palanga warrukartingi Jacob karta karrinyi Leah-nga. Jampa parrily jarrinyi kartakkarralungarra wariny yirrirni Leah! Palanga paliny kuli jarrinyi, karra marnalu kakamurninyku, "Nganija mitu marnanyin? Ngaju warrkamu jarrinyarnangu warinyku mirtawaku, Rachel-ku. Nganija yinyanyan Leah?"

<sup>26</sup> Laban-ju karra marnalu, "Nyungu wupartumurniny warlilamar-nangu. Walangkarra pilkuliny wirtumurniny. Palajunpintu nganarnamili.

<sup>27</sup> Mimalaman jampa. 7-ja karrpuja jipi jilaminyi nyunguku nyupaku. Palaja yungkulumarnanta wariny nyupa. Palaja warrkamu jarrulupijin 7 partunurrangu wupartumurninyku."

<sup>28</sup> Jacob-ju pinakarrikinyalu Laban-ku. "Yuu, yarrana warrkamu jilamarnanga." Palaja waninyikinyi Leah-nga karrpurranguku 7-ku, palaja Laban-ju yinyali wariny mirtawa, Rachel.

<sup>29</sup> (Laban-ju wariny mirtawa warrkamuku yinyali Rachel-ja, yini Bilhah.)

<sup>30</sup> Jacob-ju karrinyikinyalu Rachel-kujakun, yakarl marnakinyi Leah. Palaku mirtawaku Rachel-ku yarrana warrkamu jarrinyikinyalu kaka-jimurninyku partunurranguku 7-ku.

#### *JACOB-MILI PARTANYKARRANGU (29:31 - 30:24)*

<sup>31</sup> Ngarrkalu parrjarnakinyi Jacob wunyjurru jarrinyaja. Paju karrinyalu Leah-ku Ngarrka, yinyali Leah-nga partanykarrangu. Palinymili marrka-murniny partanymajirri waninyikinyi.

<sup>32</sup> Palaja Leah ngayinykarra jarrinyi. Yijalu palinyju mana partany pirirri. Palinyju kurlkarri marna Ngarrka, "Paju karrinyaji Ngarrkalu. Partany yinyanyi nyungu pirirri. Yija ngajumili nyupa ngarluja wantulupiji, nyungu partany manarnalu." Pala yini marna partany murrkangunya Reuben. [Reuben sounds like, "Look! A son!", and like, "He has seen my misery".]

<sup>33</sup> Palaja palinyju partany warinymal mana, pirirri. "Ngarrkalu par-jarna ngajumili pirirri, munu karrinyikinyiji, yinyaji partany wariny Ngarrkalu." Yini marna pala partany Simeon. [Simeon sounds like, "One who hears".]

<sup>34</sup> Palaja partany warinymal mana, pirirri. Palaja karra marna, "Nga-jumilinga pirirringa yinyarnalu partanykarrangu piririmarta kujarrapa

waraja. Kuwarri yiji ngarluja wantulupiji." Yini marna pala Levi. [Levi sounds like, "being attached", or "feeling affection for".]

<sup>35</sup> Palaja partany warinymal mana, pirirri. Karra marnalu Ngarrkaku, "Yarranijayi, Ngarrka! Nyurra malamarnanta." Yini marna pala pirirri Judah. Palaja partanymajirri waninyi punja. [Judah is related to the Hebrew word for "Praise", with the thought that "I will praise the Lord". (Had she given up on Jacob loving her just because she bore him sons!)]

## 30

<sup>1</sup> Rachel waninyikinyi partanymajirri. Paliny miku jarrinyikinyi palinymilaku kangkujiku. Palinyju karra marnalu palaku pirirriku, "Partany ngalilupa mankulupali. Munujalu marlkarri jarrulumarna."

<sup>2</sup> Jacob palaja kuli jarrinyi palinymili mirtawaku. "Munu ngajukupa parrjanaku. Munuyiji munu ngaju Ngarrkakapali. Ngarrkalungarra kunta jirnanti partany mananyaku."

<sup>3</sup> Rachel-ju karra marnalu Jacob-ku, "Pala nawu mirtawa, warrkamukata ngajumili, Bilhah. Karta karrulunyumpulu. Palinyjungarra mankulkulupija partany ngajuku. Pala partany wantulupiji ngajuku." Palajun muwarr pinalu Rachel-ju.

<sup>4</sup> Palaja yijangarra Jacob karta karrinyi palanga warrkamukatanga mirtawaji.

<sup>5</sup> Bilhah palanga ngayinskyarra jarrinyi, pirirri partany mana.

<sup>6</sup> Rachel-ju karra marna, "Ngajulu japiirr marnarna Ngarrka yungkulupiji partany ngajuku. Palinyju pinakarrinyiji, yinyanyi partany pirirri." Yini marna pala partany Dan. ["Dan" means "he judged" or "he vindicated". Rachel felt vindicated.]

<sup>7</sup> Yarrana ngayinskyarra jarrinyi pala warrkamukata mirtawa, palaja partany mana wariny, pirirri.

<sup>8</sup> Rachel-ju karra marna, "Ngalayi mirarnakinyaliyirnarninyi partanyjamarra, ngajulu yiji mirarnarna partanyku." [Put this sentence into the lexicon!] Yini marna pala partany Naphtali. ["Naphtali" means, "my struggle".]

<sup>9</sup> Leah-lu karra marna, "Kuwarringarra partanymajirri wantulumarna. Ngajumili warrkamukata mirtawa yungkulmarnalu ngajumilinga pirirringa. Palinyju mankuliny partany ngajuku."

<sup>10</sup> Palajalu Zilpah-lu partany pirirri kanya Jacob-ku.

<sup>11</sup> Leah-lu karra marna, "Yarranijayi!" Yini marna pala partany Gad. ["Gad" means, "good fortune".]

<sup>12</sup> Palajalu Zilpah-lu mana partany wariny, pirirri.

<sup>13</sup> Leah-lu karra marna, "Ngaju pikaly jarrynya. Mirtawanyjarrilu wurralaminyiyi pikalykata." Yini marna pala partany Asher. ["Asher" means, "happy"]

<sup>14</sup> Yurranga jarrynijanaku. Marrngurrangulu mananyikinyijaninyi palarrangu mayirrangu, ngapirrangu, wiitirrangu. Palanga Reuben, Leah-mili murrkangunya, yana ngurraja ngunarri. Yirrirnijaninyi pirraja warruly, ngapi, manturayiki. Jinta manajaninyi, kanyajaninyi pipikarti. Rachel-ju japiirr marna mirtamarniny kangkuji, "Jinta yuwanyi pala manturayiki partanymili nyuntumilimili."

<sup>15</sup> Palanga Leah kuli jarrynalu. "Jipi kanyajinpa pirirri, nyungukurna kamu karrynya ngajumilalu partanyju manaja, pala mirrijin ngayinskyarra jinaku."

<sup>16</sup> Jarurukartingi warrkamuja warruly-warrulyja Jacob kulpanya ngunnarrija, ngurrakarti. Leah-lu purrpi karrinyalu. Palaja karra marnalu, "Kuwarringa warrukartinga ngali karta karrulupali. Yinyarnalu ngajumilinga marrkanga jinta manturayiki, partanyju manaja. Palaja karta karrulupali." Palanga warrukartingi yijangarra karta karrinyipulu.

<sup>17</sup> Ngarrkalu pinakarrinyirri Leah-ku, palaja ngayinykarra jirni. Palaja wariny mana partany, pirirri.

<sup>18</sup> Leah-lu karra marna, "Ngajulu yinyarnala ngajumili warrkamukata mirtawa karta karrinyaku ngajumilinga pirirringa. Palajunjalu Ngarrkalu yinyaji partany wariny pirirri." Yini marna pala partany Issachar. ["Issachar" sounds like, "reward" or "my hire".]

<sup>19</sup> Palajalu palalu Leah-lu wariny mana partany, pirirri.

<sup>20</sup> Karra marna, "Ngarrkalu ngalypa jirniji ngajunga. Ngajulu kanyarnajaninyi pirirrimarta 6 ngajumilaku pirirriku. Palajunjalu kuwarri wurrälapiji yija-yiji mirtawa ngaju." Yini marna pala partany Zebulun. ["Zebulun" probably means "honour"; it also means "gift".]

<sup>21</sup> Yarti yiji palajalu wariny mana partany, mirtawa. Pala yini mana Dinah.

<sup>22</sup> Palaja Ngarrkalu pinakarrinyalu Rachel-ku. Purlpija warrarnja Rachel-ju japiirr marnikinyi Ngarrka partanykarranguku yinganyaku. Yartikarra pinakarrinyalu.

<sup>23</sup> Yijangarra ngayinykarra jarrinyi paliny, mana partany, pirirri. Karra marna, ["God has taken away my shame."] "Kurntany waninyikinyirni purlpija warrarnja partanymajirri. Yijalungarra Ngarrkalu yinyaji partany. Munu janalu kurntany jiliminyiyi."

<sup>24</sup> Yini marna pala partany Joseph ['asap "take away" sounds like "Joseph", which means "may he add"]. Karra marna, "Yijapa yungkuluminyi wariny partany, pirirri."

#### *JACOB-JU WARRKAMU JARRINYIKINYILI KAKAJIMURNINYKU KUWIYIRRANGUPA YUNGKULINYPILI (30:25-43)*

<sup>25</sup> Jampa Joseph-ja ngayarta jarrinyajalu Jacob-ju karra marnalu kakajimurninyku, "Ngaju kulpulumarna ngajumilikarti warrarnkart waljakarti.

<sup>26</sup> Yijalu warrkamu jarrinyarnangu palarrangukupa mirtawaku partanykarrangukupa. Nyuntu miranungarra palaku. Kuwarringa kangkulumarnajaninyi palamarrangu. Munu ngajuku ngatu jinaku nyuntulu. Yankulumarna."

<sup>27</sup> Laban-ju karra marnalu, "Pinakarraji. Ngajulu karrinyarnangu nyungunguku waninyaku. Jampa nyuntu turlpanyan ngunarrija purlpi Ngarrkalu ngalypa jirnikinyiji ngajuku, palinyju yinyaji marlu jarnturrangu kuwiyirrangu. Palaku ngaju miranu jarrinyarna maparnja kankarni. Palajunja ngajulu karrinyarnangu purukata wantaji.

<sup>28</sup> Yini malanyinga nganikupa nyuntu karrinyan, ngajulu yungkulumar-nanta nganipa, palaja wantulupijin."

<sup>29</sup> Jacob-ju karra marnalu, "Ngaju jipi warrkamu jarrinyarnangu. Tuku jirnirnjaninyi kuwiyirrangu nyuntumilirrangu. Nyuntu miranungarra palaku.

<sup>30</sup> Nyuntu wanikinyin wupartumartarrangujartiny kuwiyirrangujartiny. Jampa ngaju turlpanyarna nyungukarti marlu jarrinyiyinga. Ngaju warrkamu jarrinyarnangu. Palajalu Ngarrkalu tuku jirnikinyinti. Kuwarri ngajulu tuku jilamarnajaninyi ngajumili partanykarrangupa."

<sup>31-32</sup> Laban-ju japirr marnalu, "Ngani yungkulumarnanta? Wurralli." Puntaju karra marnalu Jacob-ju, "Munu yinganyakupa warnuku. Kula, wurralamarnangu. Kuwarringa parrjalamarnajaninyi kuwiyyirrangu nyuntumilirrangu, jinta pilamarnajaninyi, kangkulmarnajaninyi warrukurla kukurnjayirrangupa taparl-taparl nanikuturrangu. Palamarninyarrangu. Ngajumili wantulupijiya palarrang, jinta wiyyirr nyuntumili. Yuu, karra malaman nyuntulu, nyuntungu wantulumarnanga, tuku jila-marnajaninyi kuwiyyirrangu nyuntumilirrangu nyuntuku.

<sup>33</sup> Yartipa yirrilaman ngajulu ngalypa jilamarnangu, ngajulu munu mitu manakupa nyuntuku. Nyuntulu parrjalaman palarrangku kuwiyyirrangu. Jintamarniny wantulupiyi warrukurla kukurnjayirrangu, jinta-marniny wantulupiyi taparl-taparl nanikuturrangu. Yijapa yirrilamanjaninyi warinypa wariny, nyuntu miranu jarrulumana ngajulu ngulyulu kanyarnangu." Palajun karra marnalu.

<sup>34</sup> Puntaju karra marnalu Laban-ju, "Yuu, ngalypa. Palajun jilaman."

<sup>35-36</sup> Laban-ju mitu marna Jacob. Palangangarra karrpungu palinyu kanyajaninyi wiyyirr taparl-taparl nanikuturrangupa wiyyirr warrukurlarangku kukurnjayirrangu, wurrarnajanaku palinymilinga partanykarrangungu piririmartanga, "Kawayijaninyi nyungurrangnu nanikuturrangupa kukurnjayirrangu ngunarri kaja, tuku jilayijaninyi ngunarringa." Palajalu muwarralu kanyayijaninyi kujarrapa waraja karrpurrang.

Palaja Jacob-ju tuku jirnikinyijaninyi jinta wariny Laban-mili kuwiyyirrangu.

<sup>37</sup> Palanga Jacob-ju ngartarnajaninyi yalyurrang, wupartu-wupartu karnu pirnijaninyi mirta-mirta marni jarrinyaku.

<sup>38-39</sup> Palinyu wirrirnijaninyi palarrangku karnu pinaja yalyurrangu ngapamartaji. Jampa palarrangku kuwiyyirrangku turlpanyikinyiyi ngapakarti yirrirnikinyijaninyi palarrangku yalyurrang. Ngapanga wangka jar-rinyajalu yumuny jarrinyikinyiyi. Yumuny jarrinyijalu parrjarnikinyijaninyi palarrangku yalyurrang. Palajalu kukurnjayirrangulu kanyayijaninyi wupartupani warrukurla, nanikutulurrangnu kanyayijaninyi wupartupani taparl-taparl marnijartiny.

<sup>40</sup> Palaja palinyu jinta pirnijaninyi palarrangku wupajupanirrang. Munu wirrirnamajaninyi Laban-milinga kuwiyyirrangunga. Palinyu wirrirnijaninyi mirtanya-mirtanyarrangnu kuwiyyirrangnu ngumpa Laban-milikarti.

<sup>41</sup> Jampa palarrangku kuwiyyirrangku marrjapanurangnu yumuny jar-rinyikinyiyi Jacob-ju wirrirnijaninyi palarrangku yalyurrangku walangkarra jananga.

<sup>42</sup> Jampa manyurla-manyurlarrangku kuwiyyirrangku yumuny jar-rinyikinyiyi, munu wirrirnamajanaku palarrangku yalyurrangku Jacob-ju.

<sup>43</sup> Palajunjalu Jacob-ju manarninga marlu yiji kukurnjayirrangupa nanikuturrang. Palinyu kalkurnikinyijaninyi marlu kamalpa tangki, pirirripa mirtawa warrkamukatarrangku pukun.

<sup>1</sup> Palaja Laban-mili partanykarrangu pirirrimartalu yimpirnikinyiyi Jacob. Janalu karra marnayi, "Jacob-ju wiyyirr kanyajaninyi nganyjurrumilaku japatumilaku kuwiyyirrang. Palajunja palinyju kalkurnajaninyi marlu kuwiyyirrang. Palarrangu waninyikiyalu nganyjurrumili japatuku." Jacob-ju pinakarrinyalu janamilaku muwarrku yimpinajaku.

<sup>2</sup> Laban-ju malyparr karrinyikinyalu. Jacob miranungarra paliny.

<sup>3</sup> Palajalu Ngarrkalu karra marnalu Jacob-ku, "Kulpa nyuntumili japatumi warrarnkarti, nyuntumili walja marrngukarti. Ngajulu tuku jilamar-nanta." Palajunju Ngarrkalu karra marnalu.

<sup>4</sup> Palanga Jacob waninyikinyi ngunarri jalanga, palinymilijartiny kuwiyyirrangjartiny. Palaja muwarr ngakarnapulaku palinymilaku mirtawakujirri, Rachel-pa Leah-karti, milpanyaku palinykartiku.

<sup>5</sup> Jampa turlpanyapulu palinyju karra marnapulaku, "Nyumpalamili japatu ngalyparla waninyikinyiji, kuwarringa munu jarrinyiji. Ngaju miranungarra paliny malyparr karrinyiji. Ngarrkalu tuku jirnikinyinyi. Palinyungarria tuku jirnikinyi ngajumilaku japatuku, tuku jirnikinyinyi ngaju pukun.

<sup>6</sup> Nyumpala miranungarra ngajuku, warrkamu jarrinyirnili nyumpalamilaku japatuku punja.

<sup>7</sup> Palinyju mitu marnanyi marlumal ngani warralkupa. Ngarrkalu kunta jirnikinyi Laban, munu kulilu yirrinaku ngaju.

<sup>8</sup> Nyumpalamilalu japatulu wurrarnaji ngajunga, 'Nyuntulu kalkulumanjaninyi warrukurlarrangu kukurnjarirrang puntaju pala warrkamujalu.' Palaja palarrangulu kukurnjarirrangulu kanyayijaninyi partanykarrangu warrukurlarrangu. Nyumpalamilalu japatulu wurrarnaji ngajunga, 'Nyuntulu kalkulumanjaninyi taparl-taparl marnijartin-yarrangu nanikuturrangu puntaju pala warrkamujalu.' Palaja palarrangulu nanikuturrangulu kanyayijaninyi partanykarrangu taparl-taparl marnijartinyarrangu.

<sup>9</sup> Kanganyikinyijaninyi kuwiyyirrang nyuntumilia japatuja Ngarkalungarra, yinganyikinyijaninyi ngajunga.

<sup>10</sup> Kuwiyyirrang yumuny jarrinyajanga ngajulu kapukarri manarna. Palanga kapukarringa ngajulu yirrirnirni taparl-taparl marnijartiny pirirrimarta nanikuturrangu yumuny jarrinyikinyiyi mirtawanyjarrirrungu, jinta pirirrimarta nanikuturrangu munu yumuny jarrimiyi.

<sup>11</sup> Palanga kapukarringa Ngarrkalu muwarr pirniji, 'Jacob-kayi!' 'Yuu, ngani?'

<sup>12-13</sup> 'Ngaju Ngarrka. Purlpi Bethel-ja miral jarrinyarnanga. Palanga nyarra warnku jarnti jirnin kurlkali manapintiku, wuyilpa jurtirnijin palanga warnkunga, nyuntulu karra marnajin, "Nyuntungu pinakarrulumarnanga." Ngajulu parrjarnakinyirninti. Miranungarra ngaju Labanku, mitu marnikinyinti. Parjalajaninyi palarrangu kuwiyyirrang. Taparl-taparl marnijartiny pirirri nanikuturrangu yumuny jarrinyiyi, jinta pirirri nanikuturrangu munu yumuny jarrinyikinyi. Kuwarri pinakarraji ngajuku. Yakala nyungu warrarn, kulpa warrarn waljakarti.' Palajun muwarr pirniji Ngarrkalu."

<sup>14</sup> Rachel-jupa Leah-lu pinakarrinyipulu Jacob-mili muwarrku. Puntaju karra marnapulalu, "Ngalayimilalu japatulu munu yungkulinyngalayinyi nganipa palinymilija.

<sup>15</sup> Warinykapali wurrarnangalayinyi. Purlpi warrkamujalu puntaju yinyanta ngalayi nyuntungu. Palangulu kurrngal wurrukarrarrangu manajaninyi. Kuwarri munu kalkurnaka nganipa.

<sup>16</sup> Ngarrkalu kanyajaninyi palinya wurrukarrarrangu, palarrangu jipi yinyanta nyuntu. Palajalu palarrangu warralpirti kuwarri ngalayimilipa ngalayimili partanykarrangumili. Pinakarralu Ngarrkaku. Jilalu nganipa wurralamangu."

#### *JACOB KUKUJARRI-KUKUJARRILU YAKARNA LABAN-MILI NGURRA (31:17-21)*

<sup>17-20</sup> Palaja Jacob-ju wurrukarrarrangu maninyikinyajaninyi yakana-marninyju. Munu wurrarnamala Laban-ja. Laban purlpi yana ngurra-rraja wirrkanaku mampuku kukurnjarirranguja. Ngunarrijalu Laban-jalu Rachel-ju kukujarrilu ngulyu marnajaninyi palinymili japartumili ngapirrangu, marni jinajarrangu mangunykapalirrangu.

Palaja Jacob-ju manajaninyi kamalarrangu kanganyaku mirtawanyjarrrikupa partanykarranguku. Ngakarnajaninyi palinymili kuwiyirrangu walangkarr, kukurnjaripa nanikuturrangupa purlikapa tangki. Jacob-ju palinymili mirtawanyjarrilupa partanykarrangulu yakarnayi pala ngurra Laban-mili kukujarri-kukujarrilu. Palajunju palinya mitu marna palinymili kakaji. Yana wirntijartiny warrarnkartti Canaan-karti.

<sup>21</sup> Kurtany pirni pijunga wirtunga, ngapinga, Euphrates-nga. Yana pipurru warnkumarramarrakarti, ngapinga, Gilead-ja.

#### *LABAN-JU YAJARNAJANINYI MARNTILU MARRJALU (31:22-25)*

<sup>22</sup> Kujarrapa warajaja karrpuja, Laban-ju pinakarrinyi Jacob purlpi yana.

<sup>23</sup> Laban-ju manajaninyi piririmarta, palaja yajarnayi Jacob. <sup>7</sup> 7 karrpurrangu yajarnayi paliny warnkumarramarrakarti warrarnkartti, ngapinga, Gilead-ja.

<sup>24</sup> Partijirringa Ngarrkalu muwarr pinalu kapukarringa Laban-ja, "Kuli-wayi purulu yankulumanpalu Jacob-ku."

<sup>25</sup> Jacob-jupa palinymilirrangulupa partanykarrangulupa mirtawanyjarrilu purlpi ngurra jirniyi warnkumarramarranga. Palaja Laban-pa palinymili piririmarta kajarnayi Jacob-martaji, ngurra jirniyi palamartaji.

#### *LABAN-JUPA JACOB-JU WARNTA MARNAPULARNINYA (31:26-44)*

<sup>26</sup> Laban-ju warnta marna Jacob. "Nyuntulu mitu marnanyi. Kanyajin ngajumili kurntaljirri, yijangarra jinmurntujirrikapan. Nganija palajun jirnin?

<sup>27</sup> Nganija yanan kukujarri-kukujarrilu? Yananyamarninyju wurrarnamajin. Mayikurra nganamanyi, julurrpa kuntarnamanyi, pikaly wani-manyi. Pikalymarninyju ngakarnamarnanta.

<sup>28</sup> Yampu marnamarnajaninyi ngajumilijirri kurntaljirripa jamujirrangu. Nganija ngampa pirninyin nyuntulu, muwarrmajirrilu kanyajaninyi? Yijalu mituwalju palajun jirnin.

<sup>29</sup> Palajunkatanga nyuntungu ngajulu kurlu jilamarnangu yijarla. Munu. Nyuntumilalu japatulu pinakarryikinyalu Ngarrkakungarra. Nyarralu Ngarrkalungarra muwarr pirnji ngajunga warrukartinga, wurrarnaji, 'Kuliwayi purulu yankulumanpalu Jacob-ku.' Muwarrjalu palajunjalu puru yakarnarnanta.

<sup>30</sup> Nyuntulu karrinyanpa yirrinaku nyuntumilaku japatuku. Jipi ngalypa. Nganijalu ngajumili ngulyulu marnajinpa mangunykapalirrangu? Pala kurlujartiny yiji!

<sup>31</sup> Jacob-ju puntaju karra marnalu, "Ngajulu kurlkali marnikinyirninti kangamanpulinyi nyungujirri ngajuja. Wirnti karrinyikinyirni. Palajun-jalu yanarna kukujarri-kukujarri.

<sup>32</sup> Munu ngajulu kangamarnanga nyuntumilrrangu mangunykapalirrangu. Nganurtulupa ngajumilrrangujualu kanyajaninyi palarrangu, pala marrngu wirlanaku marlkari. Parrjalajaninyi palamarrangu ngajumili wurrukarra. Nganipa yirrilaman nyuntumili, jurtu jilaman nganarnaku nyuntumilingapa piririmarta ngajumilinga. Palaja kalkuluman-parninga." Munumpa waninyikinyi Jacob, Rachel-ju yakanamarninyu Canaan-kartiku kukujarrilu kanyalu palinymili japatumili mangunykapalirrangu marni jinajarrangu. Palajalu Jacob palajun muwarr pirni.

<sup>33</sup> Palajalu Laban ngalpanyalu Jacob-milinga kalikunga. Kanyjirnikinyi palaku mangunykapalirranguku. Munu yirrirnimajaninyi palarrangu palanga. Palaja kanyjirnikinyi Leah-milinga kalikunga, palanga pukun munu yirrirnimajaninyi. Palajalu ngalpanypulaku kalikunga palamilijirri warrkamu puluku mirtawamilijirriku. Munu, palanga pukun partarl kanyjirnikinyijanaku. Palaja yanalu Rachel-milikarti kalikukarti.

<sup>34</sup> Rachel-ju purlpi kuku jirnijaninyi palarrangu mangunykapalirrangu, kamalmilingi saddle-ja wirrirnijaninyi. Palaja kajarna palanga saddle-ja. Palinymili japatulu warlirn-warlirnikinyi Rachel-milinga wurrukarranga, munuyiji, munu yirrirnimajaninyi.

<sup>35</sup> Karra marnalu Rachel-ju palinymili japatuku, "Ngaju munu wararr karrinyikirni, nganarnamilinga mirtawamilinga. Munu jaaly jarrinyaku ngajukupa, nyungukurrapa kajarnarni nyungungu." Palajun-jalu Laban-ju puru kanyjirn-kanyjirnikinyijanaku palinymilrranguku mangunykapalirranguku.

<sup>36</sup> Palaja palanga Jacob kuli jarrinyi Laban-ku, warnta marna palinymili kakajimurniny. "Munu nganipa ngajulu kurlu jinamarnanga. Nganijalu nyuntulu yirtil marnanyin palajunju? Ngani yiya-yiji kurlu jirnirnangu?

<sup>37</sup> Jipirla wurrukarrarrangu yatirnajinpa. Nganipa wurru yirrirnijaninyi nyuntumili? Yijapa yirrirnijaninyi, wirrilajaninyi nyungungu, yirrilipiyjaninyi nyungurrangulu piririmartalu nyuntumilalupa ngajumilalu. Janalu wurrapiyjaninyi nganurtumilipa palarrangu.

<sup>38</sup> Jipirla ngaju waninyirnangu 20 partunurrangu. Ngajulu tuku jirnikinyirnijaninyi nyuntumili kuwiyyirrangu. Palanga nyuntumili kukurnjaripa nanikutu tuku wanikinyiyi. Janalu marlu partanykarrangu kanyayijaninyi. Munu ngajulu nganamarnajaninyi yuramurrangu nyuntumili.

<sup>39</sup> Jampa kulikatarrangulu yukurrulu pajirnikinyijaninyi marlkari nyuntumili nanikutupa kukurnjari, munu ngajulu kangamarnajaninyi marlkarrirrangu palarrangu jurtu jinaku nyuntungu. Munu. Ngajulu wirrirnijaninyi ngajumilrrangu kukurnjaripa nanikutu puntaju palarrangu marlkarrirranguku nyuntumilrranguku. Jampa jintalu marrngurrangulu kukujarri-kukujarrilu ngulyulu mananyikinyijaninyi nyuntumilrrangu janyjangapa warrukartinga, ngaju japirr marnikinyinyin palamarrangu wirrinaku.

<sup>40</sup> Karrpurrangu karrpurrangu ngaju warrkamu jarrinyarnangu parpkakarranga, marlu warrukartinga ngaju wanikinyirni yija warringa. Marlumal ngaju wanikinyirni kartamajirri tuku jirnikinyirnijaninyi nyuntumilrrangu kuwiyyirrangu.

<sup>41</sup> Ngaju waninyarnangu 20 partunurrangu. Warrkamu jarrinyarnangu 14 partunurrangu palakujirri mirtawakujirri, nyuntumili kurntaljirri.

Palaja ngaju warrkamu jarryarnya nyuntungu 6 partunurrangu manyaku kuwiyyirrangku ngajuku. Palanga 20 partunurrangungu nyuntulu mitu marnanyin marlumal.

<sup>42</sup> Kartu ngakarnaminyin nyuntulu ngani warralpirtimajirri. Ngarrkalu ngaju tuku jirnikinyini. Miranungarra paliny ngajuku, ngaju warrkamu jarryarnangu ngalya nyuntunga, paliny miranungarra nyuntuku, ngurnjul jirnijin. Palajalu warnta marnanta warrukartinga kapukarrilu." Palajun muwarr pinalu Jacob.

<sup>43</sup> Palaja Laban-ju puntaju karra marnalu, "Nyungujirri partanyirri ngajumilijirri, pulanymili palarrangu partanykarrangurrangu ngajumili jamujirrangu. Palarrangu kuwiyyirrang kalkurnanjaninyi nganin-nganinpa palarrangu ngajumilirrang pukun. Nyuntulu parrjala! Nyungurrangu ngajumilirrangujakun. Yijapa ngajulu kalkulumarnapulinyi ngajumili kurntaljirripa pulanymili partanykarrangu. Munu, puru ngakalamarna-janinyi nyuntungu.

<sup>44</sup> Yuu. Ngali muwarr pilipalirnangu. Wirlanawayi puru wantulupali, wirlanamajirri. Wuru jilipali nyungurrangu warnkurrangu, kurlka jinaku ngaliku." Palajun Laban-ju karra marnalu.

#### *JACOB-JUPA LABAN-JU MUWARR WIRRARNIPULARNINGA (31:45-55)*

<sup>45</sup> Palajalu Jacob-ju warnku wirtu mana, wararr jirni.

<sup>46</sup> Palaja wurrarnajanaku palinymili piririmartanga, "Nyurralupa mar-rayijaninyi warnkurrangu." Yijalu manayijaninyi, kunmu jirniyijaninyi warnkunga wirtunga wangka. Palaja wiyyirru nganayi mayi warnkurrangunga wangka.

<sup>47-48</sup> Laban-ju karra marnalu Jacob-ku, "Nyungulu kurulu kurlka jilkulinyngalinyi yartipa." Palinyu yini marna palinymilinga muwarrja, "Kuru kurlka jinapinti." Jacob-ju pukun yini marna pala warnku warinya palinymilinga muwarrja, "Kuru kurlka jinapinti."

<sup>49-53</sup> Laban-ju karra marnalu Jacob-ku, "Jinta pinajalu, yankuluman nyuntumili warrarnkarti, ngaju yankulumarna ngajumilikarti. Ngarrkalu parrjalkulinyngalinyi. Kawanjaninyili nyuntulu warinyarrangu mirtawarrangu, yakalanpulinyili nyungujirri kurntaljirri, wirlalanpulinyili ngunar-ringi. Munumpa wantarnili ngaju. Pinakarraj. Ngarrkalu parrjarnanti. Yirrirnin nyungu warnku wirtu ngajulu wararr jirnirni, nyungupa kuru marnarna. Palarrangu warnkurrangu wantulupiyi kurlka jinaku ngaliku, muwarrpa nyungunga wirrirnali. Ngaju munu yankulumarna nyungungu kurungu ngunarrrikarti nyuntukarti kulikarti. Nyuntu pukun munu milpuluman ngajukarti kulikarti nyungungamarra kurungamarra. Warajalupa ngalijalu panypalali nyungungu muwarrja, Ngarrka miranu jarruliny palinyku. Ngalimilalu karlujilujirri, Abraham-jupa Nahor-lu, pinakarrinyikinyipulu Ngarrkanga. Yijapa ngajulu muwarrja palanga panpiyirnili. Palaja yiji palalungarra Ngarrkalu wirlalaminyi ngaju. Yijapa nyuntulu muwarrja palanga panpiyinpili. Palaja yiji palalungarra Ngarrkalu wirlalamanta nyuntu." Palajun Laban-ju muwarr pinalu Jacob-ku.

Palajalu yini marnapulu pala kuru "Mizpah" pukun. Pala wurrarna "Ngarrkalu Yirrkulu Parrjarnangalinyi".

Jacob-ju pinakarrinyalu Laban-mili muwarrku. Palaja karra marnalu, "Ngarrkakungarra ngajumili japatlu Isaac-ju pinakarrinyikinyalu. Nyarra Ngarrka paliny miranu ngajuku. Yijalu pala muwarr kalkurnarninga."

<sup>54</sup> Palaja Jacob-ju mana waraja kuwiyi palinymilirranguja, wirlarna, kamparnalu yinganyaku Ngarrkaku. Japirr marnajaninyi piririmarta palinymilipa Laban-mili, ngananyaku mayiku palinyja. Ngananyajalu karta karrnyiyi warrukartinga palanga warnkumartaji.

<sup>55</sup> Kurnpungu Laban turlpanya kartaja. Palinyju yampu marnajaninyi palinymili jamujirrangupa kujarra kurntalijirri. Palaja kulpanya palinymili warrarnkartti.

## 32

### *JACOB KURLKARRI MARNA PURRPI MANAMARNINYJU MAMA-JIMURNINY (32:1-21)*

<sup>1</sup> Palanga Jacob yakarna yananyaku palinymilaku japatumilaku warrarnku. Jampa yananyikinyi jinta Ngarrkamili angel-arrangu purrpi turlpaniyiyalu paliny.

<sup>2</sup> Jampa Jacob-ju parrjarnajaninyi palinyju karra marnarningu, "Nyungu ngurra Ngarrkamili!" Pala warrarn palinyju yini marna "Mahanaim". Pala wurrarna "Kujarra Ngurra Kurrgaljirri".

<sup>3</sup> Palaja Jacob-ju ngakarnajaninyi jinta piririmarta walangkarr palinymili mamajimurninykartti, Esau-karti, palanga warrarnja waninyikinyi, Edom-ja.

<sup>4</sup> Palinyju wurrarnajanaku, "Nyungu muwarr kawayi palinykartti, wurralayalu Esau-nga, ngajumili nyampalingi, nyungu muwarr: 'Nyuntumili warrkamu pulukalu, Jacob-ju, palinyju ngakarnanganinyi nyuntukarti. Paliny punja waninyikinyi Laban-ja.

<sup>5</sup> Kuwarringa palinyju kalkurnujaninyi purlikapa tangkipa kukurnjaripa nanikutupa warrkamu puluka mirtawapa pirirri. Palinyju ngakarnanga nyungu muwarr nyuntuku. Yijapa ngarlu ngalypa jarrulumanpili. Yijapa nyuntulu ngalypalu jilimanpalu nganipa.' Palajun muwarr pilkulunyurru Esau-nga." Palinyja muwarrja palarrangu piririmarta yanayi purrpi manaku Esau.

<sup>6</sup> Yarti kulpanyajalu wurrarniyalu Jacob-ja, "Nganarna yanayirnalu nyuntumili mamajikarti, wurrarniyirnalu nyuntumili muwarr. Paliny milpanya purrpi malamanta nyuntu. Paliny 400 piririmartajartiny."

<sup>7</sup> Pinakarrinyaja pala muwarr Jacob yija-yiji wirnti jarrinyi. Palaja palinyju jinta marnajaninyi palinymili marrngurrangu kujarra kurrgaljirri. Palajunjalu palinyju jinta pirnijaninyi kuwiyyirrangu pukun.

<sup>8</sup> Karra marnarningu, "Yijapa Esau milpuliny warajakarti, wirlalajaninyili. Palanga warinyarrangu mirti jarrulupiyi wankaku."

<sup>9</sup> Palaja paliny muwarr pinalu Ngarrkaku, "Nyuntu yija Ngarrka, nyuntulungarra tuku jirnikinyinpulinyi ngajumili karluji Abraham-pa ngajumili japarti Isaac. Nyuntulu karra marnajin ngajuku, 'Kulpa nyuntumili warrarn waljakarti, marrngu waljakarti. Ngajulu tuku jilamarnangu, tuku kalkulumarnanta.' Palajun karra marnajin.

<sup>10</sup> Yija nyuntulu nganipa ngalypa jirnikinyijin. Ngaju puru, mujujakun. Jampa purlpilu ngajulu yakarnarna ngajumili warrarn, ngaju ngunarrija kurtany pirnirni nyungunga pijunga, nyungunga Jordan-ja pijunga, puru yananyikinyirni, mungkajartinyjakun. Ngaju kuwarringa kulpanyarna marlu kuwiyyirrangujartinya marrngurrangu.

<sup>11-12</sup> Ngaju wirnti karrinyarna ngajumili mamajiku, Esau-ku. Wirlalan-ganinyili wiyyirr, partanya pipimurninyarrangu. Nyuntulu wurrarnajin, 'Ngajulu tuku jilamarnanta, ngajulu yungkulumarnanta marlu partanykar-rangupa janamilirrangu nyirrirnikartijarrangu.' Palajun karra marnajin.

Ngarrkakayi, kuwarringa tuku jilinganinyi. Kunta jili Esau, wirlalan-ganinyili marlkarri wiyyirr." Palajun karra marnalu Ngarrkaku.

<sup>13</sup> Palanga Jacob karta karrinyi waraja warrukartinga. Palaja manajaninyi jinta wariny kuwiyyirrangu yinganyaku mamajimurninyku.

<sup>14-15</sup> Palinyju manajaninyi nanikuturrangu 200 mirtawanyjarripa 20 piririmarta, kukurnjarirrangu 200 mirtawanyjarripa 20 piririmarta, kamalarrangu 30 mirtawanyjarripa partanykarrangu janamili, purlika 40 mirtawanyjarripa 10 piririmarta, tangki 20 mirtawanyjarripa 10 piririmarta. Palarrangu wiyyirr jinta pirnajaninyi yinganyaku mamajimurninyja.

<sup>16</sup> Palinyju wurrarnajanaku palinymili warrkamukatanga piririmartanga, "Kangkulinyurrujaninyi nyungurrangu kuwiyyirrangu Esau-karti. Yankulunyurru nyirrirnipa walangkarr, kajamarta kajamarta yankulunyurru."

<sup>17</sup> Walangkarr pirirringa wurrarnalu, "Jampa ngajumili mamajilu purrpi malamanta japirr malamanta, 'Nganurtu nyuntmili maaja? Wanyjarni yananyan? Nganurtumili palarrangu kuwiyyirrangu tuku jinanpalu?'

<sup>18</sup> Nyuntulu karra malamanpalu puntaju, 'Nyungurrangu kuwiyyirrangu Jacob-mili, nyuntumili warrkamu puluka. Palinyju ngakarnajaninyi palinymili nyampaliku, Esau-ku. Nyirrirni milpanya kuwarringa." Palajun wurrarnalu palaku pirirriku.

<sup>19</sup> Jintanga wurrarnajanaku, "Nyurralu pukun palajun wurralkulun-yurru, jampa purrpi malkulunyurrinyi Esau-lu.

<sup>20</sup> Wurralkulunyurrulu, 'Nyuntumili warrkamu puluka Jacob nyirrirni milpanya nganarnanga.'" Jacob-ju karra marnikinyirningu, "Nyungurragulu kuwiyyirrangulu yijapa ngarlu ngalypa jilkuliny Esau ngajuku. Yartipa yirrilimarnalu, yijapa ngarlu paliny ngalypa jarrulupiji."

<sup>21</sup> Jampa yanayi palinymili piririmarta kuwiyyirranguartiny, Jacob palanga waninyi.

### *NGAJARRILU PURRPI MARNA JACOB WARRUKARTINGI (32:22-32)*

<sup>22-23</sup> Warrukartingi palinyju kanyajaninyi palinymili wurrukarrapa mirtawarrangupa partanykarrangu, kurtany pirniyi pijunga, ngapinga, Jabbok-ja, jinangu yanayi ngapanga palanga pijunga ngunarrikarti. Wiyyirr yakarnajaninyi ngunarrikarti. Palaja palinyjakun kulpanya.

<sup>24</sup> Paliny kujurl waninyi palanga. Pirirri ngajarri turpanyalu. Palanga partarl jungkanga parirru warlirnikinyipularninyi, palajun partarl jirnikinyipularninyi pirrpa-pirrpakartijakun.

<sup>25</sup> Palama pirirrilu ngajarrilu partarl warlirni Jacob. Palajunjalu palalu pirirrilu wirlarna Jacob mila nyuku,

<sup>26</sup> Palaja karra marnalu Jacob-ku, "Pirrpa-pirrpa jarrinyi. Warlinawayi! Yakalanyi!" Jacob-ju karra marnalu, "Nyuntulu wurratalapjin ngajuku nganipa ngalypa jilipjin. Palajunwayijalu kakuputulu warlilamarnanta."

<sup>27</sup> Palalu ngajarrilu japirr marna, "Nganurtukurra nyuntu yini?" "Ngaju yini Jacob."

<sup>28</sup> Palalu ngajarrilu karra marnalu, "Kuwarrijalu munu yini malapiyirn-inti Jacob. Nyuntumili yini wantuliny Israel. Nyuntu jalypa jirnijaninyi Ngarrkapa marrngurrangu, yakarniyinti, yirrku wararr karrinyin nyuntu. [??] [You have struggled with God and with men, and have prevailed over them.]

<sup>29</sup> Palaja Jacob-ju karra marnalu, "Nganurtu yini nyuntu?" Palinyju karra marnalu, "Japirrwayi, munu palajun muwarr japirr malamanyin.

Kuwarringa ngajulu ngalypa jilamarnangu." Palajun karra marnalu Jacob-ku. Palanga palinyju yakarna Jacob palanga, yana ngunarri.

<sup>30</sup> Jacob-ju karra marnarningu, "Ngajulu parrjarnarna ngumpa Ngarrkamili. Payi! Palinyju munu wirlarnaminyi marlkarri!" Palajunjalu Jacob-ju yini marna pala ngurra "Penuel". Palalu yinilu wurrarna, "Ngarrkamili Ngumpa."

<sup>31</sup> Palaja palanga jampa ngarrany karrpu milyapal jarrinyi. Jacob-ju yakarna pala warrarn, paliny yananyikinyi jarntarni-jarntarni [OR yikitikarri?] mila wirlanaja.

<sup>32</sup> Palajunjalu kuwiyi wirlanajalu Israel-milirrangulu munu nganamayi majangu milaja. Janalu kurlkali marnayi purlpilu Ngarrkalu wirlarna Jacob mila nyuku.

## 33

### *ESAU TAMARNA, PURRPI MARNA JACOB (33:1-20)*

<sup>1</sup> Palaja palalu Jacob-ju parrjarna, Esau milpanyikinyi palinykarti 400 pirirrimartajartiny. Wirrirnijaninyi partanykarrangu janamilinga pipimurninyja.

<sup>2</sup> Wirrirnipulinyi warrkamu puluku mirtawajirri partanypa walangkarr. Pulanymartaji wirrirni Leah-pa partanykarrangu, nyirrirni wirrirni Rachel-pa palinymili partany, Juwujapu.

<sup>3</sup> Paliny yana walangkarr purrpi marna palinymili mamaji. Jampa yananyikinyi Esau-karti jurnturtu kaniny jarrinyikinyi 7-mal.

<sup>4</sup> Palaja Esau puntaju mirti jarrinyalu, palanga pulany yampu marnapularninyi. Ngangkurlji pirnipularninyi, yirrirnipularninyi pikalymarninyju.

<sup>5</sup> Palaja Esau-lu parrjarn-parrjarnikinyi, yijalu yirrirnijaninyi mirtawanyjarripa partanykarrangu. "Nganurturrangu nyungu kanganyinjaninyi?" "Palamarrangu partanykarrangu yinyanyi Ngarrkalu."

<sup>6</sup> Palaja warrkamu puluku mirtawajirripa partanykarrangu milpanyiyi wangka, jana jurnturtu kaniny jarrinyiyi walangkarr Esau-nга.

<sup>7</sup> Palaja Leah-pa palinymili partanykarrangu milpanyiyi wangka, jana pukun jurnturtu kaniny jarrinyiyi walangkarr Esau-nга. Palaja Rachel-pa palinymili partany, Joseph, pulany pukun jurnturtu kaniny jarrinyipulu walangkarr Esau-nга.

<sup>8</sup> Palaja Esau-lu japirr marna, "Ngurnungurrangu kuwiyyirrangu yirrirnijaninyi, nganja ngakarnanjaninyi?" Jacob-ju karra marnalu, "Palamarrangu nyuntuku. Yinganyijalu yijapa ngalypa jarrulupijin."

<sup>9</sup> "Munu, jipi kalkurnurnajaninyi ngajumili. Kalkularninga pala nyuntuku."

<sup>10</sup> Jacob-ju karra marnalu, "Yija nyuntu ngalypa waninyikinyijin, munu kuliwayi waninyijin ngajuku. Palajunjalu nyuntulu kangkulumanparninga palarrangu kuwiyyirrangu.

<sup>11</sup> Ngarrkalu ngalypa jirnikinyiji ngajuku, palinyju yinyaji marlu nganipa. Kawajaninyi palarrangu kuwiyyirrangu nyuntuku." Palajun karra marnalu Jacob-ju. Puntaju Esau-lu karra marnalu, "Yijangarra kangkulumanajaninyi."

<sup>12</sup> Palaja Esau-lu karra marnalu, "Ngali yankuli warajanga, ngaju walangkarr yankulumarna."

<sup>13</sup> Jacob-ju karra marnalu, "Ngajumili partanykarrangu manyurlajakun, munu yananyaku nyampakupa. Ngajumili kuwiyyirrangu, kukurnjaripa

nanikutupa purlika, wupartupanimarninyarrangujartiny tuku jilamarna-janinyi. Kaja yananyijalu karrpunga warajanga marlkarri jarrayili.

<sup>14</sup> Walangkarr pilililu ngajuku. Kinti milpulumarna nyirrirni, nyungurrangujartiny. Yartipa turlpalamarnanga nyirrirni nyuntumilikarti ngurrikarti Edom-ja.”

<sup>15</sup> Esau-lu karra marnalu, “Yuu, yakalamarnajaninyi nyungurrangu piririmarta nyuntungu, milpulkulinyurru nyirrirni.” Puntajulu, “Puru kawajaninyi nyuntumili piririmarta. Munu ngaju karrinyarnangu yirnganaku nyuntuku. Ngalyparla wantulumarna.” Palajun muwarr pinalu Esau-ku.

<sup>16</sup> Palaja Esau-lu yakarna palinymili marrka, kurila kulpinyi palinymili warrarnkarti, Edom-karti.

<sup>17</sup> Jacob munu pipurru yanama Edom-karti. Paliny partijirri wararr karinyi, ngapinga, Succoth-ja. Palanga maya jirni palinyku, kuwiyyirranguku jirni pamarrarrangu. Palajalu yini marnayi pala ngurra “Succoth”. Palalu yinilu wurrarna, “Pamarrarrangu”.

<sup>18</sup> Palaja Jacob-jupa palinymilirrangulu yakarnayi pala Succoth, yanayi kara. Turlpanyayi tawunja, Shechem-ja, warrarnja ngapinga, Canaan-ja. Palinyju ngurra jirni palamartaji tawunmartaji.

<sup>19</sup> Purlpi pala warrarn palinyju ngurra jirnipa waninyikinyi Hamor-mili, Shechem-mili japatumili. Jacob-ju yinyajaninyi Hamor-milirranglu warnku wirtu palaku warrarnku.

<sup>20</sup> Palanga palinyju warnku kunmu marnajaninyi. Yini marna pala kunmu warnku El-Eloï-Israel. Palalu yinilu wurrarna, “Ngarrka, pala Israel-mili Ngarrka”.

## 34

### DINAH-KU KURLU JIRNI SHECHEM-JU (34:1-24)

<sup>1</sup> Palanga Dinah, kurntal Jacob-milipa Leah-mili, ngurraja jalakarti yanajanaku puru muwarr pinaku ngurrararranguku mirtawanyjarriku.

<sup>2</sup> Warajalu ngurraralu pirirrilu yirrirni, yini Shechem. Hivitemilirrangungu paliny. Palinymili japatu, yini Hamor, wirtu nyampali waninyikinyi palanga warrarnja paliny. Pala nyarra Shechem-ulu mana kanya pala kurri kurntanymajirrilu, kanya palinymilikarti ngurrikarti, yirrku piririmarninyu kurlarnapularninyi, pala mirtawa palaku panyju, partarl yalaji pирнarninyi. [??]

<sup>3</sup> Wurrarnarningu, “Pala kurri ngalypa yija yiji.” Marru marna yiji pala kurri, ngarlunga palinya wirrernarningu, karrinyikinya Dinah-lu puntajulu marru manaku, ngarlungu paliny wirrinaku.

<sup>4</sup> Wurrarnala japatungu palinymilingi, “Malkulupijin pala Dinah, mirtawa ngajumili jarrinyaku.”

<sup>5</sup> Jacob-ju pinakarrinyi Shechem-ulu kurlu jini palinymilingi kurntalja. [??] Palinymilirranglu partanykarranglu ngurnarrijalu kuwiyyirranglu kalkurnikinyiyi. Paliny jama waninyikinyi, mimarnajanaku kulpanyaku.

<sup>6-7</sup> Partanykarranguku kulpanyaku mimanajalu, milpanyalu Hamor, Shechem-umili japatu, muwarr pinaku Jacob-ungu.

Jacob-milirrangulu partanykarrangulu pinakarrinyiyi ngurnarrija kulpanyajalu. Wirrilya yiji jarrinyiyalu Shechem-uku. Wurrarniyiyarningu, “Nyarralu Shechem-ulu kurlujartiny jini nganyjurrakupa nganyjurrumi-laku japatumilirranguku. Kurlu yiji jini Dinah-ku. Munu yiji palajunka-pali jinaku kurntanya yiji marrnguku.”

<sup>8</sup> Hamor-lu wurrarnala Jacob-ja, "Partanyju ngajumilalu ngarlungu wirrirni kurntal nyuntumili. Nyuntulu yungkulumanpa mirtawaku palinymili jarruliny.

<sup>9</sup> Nganarnaja mirtawanyjarri mankulunyurrujaninyi, puntaju palajun pukun nganarna yungkulunyurrunganinyi mirtawa nyurramilija.

<sup>10</sup> Palaja nganarnanga wantulunyurrunganaku wiyyirr nyungungu warrarnja, maninyakanu parljulkulunyurrarninga ngurra nyarralanga warrarnja, wurrukarrapa warnkujartinyju mankulunyurru, ngurra walja mankulunyurrarninga pukun."

<sup>11-12</sup> Palaja Shechem-ulu japiirmarnajaninyi, wurrarnajanaku Dinah-milingi japatungupa mamajimurninyarranguku, "Ngalypakurra jilkulupijinyurru. Yungkuluminyinyurru Dinah ngajumiliku mirtawaku jarriyaku. Palajun jinajalu nganiwarralpirtiku japiirr malkuluminyinyurru, palangarra yungkulumarnanyurrinyi ngajulu, ngurnipali kurrngalku yi-jaku wurrukarraku karrinyanyurru, ngurnipali wirtuku yijaku warnkuku karrinyanyurru, Dinah puntaju yungkuluminyinyurru."

<sup>13</sup> Jacob-milirrangulu partanykarrangulu kuli ngarrany waninyikinyiyalu Shechem-uku, palinyju kurlujartiny jini Dinah-ku, kurntany yiji jinili [??]. Palajunjalu mitulu muwarr piniyipulaku Shechem-upa japatuku palinymilaku.

<sup>14</sup> Wurrarnayipulaku, "Munu yiji palajun jinakayirni nganarnalu, Shechem palama partany ngarrany, munu pirirri jarrima. Kurntanya yiji nganarnaku marrka yinganyaku pirirringa ngapi nyarra partanyja ngarrany.

<sup>15-16</sup> Yakujun jilkulunyurru: Nyurra wiyyirr piririmarta jilayarningu nyurralu. Palajunjalu nganarnamili kurrirrangu yungkulupiyirninyurriyipa nyurramili kurrirrangu kangkulupiyirnijaninyi nganarnaku. Nganarnalu ngurra jilkulupiyirninyurraku nyurranga, nganyjurru wiyyirr wantuluminyi nyarralanga.

<sup>17</sup> Yijapa nyurra munu piririmarta jarrulunyurru, palaja Dinah kangkulupiyirni, yankulupiyirni warrarn warinykartu ngaramarnti."

<sup>18</sup> Hamor-lupa Shechem-ju, partanyju palinymilalu, wurrarnapulujanaku, "Yuu, pala ngalypa."

<sup>19</sup> Shechem-ulu pipurrulungarra palinymilija muwarrja jirni. Yijalu yiji karrinyikinyiyalu Dinah-ku! Shechem-mili marrngurrangulu yijalu yiji kurlkarri manikinyiyi Shechem nyampalimili pujamumurniny paliny.

<sup>20</sup> Palinypa japatumurniny tawunkarti gate-karti yanapulujanaku muwarrkarti. Palangangarra mirtanya-mirtanya kajarnikinyiyi, wirtu muwarr kurrngarnakinyiyi. Shechem-ulu nyarra muwarr kanyajanaku.

<sup>21</sup> "Nyungurrangu piririmarta jana nganyjurruku jarnturrangu," wurrarnajanaku. "Japiirr malkunyijaninyi wantulupiyi nganyjurruku jana [[and trade with us ??]]. Parrjalayi! Nyungu warrarn wirtu nganyjurruku wiyyirku. Kangkuluminyijaninyi kurrirrangu mirtawarrangukupa janamili piririmarta warajanga jarrulupiyi kurrirrangungu nganyjurru-milingi.

<sup>22</sup> Nganyjurrumili marrngurrangu piririmarta jarrrinya jalu, janaka-palingarra, jana wantulupiyi nganyjurruku nganyjurrungu, wakany marrngurrangu wantuluminyi wiyyirr.

<sup>23</sup> Palajun jinajalu, janapa janamili kuwiyyirrangupa wurrukarra nganyjurrumili jarrulupiyiganyjurruku! Pinakarruluminyi janaku muwarr janamili, nyungu nganyjurrunga ngatu jarrulupiyi nganyjurruku."

<sup>24</sup> Palaja pirirrimarta jinayarningu wiyyirru palanga tawunja.

#### *JACOB-MILALU PIRIRRIMARTALU SHECHEM-MILI NGURRA NGARTARNAYI (34:25-29)*

<sup>25</sup> Kujarrapa waraja karrpurranguja, Shechem-milirrang parra-parra wirtu jarrynaya, kujarra Jacob-mili partanyirri, Simeon-pa Levi, Dinah-mili mamajimurninyirri, tawunja ngalpanyapulu. Munu ngampa pinayipulinyi. Sword kanyapulu, marlkarri wirlarnapulujaninyi pirirrimarta wiyyir,

<sup>26</sup> Hamor-pa Shechem pukun. Sword-ju marlkarri wirlarnapulupulinyi, palaja mayaja Shechem-milia kanyapulu Dinah, kulpanyapulu ngurra pulanymilikarti.

<sup>27</sup> Palajun jinaja, jinta pirirrimarta Jacob-mili turlpanya, yirrinajalu marrngu wiyyir marlkarri, kanyayi wurrkarra wiyyir tawunja. (They did that because their sister had been defiled there.)

<sup>28</sup> Kanyayi kuwyirrangu — kamalpa purlikapa kukurnjaripa tangki — wiyyir kanyayi tawunjapa janamili warrarnja.

<sup>29</sup> Mayarranguja kanyayi wurrukarrapa warnkurrangupa nganirn-anganirn. Kanyayi partanykarrangupa mirtawanyjarri pukun, jakurlirniyi-janinya jana warrkamukata jarrynaku janaku.

#### *JACOB-JU WARNTA MARNAPULINYI (34: 30-31)*

<sup>30</sup> Yarti Simeon-japa Levi-nga wurrarnapulaku Jacob-ju, "Ngajuku yija kurlujartiny jinanyumpulu! Marrngurrangu nyarralanga warrarnja — wiyyir Canaan-milirrangupa Perizz-milirrang — kurlkapirli jarrulupijiyi, wurratalapiyya, "Puka pala Jacob!" Nganyjurru kujarrapa warajakapali, jana kurrgal yiji! Kunmu jarrulupiyi, marlkarri wirlalkulupiyinganyjurrynyi wiyyir! Munu jarrulumarna ngaju, ngajumili marrngurrangu wakany munu jarrulin!

<sup>31</sup> "Wayirti! Shechem-ju marrka ngalayimili kurlukatakapi jirni[??]. Ngani jinaku ngalayi? Munujakun jinaku?"

## 35

#### *JACOB KULPINYI BETHEL-KARTI (35:1-15)*

<sup>1</sup> Palaja Ngarrkalu karra marnalu Jacob-ku, "Yakala nyungu warrarn, yarra Bethel-karti, palanga wantuluman. Palangangarra ngaju miral jarrinyrnangu purlpi, nyuntu wirnti mirti jarrinyikinyin nyuntumili mamajingamarra, Esau-ngamarra. Jampa turpalaman Bethel-ja warnku kuru malaman, wuru jilaman, palanga nyuntu muwarr pilipjin ngajuku." Palajun muwarr pinalu Jacob-ku.

<sup>2</sup> Palaja Jacob-ju muwarr pirnajanaku palinymili mirtawanyjarrikupa palinymili warrkamukatarrangu. Karra marnajanaku, "Yakaliyijaninyi nyurramili ngapirrangu, palarrangu mangunykapalirrangu, warrarnja warinyja. Palaja janpulinyurru, wurru wariny ngalpulunyurru.

<sup>3</sup> Palaja yakalaminyi nyungu ngurra, yankuluminyi Bethel-karti. Purlpi purlpi ngaju wirnti mirti jarrinyirni Esau-ngamarra. Palangangarra ngajulu kamarnalu Ngarrkaku, palinyu pinakarrinyiji. Palinyjungarra tuku jirnikinyinyi ngaju wanyjarnipa yananyikinyirni. Bethel-jangarra ngajulu kuru malamarnajaninyi warnkurrang, muwarr pilamarnalu Ngarrkaku palanga."

<sup>4</sup> Jacob-milija muwarrja janalu yinyiyili wiyirr janamili mangunykapalir-rangu, kurlkapinti ringirrangu pukun yinyiyili. Pirti karlinyi mungkamar-taji palinyju, palanga piringa yamarnajaninyi.

<sup>5</sup> Palajalu Jacob-pa palinymilirrangu yaninyikinyiyi Bethel-karti. Ngarkalu wirntiku jirnijaninyi marrngurrangu ngurrararrang, munu purrja pinamayi Jacob-arrangumili.

<sup>6</sup> Jacob-milirrangu kajarniyi Luz-ja, warrarnja ngapringa, Canaan-ja. Palaku Luz-ku wariny yini Bethel.

<sup>7</sup> Palanga Jacob-ju kuru marna warnkurrang, muwarr pinalu Ngarkaku. Purlpi jampa Jacob mirti jarrinyikinyi palinymili mamajingamarra palangangarra yarrana Ngarrka turlpanyalu. Palajangarra Jacob-ju yini marna pala warrarn El-Bethel. Palalu yinilu wurrarna, "Ngarrka Bethel-ja waniny."

<sup>8</sup> Now Deborah, Rebekah's nurse, died and was buried under the oak outside Bethel. Palajalu yini marnayi "Allon Bakuth". ["Oak of weeping"]

<sup>9</sup> Jampa Jacob kulpanya palinymili kakajimurninymili warrarnja, yarrana Ngarrka miral jarrinyili Jacob-ja, ngalypa yiji muwarr pinalu.

<sup>10</sup> Yini wariny yinyalu Jacob, pala yini Israel. Karra marnalu Jacob-ku, "Purlpi nyuntu yini waninyikinyi Jacob. Kuwarringa munu wurralapiyinti 'Jacob' ["Deceiver"], yini malapiyinti 'Israel' ["Prince with God"].

<sup>11</sup> Ngaju yija Ngarrka, wiyyirku nyurraku nyampali. Ngajulu yungku-lumarnanta marlu jamujipa karluji, kurrgal yiji wantulupiyi. Yankulupiyi ngunarrijirri, warrarn warinyarrangukarti. Jinta want ulupiyi wirtu maaja, kingi wantulupiyi.

<sup>12</sup> Purlpi ngajulu yinyarnalu nyungu warrarn nyuntumili karlujinga, Abraham-ja. Palaja yinyarnalu nyuntumili japartunga, Isaac-ja. Kuwarringa ngajulu yungkulmarnanta nyuntungupa nyuntumili karlujingapa jamuinga, nyirrirnikartijapa yajalapiyi." Palajun muwarr pinalu Jacob-ku.

<sup>13</sup> Palaja Ngarrka yakarna paliny.

<sup>14</sup> Palamangangarra Jacob-ju wararr jirni wirtu warnku, jarnti jirni. Jurtni wayinpa wuyil warnkunga yinganyaku Ngarrkaku.

<sup>15</sup> Palanga warrarnja Ngarrkapa miral jarrinyalu palinyju yini marna Bethel.

#### *BENJAMIN NGAYARTA JARRINYI. RACHEL MARLKARRI JARRINYI (35:16-21)*

<sup>16</sup> Palaja Jacob-milirrangulu yakarniyi Bethel, yaninyikinyiyi ngapikarti, Ephrath-karti. Palinymili mirtawa Rachel ngayinykarra. Kajamarta Ephrath-ja, wupartupani ngayarta jarra-jarrinyikinyi. Rachel yija manyurla, partarl ngayarta jirnikinyi.

<sup>17</sup> Palinymilalu mirtawaju warrkamukatalu mimarnikinyi partanyku ngayarta jarrinyaku. "Wirntiwayi. Puru wanta, pirirri partany manku-luman."

<sup>18</sup> Rachel wurrku yiji waninyikinyi, kinti marlkarrji jarrinykinyi, marlkarrimarninyju yini marna pala partany Benoni. ["Son of my sorrow"] Yarti Jacob-ju wariny jirni yini, Benjamin. ["Son of my right hand"]

<sup>19</sup> Janalu piringi jirniyji Rachel ruwurtumartaji, pala ruwurtu yaninyikinyi Ephrathah-karti. (Kuwarringi pala yini marnayi tawun Bethlehem.)

<sup>20</sup> Jacob-ju wararr jirni wirtu warnku, jarnti jirni, kankarni jungkanga Rachel-milingi. Pala warnku yirrku waninyi kuwarringipa.

<sup>21</sup> Palaja Israel-milirrangup pipurru yaninyiyi. Ngurra jirniyi ngunarrikarti ngapinga, Migdal-Eder-nga.

<sup>22a</sup> Palamartaji waninyaja, Reuben yana Bilhah-karti, Israel-mili yarungu, kalikunga ngalpanya, karta karrinyipulu. Pinakarrinyi palaku Israel-ju.

### *JACOB 12 PIRIRRIMARTAJARTINY (35:22-26)*

<sup>22b</sup> Jacob 12 partany pirirrimartajartiny:

<sup>23</sup> Partany pirirrimarta Leah-mili: Reuben (Jacob-mili murrkangunya), Simeon, Levi, Judah, Issachar, Zebulun.

<sup>24</sup> Partany pirirrimarta Rachel-mili: Joseph-pa Benjamin.

<sup>25</sup> Partany pirirrimarta Bilhah-mili (warrkamukata Rachel-ku): Dan-pa Naphtali.

<sup>26</sup> Partany pirirrimarta Zilpah-mili (warrkamukata Leah-mili): Gad-pa Asher. Palarrangu partany pirirrimarta Jacob-mili, Paddan-Aram-ja waninyaja ngayarta jarrinyiyi wiyyirr.

### *JACOB KULPANYA JAPARTUKARTI (35:27-29)*

<sup>27</sup> Palaja Jacob kulpanya palinymili japartumili ngurrakarti, ngapinga, Mamre-nga, Kiriath-Arba-martaji. (Yini wariny palaku Hebron.) Purlpi purlpija Jacob-mili karlujilupa japartulu ngurra jirnipulu palanga, Abraham-jupa Isaac-ju.

<sup>28-29</sup> Isaac mirtanya yiji jarrinyaja, 180 partunurrangujartinyja, marlkarri jarrinyi. Palinymilalu kujarralu partanyujirri Esau-lupa Jacob-ju pirtinga jirnipulu palanga.

## 37

### *JOSEPH-PA MAMAJIRRANGU PALINYMILI (37:1-11)*

<sup>1</sup> Jacob-ju ngurra paljurnu palinymilingi japartumilingi warrarnja, yini marnayi pala warrarn Canaan.

<sup>2</sup> Wurralamarnanta Jacob-milaku partanykarranguku.

Joseph-ju tuku jirnikinyijaninyi palinymili japartumili kukurnjarirrangupu nanikuturrangu. Palanga paliny 17 partunurranguja. Jinta palinymili mamajimurninyarrangu waninyikinyiyi palakurtirri, Bilhah-milipa Zilpah-mili partanykarrangu. Wurrarnikinyili palinymilingi japartungu palinymilirrangulu mamajimurninyarrangulu jampa kulu-jartiny jirnikinyiyi.

<sup>3</sup> Joseph ngayarta jarrinyi jampa palinymilingi japartungu mirtanya jarrinya jaluu. Palajalu paliny yija ngarlunga Jacob-ja. Palinymilirranguja wiyyirra partanykarranguja Joseph yija ngarlunga palinymilingi. Yinyala Joseph kuwurtu marnikata [long robe — work out best term].

<sup>4</sup> Palinymilirrangupu mamajimurninyarrangu miranu jarrinyiyalu janamillalu japartulu ngarlunga jirni yija marrkamurniny. Palaja kulilu yirrnikinyiyi, malyparr karrinyikinyiyalu palinyku.

<sup>5</sup> Warrukartingi warajanga kapukarri marna Joseph-ju, wurrarnajanaku palinymilirrangungu mamajimurninyarrangungu.

<sup>6</sup> “Pinakarrayi! Wurralamarnanyurraku ngani kapukarri marnarna.

<sup>7</sup> Paru makanu wirrkarnikinyiyirni, pala paru mayijartiny. Pirntu?? jirnikinyiyirnipa kunyji pirnikinyiyirni jungkanga yakarnikinyiyirni-janinyi. Ngajumili pirntu wararr karrinyi. Nyuntumilirrangupu kunmu jarrinyiyi, wupurnijiyi, murtinga juripi-juripi.”

<sup>8</sup> Pinakarrinyiyi pala muwarrja paliny mamajimurninyarrangulu kuli jarrinyiyalu. "Wunyjurru? Nyuntu maaja jarrinyaku karrinyan nganarnaku, wurranañku nganarnaku jinaku?" Pinakarrinyajalu kapukarriku wariny muwarr palinymili kulilu yirrirniyi.

<sup>9</sup> Palaja wariny yarrana kapukarri marna. Mamajimurninyarrangungu wurrarnajanaku, "Pinakarrayiji! Yarrana kapukarri marnarna. Kapukarringi ngajumilingi yirrirnirnijaninyi karrpupa wirlarrapa panikatarrangu 11 wupirnijiyi palarrangu."

<sup>10</sup> Palinymili japatulu pinakarrinyajalu warnta marna. "Nganikapali pala kapukarri? Nyuntulu wurrarnan nganarnaku nyuntuku wupinaku jungkakarti? Munu wupilipiyirnangu ngaju, pipi, nyuntumili mamajirrangupa marrka, Pinjamin." Palajunjalu warnta marna Jacob-ju.

<sup>11</sup> Joseph-milalu mamajirrangulu yirrkulu ngampan karrinyikinyiyalu. Palinymilalu japatulu kurlkarri marnikinyi ngarrany pala kapukarri.

### *JOSEPH-MILI MAMAJIRRANGU YINYAYALU NGAJARRIRRANGU WARNKUKU (37:12-36)*

<sup>12</sup> Yarti mamajirrangulu kanyayijaninyi janamili japatumili kukurnjaripa nanikuturrangu Shechem-ukurtirringi kanyjirnikinyiya parumarra-marraku kuwiyyirranguku nganinyaku.

<sup>13</sup> Japatulu palinymilalu muwarr pinalu Joseph-ku, "Nyuntumilalu mamajirrangulu kalkurnayijaninyi kuwiyyirrangulu Shechem-ukurtirringi. Ngajulu ngakalamarnanta janaku." "Yuu. Yankulumarnajanaku, Japartu."

<sup>14</sup> "Kajanajalu japiirr malamanjaninyi "Wayirti? Ngalypa waninyinyurru? Wayirti kuwiyyirrangupa? Ngalypa waninyiyi?" Kulpulumun ngajukarti, wurratalapijin wayirti, ngalypa waninyayi." Palajalu ngakarna Joseph.

Joseph-ju yakarna ngurra, yana jinangu Shechem-ukarti.

<sup>15</sup> Palanga kajanajalu, munu, kanyjirnijanaku. Kanyjin-kanyjinangulu warinyjulu marrngulu japiirr marna, "Nganiku kanyjirnan?"

<sup>16</sup> "Ngaju kanyjirnarnijanaku ngajumiliku mamajirranguku. Wayirti nyuntu miranu wanyarni kanyayijaninyi kuwiyyirrangulu?"

<sup>17</sup> "Purlpi ngarrany yanayi. Pinakarrinyirnijaninyi, 'Yankunyi Dothan-karti'." Joseph-ju yajarnajaninyi, yirrirnijaninyi wangka Dothan.

<sup>18-20</sup> Yirrirniyi kajangulu ngarrany janamili marrka. Wurrarniyirnangu, "Nyungu kapukarri manakata milpayinyi. Jipi wirlalaminyi markarringi. Parnpilaminyi pirtingi wirtungu. Wurralaminyili japatungu nganyjurru-milingi, kuwiyyilu kulikatalu marlkarri wirlarni, nganayi. [??]. Palajalu kapukarrimajirri wantuliny.

<sup>21-22</sup> Rueben-ju pinakarrinyikinyi jana muwarr pinaja. "Munu marlkerringa wirlanaku Joseph-ku! Parnpiliminyi nyungu pirtingi wirtungu." Rueben-ju kurlkarri marnikinyi, "Yarti kulpulumarnalu, mankulumarna marrka pirtija, kangkulumarna nganarnamilikarti japatukarti."

<sup>23</sup> Joseph turlpanyijanaku palinymilaku mamajirranguku. Warlirniyi, yinyjil pirniyalu palinymili kuwurtu [coat??] marnijartiny,

<sup>24</sup> parnpirniyi pirtingi wirtungu, mulyingi yiji. Pirti punarra. [It was actually an old water-cistern, dug to hold water, but dry.]

<sup>25</sup> Kajarniyi mayiku nganinyaku.

Mayi nganinyangulu yirrirniyijaninyi marrngu taManasseh camel-jartiny pirlurru yajarnikinyiyi. Jinta ngurra warinyja, yini marnayijaninyi Ishmael-milirranglu. (Wariny janamili yini Midian-milirranglu.) Tamarniyi

Gilead-ja, yananyayi Egypt-karti. Camel-ju kanganyikinyiyi jurikata jirnikatapa mirrijin warinypa wariny warnkuku maninyaku.

<sup>26</sup> Malyurtamarninyju Judah-lu wurrarnajanaku, "Munu wirlanaku marlkarriku marrkaku nganyjurramilaku, munu kuku jinaku palinyku kawuku.

<sup>27</sup> Jinyji pilkunyi warnkuku nyungungurrangu Ishmael-arrangunu. Paliny palama nganyjurramili walja marrka, munu wirlanaku marlkari."

<sup>28</sup> Wangka jarrinyijalu marrngurrangu camel-jartinyarrangu jinyi pirniyi mamajirrangulu warnkuku nyungurrangunu. Manayi kuliny-kulinyju, [??] kanganyangulu Egypt-kartijakun.

<sup>29</sup> Yarti kulpanya Rueben pirtikarti. Munu kanyjirnalu Joseph-ku. Rueben ngarlu kurlu jarrinyi munu kanyjinaja. Wurrukarra palinymili ngartarna marlparrjartinyju.

<sup>30</sup> Kulpanyajanaku mamajirranguku, wurrarnajanaku, "Marrkaku munu kanyjirniralu! Ngakumpa jarrinyirni!"

<sup>31</sup> Wirlarniyi nanikutu, pijirringi nanikutunga wirrirniya kuwurtu Joseph-mili.

<sup>32</sup> Kanyayi kuwurtu janamilikarti japartukarti. "Nyungu yirrili kuwurtu! Yirrirniyirni warrarnja warinyja! Yijapa nyuntumilimili partanymili?"

<sup>33</sup> Yirrirni. "Yijarla pala ngajumilimili partanymili, Joseph-mili! Kuwiylu kulikatalu nganiyi!"

<sup>34</sup> Palajalu Jacob wIRRILYIJARTINYJU wurrukarra palinymili ngartarna. Wirrirnirnangu kurlujartinyirrangu wurrukarra. Ngangkurlu pirnikinyalu partanyku palinymilaku karrpurrangu karrpurrangu.

<sup>35</sup> Palinymilalu partanykarrangulu pirirrilupa mirtawalu partarl tuku jirnikinyiyi. Yirrkulu ngangkurlu pirnikinyalu. "Partarl pikaly jil-iminyinyurru. Kurluny-kurluny wantulumarna marlkarikartijakun."

<sup>36</sup> Nyungungu warrarnja warinykartingi palalurrangu kanganyikinyiyi Joseph Egypt-kartijakun. Palanga kajanajalu jinyji pirniyi warnkuku. Mana marrngulu, yinilu Potiphar-lu. Potiphar nyampali wirtu warrkamu puluka king-ku Egypt-milaku, nyampali jurljarranguku king-milaku. [He was captain of the king's personal bodyguard.]

## 38

### JUDAH AND TAMAR (38:1-30)

<sup>1</sup> Palamartaji [?? "about that time" — soon after his brothers had sold Joseph as a slave and the traders took him to Egypt] Judah-lu yakarna marrkarrangu palinymili, warnkumarramarraja katukarna, yana ngapikarti, Adullam-karti. Ngurra jirni pirirringa, yini Hirah.

<sup>2-3</sup> Palanga warrarnja pirirri Canaan-mili nyirrirnikartijanga, yini Shua. Shua partany mirtawajartiny. Judah-lu yirrirni. Yarti warajanga jarrinya-pulu. Karta karrinyipulu, mirtawa ngarlungu jarrinyi, pirirri partany kanya, yini marnapulu Er.

<sup>4</sup> Palaja pirirri wariny partany kanya, yini marnapulu Onan.

<sup>5</sup> Palaja wariny pirirri partany kanya, yini marnapulu Shelah. Ngayarta jarrinya-nga-waninyayi ngapingga, Kezib-ja.

<sup>6</sup> Punjaja Judah mirtawa kanya, yini Tamar, palinymili murrkangunyaku, Er-ku.

<sup>7</sup> Ngarrka yirrirnikinyi Er, kurlu yija pala pirirri. Palajalu Ngarrka marlkari wirlarna.

<sup>8</sup> Palaja Judah-lu wurrarnala Onan-ja, “Nganyjurrumilija mangunyja, pirirri marlkarri jarrinya ja partnymajirri, palinymili marrka karta karrinyaku palinymilinga mamajinga nyupajinga, yirrirnikartijarrang jinaku mamajiku, mamajimilirrang jarrulupiyi. Palajun jilaman, karta karrulinyumpulu Tamar-pa.

<sup>9</sup> Onan miranu pala partany munu palinymili wantuliny. Palajalu karta karrinyapulu, palinyju parti palinymili jurtirni jungkanga, partany jinangamarra mamajiku.

<sup>10</sup> Ngarrka wurrarna, “Pala pirirri pukurl kurlu yija jirnikinyi!” Palajalu marlkarri wirlarna Onan.

<sup>11</sup> Palaja Judah-lu wurrarnala ngarraya palinymilingi, Tamar-nga, “Kulpulaman japatumurninykarti ngurrakarti, palanga piririmajirri wantuluman. Yarti pujamu ngajumili wirtu jarruliny, Shelah, palanga warajanga wantulinyumpulu.” (Judah mitu-mitu marnala. Kurlkapirli jarriyarninyi, “Marlkarri jarrala Shelah pukun, mamajikapalijirri!”) Palaja Tamar kulanya japatumurninykarti, waninyi palinymilingi ngurranga.

<sup>12</sup> Yarti Judah-mili mirtawa marlkarri jarrinyi. Ngangkurl jinaja, Judah-pa ngapinga, Timnah-karti yana. Warinyarrangulu kukurnjayi palinymili jiyiram jirnikinyalu. Yanapulu Judah-pa miyirty palinymili Hirah, paliny ngapija, Adullam-ja.

<sup>13</sup> Warinyju Tamar wurrarnalu kakajimarniny Timnah-karti yankuliny.

<sup>14</sup> Miranu jarrinyi Tamar Shelah-ku, Judah-mili nyirtingunyaku, purlpi pirirri jarrinyi. Judah-lu Shelah yinyama Tamar-nga, pulany warajanga jarrinyaku. Purlpi matunyaku wurru wartu jirnirnangu Tamar. Pala muwarr pinakarrinyajalu, matunyaku wurru karnu pирнarninyi, wariny wurru wirrirnarninyi, waralu ngumpa wurta jirnarninyi. Palaja yana ngapikarti, Enaim-karti, tawun wupartu pala, ruwurtunga Timnah-karti. Enaim wangkamartaji ruwurtunga kajarna.

<sup>15</sup> Judah Timnah-karti yananya Tamar yirrirni, ngumpa warapurni, kurlkarrinyarningu mirtawa kurla-kurla paliny. Munumpa pala mirtawa ngarrayamarniny palinymili!

<sup>16</sup> Yana-yana mirtawakarti ruwurtumartajinga, wurrarnalu, “Yuu, warnkuku wirtuku karrinyanpa?” Japirr marna, “Ngani yungkulupijin?”

<sup>17</sup> Judah-lu puntaju marna, “Kuwiyirranguja ngajumilija ngakalamarna nanikutku.” “Yuu, ngapi kuwarri yungkuluman, yarti jinyji jilamarna nanikutku.”

<sup>18</sup> “Ngani yungkulumarnanta kuwarri?” “Nyuntumili seal-pa marntip-inti warnu pukun.” Yinalu palajirri. Palaja karta karrinyipulu. Palajunju ngarlunga jarrinyi Tamar.

<sup>19</sup> Ngurrakarti kulpanyi Tamar, ngumpa wartu jirnarningu yirrinanga-marra, matunyamili wurru wirrirnarningu.

<sup>20</sup> Judah-lu miyirty ngakarna, Hirah, nanikutujartinyju, mirtawa kanyji-nakupa mananyaku palinymili seal-pa marntipinti warnu. Partarl Hirah-lu kanyjirnalu mirtawaku.

<sup>21</sup> Marrngurrangu Enaim-martaji wurrarnajanaku, “Wanyjarningi pala kurla-kurla mirtawa, purlpi nyungungu ruwurtungumartaji waninyi?” Puntaju karra marnayi, “Munu yiji kurla-kurla mirtawa nyungungumartaji waninyi.”

<sup>22</sup> Hirah kulanya Judah-karti, wurrarnalu, “Partarl kanyjirnikinyirni. Marrngurrangulu ngurraralu wurrarnajiya, munu yiji kurla-kurla mirtawa palangamartaji.”

<sup>23</sup> Karra marnalu Judah-lu, "Puru wanta. Palajirri seal-pa marntipinti warnu kalkuli. Ngurrararrangulu pinakarrayali, yijapa nyarru piliyinglikalu. Yijalu jinyji pinaku karrinyarna. Kanyjirnan-kanyjirnan, munu."

<sup>24</sup> Kujarrapa waraja wirlarrarranguja warajalu Judah-nga wurrarnalu, "Ngarrayamarniny nyuntumili kurla-kurla mirtawa jarra-jarrinyi, paliny ngarlunga." Puntaju karra marna Judah-lu, "Jalakarti kanganyaaja kampa-nyaku marlkarringa!"

<sup>25</sup> Kanganyakanu muwarr ngakarnalu kakajimurninykarti, "Warajalun-garra pirirrilu ngarlunga jirninyi. Parrjala nyungujirri seal-pa marntipinti warnu pukun. Parrjala! Nyuntumili!"

<sup>26</sup> Judah miranu jarrinyi palajirriku, wurrarna, "Tamar yijalu jirni. Kurlu jirnirni palinyku. Yinyarnamalu partany ngajumili, Shelah, wara-janga jarrinyaku pulany." Palajangarra Judah munu Tamar-nga karta karrimapulu.

<sup>27</sup> Partany kanganyaaja, miranu jarrinyayi partanyjirri kujarrajartiny!

<sup>28</sup> Partany kanganyaajalu, warajalu parirr jirrarninya. Mirtawalu mana, mirrilyi pilyarri kunyji pirni, wurrarna, "Nyungungarra walangkarra turlpanyi."

<sup>29</sup> Palaja parirr purrirna kaninykurti, palaja mamaji palinyku murrkan-gunya jarrinyi. Palanga mirtawalu wurrarnalu, "Nyungukapalingarra kurtanyan!" Palajalu yini marnayi "Perez" [which means, "breaking out"].

<sup>30</sup> Palaja marrkamarniny kurtanya, pilyarri milyirri parirrja. Yini marnayi "Zerah".

## 39

### *JOSEPH-PA POTIPHAR-MILI MIRTAWA (39:1-18)*

<sup>1</sup> Nyarrangarrangu Ishmael-milirrang Joseph kanyayi Egypt-karti, ka-janajalu jinyji pirniyi warnuku. Mana marrngulu, yinilu Potiphar-lu. Potiphar nyampali wirtu warrkamu puluka king-ku Egypt-milaku, nyampali jurljarranguku king-marninymilaku [captain of the king's personal bodyguard].

<sup>2</sup> Joseph warrkamu jarrinyikinyi ngurranga palinymilimilingi nyampalimilingi. Ngarrkalu ngalypa jirnikinyalu. Yatilpa jarrinyi ngurranga Potiphar-milingi.

<sup>3</sup> Potiphar-lu yirrirni ngalypakata jirnikinyijaninyi, Ngarrkalu tuku jirnikinyi, nganipa jirnikinyijaninyi ngalypa.

<sup>4</sup> Palajamarra pikaly jarrinyalu Joseph-ku, nyampali jirni palamarrangu palinymililingi marrngurrangunapa wurrukarrarrangunga. Joseph-ju tuku jinikinyi pukurl palinymili nyampali.

<sup>5</sup> Ngarrka pikaly jarrinyalu Joseph-ku. Palajunjalu ngalypa jirnikinyalu Potiphar-ku, Joseph-milaku nyampaliku.

<sup>6</sup> Potiphar-lu wurrukarrarrangu yakarnala wiyyir Joseph-ku tuku jinaku. Munu nganipa kurlu jarrimalu Potiphar-ku, ngalypajakun jirnijaninyi Ngarrkalu. Potiphar-lu mayija ngananyajalu karta karrinyikinyi. Wirri-lyimajirri, pikaly yiji.

Joseph wangalangu yiji, ngumpa ngalypakata kawupa.

<sup>7</sup> Palaja jampa Potiphar-milalu mirtawalu marru marnikinyi Joseph. Japirr marna, "Karta karruli warajanga."

<sup>8</sup> "Munu ngali karta karrinyaku warajanga! Nyuntu ngajumilimili nyampalimili mirtawa. Wirrirninyi ngaju nyampali palinymilaku wurrukarraku wiyyirku, kalkunaku wiyyirku.

<sup>9</sup> Munu nyuntuku kanganyaku. Munu ngaju muwarrku Ngarrkaku ngartanaku!"

<sup>10</sup> Palalu mirtawalu yirrkulu japirr marnikinyi. Palinyju yirrkulu, "Munu ngali karta karruli warajanga." Munu karta karrimapulu warajanga.

<sup>11</sup> Warajanga karrpungu Joseph ngalpanya mayanga palinymilimilinga nyampalimilinga warrkamuku jinaku. Jinta piririmarta waninyikinyiyi warinykartingi, kajamarta.

<sup>12</sup> Palalu mirtawalu manalu palinymili kuwurtu, japirr marna karta karrnyaku. Yakanajalu kuwurtu mirtawanga parirrja, Joseph mirti jarrinyi kaninykurtija.

<sup>13-14</sup> Mirtawalu warlirnikinyi kuwurtu. Kamarnajanaku warinykur-rangu piririmartaku. Turlpanyiyalu milpanyajalu mitu marnikiny-ijanaku. "Ngajumilalu pirirrilu nyungu pirirri kanya nyungukarti mayakarti kurntany jinaku ngajuku. Turlpanyi kaninykartu, karra marnaji, 'Karta karruli warajanga.' Yakal marnarna ngajulu. Kamarnarna marrja.

<sup>15</sup> Kamanajalu yakarna kuwurtu, mirti jarrinyi mayaja kaninykurtija."

<sup>16</sup> Kalkurnu kuwurtu kala Joseph-mili, mimarnalu palinymilaku piririku kulpanyajaku.

<sup>17</sup> Potiphar kulpanyajalu palarrangu ngarrany muwarr wurrarnala. "Nyarra pirirri, nyarra Hebrw nyuntulu kanyanpa nyungukarti mayakarti, turlpanyi nyungukarti ngaju kurntany jinaku.

<sup>18</sup> Kamarnarna marrja, yakarna kuwurtu nyungungu mirtimarninyju." Palajunju mitu marna palinymili pirirri.

### *WIRRIRNAYI JOSEPH JURNTINGA (39:19-23)*

<sup>19</sup> Potiphar-lu pinakarrinyijalu wirrilyi karrinyi yiji.

<sup>20</sup> Palinyju kanya Joseph jurntikarti. Palanga jurntinga kingilu wirrirnikinyijaninyi wirrilyijartinyju. Joseph waninyikinyi palanga jurntinga.

<sup>21</sup> Ngarrkalu munu kakurnama Joseph, jurntingaja kurlkarri marnikinyi paliny. Palajunjalu jurntiku nyampali pikaly jarrinyalu Joseph-ku.

<sup>22</sup> Wurrarnalu nyampalilu Joseph-ku, "Nyungurrangu marrngu tuku jilamanjaninyi. Nyampali nyuntu yiji jirnirninti, yirrilamanjaninyi warrkamupa jilipiyi jurntinga."

<sup>23</sup> Ngarrkalupa Joseph-ju jirnikinyipulu marakulalu. Palajalu wiyyirr ngalypa jarrinyi. Nyampali jurntiku puru pikaly wanikinyi. Yakarnala wiyyirr warrkamu Joseph-ku.

## 40

### *KAPUKARRI YIMPARNPULAKU JOSEPH-JU (40:1-23)*

<sup>1-2</sup> Jampa palajalu kingi palaja warrarnja wirrilyi jarrinyipulaku kujarraku warrkamu pulukaku. Warinyju tuku jirnikinyalu wayin kingimili, warinymarninyju mayi kamparnikinyalu kingiku. Palalujirri kingi wirrilyi jinapulu.

<sup>3</sup> Palajalu jurntinga wirrirnapulinyi, palanga jurntinga Joseph waninyikinyi.

<sup>4</sup> Nyampalilu jurljaku wurrarnalu Joseph-ja, "Tuku jilamanpulinyi palajirri!" Joseph-ju tuku jirnikinyipulinyi punja.

<sup>5</sup> Warajanga warrukartingi kapukarri marnapulu.

<sup>6</sup> Karrpunga jarrinya ya yirrirnapulinyi Joseph-ju, wirrilyijartinyjirri.

<sup>7</sup> "Nganija nyumpala ngumpa wirrilyijartiny?"

<sup>8</sup> “Kapukarri marnalayi. Palajirriku kapukarriku ngaliku ngakumpa ngaliyi. Munu wurrarnakayingalayinyi pala muwarr.” “Ngajunga wurreralajipulu ngani palajirri kapukarri mananyumpulu. Ngarrka miranu nyumpalamilaku kapukarriku. Palinyju ngaju miranu jilamanyi.”

<sup>9-10</sup> Nyampali wayinkulu wurrarnala, “Kapukarri marnarna yirrirnirni mungka kurayipipinti kujarrapa waraja karlkajarrarrangujartiny. Jampa walyakajartiny jarrinyaja pupujartiny jarrinyiyi, jukurtarrangu turlpaniyiyi, murla jarrinyiyi.

<sup>11</sup> Minpinapinti kingimili warlirnarna parirrja. Manarnajaninyi juktarrangu, nyitarnarnajaninyi parirrju, wayin jarrinyaku, yinyarnarna kingi.” Palajunju wurrarnala Joseph-ngu.

<sup>12</sup> Joseph-ju wurrarnala, “Pala kujarra waraja karlkajarrarrangu palalu wurrarna kujarrapa waraja karrpu.

<sup>13</sup> Kujarrapa warajaja karrpuja kingilu wurralkulinyjanaku nyuntu murru malapiyinta jurntija, jipi nyuntu ngalypa, yarrana palinymili warrkamu puluka jilamanta. Nyuntu ngarrany palinymili wayin kanganyakata jarruluman.

<sup>14-15</sup> Nyunguja pirtija murru malapiyinta kurlkarri malamanyin. Wurralamanpala kingingi yija, japirr malamanpa murru malamanyi nyunguja pirtija. Purlpilu jintalu marrngurrangulu warlirninyiyi kanyanyiyi ngajumilia warrarnja, Hebrew-mili warrarnja, nyungukarti kanyanyi. Ngajulu munu kurlujartiny jinamarna nganipa nyungungu warrarnja, wata wirrirninyiyi nyungunga jurntinga. Japirr malamanpa kingi yiji nyunguja murru malaminyi jurntija.”

<sup>16</sup> Mayi kampanakatalu muwarr pinakarrinyijaninyi ngalypakatarrangu wurrarnala Joseph-ja, “Ngajulu pukun kapukarri marnarna. Kapara kujarrapa waraja martumurripinti kanganyikinyirnajaninyi jurnturtungu.

<sup>17</sup> Kankakartingi kampanajarrangu warinypa wariny mayi kingiku. Wirrujartinyju ngananyikinyiyi pala mayi kankakartija.”

<sup>18</sup> “Nyungu nyuntuku muwarr. Pala kujarra waraja kapararrangu palalu wurrarna kujarrapa waraja karrpu.

<sup>19</sup> Pala kujarrapa waraja karrpuja kingilu wurralkulinyjanaku kangkulupiyinta nyunguja jurntija kingikartimilirrangulu jurljakarti, kingilu wurralkulinyjanaku ngalyi malyalapiyinta. Kawu nyuntu marlkarrija jarnti jilipiyinta karntinga wurrunga. Wirrujartinyju ngalkulupiyinta kawu.” Palajunju wurrarnala Joseph-ju.

<sup>20</sup> Palaja kujarrapa waraja karrpuja kingilu wurrarnajanaku, “Mayi wirtu kampalkulinyurru nganin-nganin wirtukurrangu warrkamu pulukurranguku ngajumilaku.” Wurrarnalu warinyja, “Marrapulinyi palajirri jurntija nyampali wayinkupa mayi kampanakata.”

<sup>21</sup> Wayin kanganyakata warrkamu jarrinyalu kingiku ngarrany.

<sup>22</sup> Mayi kampanakata wirlarniyi marlkarri, jarnti jirniyi kawu karntinga mungkanga kingimilia muwarrja. Yija muwarr wurrarnapulaku Joseph-ju palangajirri wayinku nyampalingipa mayi kampanakatanga.

<sup>23</sup> Palalu wayinku nyampalilu munu kurlkarri marnama Joseph, kakurna ngarrakuny.

## 41

### KAPUKARRIJIRRI KINGIMILI YIMPIRNALU JOSEPH-JU (41:1-36)

<sup>1</sup> Yarti kujarra partunuja kingi kapukarri marna. Palanga kapukarringa wararr karrinyikinyi wangka pijunga wirtunga, yini pala piju River Nile.

<sup>2</sup> Parrjan-parrjanangulu 7 purlikarrangu jinjikatarrangu janpaja turlpaniyiyi, pijungu ngananyikinyiyi paru.

<sup>3</sup> Palaja 7 purlikarrangu pajalimajirri winyjany-winyjany janpaja turlpaniyiyi, wararr karrinyikinyiyi wangka pajalikatanga purlakaja.

<sup>4</sup> Palanga nganayijaninyi wiyyirr pajalikatarrangu purlika. Palaja kingi parrily jarrinyi kartaja.

<sup>5</sup> Palaja karta karrinyi, kapukarri marna wariny. Kapukarringa yirrirni patalyi yini wiyyiti, waraja patalyi 7 mayijartiny, ngalypakatajartiny yiji.

<sup>6</sup> Palaja 7 patalyi kurlujartinyirrangulu turlpaniyiyi, purangulu wangalju kamparnajaninyi lalka jinangulu.

<sup>7</sup> Palarrangulu 7 kurlujartinyirrangulu kunanyiyijaninyi ngalypakatarrangulu. Kingi parrily jarrinyi kartaja, parrily jarrinityingulu puru kapukarri.

<sup>8</sup> Marntungu ngawu kanyjil-kanyjil jarrinyikinyi kapukarrikujirri. Muwarr ngakarnajanaku kamanaku warrkamuku maparnpurrjakupa yatilpaku. Wurrarnajanaku pala kapukarrijirri, janapa ngawu kanyjilkanyjil wurrarnayirnarninyi. Munu nganurtupa miranu palakujirri kapukarriku.

<sup>9</sup> Palaja wayin nyampalilu wurrarnala, "Kurlkapirli jarrinyirni, muwarr kakurnarnangu.

<sup>10</sup> Purlpingarra nyuntu wirrilyi jarrinyinnngaliyaku kujarraku. Nyuntulu wirrirninngalayinyi nyuntumili mayi kampanakatapa ngaju jurntinga. Wurrarnanpalu nyampalinga jurljaku 'Tukulu parrjalapulinyi palamajirri, mujarri jarriyipululu.'

<sup>11</sup> Jurntingalu ngaliyalu kapukarri marnaliyi warajanga warrukarti.

<sup>12</sup> Palamanga wangalangu, paliny Hebrew-milija. Paliny warrkamukata jurljamilaku nyampaliku. Ngaliyalu wurrarnaliyili kapukarri ngalayimili. Wurrarnangaliyaku ngalayimili kapukarrijirri.

<sup>13</sup> Pala kujarra muwarr yiya jarrinyipulu. Yarrana warrkamukata jirninyin, wurrarnanjanaku jurljaku, 'Wirlaliyi palama mayi kampanakata marlkari'." Palajunju palalu wayin nyampalilu wurrarnala kingingi.

<sup>14</sup> Pinakarrinyajalu palakurrangu muwarrku kingilu ngakarna jurntikarti walarni jinaku Joseph-ku janyinku. Joseph-ju ngarnka wirrkarnarninyi, wirrirnirnangu wurrukarra ngalypakata.

<sup>15</sup> Kingilu wurrarnala, "Ngajulu kapukarri marnarni, munu nganurtulupa wurrarnakaji pala muwarr. Wurrarnajiyi nyuntu miranu palaku muwarrkurrangu."

<sup>16</sup> "Ngaju munu yatilpa, Ngarrkalu wurralkulinyngaliku pala muwarr." Palajunju wurrarnala kinginga.

<sup>17</sup> Kingilu wurrarnala, "Ngajumilinga kapukarringa wararr karinyikinyirni pijunga wangka Nile-ja.

<sup>18</sup> Yirrirnirnijaninyi 7 purlika pajalikatarrangu turlpaniyiyi ngapaja. Janalu ngananyikinyiyi paru.

<sup>19</sup> Palaja 7 pajalimajirrirrangulu turlpaniyiyi ngapaja, palarranglu winyjaly-winyjaly yiji. Munu ngajulu yirrirnamalparnajaninyi purlika nyunguranganukapali nyungunga warrarnja Egypt-ja!

<sup>20</sup> Palangurrangu winyjaly-winyjalyju kunanyiyijaninyi pajalikatarrangu.

<sup>21</sup> Palaja ngananyijalu waninyiyi winjaly-winyjaly ngarrany. Palaja kartaja parrily jarrinyarni.

<sup>22</sup> Palaja kapukarri marnarna warinymal. Yirrirnirni patalyi yini wiyyiti, waraja patalyi 7 mayijartiny, ngalypakatajartiny yiji.

<sup>23</sup> Palaja 7 patalyi kurlujartinyirrangu turlpanyiyi, purangulu wangalju kamparnajaninyi lalka jinangulu.

<sup>24</sup> Palarrangulu 7 kurlujartinyirrangu kunanyiyijaninyi ngalypakatarrangu. Wurrarnajanaku kapukarri yatilpanga, palalurrangu munu wurrarnamajyi."

<sup>25</sup> Joseph-ju wurrarnala kinginga, "Nyuntumili kapukarrijirri muwarr palajirri warajangarra. Ngarrkalu jurti jinangu ngani jilkuliny kuwarrilu.

<sup>26</sup> Palarrangulu 7 pajalikatalurrangu purlikalu wurrarnaya 7 partunu ngalypakatarrangu. Waraja ngarrany wurrarnaya 7 ngalypakatarrangulu wiyyitilu. Pala kapukarrijirri warajangarra muwarr.

<sup>27</sup> Palarrangulu 7 winyjaly-winjalyju purlikalu wurrarnaya 7 partunu kurlujartinyirrangu. Waraja ngarrany wurrarnaya 7 kurlujartinyju wiyyitilu, purangulu wangalju kamparnajaninyi lalka jinangulu. Palamarrangungu 7 partunungu kurlujartinyirrangu wuparturrangu mayi ngalkuluminyi.

<sup>28</sup> Palajun muwarr pirnirninyurraku, Ngarrkalu jurti jinanga yukuyil jilkuliny kuwarri jampamarta.

<sup>29</sup> Palanga 7 partunungu mayi kalkuluminyi wirtu yiji ngunarrijirringi warrarnjirringi Egypt-ja.

<sup>30-31</sup> Palajalu 7 partunurrangulu kurlujartinyirrangu yajalapiyijaninyi 7 partunurrangu ngalypakatarrangu. Wupartu mayi turlpulapiyi. Kurlujartiny jarruliny yiji nganyjurruku wiyyirru. Kakuluminyi mayi kalkur-nalpinyi purpilu marlu. Kurluny-kurlunya warrarnja yiji wantuluminyi.

<sup>32</sup> Ngarrkalu yinya nyuntunga pala kapukarrijirri jurti jinangu palajun jilkuliny kuwarrimarta.

<sup>33</sup> Yijapa pinakarrulupijin, kingi, yukuyil jilimin. Kurlkapirlikata mankuluman, nyampali jilaman wiyyirru warrarnku.

<sup>34-35</sup> Yijapa wurralamajanaku warinykurrangu warrkamu pulukukataku kuru malkulupiyijaninyi mayirrangu warinyjirrangu tawunjarrangu. Palalurrangu piririmartalu marlu jilapiyi mayi partunungu ngalypajalu, winya jilapiyi tawunjarrangu, tuku jilapiyi nyuntumilijalu muwarrjalu.

<sup>36</sup> Kurlujartinyja partunurrangunga marlu wantulinynganyjurruka mayi. Palaja munu janparrja marlkarri jarruluminyi." Palajunjalu.

#### *KINGILU NYAMPALI WIRTU EGYPT-KU JIRNI JOSEPH (41:37-44)*

<sup>37</sup> Kingipa palinymili piririmarta pinakarrinyiyalu Joseph-ku. "Nyungu muwarr ngalypakatarrangu!"

<sup>38</sup> Kingi muwarr pirnijanaku palinymilaku piririmartaku, "Ngarrkamilalu pirlurrju kalkurna Joseph. Munupa nganurtu palinykapali, yatilpa yiji."

<sup>39</sup> Kingilu muwarr pinalu Joseph-ku, "Ngarrkalu nyuntu miranu jinanta, munu nganurtu nyuntukapali ngalypakata yatilpa.

<sup>40</sup> Palajalu nyuntu nyampali jinarnanta nyungu warrarnkujirri, ngajumilarrangulu marrngulu nyuntuku pinakarrulupiyangu, janalu jilapiyi nyuntujalu muwarrjalu. Ngaju ngarrany nyampali wantulamarnanga nyuntuku. Nyuntu nyampali wantulumanjanaku jintaku wiyyirru.

<sup>41</sup> Kuwarri ngajulu nyampali jinarnanta wiyyirru Egypt-ku."

<sup>42</sup> Kingilu palinymili ringi parirrja yinyji pirni, wirrirnili parirrja Joseph-ja. Wurrarnajanaku jintaku wurru wirriliiyili Joseph-ja ngalypakatarrangu. Kingilu ngalyinga wirrirnili miji-mijkata chain.

**43** Kingilu yinya Joseph palinymili waraja chariot jarli pinaku. Piririmarta jinta marnti yanalpiyi walangkarrangu chariot-ja, kamarnalpiyi-janaku warinykurrangu marrngurranguku, "Purlu jarrayil! Purlu jarrayil!" Palajalu kingilu nyampali jirni wiyyirru warrarnku.

**44** Kingilu muwarr pinalu Joseph-ku, "Ngajurla nyampali wiyyirru nyungu warrarnku. Ngajulu nyuntu nyampali wirtu jinarnanta. Nyungunga warrarnja marrngurrangu nyuntuku pinakarrulupiyangu, jilipiyi nyuntujalu yiji muwarrjalu." Palajunjalu wurrarnala Joseph-ngu.

### *KINGILU MIRTAWA YINYALI JOSEPH (41:45-46)*

**45-46a** Palajalu kingilu yini yinya Joseph wariny, Zaphenath-paneah. Kingilu mirtawa pukun yinyala, yini pala mirtawa Asenath. Palamili mirtawamili japartu yini Potiphera, palapali nyampali muwarrku yatil-pamilaku, tawun-ja yini Heliopolis. Palajalu Joseph wirtu yiji nyampali jarrinyi.

### *PARTUNURRANGU 7 NGALYPAPA 7 KURLU (41:46-57)*

**46b** Kingilu nyampali jirni Joseph 30 partunu jarrynija.

**47** Palaja 7 partunurrangunu mayi marlu yiji jirniyi.

**48** Palanga partunurrangunu Joseph yani-yanikinyi ngunarrijirri warrarn, wurrarnikinyijanaku, "Kuru muluyi mayirrangu marlurrangu yiji!" Winya jirnikinyiyi wirturrangu mayarrangu mayarrangu, tawunjarrangu tawunjarrangu palanga warrarnja.

**49** Palajunju jirni munu marlu yiji.

**50** Palangarrangu partunurrangu Joseph-milalu mirtawalu partanyirri kujarra kanyapulinyi mutunyajirri.

**51** Joseph-ju yini marna walangkarrangumarniny Manasseh. "Ngarrkalu ngalypa jirnilpija, ngajulu kakulumarnajaninyi ngajumili japartumilir-rangupa, kakulumarnajaninyi ngajumilarrangulu mamajilurrangu kurlujartiny jirnilpijiya." Palajunjalu yini marna pala partany Manasseh.

**52** Yini marna nyirrirnikartimarninyja Ephraim. "Marrngurrangulu kurlujartiny jirnijiya nyungu warrarnja. Kuwarri Ngarrkalu yinyaji ngajumilirrangu waljarrangu nyungunga warrarnja." Palajunjalu yini mirni pala partany Ephraim.

**53** Palajarrangungaja 7 ngalypa partunuja wanayirti munu pungkuma-janaku.

**54** Palaja 7 kurlujartinyarrangu partunurrangu turlpanyajanaku palajunngarra Joseph-ju purlpi wurrarnajanaku. Warrarnja warinyjarrangu marrngurrangu janparr karrinyikinyiyi, mayimajirringa. Marrngurrangu Egypt-ja mayi kalkurnikinyiyi ngarrany.

**55** Yarti marrngurrangulu Egypt-ja wiyyirr jirniyi mayi janamili. Palajalu yanayalu kingiku, wurrarniyili, "Mayi yuwanganinya!" Paliny muwarr pirnijanaku, "Yarrayalu Joseph-karti. Palinyju wurralkulinyurraku ngani jinaku. Pinakarriyalu."

**56** Marrngurrangu wiyyirrja warrarnja janparr karrinyikinyiyi. Palaja Joseph-ju wirturranguja mayarranguja mayi Manassehninyi, warnkuku mayi yinganyikinyijaninyi.

**57** Marrngukarra turlpanyiyi warinyja warrarnjarrangu, jana milpanyikinyiyalu Joseph-ku mayiku maninyaku warnkujartinyju. Marrngurrangu warinyjarrangu warinyjarrangu warrarnja turlpanyiyi Egypt-karti janparr karrinyija, mayiku maninyaku.

## 42

### *JOSEPH-MILI MAMAJIRRANGU EGYPT-KARTI YANAYI MAYIKU (42:1-24)*

<sup>1-2</sup> Palanga Joseph-mili japartu Jacob palangangarra waninyikinyi palinymilinga warrarnja. Palanga waninyikinyi janparr. Warinyju wurrarnala Jacob-ja, "Mayi kalkurnayi Egypt-ja." Muwarr pirnijanaku palinymilaku partanykarranguku, "Nganiwanti waninyurru nyungungu? Pinakarrinyirni mayi kalkurnayi Egypt-ja. Yarrayi palakarti, mayi marrayinganyjurruka wanka nyungu waninyaku. Munujalu wurrjiliminyi wiyirr."

<sup>3</sup> Japartumilijalu muwarrjalu 10 mamajirrangu Joseph-mili yanayi kuri-lakarti Egypt-karti.

<sup>4</sup> Joseph-mili marrkamarniny waninyi ngurranga. Palinymili japartu wirnti karrinyikinyalu, palinyju kurlkarri marnikinyi, "Marrkamarniny marlkarri jarriyili Egypt-ja." Palajunjalu munu ngakarnama warinyjarrangu palinymilirrangunga partanykarrangunga.

<sup>5</sup> Palajunjalu Jacob-mili partanykarrangu piririmarta kajarniyi Egypt-ja maninyaku mayi. Jinta warinyirrangupa turlpanyiyi palakarti mayiku maninyaku.

<sup>6-8</sup> Palanga Joseph nyampali waninyikinyi marrngumilaku warrarnku Egypt-ja. Palinykungarra yaninyikinyiyalu wiyyir mayiku maninyaku. Joseph-mili mamajirrangu turlpanyiyalu mayiku maninyaku palinyjaku, wupurniyalu palinyku. Janalu ngawu marnayi janamili marrka. Palinyju jurtulu yirrirnijaninyi mamajirrangu palinymili. Muwarr pirnijanaku ngawu kanyjil-kanyjil, "Wanyjarnija nyurra milpanyanyurru?!" Wurrarniyili, "Nganarna milpanyiyirni Canaan-ja mayiku maninyaku."

<sup>9</sup> Kurlkarri marnajaninyi kapukarri, purlipa palinymilirrangu mama-jirrangu wupirniyalu. "Mitu marnanyinyurru! Yija-yiji milpanyanyurru nyunguku warrarnku kanganyaku nganarnamilaku Egypt-ku." Palajunjalu kuli muwarr pinajanaku.

<sup>10</sup> "Munu, Nyampali! Nganarna munu milpanyamayirni yirrinaku warrarnku, milpanyiyirni mayiku maninyaku.

<sup>11</sup> Nganarna partanykarrangu warajamilija japartuja, nganarna munu mitukata. Nganarna munu turlpanyimayirni nyungukarti warrarnku maninyaku, nganarnamili jinaku."

<sup>12</sup> Warinymil wurrarnajanaku, "Nyurra turlpanyinyurru warrarn yirrinaku, warrarnku kanganyaku nganarnaja."

<sup>13</sup> "Nganarna partanykarrangu warajamilija pirirrija. Japartu nganarnamili 12 piririmartajartiny partanykarrangujartiny. Nyirtingunya-marniny kalkurna japartulu nganarnamilalu Canaan-ja. Wariny marrka-marniny marlkarri." Palajunjalu wurrarniyili.

<sup>14</sup> Warinymalja muwarr pirnijanaku, "Nyurra turlpanyinyurru warrarn yirrinaku, warrarnku kanganyaku nganarnaja.

<sup>15</sup> Yakurr malamarnanyurrinyi. Kawayi ngajukarti nyurramili marrka-marniny. Munujalu munu kulpa malamarnanyurrinyi walarni jarrinyaku nyurramilikarti warrarnkartu. Pala muwarr yija. Wirrilamarnanyurrinyi jurntinga yakurr manaku.

<sup>16</sup> Nyurralu waraja ngakalkulinyurru nyurramilikarti warrarnkartu, palalu warajalu walarni jilkuliny nyurramili marrka. Jinta wiyyirr wantulinyurru nyungu jurntinga. Palajunjalu yakurr malamarnanyurraku muwarr nyurramili. Yijapa nyurramili marrka walarni jarruliny ngajukarti. Palajalu palaja muwarrja ngajulu yijal malamarnanyurraku.

Munujalu ngajulu mitu yakalamarnanyurrinyi, yija-yiji turlpanyinyurru warrarnku yirrinaku."

<sup>17</sup> Palajunjalu muwarrjalu palinymili mamajirrangu jurntingi wirrirni-janinyi.

<sup>18</sup> Kujarrajalu karrpujalu Joseph yana jurntikarti, wurrarnajanaku, "Ngarrkaku yijalmarta jirninyalu. Ngajulu wurralamarnanyurraku ngani jilkulinyurru. Yijalu pinakarraji, yijapa pinakarrulinyurruji wankanyu wantulinyurru, ngajulu munu wirlalamarnanyurrinyi marlkarri.

<sup>19-20</sup> Ngajulu kalkulumarna waraja jurntinga. Wiyirr walarni jar-rulinyurrujanaku nyurramilikarti ngurrikarti. Palaja walarni jar-rulinyurru nyungukarti nyurramilijartiny marrkajartiny. Palajalu wurrarnajinyurru yija muwarr. Munu marlkarri wirlalamarnanyurrinyi." Palajunjalu Joseph-ju muwarr pirnijanaku. "Yuu! Palajun jilipiyirni."

<sup>21</sup> Palaja muwarr pirnikinyiyi janamili muwarr. "Yijalu kurlu jirninyalu nganyjurrumilaku marrkaku. Munu tuku jinamanyi, yinyanyijanaku nganyjurrumili marrka wala nyungu warnku maninyaku. Wirrilyi-jartinyu ngarlu japirr marnikinyinganinyi, 'Munu yingkuluminginyurru jananga!' Munu pinakarramayirnalu. Kuwarri yiji kurlu jarrinyi nganarnaka. Yija-yiji kurraparniyirnarninyi."

<sup>22</sup> Murrkangunyalu, Rueben-ju, wurrarnajanaku marrkamarninyirrangu, "Wurrarnarnanyurraku ngajulu munu palajun jinaku nganyjurrumilaku marrkaku. Munu pinakarrimajinyurru. Palajunjalu nganyjurrumili marrka marlkarri. Kuwarri Ngarrkalu yukuyil jirninganyjurrinyi!"

<sup>23</sup> Muwarr pirnijaku pinakarrinyikinyijanaku Joseph-ju. Jurtulu pinakar-rinikinyijaninyi, jana ngakumpa. Joseph-ju muwarr pirnikinyijanaku wariny muwarr Egypt-mili, warinyu muwarr jurtu jirnikinyi jananga. Jana ngakumpa Joseph miranu janaku muwarrmilaku.

<sup>24</sup> Palaja pinakarrinya ja mamajirrangurraguku muwarrku Joseph-ju yana kuku jarrinyaku ngangkurli jinaku. Palaja kulpanyajanaku, palinyu muwarr pirnikinyijanaku mamajirranguku. Palinyu kunyji pirni Simeon, miranga jananga. Wurrarnajanaku wiyyirra palinymili mamajirrangunga, "Nyurra yarrayi mayjartiny ngurrikarti nyurramilikarti."

#### ***JOSEPH-MILI MAMAJIRRANGU KULPANYAYI CANAAN-KARTI (42:25-38)***

<sup>25</sup> Wurrarnala warajanga palinymilinga warrkamu puluku, "Marra-janaka mayi nyungukurrangu, kangkulupiyi janamilikarti warrarnkartu. Winya jilijanaka kurtan. Warnku jalu maninyijalu wirrilijanaku warnku janamilirrangunga kurtanjirrangunga. Wariny yuwajanaka kurtan mayi-jartiny kangkulupiyi ngananyaku janamilikartku warrarnkartku." Palajalu palinymilalu warrkamu pulukulu jirni Joseph-jalu muwarrjalu.

<sup>26</sup> Palajalu mamajirrangulu mayi kurtanarrangu wirrirniyi jananga tangkingi. Jipi marnti yanayi, kulpanyayi janamilikarti warrarnkartu.

<sup>27</sup> Warajanga warrukartingi karta karrinyiyi partijirringa. Warajalu pirlu jirni palinymili kurtan, maninyaku mayiku palinymilaku tangkiku. Palinyu yirrirni palinymili warnku kankakartingi mayingi.

<sup>28</sup> Palinyu kamarnajanaku warinyarranguku, "Nyungu yirriliyi! Ngaju-mili warnku! Jintalu wirrirni kurtanja, kankakarti mayinga." Pinakar-rinikinyiyi pala muwarr, palalu muwarrju wirntiji pirnijaninyi yiji. Jana jankanka pirnikinyiyi yiji. Muwarr pirniyirnangu wirntilu, "Ngani jirninganyjurrinyi Ngarrkalu?"

<sup>29</sup> Palaja kulpanyayi janamili japatukarti, warrarnja Canaan-ja. Yimpirniyili wiyyirr nganirrangku jinajalu.

<sup>30</sup> “Maajalu Egypt-jalu muwarr pirni nganarnaku kulilu. ‘Nyurra turlpanyinyurru warrarn yirrinaku nyurramili jinaku!’

<sup>31</sup> ‘Munu nganarna palajun jinaku milpanyiyirni. Nganarna yijakata, munu mitukata. Munu turlpanyamayirni yirrinaku warrarnku.

<sup>32</sup> Nganarna pujamu warajamilaku japatuku. Palinyju Manassehninyi 12 partanykarrangu piririmarta. Waraja marlkarri, nyirtingunyamarniny kalkurna japatulu nganarnamilalu Canaan-ja.’

<sup>33</sup> Palalu pirirrilu nyampalilu wurrarna nganarnaku, ‘Yakurr mala-marnanyurrinyi! Nyurralu yakalkulinyurru waraja marrngu, nyungunga ngaliya wantulupalayi. Wiyirr nyurra kulpulinyurru nyurramilikarti warrarnkartu mayijartiny nyurramilakurrangu.

<sup>34</sup> Palajalu walarni jilkulinyurru ngajukarti nyurramili nyirtingunya. Palaja jirnijalu ngajulu wurralamarnanyurrinya yijakata, munu turlpanyimanyurru warrarnku kanganyaku. Ngajulu yala jilamarna nyurramili walja jurntija. Palajalu mankulinyurru mayirrangu, ngajulu munu ngampa pilamarnanyurrinyi.’ Palajun muwarr pirni nganarnaku.”

<sup>35</sup> Palaja yanayi yatinaku kurtanku mayiku yirrinaku, palanga kankakarti mayinga warnku janamili yirrirniyi! Warnkulu yirrinajalu jana japatupa janamili wirnti karrinyiyi yiji.

<sup>36</sup> “Nganiwanti jirninyurru palajun? Kanyanyurrupulinyi ngajumili pujamujirri. Simeon-majirripa Joseph-majirri waninyirni. Yijalmarta karrinyinyurru kanganyaku Benjamin-ku. Nyurralu kuli jirnijinyurra.” Palajun muwarr pirnijanaku Jacob-ju.

<sup>37</sup> Mirtamarninyju, Rueben-ju, muwarr pinalu japatuku, “Japartu, ngajulu walarni jilamarnanga nyirtingunya. Munujalu, nyuntulu wirlalaman-pulinyi ngajumilijirri partanyjirri marlkarri. Ngajulu tuku jilamarnanga nyirtingunya, tukulu walarni jilamarnanga.”

<sup>38</sup> “Munu palajunku! Nyirtingunyamarniny munu yankuliny Egypt-karti! Marlkarri jarriyili partijirri kaniny. Paliny marlkarri jarruliny, ngajupa marlkarri jarrulumarna! Ngaju jipi mirta jarrinyirni. Marlkarri jarrulumarna pajujartiny!”

## 43

### *JOSEPH-MILI MAMAJIRRANGU EGYPT-KARTI YANAYI, BENJAMIN PUKUN (43:1-15)*

<sup>1</sup> Warrarnja waninyi Canaan-ja ngapa munu ngarrany pungkamajanaku. Mayi wupartu yiji wirtu jarrinyijanaka.

<sup>2</sup> Jacob-jupa palinymilalu partanykarrangulu jipi mayi nganayi, pala mayi manayi Egypt-ja. Japartu muwarr pirnijanaku, “Yarrayi Egypt-karti yarrana, mayi marrayinganyjurruka.”

<sup>3</sup> Judah-lu muwarr pinalu, “Palalu pirirrilu wurrarna nganarnaku yiji, ‘Nyarnikurnu kawayi nyurramili nyirti ngajukarti. Munujalu ngajulu munu muwarr pilamarnanyurraku, munu mayi yingkulumarnanyurrinya.’

<sup>4</sup> Ngakala pala nyirtingunyapa, palaja yankulupiyirni Egypt-karti mayiku maninyaku nganyjurruku wiyyirku.

<sup>5</sup> Munu ngarrany yankulupiyirni nyirtingunyamajirri. Palalu nyampalilu Egypt-jalu wurrarna nganarnaku, ‘Nyarni kawayi nyirtingunya. Palaja muwarr pilamarnanyurraku’.”

<sup>6</sup> Jacob-ju warnta marnajaninyi, “Nganiwanti wurrarnanyurralu nyurra marrkajartiny? Kurlu jinajinyurra!”

<sup>7</sup> Karra marnayalu, "Japirr marnanganinya, 'Japartu nyurramili wankanyu ngarrany? Wayirti, warinypa kalkurnanyurru marrkapa mamaji?' Purulu yija muwarr wurrarniyirnili. Nganarna munumparla palinyja, 'Kangkulunyurru nyungukarti nyurramili nyirtingunya'." Palajun muwarr pirniyalu janamilaku japatuku.

<sup>8</sup> Judah-lu muwarr pinalu japatumarninyku, "Ngajulu tuku jilamarna nyirtingunya. Ngajulu kangkulumarna. Nyampa yankulupiyirni mayiku maninyaku. Palajunja jinajalu wankanyu wantulaminyi wiyyirr, munu marlkarri jarrinyaku, nyuntupa nganarnapa nganarnamili partanykar-rangu.

<sup>9</sup> Ngajulu tuku jilamarna nyirtingunya, ngajulu walarni jilamarnanga tukulu. Munujalu ngaju nyanyji jilamanyin ngarrakuny.

<sup>10</sup> Yanamayirni purlpi ngarrany. Jipijalu walarni jarrimayirni kujarra-mal."

<sup>11</sup> Japatumurninyju wurrarnajanaku, "Yuu! Jipi kawayi nyirtingunya. Ngajulu munu ngampa pilamarnanyurrinyi. Kawayalu mayi palar-rangu ngalyparrangu nyunguja warrarnja nyampaliku Egypt-ku: jutipirri, minta ngalypa parntinyakata, mayiku jurikata jinakata (spices), warinypa warinypa mayi jurikata (pistachio nuts and almonds)."

<sup>12</sup> Warnku nyarra wirrirniyi nyurramilinga kurtanja kulpa jiliyijanaku. Ngurnipali wirrirniyi watarrkulu. Kawayi yarrana warnku mayiku maninyaku.

<sup>13</sup> Kawayi nyirtingunya nyurramili marrka, yarrayi yarrana yirrinaku nyarraku pirirriku.

<sup>14</sup> Ngarrka wirtu yiji. Ngajulu japiirr marnarna paju karri nganarnaku, paju karrinyajalu ngakalkulinypulinyi ngajumilijirri partanyjirri, Simeon-pa Benjamin. Yijapa munu ngakalkulinypulinyi, ngaju wantulumarna partanymajirrijirri ngarrakuny." Palajunju muwarr pирnijanaku palinymilaku partanykarranguku.

<sup>15</sup> Jacob-milalu partanykarrangulu piririmartalu wirrirniyi jinyjipintipa warnkupa kurtangi. Wirrirniyi warnku wata manayi purlpilu, warin-yarrangu warnkurragu yarrana manayi, maninyaku mayiku janaku. Palaja yanayi kanyayi janamilipa marrka, Benjamin. Egypt-karti pipurr yanayi. Egypt-ja kajanaja yanayalu muwarr pinaku Joseph-ku.

### *MAYI NGANAYI JOSEPH-JUPA MAMAJIRRANGULU KUNMUNGU (43:16-34)*

<sup>16</sup> Joseph-ju yirrirni marrkamarniny palinymili warinyjarrangungu. Kamarnalu palinymilaku warrkamukataku nyampaliku mayakataku. "Kawan-janinyi nyungurrangu marrngurrangu ngajumilikarti mayakarti. Wirlala kuwiyi, kampala nganarnaka. Nyungurrangulu piririmartalu mayi ngalkulupiyirni ngajumilinga mayanga karrpunga kankajalu yiji."

<sup>17</sup> Palaja warrkamuku nyampalilu kanyajaninyi Joseph-milikarti mayakarti Joseph-milalu muwarrjalu.

<sup>18</sup> Yananyajalu mayakartilu Joseph-mili mamajirranglu wirnti karrinyiyi. Kurlkarri marnikinyiyi, "Wirrilyi jarrinyi warnku nyarra yirrirninyi kurtanjarrangu purlpi. Palajalu ngakarnanganyjurrinyi palinymilikarti mayakarti. Yijalupa warlilinganyjurrinyili, yijalu jilinganyjurrinyili warrkamuku jinaku palinyku ngarrakuny. Yijalupa kawajaninyili nganyjur-ruka tangki." Palajunju kurlkarri marnikinyiyarninyi.

<sup>19</sup> Mayanga milyanga jarrinya ja wirntijartinyu muwarr pirniyalu palaku nyampaliku.

<sup>20</sup> Janalu muwarr pirniyalu, "Nyampalikayi, milpanyiyirni nyungukarti purlpinga mayiku maninyaku.

<sup>21-22</sup> Nganarna warlirni jarrinyikinyirni nganarnamilikarti warrarnkarti. Yutakartanga waninyiyirni partijirri, yatirniyirni nganarnamili mayipinti kurtanarrangu. Yirrirniyirni nganarnamili warnkurrangu nganarnamilingi kurtanja kankakarti mayinga, warnkurrangu wiyyirr waninyikinyi kurtanja! Nganarna ngakumparla nganurtulu warnku wirrirni nganarnamilinga kurtanja. Nganarnalu warlarnikinyirninga wiyyirr. Nganarnalu wariny warnku kanyayirni maninyaku mayiku nganarnaku."

<sup>23</sup> Puntaju karra marnajanaku, "Wirntiwayilu puru. Purlpilu warnku yinyanyinyurru. Nyurralupa nyurramilalu japatulu yijalmarta jirninyurru Ngarrkanga. Yijapa palinyju wirrirni warnku nyurramilingi kurtanjirrang."

Palaja palinyju kanyajanaku Simeon.

<sup>24</sup> Palaja kanyajaninyi wiyyirr kaninykart Joseph-milinga mayanga, yinyajaninyi ngapa jinaku janpa jinaku. Mayi pukun yinyajaninya tangkikurrangu.

<sup>25</sup> Wurrarnajanaku, "Nyurralu mayi ngalkulunyurru nyungungu kuwarri." Palanga manayijaninyi wurrukarrangu yinganyaku Joseph-ku kulpanyajalu.

<sup>26</sup> Joseph walarni jarrinyajalu mayakarti, palinymilalu mamajirrangulu yinyayili jinyjipinti wurrukarrangu palinyku, jana wupirniyalu jinangu palinyja.

<sup>27</sup> "Wayirti, ngalypa waninyurru? Japartu nyurramili, wankanyungarra waninyi? Ngalypa waninyi?"

<sup>28</sup> "Yuu, wankanyungarra waninyi." Palajalu warinymil wupirniyalu.

<sup>29</sup> Parrjana yirrirni palinymili marrka, Benjamin, pipimarniny partanyjirimili walja. "Nyungungarra nyirtingunya, wurrarnijinyurru?" "Yuu." Wurrarnala Benjamin-ja, "Ngarrka paju karruliny nyuntuku."

<sup>30</sup> Palaja Joseph yana nyampa jurntikarti palinymilikarti, manyjarrajalu nyirtingunyaku ngangkurl jirnikinyalu.

<sup>31</sup> Ngumpa janpa jinanyarninyi, kulpanyajanaku. Wurrarnajanaku warrkamukataku palinymilaku, "Mayi kawayi nganarnaku!"

<sup>32-33</sup> Purlpilu Joseph-milalu warrkamu pulukurrangulu kajana jirnijaninyi mamajirrang Joseph-milirrang, murrkangunya wirrirniyi walangkarrkarti, nyirtingunya warinykartingi, wiyyirr partijirringi wirrirnayijaninyi. Kajana jirnijaninyi, murrkangunya walangkarr, malyartarrang, nyirtingunya nyirrikart, Palajunngarra. Piririmarta parrjarnikinyarninyi. "Yukuyilpirla ngayarta jarrinyinyi!" Yija yiji ngawu karrinyikinyiyi. Palanga warajanga ngananyikinyiyi, Joseph-pa mamajirrang palinymilipa Egypt-jarrangupa. Joseph kajarna warajanga table-ja. Palinymili mamajirrangupa nyirtingunyapa warinyja table-ja kajarnikinyiyi. Warinyarrang kajarnikinyiyi warinyja table-ja, kajamarta kajarnikinyiyi. Egypt-arrangulu munukata kajanakata warajanga Hebrew marrngunga.

<sup>34</sup> Joseph-ju ngakarnajanaka jinta mayi palinymilija table-ja. Ngakarnalu wirtu yiji palinymilaku marrkaku, Benjaminku. Palanga nganayipa minpirnayipa Joseph-ja, pikaly jarrinyiyi wiyyirr.

## 44

### *MINPINAPINTI KANYAI MAMAJIRRANGULU MUNAMPALU (44:1-17)*

<sup>1</sup> Yartingi Joseph-ju wurrarnala nyampalingi warrkamukatanga, "Winya jirnijaninyi kurtan mayijartinyju janamili. Warnkurrangu janamili wirril-ijanaka kankakarti mayirrangunga.

<sup>2</sup> Kurtanja nyirtingunyamilinga wirrili nyungu ngajumili ngalypakata yiji minpinapinti. Wirrili pala minpinapintipa warnkupa palinymilinga kurtanja." Palajun wurranala. Palinyu yijalu jirni Joseph-jalu muwarr-jalu.

<sup>3</sup> Pirrpa-pirrpanga mamajirrangupa nyirtingunya yananyayi tangki-jartiny janamilikarti ngurra waljakarti.

<sup>4</sup> Jampa yanayi wangkangarra. Joseph-ju wurrarnala warrkamukatanga, "Yarrajana! Purrja pilijaninyi. Wurralajanaku, 'Ngajumili nyampali ngalypalu kalkurnakinyinyurrinyi. Puntajulu kurlu jirninyurrulu! Ngani-wanti minyji marnanyurralu ngalypakata yiji minpinapinti palinymili?

<sup>5</sup> Palamangarra minpinapinti palinymili minpirni karrpurrangu kar-purrangu. Palamajartinyju minpinapintilu maparn jirnijaninyi pukurl. Nyurralu minyji marnanyurralu. Kurlu yiji jirninyurrulu!' Wurralajanaku palajun muwarr."

<sup>6</sup> Palinymilalu warrkamukatalu yajarnajaninyi. Yirrinajalu wurrarna-janaku Joseph-milaja muwarrja.

<sup>7</sup> Puntajulu, "Nyampali yija, munu palajun muwarr pinaku! Munu palajun jinamayirni. Nganarna munu minyji manakatarrangu.

<sup>8</sup> Pala warnku yirrirniyirni purlpilu kurtanja nganarnamilinga walarni jirniyirningu nyuntunga Canaan-ja. Nganiku palajun muwarr pinanpa, wurrarnannganinya minyji Manasseh nyuntumilimili nyampalimili min-pinapinti palinymilia mayaja?

<sup>9</sup> Kanyjilimanpa palaku minpinapintiku nganarnamilinga kurtanja. Yi-japa yirrilaman nganurtumilingi kurtanja, pala marrngu wirlalaman marlkari. Wiyirr nganarna wantulupiyirni nyungunga, warnku man-anyamajirri warrkamu jarrulupiyirni nyuntuku."

<sup>10</sup> Puntajulu, "Yuu, yijapa yirrilamarna minpinapinti palamilinga kurtanja, pala waraja marrngu kalkulumarna. Wiyirr nyurra kul pulinyurru nyurramilikarti warrarnkartu." Palajun muwarr pirnijanaku Joseph-milaku mamajirranguku.

<sup>11</sup> Yinyji pirniyi nyampalu kurtanarrangu tangkija, jungkanga wirrirniyi, jawa pirli jirniyijaninyi.

<sup>12</sup> Joseph-milalu warrkamukatalu kanyjirnikinyalu pala minpinapintiku warinypa warinypa kurtanarrangunga. Walangkarranga kanyjirnalu murrkamilinga, palaja malyurtarrangumilingi, nyirrirnikarti kanyjirnalu nyirtingunyamilingi. Pala minpinapinti waninykinyi nyirtingunyamilingi, Benjamin-milinga.

<sup>13</sup> WIRRILYI KARRINYIYI, WURRURRANGU KAWUJA NGARTARN-NGARTARNIYI PAJULU YIJI-YIJALU.

<sup>14</sup> Judah-pa jintapa walarni jarrinyiyi mayakarti Joseph-milikarti. Palang-gangarra waninyikinyi. Wupirniyalu jungkakarti yiji.

<sup>15</sup> Paliny muwarr pirnijanaku, "Nganiwanti kurlujartiny jinajinyurru? Ngaju miranu nyurra. Ngaju miranurla maparn jinaku. Nyurra miranurla ngajuku wanimanyurru."

<sup>16</sup> Judah-lu, "Munu nganarna jurtu muwarrmajirri. Ngarrka mi-ranu nganarnalu kurlu jirniyirni! Warnku maninyamajirri warrkamu

jarrulupiyirni nyuntuku, warinyju nyarra kalkurnikinyi minpinapintipa nganarna jinta." Palajunju muwarr pinalu Judah-lu.

<sup>17</sup> Joseph-ju karra marnajanaku, "Munu palajun jilamarna. Pala waraja marrngu minpinapintijartiny kalkulumarna nyungu. Nyungu waraja warrkamu jarrulupija. Wiyirr nyurra kulpulinyurru nyurramilikarti japartukarti."

#### *JUDAH-LU NGARLU JAPIRR MARNA JOSEPH BENJAMIN-KU (44:18-34)*

<sup>18</sup> Wangka jarrynalu Judah, karra marnalu, "Nyampali, wirtu nyuntu, nyuntu kingikapali. Munu wirrilyi jarrulupijin, puru muwarr pilamar-nangu.

<sup>19</sup> Purlpilu japiirr marnanganinyi, 'Yija japartu nyurramili wankanyu ngarrany, wayirti kalkurnanyurru warinypa marrkamarniny?'

<sup>20</sup> Wurrarnayirnangu purlpilu, "Yuu, nganarnamili japartu wankanyu ngarrany, waraja marrka nganarnamili ngayarta jarrynyi paliny nganarnamilinga japatunga mirtanga yija. Nyirtingunyamili walja yija mamaji marlkarri. Nyungujakun wankanyu palaja pipija, nganarnamilalu japartulu ngarluja yiji palinymili pala.

<sup>21</sup> Nyuntulu wurrarnan nganarnaku, 'Ngajulu yirrilimarna nyurramili nyirtingunya marrkamarniny. Kawayi ngajukarti.'

<sup>22</sup> Palinyju munu yakalkulinypa nganarnamili japartu. Marlkarri jarriyili nganarnamili japartu.

<sup>23</sup> 'Wurraliyili nyurramilinga marrkanga nyungukarti milpuliny ngajuku yirrinaku. Munujalu milpanyajalu ngajulu ngampa pilamarnanyurrinyi nyungukarti milpanyaja ngarrakuny.' Palajun wurrarnan nganarnaku.

<sup>24</sup> Palaja kulpanyajalu wurrarniyirnili japatungu nyuntuja muwarr.

<sup>25</sup> Yarti nganarnalu japartulu wurrarna nganarnaku, 'Kurlpayi yarrana Egypt-karti, mayi marrayi yarrana!'

<sup>26</sup> 'Nganarna munu palakarti yaninyaku. Palalu pirirrilu wurrarna nganarnaku yaninyaku palakarti kangkulupiyirni nganarnamili marrka nyirtingunya. Munu kanganyajalu nyirtingunyaku palalu pirirrilu munu muwarr pilkuliny nganarnaku. Nyuntulu ngakalaman nyirtingunya pukun, palaja yankulupiyirni.'

<sup>27</sup> 'Ngajumili mirtawa Rayijil kujarra murtunyajirrijakun kanyapulinyi. Nyurra miranu palaku.

<sup>28</sup> Waraja partany yana ngarrakuny, ngaju ngawu kanyjil-kanyjil. Yijapa marlkarri, kulikatalu kuwiylu nganayi ngurnipali.

<sup>29</sup> Kuwarri karrinyinyurru kanganyaku nyirtingunyaku. Palinypa marlkarri jarriyili. Palaja ngajupa wurrjularnala paju karrinyija.' Palajunju wurrarna nganarnalu japartulu.

<sup>30-31</sup> Munu kulpanyaku nganarnamilikarti japartukarti nyirtingunyamajirri. Palajun jilipiyirni, nganarnamili japartu marlkarri jarriyili paju karrinyajalu.

<sup>32</sup> Marntikartilu nyungukartiku wurrarnarnala japatungu, 'Ngajulu tuku jilamarna nyirtingunya, walarni jilamarna nyuntukarti. Munujalu ngaju nyanyji jilamanya ngarrakuny.'

<sup>33-34</sup> Pinakarraji, nyampali. Ngaju munu karrinyirna ngajumilaku japartuku marlkarri jarriyilipa. Ngaju munu karrinyirna walarni jarriyaku nyirtingunyamajirri. Ngaju wantulumarnanga, warrkamu jila-marnanga kakuputulu. Yijapa ngakalaman nyirtingunya nganarnamilikarti japartukarti." Palajun muwarr pinalu Joseph-ku.

## 45

*JOSEPH MAMAJIRRANGU WURRARNAJANAKU YINI WALJA  
PALINYMILI (45:1-20) [reveals ??]*

<sup>1</sup> Joseph-ju pinakarrinyikinyalu palinymilaku mamajiku. Palaja partarl jama karrinyikinyi. "Jinta nyurra warrkamukatarrangu yarrayi jurntija." Palarrangujakun yiji waninyiyi kaninykurti jurntinga mamajirrangupa nyirtingunya. Warrkamukatarranu Egypt-jirrirrangu yanayi.

<sup>2</sup> Joseph ngangkurl jirnikinyi marrja. Marrngulu pinakarrinyiyi kajangulu, warinyu wurrarnajanaku marrngurrangunga kingimilinga mayanga, "Joseph ngangkurlu jirnikinyi marrja."

<sup>3</sup> Joseph-ju wurrarnajanaku mamajirrangunga, "Ngajungarra Joseph. Yija yiji japartu nganyjurramili wankanyu waninyi?" Pala muwarr pinakarrinyiyi yija yiji wirnti karrinyiyi. Munu puntaju muwarr pinamayalu. Jama waninyiyi.

<sup>4</sup> "Kurtaliyi wangka ngajukarti!" Milpanyiyi palinykart. "Ngajungarra nyurramili marrka, Joseph. Nyurralu yinalpirninyurru jananga ngajarirrangunga warnku. Janalu kanyanyiyi nyungukarti.

<sup>5</sup> Munu wirrilyi jarrinyaku nyurra, munu kulilu yirrkulinyur-rarninyi. Ngarrkalungarra nyungukarti ngakarnanyi, kalkunaku nyurraku wankanyu.

<sup>6</sup> Punja waninyiyirni ngapa munu pungkama kujarra partunujirringi. <sup>5</sup> partunurrangu turlpulupiyinganyjurraka ngapa wupartu pungkuliny nganyjurraku, mayirrangu munu jarruliny nganyjurraku.

<sup>7</sup> Palajalu Ngarrkalu ngakarninyi walangkarrangu nyurranga. Ngakarninyi nyungukarti nyurraku kalkunaku wankanyuku, partanykarranguku nyurramilaku pukun.

<sup>8</sup> Munu nyurralu ngakarnamanyinyurru nyungukarti, Ngarrkalu ngakarninyi. Ngaju wirrirninyi nyampali wiyyirru warrkumukatarrangu kingimilinga mayanga, wirrirninyi nyampali wiyyirru marrngurranguku nyungunu warrarnja, Egypt-ja.

<sup>9</sup> Yarrayi japartukarti janyin, wurraliyili nyungu muwarr. 'Yija ngaju, nyuntumili partany, Joseph, wankanyungarra waninyirni. Ngarrkalu ngaju wirrirninyi nyampali wiyyirru marrngku warrarnja Egypt-ja. Kur-taliji nyungukarti warrarnkart.

<sup>10</sup> Nyuntu wantuluman ngajungu wangka nyungunga, Gothen-ja, nyuntupa partanykarrangu nyuntumilipa karluji jamuji, kaparlijipa kamiji. Kawayijaninyi kukurnjayipa nanikutupa purlimanarrangupa wurukarra pukun.

<sup>11</sup> Ngajulu tuku jilamarnanta. <sup>5</sup> partunurrangu turlpulupiyinganyjurraka ngapa wupartu pungkuliny nganyjurraku. Nyungunga Gothen-ja tuku jilamarnanyurrinyi wiyyirr, mayijartiny wirtujartiny wantulinyurru.' Pala muwarr wurrallala.

<sup>12</sup> Nyurralu wiyyirru yirrilinyiyi, ngaju yiji nyungu, Joseph muwarr pirnirninyurru.

<sup>13</sup> Wurraliyili japartunga ngaju nyampali yiji Egypt-ja. Wurraliyili yirrirninyurru wiyyirr nyungunga. Palaja nyungukarti kawayi janyin!" Palajunju wurrarnajanaku Joseph-ju.

<sup>14</sup> Ngamparna marrka, ngangkurlu jirnipularninyi.

<sup>15</sup> Ngamparnajaninyi mamajirrangu, ngangkurlu jirniyi warajanga, palaja kurrgarniyi warajanga.

<sup>16</sup> Kingilu pinakarrinyi, "Joseph-mili mamajirrangu kajarniyi." Kingipa palinymili warrkamu pulukurrangu pikaly jarrinyiyi.

<sup>17</sup> Kingilu wurrarnala Joseph-ku, "Wurralajanaku nyuntumilirrangu mamajirrangunu kurtanjarrangu mayijartiny wirrilipiyi janamilingi tangkingi, kulpulupiyi janamilikarti warrarnkartu waljakarti.

<sup>18</sup> Mankulupiyi janamili japartupa palinymilirrangupa, nyarnikurnu turlpulkulinyurru ngajukarti. Warrarn ngajulu yingkulumarnajanaku, warrarn ngalypakata. Marlu mayi ngalypakata ngalkulupiyi.

<sup>19</sup> Wurrala jinaku mamajirrangunga kangkulupiyi wagon-arrangu maninyaku pipirrangupa partanykarrangupa japartumurniny nyuntu milipa. Milpulupiyi nyarnikurnu wiyyir.

<sup>20</sup> Wurralajanaku janamilirrangu wurrukarra, yakalapiyijaninyi palar-rangu wurrurrangu janamilinga warrarnja. Ngajulu yingkulumurnuju janaku nyungungu palarrangu wurrukarra, yija yiji ngalypakatarrangu." Palajun wurrarnala Joseph.

#### *JOSEPH-MILI MAMAJIRRANGU KULPANYAYI CANAAN-KARTI (45:21-28)*

<sup>21</sup> Palajalu Joseph-ju yinyajaninyi wagon-arrangu kingija muwarrja. Palajalu yinyajaninyi mayi ngananyaku marntiku.

<sup>22</sup> Parrpakarrarrangu wurrukarra yinyajanaku, ngalypakatarrangu. Marrkamarninyku yinyalu wurrukarra parrpakarrarrangu marlu, warnku wirtu pukul.

<sup>23</sup> Japartumurninyku yinyajanaku 10 tangki wurrukatajakunarrangu kanganyaku, 10 tangki kanganyaku mayirrangujakun, japartumurninyju ngalkuliny marntiku.

<sup>24</sup> "Jipi yarrayi! Munu kurlipatilkuliny nyurru marntijalu."

<sup>25</sup> Kulpanyiyi Egypt-ja janamilikarti warrarnkartu waljakarti.

<sup>26</sup> Palaja kajarniyi wurrarniyili janamilingi japartungu, "Joseph wankanyu ngarrany waninyi! Nyampali janaku wiyyirku Egypt-ja!" Jacob panypinyijananga, ngakumpa karrinyi.

<sup>27</sup> Wurrarniyili muwarrarrangu Joseph-ja. Jurti jirniyili wagon-arrangu Joseph-ja ngakanaja. Palaja Jacob pikaly jarrinyi.

<sup>28</sup> Wurrarnajanaku, "Yijalmarta jirnirni nyurranga yija. Ngajumili partany Joseph wankanyu ngarrany. Yankulumarnalu yirrinaku ngajumilaku partanyku Joseph-ku wankanyulu ngarrany!"

## 46

#### *JACOB-PA PALINYMILIRRANGU WIYIRR EGYPT-KARTI YANAYI (46:1-27)*

<sup>1</sup> Palaja Jacob-ju warajanga jirnijaninyi palinymilirrangu kuwiyyirrangu, yana kurilakurti ngapikarti, Beersheba-karti. Palanga kuwiyyi wirlarna, Ngarrkaku muwarr pinalu, wangkalu yiji muwarr pinangulu "Ngarlu ngalypa jirninyi!" Isaac-ju palinymilalu japartulu muwarr pirnikinyalu palajunngarra Ngarrkaku purlpilu.

<sup>2</sup> Ngarrkalu kamarnalu kapukarri Manassehku, "Jacob! Jacob!" "Yu! Ngani?"

<sup>3-4</sup> "Nyungu ngaju, Ngarrka, muwarr pirnirnangu. Nyuntumilalu japartulu yijalmarta jirnikinyiji, ngajulu tuku jirnikinyirni. Ngaju pukurl yankulumarna Egypt-karti, tuku jilamarnanta nyuntupa. Munu wirnti karrinyaku palakarti yananyaku. Marlu karlujirrangupa jamujirrangu yingkulumarnanta palanga. Nyuntungu marlkarri jarrinyajalu Joseph palanga wantuliny nyuntumartaji. Yarti punjajalu yiji nyuntumilirrangu

walarni jilamarnajaninyi nyuntumilikarti warrarnkarti." Palajun muwarr pinalu Ngarrkalu.

<sup>5</sup> Palaja Jacob-ju yakarna Beersheba yananyaku Egypt-karti. Palinymilarrangulu partanykarrangulu wagon-ja wirrirniyijaninyi janamili japatumarninypa mirtawanyjarripa partanykarrangupa. Kanyayijaninyi wagon-ja, nyarrarrangu wagon-arrangu kingilu ngakarnajanaku.

<sup>6-7</sup> Janalu kanyayijaninyi kukurnjayipa purlimanpa wiyyirr warinyarrangu kuwyirrangupa, palaja warrarnja Canaan-ja wurrukarra kanyayijaninyi, wiyyirr yanayi Egypt-karti.

<sup>8</sup> Jacob Egypt-karti yananya palinymilirrangu wiyyirr palinyja yanayi. Murrkangunya Rueben-pa

<sup>9</sup> palinymili piritri partanykarrangu: Hanoch, Pallu, Hezron, Carmi.

<sup>10</sup> Simeon-pa palinymili piritri partanykarrangu: Jemuel, Jamin, Ohad, Jachin, Zohar Shaul (partany Canaanite-ja mirtawaja).

<sup>11</sup> Levi-pa palinymili piritri partanykarrangu: Gershon, Kohath, Merari.

<sup>12</sup> Judah-pa palinymili piritri partanykarrangu: Shelah, Perez, Zerah. (Warinyjirri Judah-mili piritri partanyjirri, Er-pa Onan, marlkarri jarinyipulu Canaan-ja.) Perez-mili piritri partanyjirri: Hezron-pa Hamul.

<sup>13</sup> Issachar-pa palinymili piritri partanykarrangu: Tola, Puah, Jashub, Shimron.

<sup>14</sup> Zebulun-pa palinymili piritri partanykarrangu: Sered, Elon, Jahleel.

<sup>15</sup> Nyungurrangu piritri partanykarrangu ngayarta jirnijaninyi Leah-lu, Mesopotamia-nga, palinymili kurntal Dinah pukun. Jacob 33 nyirrirnikartijarrangujartiny Leah-ja.

<sup>16</sup> Gad-pa palinymili piritri partanykarrangu: Zephon, Hagi, Shuni, Eri, Arod, Areli.

<sup>17</sup> Asher-pa palinymili piritri partanykarrangu: Imnah, Ishvah, Ishvi, Beriah, janamili mirtawa partany pukun, Serah.

<sup>18</sup> Jacob nyungurrangu 16 nyirrirnikartijarrangujartiny Zilpah-ja. Jacob-mili kakaji Laban-ju yinyalu nyarra Zilpah, warrkamukata jarrinyaku paliny Leah-ku.

<sup>19</sup> Jacob-milalu mirtawalu Rachel-ju ngayarta jirnipulinyi kujarra piritri partanyjirri, Joseph-pa Benjamin.

<sup>20</sup> Egypt-ja waninya Joseph piritri partanyjartinyjirri, Manasseh-pa Ephraim, Asenath ngayarta jirnipulinyi. (Paliny kurntal Potiphera-mili, palapali nyampali muwarrku yatilpamilaku, tawun-ja, ngapi-nga, Heliopolis-ja.)

<sup>21</sup> Benjaminpa palinymili piritri partanykarrangu: Belar, Becher, Ashbel, Gerah, Naaman, Ehi, Rosh, Muppim, Huppim, Ard.

<sup>22</sup> Jacob nyungurrangu 14 nyirrirnikartijarrangujartiny Rachel-ja.

<sup>23</sup> Dan-pa palinymili piritri partany, Hushim.

<sup>24</sup> Naphtali-pa palinymili piritri partanykarrangu: Jahzeel, Guni, Jezer, Shillem.

<sup>25</sup> Jacob nyungurrangu 7 nyirrirnikartijarrangujartiny Bilhah-ja. (Jacob-mili kakaji Laban-ju yinyalu nyarra Bilhah, warrkamukata jarrinyaku paliny Rachel-ku.)

<sup>26</sup> Wiyirr Jacob-milirrangu yanayi Egypt-karti, 66 marrngurrangu, Jacob-mili piritri partanykarrangumili nyuparrangu.

<sup>27</sup> Kujarra piritri partanyjirri ngayarta jarrinyipulu Egypt-ja, Joseph-ku. Wiyirr Jacob-milirrangu Egypt-ja waninyiyi 70 marrngurrangu.

<sup>28</sup> Jacob-ju ngakarna walangkarrangu Judah, wurranaku Joseph-ja jampa turlpuliny Gothen-ja, milyangkurl. Jacob-pa jintarrangu nyirrirni yananyikinyiyi.

<sup>29</sup> Jacob kajanajalu Gothen-ja Joseph miranu, yawartajirri manapulinyi, chariot-ja wirrirlipulinyi, yana palinymilaku japatuku yirrinaku punjaja. Yirrinajalu japatuku ngamparnapularninyi, ngangkurlu jirnipulupa.

<sup>30</sup> Jacob-ju wurrarnala, "Yartikarra! Nyuntungarra yirrinajalu, wankanyu ngarrany, marlkarri jarrulamarna pikaly!"

<sup>31</sup> Joseph-ju muwarr pирnjanaku palinymilaku mamajirrangukupa wiyyirku palinymilaku japatumilaku marrngurranguku. "Ngaju yankulumarnalu kingiku yirrinaku, wurralamarnala, 'Ngajumili mamajirrangupu japatumilirrangu wiyyirr kajarniyi Canaan-ja.'

<sup>32</sup> Nyungurrangu marrngurrangu japatkana jinakatarrangu. Kukurnjayipa purlimanpa nanikutupa wiyyirr kanyayijaninyi wurrukarrapa.' Pala muwarrarrangu wurralamarnala kingingi.

<sup>33</sup> Palaja muwarr ngakalkulunyurruka, 'Ngajukarti turlpulunyurru yirrinaku.' Palinyju japirr malkulunyurrinyi, 'Ngani jirninyurru warrkamuk?''

<sup>34</sup> Nyurralu wurralkulinyurrulu, 'Nganarna partanykarranguja ngarrany japatkana jirnikata. Karlujilu nganarnamilalu japatamu jirnikinyijaninyi kuwiyyirrangu, japatkana nganarnamilalu palajunngarra jirnikinyjaninyi, kuwarrilu nganarnalu palanggarra jirniyirni.' Palanggarra wurralkulinyurrulu. Palinyju wurralkulinyurraku nyungu warrarnja wantiyi, Gothen-ja, kajakulu wantulunyurru Egypt-arrangungumarra. Palarrangulu Egypt-arrangulu wirriliyi karrinyiyijanaku japatkana jirnikataku.' Palajunju wurrarnajanaku Joseph-ju.

## 47

### JACOB YIRRIRNI EGYPT-MILI KINGI (47:1-12)

<sup>1</sup> Palaja Joseph yanalu kingiku. "Ngajumili japatupa mamajirrangupu marrka pirirripa kajarniyi Canaan-ja. Kanyayi nanikutupa purlimanpa kukurnjayipa wurrukarrra wiyyirr. Gothen-ja waninyayi kuwarri."

<sup>2</sup> Mamajirrangupu 5 kanyajaninyi kingikarti, milyangkurl jirnijaninyi.

<sup>3</sup> Japirr marnajaninyi kingilu, "Nganikapali warrkamu jirninyurru?" "Japatkana jirnikatarrangu nganarna. Karlujilupa japatulu nganarnamilalu kuwiyyirrangu japatkana jirnikinyipulu, nganarnalu palajunngarra jirniyirni.

<sup>4</sup> Warrarn Canaan-ja punarra yiji, mayimajirri yiji nganarnamilaku kuwiyyiku. Turlpanyiyirni nyungukarti wankanyuku waninyaku. Yijapa wantulupiyirni Gothen-ja? Wurralamana nganarnaku waninyaku palanga?" Palajun wurrarnayili kingingi.

<sup>5</sup> Kingilu wurrarnalu Jospeh-ja, "Nyuntumili japatupa mamajirrangupu turlpanyiyi nyuntuku yirrinaku.

<sup>6</sup> Wantulupiyi Egypt-ja. Jurti jilijanaku warrarn ngalypakata yiji. Jana wantulupiyi Gothen-ja. Yijapa jinta ngalypakata japatkana manakata nyampali jilijaninyi ngajumilaku kuwiyyirrangu." Palajun wurrarnalu kingilu.

<sup>7</sup> Joseph-ju kanyalu japatkana palinymili kingiku. Jacob-ju ngalypa muwarr pinalu kingiku.

<sup>8</sup> "Wayirti, partunurrangu kurrrgal yirrirnan?"

<sup>9</sup> "Yananya-yananyakanu yirrirnarnajaninyi puru partunurrangu, munu kurrrgal, 130-jakun. Ngurnjularrangu palarrangulu. Ngajumili karlujilupa

japartulupa marlu yiji partunurrangu yirrirnapulujaninyi. Ngaju munu palajirrikapali."

<sup>10</sup> Palaja Jacob-ju japirr marna Ngarrka, "Tuku jilaman yijalu yiji nyungu kingi."

<sup>11</sup> Palaja Joseph-ju jurti jirnijaninyi japartupa mamajirrangupa ngalypa yiji warrarn kingijalu muwarrjalu. Palanga jarnti jirnijaninyi mayarrangupawatunmartaji, ngapimartaji, Rameses-martaji.

<sup>12</sup> Joseph-ju tuku jirnikinyijaninyi japartupa mamajirrangupa janamirlirrangu wiyyirr. Palinyju yinganyikinyijaninyi mayi.

### ***NGAPAMAJIRIPA MAYIMAJIRRI (47:13-26)***

<sup>13</sup> Punja yiji waninyi ngapa munu pungkama Egypt-japa Canaann-ja. Mayi wiyyirri jarrinyijanaka wiyyirru Egypt-jaku Canaan-jaku. Mayimajirrilu manyurla-manyurla jarrinyiya.

<sup>14</sup> Punja yiji mayi manikinyiyi warnkujartinyju. Joseph-ju warnku kanya kingi yinyala. Palaja marrngu warnkumajirri waninyikinyiyi.

<sup>15</sup> Palaja Egypt-arrangu milpanyiyalu Joseph-ku, wurrarniyili, "Nganarnalu yinyayirninti nganarnamili warnku wiyyirr. Nganarna warnkumajirri kuwarri. Nyuntulu yingkulumunganinyi mayi, wankanyuku waninyaku. Mayimajirringa marlkarri jarriyirnili."

<sup>16</sup> "Kawayijaninyili ngajukarti kukurnjayipa nanikutupa purlimanpa jinta kuwiyi nyurramili, puntajulu yingkulumurnunyurrinyi mayi."

<sup>17</sup> Kanginyikinyijaninyi Joseph-karti janamili yawartapa kukurnjayipa nanikutupa purlimanpa tangki. Puntajulu mayi yinganyikinyijaninyi. Palajun jirnikinyiyi partunungu warajanga.

<sup>18</sup> Yarranamal turlpanyiyalu Egypt-arrangu Joseph-ku. "Nyampali, yija wurrarniyirnangu, yinyayirninta purlpilu warnku wiyyirr nganarnamili, yinyayirninta kuwiyyirrangu wiyyirr nganarnamili mayiku maninyaku. Munu yijirla mayimajirri nganarna. Wunyjurrulurti mayi mankulupiyirni warnkumajirrilu? Kalkurnayirni nganarnamili kawupa warrarnjakun."

<sup>19</sup> Nganiku, karrinyanpa marlkarri jarrinyaku nganarna, warrarn nganarnamili kurluny-kurluny jarruliny nganarnamajirri. Yiwanganinya mayi. Puntajulu yingkulupiyirni warrarn nganarnamili kingi, nganarna wiyyirr palinymili warrkamukata jarrulupiyirni, nganarna tuku jilapiyirni warrarn palinyku. Yiwanganinya wilyki jungkanga wirrinaku mayi jinaku, palajun jilapiyirni jungkaku ngalypa jinaku, wantulupiyirni wankanyu, munu marlkarri jarrinyaku." Palajun wurrarnayili Joseph-ja.

<sup>20</sup> Palajalu Joseph-ju kanyajanaka warrarn kingimila jinaku, puntajulu yinyajaninyi mayi. Palajunjalu warrarnarrangu wiyyirr kingimili jarrinyi.

<sup>21</sup> Joseph-ju wiyyirr marrngurrangu wirrirnijaninyi Egypt-ja warrkamukata kingiku. Janalu tuku jirnikinyiyalu warrarn palinyku.

<sup>22</sup> Joseph-ju munu kanyama janaka warrarn yatilparrangukurrangu. Kingilu tuku jirnikinyijaninyi yatilparrangu, palinyju yinyajaninya mayi.

<sup>23</sup> Joseph-ju muwarr pirnijanaku Egypt-arrangungu, "Ngajulu nyurramili warrarn yinyala kinginga, wirrirnirninyurrinyi palinymili warrkamukata. Puntajulu nyurralu tuku jilkulinyurrulu warrarn palinyku. Nyungurranguwilyki, wirriliyi jungkanga mayi jinaku.

<sup>24</sup> Palaja mayijalu murla jarrinyijalu wirrkalkulinyurru. Jinta yingkulinyurrulu kinginga. Kurtan 5-ja 1 yingkulinyurrulu kinginga, 4 kurtnakalkulkulinyurru. Pala nyurramili. Nyurra wiyyirr partanykarrangupamayi kalkululunyurru nganinyaku, jinta kalkulkulunyurru wilykirrangujungkanga wirrinaku yarti." Palajun wurrarnajanaku.

<sup>25</sup> "Yuu, Nyampali. Yarranija! Wankanyu jirninnganinyi nyuntulu! Warrkamu jilkulupiyirnalu kingiku."

<sup>26</sup> Palajunju Joseph-ju nyungu manguny wirrirnijanaku Egypt-arrangku: mayijalu murla jarrinyajalu kurtanja wilykijartinyja 5-ja 1 yinganyaku kingiku. Yatilparrangulujakun kalkurnukinyiyarningu warrarn janamili. Munu kangama warrarn janamili kingilu. Munu janamilia wilykija yingamayalu kingiku.

***JACOB JAPIRR MARNA JUNGKARANGA WIRRILAPIYI CANAAN-JA (47:27-31)***

<sup>27</sup> Palarrangu Israel-mili marrngurrangu, Jacob-pa palinymili jamuji karlujirrangupa nyirrnikartijarrangu, jana waninyikinyiyi palanga, Gothen-ja, Egypt-ja. Palanga partanykarrangu marlu jirniyijaninyi. Kurrngal jarrinyiyi yiji. Janalu kuru-kuru marnayijaninyi wurrukarra marlu.

<sup>28</sup> Jacob ranyji jarrinyi. Egypt-ja waninyi 17 partunurrangu. Jampa marlkarri jarruliny, partunurrangu 147-jartiny.

<sup>29-31</sup> Muwarr ngakarnalu palinymilaku pujamuku, Joseph-ku, "Milpuluman." "Jampa marlkarri jarrulumarna. Muwarr yija yiwa ji nyunguku: Marlkarri jarrinyajalu ngaju, munu nyungunga yamalaminyin Egypt-ja, kangkuluminin kawu ngaju japatumilipa karlujimilikarti warrarnkart. Palanga yamalaminyin wangka ngajumilinga japatupa karlujinga. Palajun jiliminyin yija? Parirr wirrilamanyin ngajunga kalpartinga partijirri, muwarr nyuntumili yiji yiwa ji." "Yuu, palajun jilamarna." Palaja Jacob wupirnalu Ngarrkangapa nyurra marna.

## 48

***JACOB MUWARR PIRNIPULAKU EPHRAIM-PA MANASSEH (48:1-22)***

<sup>1</sup> Yarti jintalu wurrarniyili Joseph-ja, "Nyuntumili japatu wurrku." Palinyju kanyapulinyi palinymilijirri pujamu, Manasseh-pa Ephraim, yanayalu yirrinaku Jacob.

<sup>2</sup> Jacob-ja wurrarniyili, "Nyuntumili pujamu kajarna nyuntuku yirrinaku." Palajunjalu paliny parnturrkarra jarrinyi, kajarna.

<sup>3</sup> Palinyju wurrarnala Joseph-ja, "Ngarrka Parnturrkata Jarrinyi Yiji ngayarta jarrinyiji ngapinga, Luz-ja, warrarnja Canaan-ja, wurrarnaji 'Ngajulu tuku jilamarnanta.'

<sup>4</sup> Ngajulu yingkulamarnanta marlu partanykarrangu, nyuntumilirrangu marrngurrangu kurrngal jarrulupiyi, warinypa wariny marrngurrangu. Ngajulu yingkulamarnajaninya nyuntumilirrangu nyungu warrarn janaku yiji ngaramarntiku kalkunaku."

<sup>5</sup> Palaja Jacob muwarr pinalu Joseph-ku, "Joseph-kayi, nyuntumilijirri partanyjirri ngayarta jarrinyipulu Egypt-ja. Ngajulu kanganyarnapulinyi ngajumilakapalijirri, Rueben-pa Simeon-pa ngajumilimurninykapalijirri.

<sup>6</sup> Yarti yijapa mankuluman partanykarrangu palarrangu nyuntumilirrangu, munu ngajumilirrangu. Warinyjirrija Ephraim-paja Manasseh-ja warrarn mankulinpulu."

<sup>7</sup> Nyungu jirnirnarnalu pipiku nyuntumilaku, Rayijilku. Walarni jarrinyajalu Mesopotamia-ja paliny marlkarri jarrinyi Canaan-ja, wangka ngapingi, Ephrath-ja. Paju karrinyangulu yiji." (Kuwarrija pala Ephrath yini Bethlehem.)

<sup>8</sup> Jacob-ju yirrirnapulinyi partanyjirri Joseph-mili, "Nganurtu nyungu partanyjirri?"

<sup>9</sup> Joseph-ju puntajulu, "Nyungu partanyirri ngajumili. Ngarrkalu yinyanyipulu Egypt-ja." "Kawapulinyi ngajukarti. Ngarrkalu tuku jilkulinyipulinyi ngajuja muwarrja."

<sup>10</sup> Jayikapu ranyji jarrynaya pani kurlu jarrynyikinyi, partarl yirrnikinyi. Joseph-ju kanyapulinyalu partanyirri, palanga ngampalja jirnipulinyipa munyjarnapulinyi.

<sup>11</sup> Wurrarnala Joseph-ja, "Purlpi wurrarnarna, 'Munu yarrana yirrinaku nyuntuku ngajulu', kuwarri Ngarrkalu jinajalu yirrinaku nyuntuku, nyuntumilakupa partanykupa."

<sup>12</sup> Manapulinyi Joseph-ju kartingija partanyirri Jacob-ja, wupirnalu milya kaniny jarrynalu jungkakarti.

<sup>13</sup> Joseph-ju wirrirni Ephraim Jacob-ja jampukarti, Manasseh marrjanyukarti.

<sup>14</sup> Jacob-ju parirrjirri warinykurnu jinarninyi. Palinyju marrjanyukarti parirr wirrernarninyili jurnturtunga Ephraim, palinyngarra nyirtingunya-marniny, palinyju jampukarti parirr wirrernarninyili jurnturtunga Manasseh, murrkangunyamarninyja.

<sup>15</sup> Palaja muwarr pinalu Ngarrkalu ngalypa jilkulinyipalu Joseph-ku, tuku jilkulinyipulinyi partanyirri Joseph-milijirri: "Ngajumilalujirri karlujilupa japatulu Ngarrkajalu wurrana jalu jirnikinyipulu. Ngajulu karrynayarna Ngarrkakungarra ngalypa jilkulinyipulaku nyungukujirri partanykujirri. Ngarrkalu kanyanyi ngarrakuny nyungukartijakun. Ngajulu karrynayarna palinyjungarra ngalypa jilkulinyipulaku nyungujirriku."

<sup>16</sup> Ngarrkamilalu angel-ju kartuwarra marninyi kurlujartinyjamarranga. Ngajulu karrynayarna palinykungarra ngalypa jilkulinyipulaku nyungujirriku. Ngajulu karrynaynapulaku kurrngalku partanykarranguku jinaku, jamuji karlujirrangupa nyirrirnikartijarrangupa. Palajunjalu marrngurrangulu kurlkarri malapiyi ngajumili yinpa yini ngajumili karlujimili Abraham-milipa yini ngajumili japatumili Isaac-milipa!"

<sup>17</sup> Joseph-ju yirrirni Jacob-ju wirrirni parirr marrjanyukarti Ephraimunga jurnturtunga. Ngarlu kurlu-kurlu jarrynyi.

<sup>18</sup> "Munu palajun, japatu! Nyungu murrkangunyamarniny, parirr marrjanyukarti wirrilarninyili jurnturtunga palinyjangarra!"

<sup>19</sup> Palinymilalu japatulu panju karrynillyi, wurrarnili, "Miranu palaku ngaju, ngajumili partany, miranu palaku! Manasseh-milirrang marrngurrangu kurrngal jarrulupiyi yiji. Marrkamarninymili marrngurrangu kurrngal jarrulupiyi yiji, palinymili nyirrirnikartijarrangu jintarrang marrngurrangu jarrulupiyi, warinpa wariny, kurrngal."

<sup>20</sup> Jipi palajun muwarr pirnipulaku. Wurrarnapulaku, "Nyurrajalu japirr malapiyi Ngarrkalu ngalypa jinaku jintaku, janalu muwarr pilipiyi, 'Ngarrkalu ngalypa yiji jirnikinyipulaku Ephraim-kupa Manasseh-ku. Yijapa palajun jilkuliny nyurraju pukun'." Palajunjalu Jacob-ju wirrirni walangkarrangu Ephraim, Manasseh wirrirni nyirrirnikarti.

<sup>21</sup> Palaja Jacob-ju wurrarnala Joseph-ngu, "Jampa marlkarri jarrulurnama. Ngarrkalu kalkulkulunyurrinyi, yarti kulpa malkulinyurrinyi warrarnkartu ngajumilikarti karlujimilikartipa japatumilikarti, Canaan-karti.

<sup>22</sup> Nyuntu wirrernarnanta murrkangunyakapali mamajirranguku. Palanga Canaan-ja purlpija mawurla wirtu jantulu wura marnarnajanaku Hamor-milirranguja. Kuwarri pala warrarn nyuntu yinganyarnanta."

## 49

(49:1-28)

<sup>1</sup> [49:1-28 has been omitted at this stage, as being an unknown genre. The contents may be taken literally and thus be very confusing to the Nyangumarta people. For readers struggling with Nyangumarta the details would probably confuse them and discourage from reading further. It can be retained in the English diglot, for those who can read English and wish to know what is in it.]

*JACOB MARLKARRI JARRINYI, JUNGKARANGA CANAAN-JA WIRRIR-NAYI (49:29—50:14)*

<sup>29-30</sup> Palaja Jacob-ju wurrarnajanaku partanykarrangungu palinymilinga 12-ja. “Jampa marlkarri jarrulumarna. Wirrulkulunyurru kawu ngajumili japartungapa karlujinga. Canaan-ja warrarnja wirrilamanyinyurru palanga jurntinga Machpelah-nga, Mamre-ja kakarrakurti, warrarnja Ephron-milinga, Hittite-milinga. Karlujilu Abraham-ulu warnkujartinyju mana pala warrarn, jurnti pukun, warajaja Hittite-ja, yini paliny Ephron. Mana malkarrynyjarriku wirrinaku.

<sup>31-32</sup> Palanga jurntingi wirrirniyipulinyi Abraham-pa mirtawa palinymili Sarah, palangangarra wirrirniyipulinyi Isaac-pa mirtawa palinymili Rebecca. Palaja wirrernarna ngajumili mirtawa pukun, Leah. Palangangarra warajanga jurntinga ngaju wirrilamanyinyurru pukun.” Palajun wurrarnajanaku Jacob-ju.

<sup>33</sup> Nyungu jipi muwarr pinajalu partanyarranguku palinymilaku, karta karrinyi, wurjurna.

## 50

<sup>1</sup> Palanga Joseph-ju ngampa pirni palinymili japartu, paliny ngangkurlu jirnikinyalu.

<sup>2</sup> Wurrarnajanaku maparnkarrangukurrangu “Tuku jiliyi marlkarri jarrinyaja kawu japartu ngajumili kalkunaku yartiku.” Janalu wirrirkinyiyi karamarta nganin-nganin palakapali kawunga puka jarrinyamanya.

<sup>3</sup> Karrpurrangu 40 tuku jirnikinyiyi palinymili kawu. Egypt-arrangu ngangkurlu jirnikinyiyalu palinyku. Ngangkurlu jirnikinyiyalu punja, 70 karrpurrangu.

<sup>4-5</sup> Joseph-ju muwarr pinajanaku wirturranguku nyampaliku, kingimilaku warrkamatarranguku. “Ngajumilalu japartulu wurrarnaji, ‘Marlkarri jarrulumarna kuwarrimarta. Marlkarri jarrinyajalu ngajunga kangkulumanyin ngajumilikarti warrarnkartu waljakarti, Canaan-karti. Wirrilamanyin jurntinga tuku jinijalu ngajujalu.’ Palajunjalu yiji winyjinalu, palajun jirnirni. Muwarr pilijiyalu kingiku ngajuku. Wurraliyili ngaju karrinyirni yaninyaku Canaan-karti ngajumilaku japartuku wirrinaku jurntinga, marlkarri. Palaja kulpulumarna nyungukarti.”

<sup>6</sup> Kingilu muwarr ngakarnalu, “Yuu, yarra Canaan-karti, nyuntumilaku japartuku marlkarriku jurntinga wirrinaku. Kalkulu muwarr nyuntumilaku japartuku.”

<sup>7</sup> Joseph yana Egypt-ja Canaan-karti palinymilaku japartuku jurntinga wirrinaku. Marlu marrngurrangu yanayi palinyja, warrkamatarrangku kingimilipa nyampalirrangu kingimilija mayajapa warinyarrangku nyampalipa, yanayi Joseph-ja.

<sup>8</sup> Joseph-milirrangupa palinymili mamajirrangumilipa yanayi wiyyirr, murrukurrurrangujakun yakarnayaninyi yintanga Gothen-ja. Kukurnjayipa nanikutupa purlimanpa pukun yakarnayi.

<sup>9</sup> Kurrgal wirtu yiji yanayi Joseph-ja. Jinta chariot-ja yanayi, jinta yawartanga jali pirniyi.

<sup>10</sup> Turlpanyiyi wangka Atad-mili yapanapinti ngurra, kakarra Pijunga Jordan-ja. Palanga waninyiyi 7 karrpurrangu, ngangkurlu jirnikinyiyi Joseph-milaku japatuku.

<sup>11</sup> Ngurrararrangulu pinakarrinyiyijaninyi. Wurrarnayarnangu, "Marngu Egypt-ja yija yiji ngangkurlu jinayi." Janalu wariny yinyaya yini pala, Abel-Mizraim. Palalu yinilu wurrarna, "Egypt-jaku Ngangkurlu Jinapinti." Wangka Pijunga Jordan-ja pala.

<sup>12-13</sup> Palajun jirniya Jacob-mili partanykarrangulu wirrirnayi janamilu japatku palanga jurntinga Machpela-nga, kakarrakurti Mamre-janga, Canaan-ja. Purlpilu Jacob-milalu karlujilu mana warnkujartinyju pala war-rarn jurntijartiny warajaja marrnguja Hittite-milirranguja jurntinga jinaku marlkarrinyjarrinyku. Janalu yijalmarta jirniyalu muwarrku janamilaku japatuku, palanga wirrirnayi paliny pukun marlkarri jarrinyaja.

<sup>14</sup> Palaja Joseph-pa mamajirrangupa jinta wiyyirrpaa Egypt-karti kulpaniyiyi.

### *JOSEPH NGALYPALU MUWARR PIRNIJANAKU MAMAJIRRANGU (50:15-21)*

<sup>15</sup> Palaja palinymili mamajirranguru muwarr pirnikinyarningu, "Joseph-ju ngurnipali panyju nganyjurru. Purlpilu nganyjurrulu kurlu jirninyalu. Puntajulu yijapa palinyju kurlu jilkulinynganyjurruka." Jana wirnti karrinyikinyiyili.

<sup>16-17</sup> Muwarr ngakarnayalu, "Nganarnamilalu japatulu wurrarna nganarnaku palajun muwarr pilipiyirnangu, 'Nyuntumilalu mamajirrangulu janalu kurlu jirniyanga. Munu wirrilyi karrulumajanaku. Pikalyju yirrilijanaku.' Palangarra muwarr nganyjurrumilia japatuja nyuntuku. Munu wantuluman wirrilyijartiny nganarnaku, ngarlu ngalypa wantuluman nganarnaka." Pinakarrinyaja pala muwarr paliny ngangkurlu jirni.

<sup>18</sup> Palaja mamajirranguru turlpanyiyalu, wupirniyalu milya kaniny, jana muwarr pirniyalu, "Nyuntu nganarnaku nyampali, nyuntuja muwarrja jilipiyirni."

<sup>19</sup> Joseph-ju muwarr pirnijanaku, "Munu wirnti jarrinyaku, puntaju munu kurlu jilamanyinyurru. Ngaju munu Ngarrka, ngajulu munu wirlalamarnanyurrinyi.

<sup>20</sup> Nyurralu kurlu jinaku karrinyinyurru, nyurralu yinyanyinyurru jananga ngajarringa warnkuku. Ngarrkalu ngalypa jirninganyjurru. Palinyju kanyanyi nyungukarti kalkunaku marrngurranguku wankanyuku. Yuu, marlu wurrjirnamayi janparrja, kuwarri wankanyu waninyiyi.

<sup>21</sup> Munu ngajunga wirnti karrinyurrulu. Ngajulu tuku jilamanyinyurri. Nyurramilipa partanykarrangu." Palajun ngalypa muwarr pirnijanaku mamajirranguku.

### *JOSEPH MARLKARRI JARRINYI (50:22-26)*

<sup>22</sup> Joseph-pa palinymili japatumilirranguru waninyiyi Egypt-ja ngarrany. Joseph yija yiji ranyji jarrinyi, 110 partunurrangu.

<sup>23</sup> Joseph-mili partany Ephraim, nyirti Joseph-mili, palamili partanykar-rangumili partanykarrangu yirrirnijaninyi Joseph-ju. Manasseh, Joseph-mili murrkangunya, partanyjartiny, yini Machir. Palamili pukun partanykarrangu yirrirnijaninyi Joseph-ju. Yirrirnijaninyi partanyjirimilija karlujirrangu palinyju.

<sup>24</sup> Palaja Joseph-ju muwarr pirnijanaku mamajirranguku, "Jampamarta wurrjulumarna. Ngarrkalu tuku jilkulinyurrinyi, yarti kangkulinyurrinyi nganyjurrumilikarti warrarnkart. Winyjirni yinganyaku pala warrarn Abraham-pa Isaac-pa Jacob. Yuu, yarti pala warrarn yingkulunyurrinyi nyurra.

<sup>25</sup> Yuu, kangkulunyurrinyi palakarti warrarnkart. Nyurralu kangku-lunyurru winyja ngajuja yananyaalu. Wurraliyi yiji pala jilkulunyurru." Wurrarnayalu, "Yija pala jilipiyirni nyuntujalu muwarrjalu."

<sup>26</sup> Palaja Joseph wurrjurnu. Paliny 110 partunurrangujartiny. Karamarta wirrirniyi kawunga puka jarrinyamanya. Palaja kawu wirrirniyi coffin-ja, kalkurnayi palanga, Egypt-ja.

## Exodus

Drafted but not consultant checked.

### (1:1-7)

<sup>1</sup> Purlpi nyungu waraja mirtanya pirirri yana palinymilija warrarnja ngapikarti, pala yini Egypt. Palinymili yini Jacob. Wariny yini paliny Israel. Jacob-mili pujamumurninyarrangu pukun yanayili palinyja, janamillirrangupukun marrngurrangu. Nyungurrangu yinirrangupukun Israel-mili partanykarrangu yanayilipa palinyja Egypt-karti:

<sup>2-4</sup> Rueben, Simeon, Levi, Judah, Issachar, Zebulun, Benjamin, Dan, Naphtali, Gad, Asher.

<sup>5</sup> Jampa yananyikinyiyi Egypt-karti Jacob-pa palinymili partanykarrangupukun Jacob-mili karluji jamujirrangupukun jana kurrgal yiji, 70 marrngu jana wiyyirr. Jacob-mili partany wariny Joseph waninyikinyi palangangarra kaninypirti Egypt-ja.

<sup>6</sup> Punja waninyiyi palanga, Egypt-ja. Palaja Joseph marlkarri jarrinyi, palaja palinymilirrangupukun mamajirrangupukun janamili partanykarrangupukun wiyyirr Jacob-milirrangupukun marrngurrangupukun marlkarri jarrinyiyi.

<sup>7</sup> Janamillirrangupukun nyirrirnikartijarrangupukun kurrgal yiji jarrinyiyi, partanykarrangupukun kurrgal kanganyikinyijaninyi kakuputulu, munu jipi jarrimajanaku janamilaku partanykarranguku, kurrgal yiji jana waninyikinyiyi ngurrarrangujartiny ngurnarrikurnujirri palanga warrarnja.

### (1:8-22)

<sup>8</sup> Yarti punjamarta palaja wariny pirirri wirtu nyampali jarrinyi palaku warrarnku Yijipikupa nyampali palarranguku marrngurranguku palanga warrarnja. Nyungu marrngu yija panypanyakata Juwujapukupa wariny jirnikinyi. Palinyju munu kurlkarri marnama wunyjurru purlpi Joseph-ju ngalypalu tukulu kalkurnikinyijaninyi marrngurrangupukun Egypt-ja. Nyungu wariny nyampali wirtu, palinyju malyparr karrinyikinyijanaku marrngurranguku Israel-jaku.

<sup>9</sup> Palalu marrngulu karra marnajanaku Egypt-jaku marrngurranguku, "Pinakarrayi! Palamarrangupukun marrngurrangupukun Israel-ja kurrgal yiji jarinyayi jana.

<sup>10</sup> Nganyjurrulu jipi jilaminyijanaku janalu partanyku kanganyaku. Jampa jinta ngajarrirrangupukun milpulupiyinganyjurruku kuliku, ngurnipali palamarrangulu marrngurrangulu Israel-jalu kululapiyijaninyi palarrangupukun ngajarrirrangupukun kulipatinaku nganyjurrungu. Ngurnipali wirlalapiyin-ganyjurrinyi ngarrakunyu. Palaja munu warrkamu jilipiyinganyjurruku, mirti yakalapiyinganyjurruku ngarramarntilu. Ngurnipali janangarra nyampali jarrulupiyinganyjurruku. Kuwarringulu kurnta jilaminyijaninyi palarrangupukun ngarramarntija partanyja kanganya. Kurluny-kurlunyja yijanga kalkuluminyijananyi."

<sup>11</sup> Janamilia nyampalija muwarraja jirniyi, nyampalirrangupukun wirrirniyijanaku palarranguku marrngurranguku Israel-jaku. Palarrangulu nyampalirrangulu jakulirniyijaninyi palarrangupukun marrngu Israel-ja marrjalu warrkamuku, mayarrangupukun yarni manaku jirniyijaninyi. Kujarra tawunjirri Israel-jalu marrngurrangulu yarni marnayipulinyi, ngapijirri yinijirri,

Pijumupa Ramiji. Palangajirri wirtujirri mayajirri yarni marnayipulinyi mayipinti Yijipijaku marrngurranguku.

<sup>12</sup> Yijipijalu yijanga kurluny-kurlunyja kalkurniyijaninyi, yirru Israel-jalu marrngurrangulu partany kanganyikinyiyjaninyi kurrngal. Jana kurrngal yiji jarrnyiyi, jirra jarrnyiyi, waninyikinyiyi ngurnarrikurnujirri. Yijipija marrngurrangu wirnti yiji jarrnyiyijanaku palarranguku. Malyparr karrnyiyijanaku palarranguku marrngurranguku Israel-jaku.

<sup>13</sup> Palaja pajumajirralu yijalu warrkamuku jirniyijaninyi marrjalu palarrangu Israel-jalu marrngurrangu.

<sup>14</sup> Janalu marrjalu yiji warrkamuku jirniyijaninyi Israel-jalu marrngurrangu, janalu jakulirniyijaninyi yarni manaku mayarranguku ... janalu jakulirniyijaninyi janukuku karlinskyaku ngapaku pukun kanganyaku. Yijalu jakulirniyijaninyi warrkamu jinaku marrjalu yiji kakuputulu.

<sup>15</sup> Kujarra mirtawajirri waninyikinyipulu ngayinykarraku kalkunaku palarranguku Israel mirtawanyjarriku. Waraja yini Zipporah, wariny-murniny yini Puah. Janamilalu Egypt nyampalilu wurrarnapulaku palajirringi mirtawajirringi,

<sup>16</sup> “Ngurnipali Israel-jalu mirtawalu partany wupartu pirirri kangkuliny, marlkarri wirlalkulunyumpulu pala partany. Mirtawanyjarri partanykar-rangu jakun kalkulkulunyumpulujaninyi wankanyu. Wiyirr piririmartarrangu partanykarrangu marlkarri wirlalkulunyumpulujaninyi jampa miral jarrnyajangarra.”

<sup>17</sup> Palajuirri mirtawalujirri ngarrakunyu kurlkarri marnikinyipulu Ngarrkangarra. Palajunjalu panypanyapululu palanga nyampalingi. Palanyu munu marlkarri wirlanamapulujaninyi piririmarta partanykar-rangu

<sup>18</sup> Palajunjalu palalu nyampalilu Egypt-jalu wariny ngakarnapulaku mananya kulpanyaku. Nyampalilu karra marnapulaku, “Nyumpalalu wankanyu yakarnanyumpulujaninyi piririmarta partanykarrangu, munu marlkarri wirlanamanyumpulujaninyi. Nganijalu panypanyijinyumpulu?”

<sup>19</sup> Puntaju karra marnapulalu, “Munu marlkarri wirlarnakalayijaninyi piririmarta partanykarrangu. Israel-jalu mirtawanyjarri munu Egypt-jalu mirtawanyjarrikapali. Israel-jalu mirtawanyjarri marrjapanu yiji, janalu partany janamili kanganyayijaninyi nyampalu. Jampa yananyalay-ijanaku palarrangukarti. Jampa kajanalayijanaku, janalu purlpi partany kanganyayiyarninga.” Pulanyu mitu marnapulu pala Nyampali.

<sup>20-21</sup> Palajunjalu palajuirri mirtawalujirri Ngarrkanga yijalmarta jirnipululu, kalkurnupulujaninyi pirirri partanykarrangu wankanyu. Ngarrka pikaly yiji jarrnyipulaku palakujirri, yinyapulinya walja pukun partanyjirri pulnymili. Israel-jalu marrngurrangu kurrngal yiji jarrnyi kawarniyi.

<sup>22</sup> Palaja nyampalilu karra marnajanaku Yijipijaku marrngurranguku, “Parnpiliyijaninyi wiyyirr Israel-jaja partanykarrangu piririmarta pijungu, ngapalu kurnulinyjaninyi. Yakaliyijaninyi mirtawarrangu partanykar-rangu wankanyu.”

## 2

(2:1-10)

<sup>1</sup> Palanga waninyikinyi nyungu waraja Israel-ja (-jaja ?) pirirri. Paliny waraja Levi-milirranguja. Palinymili nyupajimurniny Levi-milirranguja pukun.

<sup>2</sup> Palalu mirtawalu partany kanya pirirri. Palinyju parrjarna pala partany ngalypa purrpurnkata. Palinyju kuku jirni pala partany kujarrapa warajanga wirlarranga wirntijartinyu nyampalingimarra.

<sup>3</sup> Yartikarra palinyju munu kuku jinaka pala partany. Palajalu manajaninyi jurlunkurrangu, yarni marna pitikapali, yamarna miljirrkapalilu. Palajalu wirrirni pala partany palanga pitikapalingi, wirrirni pala pitikapali kankarni ngapanga jurlunkurrangungu rirri-rirringi ngapanga. Palajun jirni kuku jinaku palaku partanyku.

<sup>4</sup> Palamilalu partanymililalu kangkujilu parrjarnikinyi wararrju kajan-gulumarta.

<sup>5</sup> Palajalu Pharaoh-mili kurntalmurniny yana pijukarti mirtawarrangu palinymili warrkamukatarrangujartiny. Yana janpakarti janpanyaku. Palarrangu warrkamukatarrangu yananyikinyiyi rirri-rirringi pijungu. Palalu yirrirni pala pitikapali jurlunkurrangungu, ngakarna waraja mirtawa mananya kulpanyaku palinykartiku.

<sup>6</sup> Palinyju yatirni pala pitikapali, yirrirni partany, ngangkurl jirnikinyi. Palinyju paju karrinyalu palaku, karra marna, "Nyungu waraja Israel-milijarrangu partany."

<sup>7</sup> Kangkujimurninyu palamilalu partanymilalu karra marnalu nyampalimilaku kurntalku, "Wunyjurru? Yankulumarnajanaku Israel-jaku mirtawanyjarriku mananya kulpanyaku, tuku jilapiyinga nyungu partany nyuntuku."

<sup>8</sup> "Yu!" Karra marna palalu. Palalu partanymilalu kangkujimurninyu yananyakanu mana palamili partanymili waljangarra pipimurniny.

<sup>9</sup> Nyampalimilalu kurntalju karra marnalu palaku partanymilaku pipiku, "Kawa nyungu partany, tuku jila, wirtu jilapijingga. Ngajulu warnku yungkulumarnanta." Palalu pipimurninyu kanya pala partany palinymilikarti waljakarti ngurrakarti, palinyju tuku jinikinyi.

<sup>10</sup> Pala partany wirtu jarrinyi. Palajalu palinymilalu waljalu pipimurninyu kanyali Pharaoh-milikarti kurntalmurninykarti. Pala partany palamili pujamu jarrinyalu. Palinyju karra marna, "Ngajulungarra manarna nyungu partany ngapaja, palajunjalu yini malamarna Moses."

### (2:11-22)

<sup>11</sup> Moses-ju wirtu jarrinyi, pirirri yija yiji jarrinyi. Warajanga karrpungu yanajanaku yirrinaku palinymilirranguku marrngurranguku, palarrangu Israel-ja. Palinyju yirrirnijaninyi yijanga kurluny-kurlunyja waninyikinyiyi, Egypt-jalu nyampalirrangulu yijalu warrkamuku jakurlinikinyijaninyi marrjalu. Palaja yirrirni warajalu Egypt-jalu wirlarnikinyi waraja Israel-jaja marrngu, palinymilingarra warrarn walja marrngu.

<sup>12</sup> Moses-ju parrjan-parrjarna, palanga jintaku munu parrjarnajanaku. Palaja wirlarna pala Egypt marrngu marlkarri, palinyju kawu palinymili kuku jini kaninykurti jungkanga, yamarna.

<sup>13</sup> Karrpu warinyja paliny puru yana-yananyikinyi, yirrirnipulinyi kujarra Israeli-ja marrngujirri kulipatirnikinyipulu. Karra marnalu warajaku, "Nganijalu wirlarnan nyungu pirirri, nyuntumili marrngu walja?"

<sup>14</sup> Purntaju karra marnalu, "Ngalayaku nganurtulu nyuntu nyampali wirrirnanta? Nganijalu wurrarnan ngajulu kurlujartiny jinarni, palinyju nyungulu ngalypa jini? Nyuntulu marlkarri wirlarnan nyarra Egyptian. Ngajuku pukun karrinyajin marlkarri wirlalaminyin palajun?" Palaja

Moses-ju kurlkarri marna, [-rninyi? ?] "Miranu jana nyungu ngajulu marlkarri wirlarnarna nyarra pirirri." Paliny wirnti karrinyi.

<sup>15</sup> Jampa Pharaoh-lu pinakarrinyi Moses-ju marlkarri wirlarna nyarra Egyptian, paliny kuli yiji jarrinyalu. Kurlkarri marna, "Ngajulu marlkarri yija wirlalamarna Moses." Purlpi nyungu Moses mirti jirni pala Pharaohngimarra wirntijartiny. Paliny yana kakarra warrarn warinykart, pala warrarn yini Midian. Palamanga wani-waninyikinyi. Warajanga kar-  
rpungu milpanyajanaku pala janukungu.

<sup>16</sup> Paliny palamanga kajarnikinyi, 7 mirtawarrangu kurrnyjarri turlpaniyiyi pala janukukart. Jana kurntalmurniyarrang priest-ku yini Jethro. (What did we use in Mark's Gospel for 'priest'?) Kurntalmurninyarrangulu tuku jinikinyiyijaninyi kukurnjari janamilaku japartku. Janalu ngapa nyirnirnikinyijanaku janukuja kukurnjariku.

<sup>17</sup> Palamangangarra jinta pukun piririmarta milpanyiyi kukurnjariku tuku jinakata. [Shepherd??] Janalu munu-munu jiniyijaninyi pala mirtawanyjarri ngapaja nyirninaja, purrja piniyijaninyi janukuja. Moses-ju purntu karrinyijanaku, palinyju karnti-karntinyijanaku palarrangungu piririmartanga, palaja ngapa nyirnirnijanaku pala mirtawanyjarrimilaku kukurnjariku.

<sup>18</sup> Palarrangu mirtawanyjarri kulpanyiyi janamilikarti japartumili ngur-rakarti, Jethro-karti. Palinyju karra marnajanaku, "Nyurra kuwarri nyampa kulpanyanyurru. Wunyjurruja?"

<sup>19</sup> Janalu puntaju karra marnayalu, "Egypt-ja pirirrilu purntu karrinyinganaku, kartuwarra marnanganinyi jinta kukurnjariku tuku jinakatarrangungamarra. [Have we a descriptive word for a 'shepherd'? japartamu jinakata was phonemicised from the English.] Yijalu palinyju ngapa nyirrirnijanaku kukurnjariku pukun."

<sup>20</sup> Palinyju puntaju karra marnajanaku palinymili kurntalmurnin-yarranguku, "Wanyjarningi pala pirirri? Nganijalu palamanga yakar-nanyurru? Kulanya marrayi nyungukarti milpulinyi, mayipa nyungungu ngalkulinnganyjurruku."

<sup>21</sup> Moses waninyi pala Jethro-mili ngurranga punja. Palaja Jethro-lu yinya palinymili kurntal Zipporah nyupajimurniny jarrinyalu.

<sup>22</sup> Palaja partany kanya pirirri. Palaja Moses-ju karra marna, "Ngaju ngajarri warinyja warrarnja. Palajunjalu yini marna palinymili pujamu "Gershom". [How should we handle these puns in names? They were very common in Hebrew culture. Should we Ignore them? Or put them in footnotes?]

<sup>23</sup> Moses waninyi Midian-ja punja yiji. Yarti partunurrangu kurrngal-martaja pala Nyampali Egypt-ja marlkarri jarrinyi. Wariny pirirri nyampali jarrinyi Egypt-ja. Jalypalu ngarrany Egypt-jalu kurluny-kurlunyja kalkunikinyijaninyi Israel-ja marrngurrang, marrjalu yiji warrkamuku jakurlirnikinyijaninyi yija [-----??], janalu Ngarrkangarra kurlkarri marnikinyiyipa japiirr marnikinyiyi kartuwarra manaku.

<sup>24-25</sup> Palinyju pinakarrinyijaninyi, kurlkarri marnajaninyi muwarr nyarra wurrarnajanaku purlpilu mirtanya-mirtanya Abraham-japa Isaac-japa Jacob-ja. Purlpilu muwarr nyarra wurrarnajanaku, "Yijalu ngajulu tuku jilamarnanyurri. Ngajulu yungkulumarnajaninyi nyur-ramili nyirrirnikartija warrarn Canaan. Pala warrarn wantulinyjanaku janamili." Palajun karra muwarr pinijanaku Abraham-japa Isaac-japa Jacob-ja. Munu pala muwarr kakurnama palinymili, tukulungarra par-jarnikinyijaninyi Israeli-ja marrngurrang, kurlkangarra waninyikiny-

janaku, paju karrinyikinyijanaku.

### 3

(3:1-22)

<sup>1</sup> Moses-ju tuku jirnikinyijaninyi kukurnjaripa nanikuturrangu palinymili kakajimurninymili, nyarra pirirri, Jethro, [priest? What did we use in Mark's Gospel?] waninyikinyi palanga warrarnja Midian-ja. Warajanga karrpungu Moses-ju palarranguku kuviyiku ngurra marnikinyijanaku warrarnja puru karranga, milpanya wangka marna nyarra warnku wirtu, Warnku Sinai, pala warnku nyarra Ngarrkamili.

<sup>2</sup> Palamanga Ngarrkalu jurti jinarningu wikakapalilu Moses-ja. Moses-ju parrjarna mungka kampanyikinyi, palinyju miranu jarrinyakanu yirrirni, kurlkapirli jarrinyi, "Pala yija wika kampanyi, munurti palama mungka kampanyaka jurnpakartijakun.

<sup>3</sup> Wunyjurruja! Nganija pala mungka yirrku waninyi? Kula, wangkan-gulumartalu parrjalamarna."

<sup>4</sup> Jampa yirrirni Moses wangka jarrinyaja Ngarrkalu kamarnalu pala partijirri kaninyjalu mungkangulu, "Moses! Moses!" Puntaju karra marnalu, "Yu? Ngajungarra nyungu."

<sup>5</sup> Ngarrkalu karra marna, "Munu wangka jarruluman. Nyuntu wararr karrinyan (Holy ground? Hmm!) jungkanga. Yinji pilarningu jujika nyuntumili. Nyungu jungka ngajumili. Munu wangka milpuluman.

<sup>6</sup> Ngaju Ngarrkangarra, ngajulu nyarra tuku jinikinyirnijaninyi nyuntumili mirtanya-mirtanya walangkarrangu, Abraham-pa Isaac-pa Jacob." Moses wirnti karrinyalu parrjanaku Ngarrka. Palinyju ngumpa ya-marnarninyi.

<sup>7</sup> Palaja Ngarrkalu karra marnalu, "Ngaju miranungarra janaku ngajumili marrngurranguku Egypt-ja. Palarrangulu maja-majalu kurluny-kurlunyja kalkurnayijaninyi. Janalu kamarnayi yiji ngajuku, janaalu karrinyayi kartuwarra manaku nganurtulupa. Ngaju miranu janaku, jana kurluny-kurlunyja waninyayi.

<sup>8</sup> Ngaju milpanyarnajanaku kartuwarra manaku Egyptians-jaja. Ngajulu kangkulumarnajaninyi palamaja warrarnja, warrarn warinykart, ngalypakarti, walpurrikarti, ngalypakarti yija. Jinta warinyarrangu waninyayi palamanga warrarnja. Marrngurrangu Canaanite-japa Hittite-japa Amorite-japa marrngurranguku, Perizzite-ja pukun, jinta Hivite-japa Jebusite-ja kuwarri waninyayi palamanga. Palamakarti warrarnkart kangkulumarnajaninyi Israelite-ja marrngurranguku.

<sup>9</sup> Egypt-jalu kurluny-kurlunyja kalkurnayijaninyi ngajumili marrngurranguku, ngaju miranungarra palaku. Israeli-jalu kamarnikinyiji ngajuku, ngajulu pinakarrinyikinyirnijaninyi.

<sup>10</sup> Palajunjalu ngajulu ngakalamarnanta Pharaoh-karti Egypt-karti mananya kanganyaku ngajumili marrngurranguku Egypt-ja ("out of": something other than just -ja)."

<sup>11</sup> Puntaju karra marnalu Moses-ju Ngarrkaku, "Ngaju kalarti munu nganurtumarta, kurlujartiny yija. Munu yananyakarnalu nyampalikarti Egypt-ja, mananya kulpakyakupa marrngurranguku Israeli-rranguku pala-maja."

<sup>12</sup> Ngarrkalu wurrarnalu, "Yija ngaju yankulumarnangu nyuntungu, jampa kangkulumanjaninyi marrngu Egypt-ja, milpulunyurru yakujani,

nyurra malaminyinyurru nyungunu warnkungu. Palanga miranu jarruluman ngajulungarra ngakanarnanta" ['praise me'? 'worship me' ? Add to list of "Key Terms"].

<sup>13</sup> Palaja Moses-ju karra marnalu, "Jampa yananyakanu wurralamarnajanaku nyuntulu ngakarnanyin, japiirr malaminyiyi, 'Nganurtu palinymili yini?' Ngani wurralamarnajanaku?"

<sup>14-15</sup> Ngarrkalu wurrararnala Moses-ja, "Ngaju wankanyu ngarra-marnti, wurralanjanaku nyungu muwarr: 'Wankanyupa Waninyi, palalu ngakarninyi nyungu nyurrikarti. Yawayilungarra tuku jinkinyijaninyi Abraham-pa, Isaac-pa Jacob pukun. Palinyju nyungu ngakarninyi nyurrikarti.' Palajun karralu wurralamajanaku Israelite-ja marrngurragungu. Ngajumili yini Yawayi. Yawayingarra yini yini malaminyinyurru, nyurralupa nyurramilalu partanykarrangulupa janamilalu partanykarrangulupa jintalu pukun nyirrirnikartijalu.

<sup>16</sup> Jampa yananyakanu milpuluman Egypt-ja, kurrngalamanjanaku mirtanya-mirtanya Israeli-ja, wurralamajanaku, 'Ngarrkalu tuku jirnikinyijaninyi nganyjurrumili marrngurrangu walangkarrangu. Palinyju tuku jirnikinyijaninyi Abraham-pa, Isaac-pa, Jacob pukun. Palinymili yini Yawayi, wankanyupa waninyi. Paliny miral jarrinyiji, muwarr nyungu yinyaji, muwarr nyungu nyurru: 'Ngurinji [??] karrinyangulu parrjarnikinyirninyurrinyi. Palarrangulu Egypt-jalu kurluny-kurlunyja kalkurnikinyiyurrinyi, pajumajirralu. Ngaju miranu wiyyirku.'

<sup>17</sup> Kuwarri muwarr wirrinarninyurru, ngajulu kartuwarra malamarnanyurrinyi palarrangulu Egypt-arrangungamarra. Ngajulu kangkulumarnanyurrinyi warrarn warinykart, pala nyarrapa waninyayi marrngurrangu Canaanite-pa Hittite-pa Amorite marrngurrangu, Perizzite pukun, Hivite-pa Jebusite marrngurrangu. Palarrangulu marrngurrangu waninyayipa kuwarri. Pala ngalypakata yiji warrarn, kangkulumar-nanyurrinyi palamakartingarra. Wurralamajanaku Israelite-ja marrngurrangungu nyungu ngajumili muwarr.'

<sup>18</sup> Janalu pinakarrulupiyi muwarr nyuntumili. Palaja nyuntupa jinta wiyyirr mirtanya-mirtanya Israeli-ja yankulunyurralu Egyptian-ja nyampalikarti, karra malkulunyurralu, 'Yawayi-lu, nyarralupa tuku jrinanganinyi, paliny miral jarrinyanganaku. Palajunjalu nganarnalu pirrakartiku yaninyaku karrinyayirni, kujarrapa waraja ngurrarrangu ngurnipali yankulupiyirni, kuwiyiku wirlalapiyirnalu Yawayiku.'

<sup>19</sup> Ngaju miranu palaku nyampaliku, munungarra ngakanawayilu yirrku jarrulinyi nyurru.

<sup>20</sup> Ngaju marrjapanu yija. Ngajulu wirtu yiji jilamarna, ngajulu wirntiji pilamarnajaninyi palamarrangulu Egyptians-ja, palarrangulu ngurnjulupiya yiji nganikupa jinaku. Yarti palaja nyampalilu ngakalkulinyurrinyi Egypt-ja.

<sup>21-22</sup> Nyurra wurukarrrajartiny yankulunyurru. Wiyirr mirtawanyjarri yankulupiyijanaku Egyptian-jaku mirtawanyjarri, nyarrapa jinta pukun waninyayijanaku Israeli-mili ngurrangapa, jinta pukun wangkakulupa [neighbours??] waninyayi nyarra Egyptian-ja mirtawanyjarri. Japiirr malapiyijaninyi silver-kupa gold-ku pukun, parirrpintipa, kurlkapinti. Wurukarraku pukun japiirr malapiyijaninyi. Ngajulu ngalypaku jilamarnajaninyi Egyptian-ja marrngurrangu ngayiny ngalypa yiji wantulupiyinyurru. Palarrangulu wurukarra yungkulupiyijanaku Israelite-ja mirtawanyjarringi. Pala wurukarra wirrulkulunyurrujanaku nyurru-

milingi partanykarrangungu. Jampa Egypt yakalkulunyurru, wurrukarra janamilingarra kangkulunyurrarninga nyurraku."

## 4

(4:1-17)

<sup>1</sup> Moses-ju puntaju karra marnalu, "Ngurnipali jintalu munu pinakar-rulupijiyi ngajuku. Ngurnipali karra malayili, 'Yawayi munungarra miral jarrinyamangu nyuntuku.'"

<sup>2</sup> Ngarrkalu karra marnalu, "Ngani palama warlina kalkurnan nyuntumili parirrja?" Palinyju puntaju karra marnalu, "Mungka."

<sup>3</sup> Palinyju karra marnalu, "Jungkanga parnpila!" Moses-ju jungkanga parnpirni, pala jurru jarrinyi. Paliny wirntijartiny mirti jini jurrungumarra.

<sup>4</sup> Ngarrkalu wurrarnala palinyja, "Warntingulu warlinakanu marra." Palinyju palajunngarra jirni, palinyju warlirni, kulpanyakanu mungka jarrinyi.

<sup>5</sup> Ngarrkalu karra marnalu, "Palajun jilaman. Palaja Israeli-jalu pinakar-rulupiyingu nyuntuku. Janalu yijalmarta jilapiyi muwarr ngajumili. [??] Ngaju, Yawayi, miral jarrinyarnangu nyuntungu. Ngajulungarra tuku jinikinyirnijaninyi nyuntumilrrangu marrngurrangu mirtanya-mirtanya, nyarra tuku jinikinyirnijaninyi, Abraham-pa Isaac-pa Jacob. Palajun miranu jarrulupiyi.

<sup>6</sup> Parirr wirrilarningu kaninykurti nyuntumili wurrungu." Moses-ju wirrirnarningu kaninykurti Ngarrkamilingi muwarrja palaja kulpanya purrinajalu yirrernarningu palinymili parirr yi ja mirta-mirta pitarr-pitarr wurrkujartiny.

<sup>7</sup> Palaja Ngarrkalu wurrarnala palinyja, "Yarrana parirr ngalpa jilarningu nyuntumili wurrunga." [??] Palinyju yarrana ngalpa jinarningu parirr palinymili wurrungu jampa kulpanya purrirni, yirrirni ngalypa yajarri palinymili warinymurninykapali parirrkapali, wurrkumajirri.

<sup>8</sup> Ngarrkalu wurrarnala, "Nyuntulu jurti jilamanjanaku nyarra marn-tipinti warnu, parrjalapiyi jurru jarruliny, yirrinajalu ngurnipali munu yijalmarta jilapiyingulu nyuntumilingi muwarrja. Palajunjalu nyuntulu jurti jilamanjanaku nyuntu parirr, mirta-mirta jarruliny, wurrkujapa palajalu yarrana ngalypa jarruliny. Yarti ngurnipali yijalmarta jilipi Ngajulungarra ngakanarnanta.

<sup>9</sup> Yirrkulu ngarrany yijalmarta jinaku nyuntungu panypanyalu, ngapa mankuluman pijuja, Nile pijuja. Nyuntulu jurtilaman purnarranga jungkanga, pala ngapa pijirri jarruliny.

<sup>10</sup> Moses-ju puntaju karra marnalu, "Ngaju munu yananyakarni janaku, ngaju ngunjul-ngunjulkata muwarr pinaku. Muwarr taju-tajukata ngaju jinu muwarr pinarni."

<sup>11</sup> Ngarrakalu karra marnalu, "Nganurtulu marrngu jawa yinyajaninya? Ngajulungarra. Nganurtulu marrngu jinta muwarrmajirriku jinajaninyi? Nganurtulu jinta kurlka ngawu jinajaninyi? Ngajulungarra. Nganurtulu jinta parrjanaku jinajaninyi? Nganurtulu jinta pampuru jinajaninyi? Ngajulungarra, Yawayi.[??]

<sup>12</sup> Nyuntu yankuluman Egypt-karti. Ngajulu wurralamangan wunyjurrukarra muwarr pilamanjanaku, ngajulungarra muwarr pilamarnangu nyuntungu. [??]

<sup>13</sup> Moses-ju puntaju karra marna, "Ngajuwayi, marrngu warinymarta ngakalaman."

<sup>14</sup> Palajun karraja Ngarrka kulimarta jarrinyalu palinyku. Wurrarnala Moses-ja, "Nyuntumili mamaji Aaron, kurlkarri marnanngarra paliny? Ngaju miranu palinyku, paliny muwarrku ngunjunawayikata palar-ringarra mira karralu jampamartangarra kuwarri turlpulinyi. Nyuntu parrjanakanu pikaly yiji jarruliny.

<sup>15</sup> Ngajulu wurralamarna nyumpuluku wunyjurru karraku muwarr pinaku, nyuntulukurra wurralamapili palinyja, palaja ngajulu muwarr pilamarna nyumpuluku nyumpalanga kanka. [??]

<sup>16</sup> Nyuntuku, palinyu muwarr pilkuliny janaku marrngurrangungu. Nyuntulu wurralamapili ngajumili nyarra muwarr, palinyu nyuntujaja muwarr wurralkuliny janaku jananga.

<sup>17</sup> Kangkuluman warnu nyarra, palamajartinyjungarra jurti jilaman janaku. [??]

<sup>18</sup> Palaja Moses kulpanyalu palinymili kakajimurninykarti, Jethro-karti. Wurrarnala palinyja, "Puru kurra nyungu kulpanya ngakalaminyin janaku, kulpanya yirrinaku ngajumilirrangku Egypt-ja ngurnipali ngalypapa waninyayi." "Yuu, ngalypa-ngalypa yarrajanku."

<sup>19</sup> Nyungu Moses-janga Midian-jalu ngarrany, Ngarrkalu karra marnalu, "Nyarrarrangu marlkarri wirlanakupa karrinyikinyiyangu, palarrangu marlkarrijakun wiyirr, ngalypanga yankuluman Egypt-karti."

<sup>20</sup> Palajun karraja Moses-ju mirtawapa palinymilijirri pujamu-murninyjirri pukun, karnti jirnijaninyi donkey-nga. Jampa yananya kawanajalu ngarrany Egypt-karti, nyarra warnu kanganyikinyi pala Ngarrkalupa wurrarnala kanganyaku. [??]

<sup>21</sup> Yarranakanu Ngarrkalu wurrarnala, "Kuwarri nyungu kulpanyan Egypt-karti. Ngajulu nyarra jurti jirnanangu (wonderful things) nyuntulu jilaman (must do). [??] Yijalu jilaman wiyirr palaku king-ju yirrkuliny. Paliny jalypakata jilamarna, palinyu yirrkulu warlilkulinyjaninyi nyuntumi marrngurrangu. [??]

<sup>22</sup> Palajalu wurralamapili king-ja nyungu muwarr Ngajumili: 'Ngaju Yawayi. Israeli-mili nyirrikartija jana walja ngajumilirrangku partanyakarrangu (first born). [??]

<sup>23</sup> Ngakalamajaninyi ngajumili marrngurrangu, janalu muwarr pilapijiyipa ngaju yungkulomyiyi (gifts). Pinakaraji ngajungu. Munujalu ngajulu marlkarri wirlalamarnanga nyuntumili murrkangunyamurniny pujamu.' Palajunkarra muwarr pilamanpalu king-ja."

# Job

Unknown if consultant checked.

## 42

5-6 Jintalu wurrarnajiyi nyuntu purlpilu. Ngaju miranukapali waninyikinyirnangu nyuntuku. Kuwarringulu wariny, ngajulu yirrirnirn-inti waljalu jirtamarralu. Palajunjalu ngaju kurntany yiji ngajumilaku muwarrku, munu yarrana muwarr pilamarna palajun.

# Psalms

Unknown if consultant checked.

## 1

*Psalm 1*

- 1 Pikaly yiji nyarrarrangu marrngurrangu yakal manakata kurlujartiny jinakatarrangumilaku muwarrku, munu manal-manal jarrinyayijanaku kurlujartinyarrangumilingi jinan-gapa munu kulurnayijaninyi palarrangu nyurni manakata Ngarrkaku.
- 2 Pikaly yiji waninyayi kurlkarri manajalu Ngarrkamilaku muwarrku, pinakarrinyayalu ngarrakunyu.
- 3 Miranu nyurra nyarra mungka yintamartaji waninyi, ngalypa kakuputu, mayi karrinyili ngalypakatapa parrka munu tikirl jarrinyakayi. Ngalypakata marrngurrangu palajunngarra mungkakapali. Jurtulu jinayi nganiwarralpirti, ngalypa jarrulinyjanaku.
- 4 Munu yiji yakujun kurlujartiny jinakatarrangu marrngurrangu; jana nyarra ngapikapali, yapinajakapali mayikurnukapali, wangalju kanganyi.
- 5 Ngarrkalu marrjalu wirlalkulinyjaninyi. Palinyju jinta pilkulinyjaninyi, jana munu wantulupiyijanaku palinymilirrangungu.
- 6 Ngarrkalu tukulu kalkunajaninyi palinymilirrangu jurtungu ruwurtungu. Wariny yiji kurlujartiny jinakatarranguku, jana yananyayi yijkarti yiji kurluny-kurlunykarti.

## 9

- 17 Kurlujartiny jinakatarrangu marrngurrangu wiyyirr marlkarri jarulupiyi, jana wiyyirr yakal manakata Ngarrkaku.

## 23

- 1 Ngarrkalungarra tuku jinanyi; ngajulu kalkunarni nganiwarralpirti wankanyu waninyaku.

## 32

*Psalm 32*

- 1 Jinta marrngu kurlu jiniyi. Palaja wurrarnayalu Ngarrkanga, “Kurntany jarrinyarnangu”. Puru yakarnajaninyi. Palaja pikaly waninyayi ngaramarnti.
- 2 Jinta marrngu kurlu jiniyi. Palaja wurrarnayalu Ngarrkanga, “Kurntanya jarrinyayirni.” Munu mitu marnamayi,

munu warnta marnamajaninyi.  
Kuwarri pikaly waninyiyi kakuputu.

**3** Purlpi kurlu jinirni,  
munu wurrarnamarnalu Ngarrkanga.  
Palajalu ngangkurl jinkinyirni kara wurrpu.  
Ngangkurlaja manyurla jarrinyirni.

**4** Karrpurrangu karrpungu, warrukartirrangu warrukarti,  
nyuntulu kararr jinjin, nyampali!  
Manyurla yija-yiji jarrinyirni.  
Yurranga karrpulu yarntalkuliny janpa, punarra jilkuliny.  
Palakapali warnta marninyin, Nyampali,  
palangulu tirtirti pinirni, murrjin jarrinyirni,  
marlkarri jarrimarna.

**5** Palangulu wurrarnarnangu yija,  
palakapali jinirni, kurlu jinirni.  
Munu kuku jarrimarnangu nyuntunga,  
kurlka jarrinyirni wurralamarnangu kurlurrangu jinirni. Wurrarnarnangu,  
“Milya kaniny jarrinyarnangu kurntanyjartiny.”  
Palajalu puru ngakarninyin ngalypalu kakuputu.

**6** Palajalu nyuntumili marrngurrangu,  
palarrangu marrngu miranu nyuntuku,  
wurranaku nyuntungu nganijartiny muwarrjartiny.  
Janalu japirr manaku nyuntu,  
“Ngarrka, ngani jilamarnajanaku nyungurrangu?”

Palaja jilipiyi, ngalypa yankulupiyi.  
Nganipa kurlu milpulinyjanaku,  
ngapikapali mangkurtu mirti jarrulkuliny marrja pijunga,  
nyuntulu kalkulumanjaninyi tukulu.  
Pala mangkurtu munu kanka jarrulinyjanaku,  
munu kangkulinyjaninyi warnan-warnan.

**7** Tuku waninyarni nyuntunga.  
Nganingamarra tuku kalkuluminyin.  
Purntu marnanyin.  
Palajalu kurntarnarni marrjalu,  
“Ngarrkalu tukulu kalkurninyi!”

**8-9** Nyampalilu wurrarnaji, “Pinakarraji ngajuku!  
Munu ngakumpa jarrinyaku yawartakapalipa tangkikapali.  
Wirriliman purayitul yirranga.  
Munujalu yankulupiyi warinykurnu.  
Munu ngakumpa jarruluman janakapali.  
Wirrilimarnanga purayitul nyuntunga? Munu yiji!  
Ngajumili muwarrjartinyju miranu jilamarnanta,  
ngani jilaman.  
Nyuntulu yirrkulu pinakarrlupijin ngajuku.

**10** Kurlujartinyu marrngulu yirrkulu kurlu jinayarninyi.  
Ngarrka yirrkulu karrinyijanaku yajarnayipa punjalu,  
palinyju tukulu kalkulinyjaninyi.

**11** Nyurra marrngu ngalypa jininyurru,  
parrjalayi Ngarrka ngani jini!  
Pikaly jarrayi, raka jarrayi!  
Nyurra marrngurrangu, nyurralu yajarnakinyinyurra Ngarrka,  
kamalayi pikalyjartinyju.

## Proverbs

Unknown if consultant checked.

### 4

<sup>18</sup> Marrngu jampa kakarra kurnpungu yananya kawanajalu, tili pirrpa-pirrpa jarrinya kawaninyalu. Palajunkapalingarra nyarra yirnkulu jinakatarrangu jiti miranu jarrinya kawanayalu Ngarrkaku.

### 12

<sup>10</sup> Ngalypakatarrangu marrngurrangulu tukulu kalkunayijaninyi janamiliarrangu jarnturrangu. Kurlujartiny marrngurrangulu kurlujartinyju kalkunayijaninyi janamili.

<sup>21</sup> ...nyarra kurlujartinyngarra ngarrakuny jarrinyalu kurlujartinyku marrnguku.

### 14

<sup>12</sup> Jintalu marrngurrangulu kurkarri marnayi janalu jinayi jurtulu. Kurlu pinayi yijalu yiji, marlkarri julkulinyjaninyi.

### 20

<sup>1</sup> Nyarra wirtu kari minpinajalu nyuntu marra muwarr pinakatapa ngawu jarrinyan. Ngakumpa yiji yawurr jarrinyaku.

### 22

<sup>6</sup> Miranu jilaman partany wunyurruku waninyaku, palinyu kurkarri malkuliny kakuputulu.

### 23

<sup>19-21</sup> Pujamukayi, pinakarra! Jurtulu kurkarri malapa yijanga jurtungu wantuluman. Munu kulunaku jinta wayinku wirtu minpinakatarrangupa lirrjalkatarrangu mayiku. Marrngurrangulu palajunmartalu pujunurrangu jinayarninyi.

<sup>29-35</sup> Ngarnurtu ngarlu kurlu yija? Ngarnurtu pikalymajirri? Ngarnurtu ngarrakuny kulipatininyi? Ngarnurtu ngarrakuny warntakata? Ngarnurtulu kalkuninyi pita watarrkulu pungkanya? Ngarnurtulu kalkuninyi pani miji-miji? Nyarrarrangu karikarra waninyayi ngarrakuny, yakurr marnayi wayin warinpa wariny. Nyarra wayin ngalypa yiji parrjanakupa juri yiji yakurr manaku. Munu yiji yirni jarruluman palaku. Nyarra pajinajalu kulikatalu jurrulu nyuntu yija wurrku jarruluman, parraparra wirtu nyarra juntangulu pajinajalu, palajunngarra wayin minpinajalu nyuntu yija wurrku jarruluman. Nyuntulu parrjalamanjaninyi wirntiji pinakatarrangu miyurrangupa muwarr pilaman ngakumpakapali. Nyarra miranu nyurra puwurtuku kujungurrungu wangalpintijartinyku, makanu yiji pala mungka warlirninyipa pala wangalpinti. Pala mungka rurri-rurrinyi wangalja ngurnarrikurnujirri. Palajunngarra marrngu nyarra yawurr kurirra-kurirra marnti yananyi. Palaja karra malkuliny, "Wirlarninyiyi, munu parra-parra pinakarrimarna. Munumpa ngaju jampa wirlarninyiyi. Nyanga parril jarrulumarna yarrana minpinaku?"

## **Ecclesiastes**

Unknown if consultant checked.

**12**

<sup>1</sup> Partanyjungarra kurlkarri malaman Ngarrka, palinyjungarra jirnanta nyuntu.

## Isaiah

Unknown if consultant checked.

### 5

<sup>11-12</sup> Turlpanyanyurru marntungu kurnpungu wayinku minpinaku, palaja yirrkulu minpinanyurru warrukartingi... Nyurralu kurlkarri marnakanyurru Ngarrka, munu yiji! Munumpa nyurra ngani palinyju jininyi. Palinyju wurrarnanyurraku, "Ngajulu wirlalamarnanyurrinyi marrjalu, ngunjul yiji nyurraku mirti jarrinyakupa kuku jarrinyaku."

### 38

<sup>17</sup> Puru yakarnanyin kurlujartinyja ngajumilingi.

### 53

<sup>5-6</sup> Nganyjurrumilakungarra kurlujartinyku paliny Ngarrkalu wirlarna. Ngarrkalu wilypirni palinyngarra, palajun jinajalu nganyjurru wanka jirninganyjurrinyi. Nganyjurrulu wiyirrju ngampanjartinyju nganiwarralpirti jinikinyinyi. Munu wirlarnamanganyjurrinyi, palinyngarra wirlarnanganyjurruku nganyjurrumilaku kurlujartinyku.

## Jeremiah

Unknown if consultant checked.

**17**

<sup>9</sup> Nyarra nganyjurrumili ngampankata pirlurr yija yiji mitukata. Ngunjur yiji ngalypa jinaku.

## Matthew

Unknown if this section is consultant checked.

### *PARTANY MIYIRINGI NGAYINYJA WIRRIRNI NGARRKALU (Matthew 1:18-25)*

<sup>18</sup> Nyungu wurralamarna muwarr, Jiyijaji Kurayiji marrngu jarrinyi. Pipi palinymili Miyiri yinyayili pilyurr Juwujapungu. Juwujapu mimarnikinyalu kanganyaku palinymilikarti ngurrakarti. Palajanga ngayinykarra jarrinyi. Ngarrkamilalu Pirlurru partany wirrirlili ngayinyja. Palaja muwarr wurrarniyili Juwujapungu, "Miyiri ngayinykarra wupartujartiny."

<sup>19</sup> Juwujapulu kurlkarri marna, "Miyiri karta karrinyikinyi pirirrijartiny. Mirtawaku kangkulamarna munu." Juwujapu ngalypakata, munu kurntany jinaku karrimalu Miyiriku miranga marrngurrangunu. Kurlkarri marnarningu, "Ngakalamarna warntamajirrilu."

<sup>20</sup> Palinyju kurlkarri marnikinyi ngarrany. Palajanga kapukarri marna. Kapukarrilu yirrirni yayinyjil, Ngarrkalu ngakarnalu. Wurrarnala yayinyjilju, "Juwujapukay! Tayipitimili nyuntu. Pinakarra! Munu ngarlu kurlu jarrulumanpalu Miyiriku mirtawaku. Ngarrkamilalu Pirlurru partany yinyali. Palajalu paliny kalkuluman mirtawa nyuntuku."

<sup>21</sup> Partany pirirri kangkuliny. Yini malaman Jiyijaji. Marrngurrangu panypyanyakatarrangu Ngarrkanga. Palajunjalu Ngarrkalu ngakalajaninyili ngarramarnti. Jiyijajilu kartuwarra malkulinyjaninyi." Palajun yayinyjilju muwarr pinalu Juwujapuku.

<sup>22-23</sup> Purlpilu muwarr Ngarrkaja muwarr pini pirirrilu: "Kumpara, munu ngarrany karta karrima pirirringi, ngayinykarra jarruliny. Partany pirirri kangkuliny. Yini malapiyi Yimanyuwil." Juwumilingi muwarrja pala yini Ngarrka Nganyjurrungu Waninyi.

Palaja Jiyijaji ngayarta jarrinya, palaku muwarrku jana miranu, Jiyijajingarra.

<sup>24</sup> Juwujapu kartaja turlpanya, yayinyjilmilia muwarrja jini. Miriyi kanya palinymilikarti ngurrakarti. Warajanga jiniyipulinyi pirirripa mirtawa.

<sup>25</sup> Palajanga munu warajanga karta karrimapulu. Mimarnikinyipulalu partanyku ngayarta jarrinyaku. Juwujapulu yini marna partany pala Jiyijaji.

## 2

### *PIRIRRIMARTA MIRANUKATA KAKARRAJA KANYJIRNIYALU JIYIJAJIKU (Matthew 2:1-12)*

<sup>1</sup> Palajanga Kingi Yarata nyampali waninyikinyi marrngurranguku palanga warrarnja, Jutiyanga. Palarrangulu marrngulu yini marnikinyiyarninyi Juwurrangnu. Palanga Miyirilu partany kanya Jiyijaji tawunja Pijiliyamungu.

Jiyijaji ngayarta jarrinya, jinta pirirrimarta ngajarri warinya wararnja kakarraja turlpaniyi kanyjinaku palinyku. Nyungurrangu pirirrimarta miranukata jana panikatarranguku. Yijalu yirrirniyi panikata kuwarrija parlparrja. Palalungarra kurlkapirli jinjaninyi, nyampali wirtu ngayarta jarrinyi Juwurranguku. Warrarn janamili yakarnayi palaku partanyku yirrinaku.

Jirujalamungu kajarniyi. Japirr marnikinyiyijaninyi,

<sup>2</sup> "Wanyjarningi partany piriti, nyarra nyampali, kingi jarrulunyurraku Juwurranguku? Nganarnalu yirrirniyirni panikata palinymili kakarnilu. Yirrinaja miranu jarrinyiyirni wirtuku nyampaliku ngayarta jarrinyajaku, partany wupartu ngarrany jarrinyi paliny. Nganarna turlpaniyirni yirrinaku, paliny yinganyapinti yinganyaku."

<sup>3</sup> Jampa Kingi Yaratalu pinakarrinyijanaku muwarr, yija ngarlu kurlu jarrinyi. Marrngu wiyyirr Jirujalamungu pukun ngayiny kurlu jarrinyiyi.

<sup>4</sup> Kuru marnajaninyi yatilarrangupa miranu jinakatarrangu Juwumili Yaratalu. "Pala marrngu wirtu, ngakalkuliny Ngarrkalu, wanyjarningi ngayarta jarruliny?"

<sup>5</sup> Puntaju wurrarniyili, "Nyungungu ngayarta jarruliny, warrarnja Jutiyanga, tawunja Pijiliyamungu. Purlpi warinyju Ngarrkamilalu muwarr pinakatalu yarntarna muwarr mirli-mirlingi,

<sup>6</sup> 'Marrngurragu Pijiliyamungu, nyurramili ngurra wupartu yiji. Ngarrkalu ngakalkuliny wirtu yiji nyampali, paliny ngayarta jarruliny nyurramilingi ngurranga. Paliny nyampali jarruliny Ngarrkamilaku marrngurraguku. Palaja wiyyirr nyurramilaku ngurraku miranu wantulupiyi.' Palajunngarra muwarr yarntarna Ngarrkaja."

<sup>7</sup> Yarata miranu jarrinyaku karrinyikinyi, nyanga ngayarta jarrinyi Jiyijaji. Palaja muwarr ngakarnajanaku kukujarrilu ngajarrirranguku kakarrajaku milpanyaku. Japirr marnajaninyi mitulu pukun, "Nyanga pala panikata ngayarta jarrinyi?"

<sup>8</sup> Palaja Pijiliyamukarti ngakarnajaninyi. "Yarrayi Pijiliyamukarti, kanyjiliyalu tukulu palaku partanyku. Palaja nyungukarti kulpayi, wurrallijiyi wanyjarningi paliny. Palaja yankulumarna palakarti, yirrilamarnalu ngajulu yiji, yinganyapinti yungkulumarna pukun." Yijalu yiji mitu marnajaninyi, partanyku Jiyijajiku marlkarri jinaku karrinyikinyi.

<sup>9</sup> Palaja yananya kawarniyi Pijiliyamukarti. Pala warajangarra nyarra panikata yirrirniyi, yananyikinyijanaku walangkarr. Palanga kankarni yiji wararr karrinyi mayanga partanyjartinyja.

<sup>10</sup> Panikata yirrinajalu pikaly jarrinyiyi yiji.

<sup>11</sup> Mayanga ngalpanyiyi kaninykurti. Palaja yirrirniyi partany, pipilu palinymilalu Miyirilu kalkurnikinyi. Murtingi jurlpi-jurlpi jarrinyiyalu partanyku. Janalu yinyayili miji-mijipa mintajirri pukurl, ngalypa parntinyikinyipulu.

<sup>12</sup> Palaja Ngarrka muwarr pinijanaku kapukarringi. Wurrarnajanaku munu kulpanyaku Yaratatakarti. Palaja kulpanyiyi janamilikarti waljakarti warrarnkartu warinykurnu.

### *PARTARL YAKURR MARNA JIYIJAJIKU MARLKARRI WIRLANAKU YARATALU (Matt. 2:13-23)*

<sup>13</sup> Warrukartingi Juwujapulu kapukarri marna. Yayinyil Ngarrkaja turlpanyalu. Wurrarnala, "Yaratalu kanyjilkulinyalupu partanyku marlkarri wirlanaku. Kuwarringarra turlpa. Kawapulinyi partanypa pipimurniny, mujarri warinykarti warrarnkartu, Yijipikarti. Wantulunyurru palanga. Yarti ngajulu wurralamarnanyurraku kulpanyaku nyungukarti." Palajun yayinyil muwarr pinalu.

<sup>14</sup> Juwujapu kartaja turlpanya. Kanyapulinyi pala partanypa pipimurniny, yanayi warrukartingi. Yanayi Yijipikartijakun.

<sup>15-21</sup> Palanga warrarnja waninyikinyiyi Yaratajanga wankanyungu ngarrany.

Yaratalu partarl mimarnikinyijanaku marrnguku kakarrajaku. Munu kulpamiyalu, munu wurrarnamiyili pala Pijiliyamungu ngurra Jiyijipa waninyikinyi. Palaja paliny yija-yiji kuli jarrinyi. Purlpi japirr marnajaninyi kakarraja ngajarrirrang, "Nyanga pala panikata ngayarta jarrinyi?" Kuwarri kurlkarri marnarningu, "Nyarra panikata ngayarta jarrinyi warajanga ngurnipali partunungu. Partany pirirri wiyyirr Pijiliyamungu wirlalamarnajaninyi kujarramajirri partunumajirri, kujarrajartiny partunujartinyarrang pukun, yijalu wirlalamarnajaninyi marlkarri wiyyirr."

Palajalu kamarnajanaku palinymili jurljarrangku. "Pinakarrayi! Pi-jiliyamukarti yarrayi. Palanga wirlaliyijaninyi wiyyirr partany pirirrarrang kujarramajirri partunumajirrirrang, kujarrajartiny partunjartinyarrang pukun wirlaliyijaninyi. Munu waraja yakalkulunyurru wankanyu." Palarrangulu jurljalu palajun jiniyi, Yaratamilija muwarrja.

Palaja marrngurrang Pijiliyamungu ngangkurl jinikinyiyi yiji partanykarrangku janamilaku. Purlpi yiji Ngarrkamili muwarr pinakata, ngapi, Jirimaya, muwarr pini,

"Palanga warrarnja, ngapindi, Ramanga,  
palanga ngangkurl pinakarrinyiyi.

Wariny marrja ngangkurl jininyi.

Pala purlpija mirtawa, Rayijil,  
ngangkurl jininyi paliny,  
partanykarrangku palinymilaku ngangkurl jininyi yiji.  
Jintalu kanyayijaninyi.

Ngangkurl jinijanaku ngarramarnti."

Palarrang muwarrarrang Rayijil mirli-mirlingi yarntarna nyarralu Jirimayalu. Kuwarri palakapali yiji palarrang marrngu Pijiliyamungu janamilaku partanykarrangku ngangkurl jinikinyijanaku marrja, palajunmarta.

Palaja Yarata markarri jarrinyi. Yijipingi Juwujapulu kapukarringi yirrirni yayinyil, Ngarrkalu ngakarna. Wurrarnili, "Pirirri nyarra karrinyikinyalu Jiyijajiku marlkariku wirlanaku, palinyngarra marlkari jarrinyi.

Turlpa. Kawapulinyi partanymurninypa pipimurniny, kulpai nyurramilikarti warrarn waljakarti, Yijirayilkarti."

Turlpanya Juwujapu kartaja, kanyapulinyi warrarnkart waljakarti, Yijirayilkarti. Purlpi yiji wariny Ngarrkamili muwarr pinakata muwarr pini, "Ngarrkalu kanya palinymili partany pirirri Yijipiija." Yarti Jiyijaji Yijipiija warrarnkart waljakarti kulpanyaja, miranu jarrinyiyi marrngurrang nyarraku purlpijaku muwarrku, pala muwarr wurarna Jiyijajingarra.

<sup>22</sup> Turlpanya Yijirayilja Juwujapulu pinakarrinyi muwarr, partany Yaratamili, ngapi, Yaakala, nyampali jarrinyijanaku marrngurrangku palanga, warrarnja Jutiyanga. Palaja muwarrja wirnti karrinyikinyi palanga warrarnja waninyaku Juwujapu. Kapukarringi Ngarrka muwarr pinalu, palaja muwarrja pipurru yana yalinyikurnu, warrarnkart Kaliliyikarti.

<sup>23</sup> Ngurrara jarrinyi tawunja Najarijingi. Purlpi yiji Ngarrkamili muwarr pinakata muwarr pinikinyiyi Jiyijaji, "Wurratalapiya paliny, Najarijipirrayi ngurrara".

**7**

<sup>13-14</sup> Nyarra kiyirti Ngarrkamilikarti warrarnkartu wujukata yiji. Ngalpanyaku palangangarra. Wariny nyarra kiyirti walpurra, pala nyarra wikakarti wirtukarti, ruwurtu palakarti ngunjulmajirri. Kurrngal marrngurrangu yananyayi palanga ruwurtungu. Kiyirti nyarra Ngarrkamilikarti warrarnkartu wujukatapa ruwurtu palakarti ngunjul-ngunjulmarta. Kujarapa warajalu marrngurrangulu yirnkulu yirrirnayi pala ruwurtu.

**10***Matthew 10:26-31 (extracts)*

<sup>26-31</sup> Marrngulu marlkarri wirlalayintili kawu nyuntu.  
Wirntiwayi janangamarra.  
Munu yiji pirlurr nyuntumili marlkarri wirlarnakayinga.  
Ngarrkakujakun wirnti wanta. Palinyju kampalantili pirlurrpa kawu,  
Wikanga Wirtungu jurnpakartijakun.  
Marrngulu munu palajun jinaka.  
Palajunjalu wirntimajirri wantajanaku.  
Nyuntumili Japartu Kankajirringi miranu ngani wurralpirtiku.  
Nyinyirkupa jungkanga pungkanyajaku paliny miranu.  
Yija paliny miranu nyuntuku pukun.  
Kurlkuraku jurnturtungu nyuntumilaku paliny miranu,  
warajapa warajaku, wiyyirku.  
Palajunjalu wirntiwayi wanta.  
Nyinyiri puru kurlkarri marninyi Ngarrkalu,  
nyuntu yijalu yiji kakuputulu kurlkarri marnanti.

**11**

<sup>28-30</sup> “Ngunjulkata marrngukayi milpaji ngajukarti, ngunjul wupartumarta jilamarnanga. Kululanyi ngaju, ngalilu ngalypa jilapali...Miranu jarra ngajuja, ngaju tukukatapa rakawayikata...

**19**

<sup>14</sup> Jiyijajilu karra marnajanaku, “Ngajulu karrinyarnijanaku partanykaranguku milpanyaku ngajukartiku, munu kurnta jilkulunyurrujaninyi. Ngarlungu jananga yija yiji Ngarrka, janalu pinakarrinyayalu yijalu yiji palinyku. Ngarrkamilirrangulu marrngurrangulu yakujunngarra yija yiji jilkulupiyi.”

# MARK-JU

## yarntarna mirli-mirlingi

## nyungu ngalypakata muwarr Ngarrkaja

This gospel has been consultant checked.

<sup>1</sup> Ngalypakata muwarr nyungu, miranu jinarninyurrinyi Jesus-ku. Walja partany Ngarrkamili paliny.

*JOHN MILPANYA WURRANAKU NGARRKALU NGAKALKULINY JESUS*  
(1:2-8)

<sup>2-3</sup> Purlpimalu Ngarrka muwarr pirnalu pirirriku, yini paliny Isaiah. Palinyja wurrarnala Ngarrkalu,

“Nyampali ngakalamarnajanaku marrngurranguku.

Wariny palaji walangkarr ngakalamarnalu pala  
nyampalingi, muwarrjartiny janaku.

Pala walangkarr pirirri wantuliny pirranga.

Paliny muwarr pilkulinyjanaku,

'Nganyjurrumili nyampali milpuliny.

Yarni malayalu jurtu ruwurtu.”

Palajun Ngarrka muwarr pirnalu Isaiah-ku. Palalu Isaiah-lu yarntarna-janaku pala muwarr mirli-mirlingi.

<sup>4-6</sup> Punjaja yiji pala marrngu kuwarri milpanya. Yini paliny John. Wurrupirrayi kamalja kurlkura palinymili. Karnulu kunyji pinapintilu nyikarra kunymarnikinyarninyi. Mayi pirraja nganinyikinyi, wajapipa narnngurla.

Kurrrngal yiji milpanyikinyiyalu pinakarrinyaku John-ku. Warrarnja Judea-japa milpanyikinyiyalu, wirtuja tawunja pukurl, ngapija, Jerusalem-ja.

Wurrarnikinyijanaku, “Nyurralu panpanyikinyinyurrulu Ngarrkanga. Kurntany jarrayi! Kurlujartiny jirnikinyinyurru. Yakalaya! Yakujani jarrayi, Ngarrkakarti milpayi! Palaja Ngarrkalu munu kulilu yirrilkulunyurrinyi, ngarlu ngalypa jarrulunyurruku paliny. Palaja ngapanga jilamarnanyurrinyi.” Palajunmarta wurrarnikinyijanaku John-ju.

John-mili muwarr pinakarrinyajalu warajalupa warajalu wurrarnikinyiyalu Ngarrkanga, “Yijangarra nyuntungu panpanyikinyirnangu. Kurntanya waninyarnaji. Nyuntukarti kulpanyaku karrinyarnangu.” Palajunmarta wurrarnikinyiyalu Ngarrkanga. Palaja John-ju ngapanga jirnianinyi pijungu, ngapingi, Jordan-ja.

<sup>7</sup> John-ju wurrarnikinyijanaku, “Kuwarrimarta wariny marrngu milpuliny. Paliny yija-yiji wirtu nyampali. Munu ngajukapali, ngaju puru yiji, mujuja. Nyungu wariny nyampali wirtu. Ngajulu munu yiji jujika palinymili nyinga manaku.

<sup>8</sup> Ngajulu puru ngapanga jinarninyurrinyi. Nyungu warinyju ngakalkulunyurruku Ngarrka Pirlurr.” Palajunmarta wurrarnikinyijanaku John-ju.

*JOHN-JU NGAPANGA JIRNI JESUS (1:9-11)*

<sup>9</sup> Palaja Jesus milpanyili John-karti tawunja Nazareth-ja, warrarnja Galilee-ja. Palanga John-ju ngapanga jirni Jesus palanga pijungu Jordan-ja.

<sup>10</sup> Jesus ngapaja turlpanyajanga kanka parrjarna. Yirrinajanga parlparr laarr pirni Ngarrkalu. Ngarrka Pirlurr kaninykurnu milpanyala Jesus-karti kurlukukukapali, palinya kajarnala.

<sup>11</sup> Kankajirrija Ngarrkalu muwarr pirnalu Jesus-ku, "Nyuntu partany ngajumili walja yiji. Ngajungu ngarlungu nyuntu. Ngarlu ngalypa jarrynarnangu."

#### *MIRURRULU PARTARL JAKURLIRNIKINYI JESUS PANPANYAKU NGARKANGA (1:12-13)*

<sup>12</sup> Palaja Ngarrkamilalu Pirlurrju ngakarna Jesus pirrakarti, warrarn marrngumajirrikarti yiji.

<sup>13</sup> Palanga waninyikinyi karrpurrangungupa warrukartirrangungu 40-ngi. Palanga waninyajanga yija mirurru lu wirtulu partarl jakurlirnikinya panpanyaku Ngarrkamilaku muwarrku. Munu. Jesus kurlumajirri waninyi ngarramarnti. Kuwiyirrangu kulijarturrangupa pajinakata palanga waninyikinyi. Ngarrkalu ngakarnajaninyi angel-arrangu kankajirrija palinyku tuku kalkunaku.

#### *JOHN JINMURNTU JIRNIYI (1:14)*

<sup>14a</sup> Nyampali wirtu Jew-arranguku, King Herod, kuli jarrynalu John-ku. Wurrarnajanaku soldier-nga, "John warlinakanu jurntingi wirriliyi."

#### *JESUS-JU MIRANU JIRNIKINYIJANINYI NGARRKAKU (1:14-15)*

<sup>14b</sup> Palaja Jesus-ju yakarna pala warrarn, Judea, yalinyjikurnu yana warrarnkartu, Galilee-karti. Palanga kurrgalja wurrarnikinyijanaku Ngarrkamili muwarr.

<sup>15</sup> Karra marnikinyijanaku, "Pinakarrayi! Muwarr ngalypakata Ngarrkaja wurrarnarnanyurru. Nyurralu panpanyikinyurrulu Ngarrkanga, munu pinakarrimanyurrulu. Kurntany jarrayi! Kurlujartiny jirnikinyurru. Yakalaya! Yijalmarta jiliyalu muwarrja palinymilingi ngalypakatanga. Puntaju pikaly jarrulunyurru. Palinymilirrangu jilkulunyurri. Nyungukungarra muwarrku purpija yiji punja mimarnikinyi nganyjurrumilalu purpijalu marlkarrinyjarrilupa kurlumapulu. Nyungukungarra nyurralu pukurl mimarnikinyurru." Palajumarta wurrarnikinyijanaku Jesus-ju.

#### *JESUS-JU KAYI MARNAJANINYI JANPAMALUKU MANANYAKATA PALINY YAJANAKU (1:16-20)*

<sup>16</sup> Ngarti-ngartingi janpanga yananyikinyi Yintanga Galilee-ngi. Janpa wirtujina pala. Janpamaluku mananyakatajirri yirrirnipulinyi, Simon-pa marrka palinymili Andrew. Parru-parrulu janpamalu mananyikinyipulu.

<sup>17</sup> Wurrarnapulaku Jesus-ju, "Yajalaminyinyumpulu. Ngajulu miranu jilamarnanyumpulinyi Ngarrkaku. Palaja jintanga wurralkulunyumpulu-janaku. Yijalmarta jilipiyili Ngarrkanga muwarrja nyumpalamilia, Ngarrkamilirrangu jarrulupiyi. Purpi parru-parrulu kanganyikinyumpulujaninyi janpamalu jungkakarti. Kuwarringulu muwarrju kangkulunyumpulujaninyi marrngu Ngarrkakarti."

<sup>18</sup> Palangangarra parru-parru yakarnapulu palinymilija muwarrja, ya-jarnapulu.

<sup>19</sup> Palaja jampangarra wangka yana Jesus, warinyjirri yirrirnipulinyi, James-pa marrka palinymili John. Pulanymili japatumurniny yini Zebedee. Tingkingi pulany kajarnikinyi japatumurninypa palinymili warrkamukatarrangu. Parru-parru laarr kanganya ja yarni marnikinyiya.

<sup>20</sup> Palangangarra James-pa John kayi marnapulinyi Jesus-ju. Palinymilija muwarrja palangangarra tingkingi japatumurniny yakarnapulu, warrka-mukatarrangupa yakarnapulujaninyi, yajarnapulu Jesus pulanyju.

### *JESUS-JU JURTU NGAKARNA MIRURRU (1:21-28)*

<sup>21</sup> Palaja Jesus-ja yanayi palarrangu palakarti tawunkarti, ngapikarti, Capernaum-karti. Palanga milpanyiyi.

Sabbath jarrinyi. Sabbath-ja munu warrkamu jarrimiyyi marrngurran-gulu Jew-arrangulu. Pala manguny janamili. Sabbath waninyikinyijanaku Ngarrkamilaku muwarrku kurlkarri manaku. Town-arrangungu kunmu jarrinyikinyiyi muwarrprintingi mayanga pinakarrinyaku muwarrku Ngarrkamilakupa muwarr pinaku Ngarrkaku. Palanga Capernaum-ja Sabbath jarrinyijanaku, Jesus janamili muwarrprintingi mayanga kaninykart ngal-panya. Miranu jirnikinyijaninyi Ngarrkaku. Marrngurrangulu pinakar-rinyikinyiyalu.

<sup>22</sup> Ngurnjul-ngurnjul jarrinyiyili palinymilija muwarrja. "Yijarla wariny. Nyungu pirirri muwarr jurtukata yiji. Munu nganyjurrumili miranu jinakatarrangukapali. Jana puru muwarr pinakata warinyarrangumilaku muwarrku. Nyungulu Jesus-ju miranu jinanganyjurrinyi jurtulu muwar-rju. Yijalu wurrarnili palajun muwarr pinaku Ngarrkalu."

<sup>23</sup> Palangangarra ngalpanya muwarrprintingi mayanga pirirri. Mirurrulu ngawu jirnikinyi paliny.

<sup>24</sup> Wirntijartiny paliny, kamarnalu marrjalu, "Jesus Nazareth-ja! Nganiku karrinyannganaku mirurrurranguku? Milpanya wirlalaman-anganinyi markarri jinaku nganarnaku? Miranu ngaju nyuntuku. Ngakan-nanta Ngarrkalu. Nyuntu kurlumajirrikata yija Ngarrkamili."

<sup>25</sup> Jesus-ju warnta marna pala mirurru, "Jama jarra! Pirirri yakala! Jalakarti yarra!"

<sup>26</sup> Mirurrulu jinarn-jinarn pinakata jirni yija pirirri, palaja kamarna marrja, yakarnalu, yana ngaramarnti.

<sup>27</sup> Jesus-ku ngurnjul jarrinyiyalu marrngurrangu wiyyir. Wurrarna-yarningu, "Nganirti nyungu? Warinymarta muwarr. Muwarr jurtukata paliny. Muwarr wurrallili palinyju, nganipa muwarrja palinymilija jirniyili mirurrurrangulu pukun."

<sup>28</sup> Palanga Jesus-mili muwarr yitinykarra wurrarna kawarnikinyi-yarningu ngunarrikurnujirri warrarnja Galilee-ngi.

### *JESUS-JU NGALYPA JIRNIKINYIJANINYI WURRKUJARTINYARRANGU (1:29-34)*

<sup>29</sup> Yakanakanu pala muwarrpinti maya Jesus yana ngurrakarti pulanymilikit, Simon-milipa Andrew-milikarti. Yanapulu pulany pukurl, palajirri warinyirri, James-pa John.

<sup>30</sup> Simon-mili marrukumurniny wurrku waninyikinyi. Mayanga karta karrinyikinyi, parrpakarrajartiny wurrkjartiny. Jampa milpanya Jesus, wurrarniyili pala.

<sup>31</sup> Yanalu, parirr warlirni Jesus-ju, mirtawa wararr karrinyi. Palangangarra wurrkulu yakarna, ngalypa marntiku jarrinyi, mayi kanyajanaku.

<sup>32</sup> Jampa karrpu kaniny ngalpanyaaja, warrurl-warrurl jarrinyaja, Jesus-karti kanganyikinyijaninyi kurrngal, jinta wurrkjartiny, jinta ngawur-rangu mirurruja.

<sup>33</sup> Marrngurrangulu palanga kunmu jarrinyiyi, mayanga jawapirtingi wiyyirr milpanyiyili.

<sup>34</sup> Jesus-ju kurrngal warinypa warinyjartiny wurrkujartiny ngalypa jirnijaninyi, kurrngaljapa jurtu ngakarnajaninyi mirurrurrangu. Miranu waninyiyalu palinyku. Palajalu mirurrurrangu muwarrku kunta jirnijaninyi Jesus-ju.

*JESUS GALILEE-NGI YANANYIKINYI, WURRARNIKINYIJANAKU NGARKA (1:35-39)*

<sup>35</sup> Marntungu, karrpumajirri, Jesus kartaja turlpanya, maya yakarna. Palaja tawun yakarna. Jalakarti tawunja, pirrakarti yana, kujurl. Palanga muwarr pirnalu Ngarrkaku.

<sup>36</sup> Kanyjirnikinyiyalu Jesus-ku Simon-jupa warinyarrangulu.

<sup>37</sup> Yirrinajalu wurrarniyili, "Wiyirru kanyjirnikinyiyang."

<sup>38</sup> Wurrarnajanaku, "Munu kuwarri Capernaum-karti kulpuluminyi. Town-arrangukarti warinyarrangukarti yankuluminyi, wurralamarnajanaku Ngarrka. Palajunku jinaku ngakarnanyi Ngarrkalu."

<sup>39</sup> Galilee-ngi yana-yananyikinyijanaku, muwarrprintingi mayarrangungu kurrngal miranu jirnikinyijaninyi Ngarrkakupa jurtu ngakarnikinyijaninyi mirurrurrangu.

*JESUS-JU PIRIRRI KARNU WURRKUJARTINY NGALYPA JIRNI (1:40-45)*

<sup>40</sup> Warajanga karrpungu pirirri milpanyili Jesus-karti. Wurrkujartiny, kurlu yiji karnu paliny. Mangunja Jew-arrangumilija wiyyirr palajartiny wurrkujartiny jalanga kaja waninyaku, kujurl yija, munu ngurranga ngalpanyaku. Pala marrngu milpanyakanu murtingi jurlpi-jurlpi jarrinyalu, ngarlu japirr marna Jesus, "Wanka jiliminyinkurra, karnu ngaju ngalypa jiliminyin. Wunyjurru nyuntulu karrinyanpa?"

<sup>41</sup> Jesus paju karrinyili. Parirr jirranakanu wurrkujartiny warlirni. "Yuu, karrinyarnangu ngalypa jinaku. Kapuraly yiji jilamarnanta."

<sup>42</sup> Jampangarra pala wurrku munu jarrinyalu, karnu kapuraly jarrinyi pala marrngu.

<sup>43</sup> Minyirru wurrarnala Jesus-ju, "Pinakarra!

<sup>44</sup> Munu wurralamjanaku ngalypa jirnirninti ngajulu. Pipurru yatilkarti yarra. Palinyju yijalu parrjalamananta yitinykarra kawu nyuntu, nyuntu karnu kapuraly. Nyuntu miranu palaku mangunyu nyuntu-milaku wurrkuku. Purlpimalu Ngarrkalu wurrarnalu Moses-ja mirli-mirlingi yarntanaku. Palinyja muwarrja kukurnjari wankanyu yatilkarti kangkuluman. Palalu yatilju kampalkuliny tikirkarti, jurnpakartijakun. Palajalu jintalu marrngurrangulu pala yirrinajalu nyuntuku miranu wantulupiyangu, kapuraly nyuntu, wurrkumajirri. Palaja yarranakanu ngurranga ngalpuluman." Palajun wurrarnili Jesus-ju. Palaja ngakarna yatilkarti.

<sup>45</sup> Pala pirirri munu jama wanima. Panypyanyili Jesus-ja. Marn-telu yirrkulu wurrarnikinyijanaku nyarrakurnujirri, "Jesus-ju ngalypa jirninyi karnu ngaju." Palaja muwarrja Jesus munu tawunarrangukarti yanama, munu ngalpama, kurrngaljamarra marrngungamarra. Warrarnja waninyikinyi jalanga. Yirrku milpanyikinyiyalu marrngurrangu ngunar-rikurnujirrija.

## 2

*WURRKUJA NGALYPA JIRNI JESUS-JU (2:1-12)*

<sup>1</sup> Palaja tawunkarti kulpanya Jesus, Capernaum-karti. Palanga wurrarnikinyiyarningu, "Jesus kulpanya!"

<sup>2</sup> Kurrgal palinymilikarti mayakarti milpanyiyi, palinyku pinakar-rinyaku. Miranu jirnikinyijaninyi palinyju Ngarrkaku. Marrngurrangu kaninykurti palanga mayanga kurrgal yija, jinta kurrgal jalakartingi palakurtirri wararr karrinyikinyiyi, pinakarrinyikinyiyalu.

<sup>3</sup> Palanga milpanyiyi marrngu kujarra-pa kujarra. Pirirri wurrku-jartiny kanganyikinyiyi ngurrinyja, manyurla yija paliny, munu marnti yananya. Kanyayili Jesus-karti ngalypa jinaku.

<sup>4</sup> Partarl ngalpanyiyi mayanga, palanga kurrgal waninyikinyiyi. Wararr karrinyikinyiyi kurrgal yija Jesus-martaji. Palaja kankarni mayanga karntinyiyi. Pirli jirniyi Jesus-martaji kankarni, wurrkujartiny kaninykurnu jirniyi ngurrinyja, Jesus-ja walangkarr.

<sup>5</sup> Karra marnarningu Jesus-ju, "Yijalmarta jirniji yi nyungu wurrku-jartiny ngalypa jilamarna." Palaja ngalypalu wurrarnili wurrkujartinyja, "Nyuntulu purlpi panpanyikinyinpili Ngarrkanga. Puntaju munu wirlala-marnanta ngajulu, munu kulilu yirrilamarnanta, nyuntuku ngalypa wan-tulumarnangu."

<sup>6</sup> Mayanga palanga kajarnikinyiyi Jew-arrangumili miranu jinakatar-rangu kujarra-pa waraja. Ngarlu kurlu jarrinyiyi Jesus-ku muwarrku. Kurlkarri marnikinyiyarninyi,

<sup>7</sup> "Munu palajun muwarr pinaku! Karra marnalu, 'Nyuntulu purlpi panpanyikinyinpili Ngarrkanga. Puntaju munu wirlalamarnanta ngajulu, nyuntuku ngalypa wantulumarnangu.' Palajunngarra karra marna. Kurlu yiji muwarr pirni paliny. Ngarrkajakurl palajun muwarr pinaku. Marrngurrangulu munu jinakayi palajunju. Palalungarra Jesus-ju Ngarrkakapali jinarninyi!"

<sup>8-9</sup> Janaku miranu Jesus, palajun kurlkarri marnikinyiya janalu, palajunmarta paliny yimpirnikinyiyi. Japirr marnajaninyi, "Nganijalu nyurralu yimpirninyinyurru ngaju palajunju? Wurrarnarnala nyungungu pirirringi, 'Nyuntulu purlpi panpanyikinyinpili Ngarrkanga. Puntaju munu wirlalamarnanta ngajulu, ngalypa wantulumarnangu'. Nyurralu wurrarnanyurru palajun munu wurrakanu ngajulu. Wunyjurru muwarr pilamarnalu wurrkujartinyku nyunguku? Yijapa wurralamarnalu, 'Wararr karruluman, ngurriny mankuluman, jinangu yankuluman'. Wayirti? Palinyja palajun wurrakanu ngajulu? Muwarra ja ngajumilia ngalypa jarrulinypa? Wurrkumajirri jarruliny?"

<sup>10</sup> Yuu! Kuwarringarra ngalypa jilamarna nyungu wurrkujartiny. Palajalu wantulunyurru ngajuku miranu, ngajungu yija wurrarnaji Ngarrkalungarra paliny ngalypa jinaku. Wantulunyurru ngajuku miranu, ngajungu yija wurrarnaji Ngarrkalungarra marrnguku kurlujartinyjaku puru yakanaku, janaku ngalypa waninyaku."

Palaja wurrkujartinyja wurrarnala Jesus-ju,

<sup>11</sup> "Wararr karruluman, ngurriny mankuluman, ngurrakarti nyuntumi-likarti yankuluman."

<sup>12</sup> Palangangarra wararr karrinyi pala pirirri, ngurriny mana, jalakarti yana pipurru. Yananya kawanaja wiyyirru parrjarnikinyiyi. Wurrarnikinyiya, "Ngalypa jirni Jesus-ju! Kuwarrijakun! Munu nyungu yirrirniminyi!" Nyurra marnikinyiya Ngarrka, muwarr pirnikinyiyalu, "Yarranijayi! Yija-yiji nyuntu ngalypa!"

**13** Yarranakanu Jesus wirtu ngapamartaji ngarti-ngartingi yananyikinyi, Yintanga Galilee-ngi. Marrngu kurrngal kunmu jarrinyiyili palinyja. Miranu jirnikinyijaninyi Ngarrkaku.

**14-15** Kurrngalju Jew-arrangumili mangunja panpanyakatarrangulu yajarnikinyiyi Jesus. Jananga jinta warnuku miranakatarrangu. Warrkamu jirnikinyiyi Roman Government-ku palarrangulu, warnuku mirrarnikinyijaninyi marrngu Government-milija muwarrja. Ngulyu manyakata jana. Warnuku wirtumartaku mirarnikinyijaninyi, jinta yinganyikinyiyalu nyampali, jinta kalkurnikinyiyarningu.

Karrpurrangu karrpungu Jesus yajarnikinyiyi palarrangukapalilu kurrngalju Jew-arrangumili mangunja panpanyakatarrangulu pukun.

Warajanga karrpungu Yintanga Galilee-ngi Jesus yananyikinyi. Marrngu yirrirni, warnuku miranakata, paliny yini Levi. Nyungu Levi mayanga warrkamupintingi palinymilingi kajarnikinyi. Yirrinajalu Jesus-ju wurrar-nala, "Yajalaminyin ngaju." Palangangarra warrkamu yakarna palinyju, Jesus yajana kawarna.

Palaja Levi-milikarti mayakarti yana Jesus mayiku ngananyaku. Jinta warnuku miranakatarrangu pukurl milpanyiyi, warinyarrangupa Jew-arrangumili mangunja panpanyakatarrangu, mayiku ngananyaku palanga.

**16** Warinyarrangu Jew-arrangumili miranu jinakatarrangu wangka wararr karrinyiyi. Yini marnikinyiyarninyi Pharisee-rrangu. Parrjarniyi Jesus-ju ngananyijanaku palarrangunu Jew-arrangumili mangunja panpanyakatarrangunu. Wurrarniyijanaku Jesus-milingi marrngurran-gungu, "Jesus-ju munu mayi ngananyaku warnuku miranakatarrangun-gupa mangunja panpanyakatarrangunu. Kurlu jirninyi." Palajun muwarr pirnikinyiyi Pharisee-rrangu.

**17** Pinakarrinyijaninyi Jesus-ju. Puntaju karra marnajanaku, "Maparnkarra munu milpuliny wanka jinaku purrpurnkatarranguku, milpuliny wurrkukatarrangukujakun. Palakapali jinarni ngajulu. Munu milpamarna ngalypakatarranguku kayi manaku Ngarrkakarti. Milpanyarna ngaju Ngarrkanga panpanyakatarranguku kayi manaku Ngarrkakarti, muwarrja palinymilija. Palajalu ngananyarnijanaku palarrangunu."

### 3

**PARIRR TIKIRLJARTINY NGALYPA JIRNI JESUS-JU SABBATH-JA.  
NGUKARRIRNAYI JINTALU (3:1-6)**

**1** Palaja yarrana muwarrprintingi mayanga ngalpanya Jesus. Sabbath pala karrpu. Palanga mayanga pirirri parirr kurluny-kurluny, tikirlkata, munu rurrinyaka parirr.

**2** Palanga kajarnayi Pharisee-rrangu pukurl, kujarrapa waraja. Jesus-ku malyparr waninyikinyiyalu. Parrjarn-parrjarnikinyiya. Wurrarnikinyiyarningu, "Kuwarri Sabbath. Yijapa ngalypa jilkuliny wurrkujartiny. Nganyjurrumilia mangunja pala kurlu. Munu wurrkujartiny ngalypa jinaku Sabbath-ja. Palajun jinaja ngukarriliminyi yija." Palajunmarta wurrarnikinyiyarningu palarrangulu Pharisee-rrangulu.

**3** Pala pirirringi wurrarnala Jesus-ju, parirr kurluny-kurlunyjartinyja, "Yakujani, nyungukarti milpuluman."

**4-5** Palaja Pharisee-rrangungu wurrarnajanaku, "Pinakarrayi! Miranu nyurra Sabbath-ku, karrpu nganyjurrumili warrkamumajirriku. Ngarrkamilia muwarrja pala. Yuu, mangunja nganyjurrumilija, wunyjurru jiliminyijanaku marrnguku Sabbath-ja? Ngalypa jiliminyijanaku? Kurlu jiliminyijanaku? Wanka jiliminyijaninyi? Wirlalaminyijaninyi? Wunyjurru? Wurraliyi."

Munu puntaju muwarr pirnamiyalu. Jama waninyikinyiyalu. Pa-juwayikatarrangupa jalypakatarrangu jana.

Palajalu Jesus-ju kulilu yirrirnijaninyi. Paliny paju karrnyijanaku pukun.

Palaja pirirringi parirr kurluny-kurlunyja wurrarnala, "Parirr jirrala." Parirr jirrarna, ngalypa jarrinyi.

**6** Palaja palarrangupha Pharisee-rrangu yunturi jarrnyiyalu Jesus-ku. Yananya kawarnayi kurrnganaku jintanga, ngapindi, Herod-milingirrangupha marrngurrangungu. Kunmu jarrnyiyi, kurrngarnayarningu, "Wunyjurru Jesus marlkarri wirlalaminyi?"

### *KURRNGALJU PINAKARRINYIKINYIYALU JESUS-KU JANPAMARTAJI (3:7-12)*

**7-8** Palaja Jesus-pa palinymili marrngurrangupha janpakarti wirtukarti yanayi, Yintakarti Galilee-karti. Kurrngalju paliny yajarniyi. Milpanyikinyiyi pala wirtuja tawunja, ngapija, Jerusalem-ja, warrarnjirrija Judea-japa Idumea-japa ngunarrija Jordan-ja pijuja, palajirrija tawunjajirripa milpanyikinyiyi, Tyre-japa Jayitunja. Pinakarrnyiyi, "Jesus-ju ngalypa jirnijaninyi wurrkujartinyarrangu." Palaja milpanyikinyiya kurrngal.

**9-10** Ngalypa jirnijaninyi wurrkujartiny kurrngal. Wangka yija milpanyikinyiyi palinyku nytinga manaku. Palaja marrngurrangungupha palinymilingi wurrarnajanaku Jesus-ju, "Ngurrku malanyiyili. Tingki marrajiya. Kajalamarna palanga ngurrku manangamarra."

**11-12** Jintalu Jesus-karti kanganyikinyijaninyi jinta marrngurrangupha, ngawurrangupha jana. Mirurrurrangulu kanganyikinyijaninyi. Jesus jampa yirrinakanu, mirurrurrangulu marrngu parnpirnikinyijaninyi jungkanga Jesus-ja walangkarr, wirntilu kamarnikinyiyi, "Jesus! Ngarrkamili partany nyuntu!" Wurrarnikinyijanaku minyirru mirurrurrangungu, "Jama jarra!" Kurnta jirnikinyijaninyi yini manaku "Ngarrkamili Partany" paliny.

## 4

### *JESUS-MILIJA MUWARRJA JUPANYAPULU WANGALPA NGAPA (4:35-41)*

**35** Jarurrukartingi Jesus-ju wurrarnajanaku palinymilirrangungu, "Yankuluminyi kakarrakurnu ngapanga ngunarrikarti."

**36** Palajalu yakarniyijaninyi marrngu jinta jungkanga, Jesus ngapanga kanyayi tingkingi. Warinyarrangulu pukurl tingkingirrangupha yajarniyijaninyi.

**37-38** Yananyajanga Jesus karta karrnyi nyirrirni, ngurrinyja, pilawunga, karta karrnyi yija.

Palaja partijirri wangal wirtu yija jarrnyi, ngapa pintura jarrnyi, ngalpanyikinyi tingkingi, winya jarrnyikinyijanaku ngapa. Wirnti yiji jarrnyiyi marrngurrangupha Jesus-mili. Mintu jirniya. Wurrarniyili, "Miranu jinakatakayi! Yija kunulinynganyjurriyi ngapalu. Jampangarra marlkarri jarruluminyi. Wanka jilanganinyi! Nganijalu kakurnannganinyi?"

<sup>39</sup> Jesus kupalyaja wararr turlpanya, wurrarnapulaku, "Wangalkayi, jupa! Janpakayi, kaniny jarra!" Palinymilija muwarrja wangal jupanya palangangarra, ngapa kaniny jarrinyi palajun, wuta jarrinyi.

<sup>40</sup> Jesus-ju japiirr marnajaninyi marrngurrangu palinymili, "Nganija wirnti jarrinyikinyinyurru? Nganijalu munu yijalmarta jirnimijinyurru?"

<sup>41</sup> Ngurnjurnikinyiyalu yija. Wurrarnayarningu, "Pinakarrinyipulalu wangaljupa ngapalu! Palinymilija muwarrja jupanya kawarna wangalpa kaniny jarrinyi yija ngapa. Yija nyampali paliny ngapakupa wangalku! Nganikapali nyungu Jesus? Nganurtu paliny?" Ngurnjurnikinyiya palajun. Palaja wirnti jarrinyiyalu.

## 5

### *NGAWUKATAJA MIRURRURANGU KURRNGAL JURTU NGAKARNA-JANINYI JESUS-JU (5:1-20)*

<sup>1-2</sup> Yananya kawarnikinyiyi tingkingi, ngunarrikarti ngapanga jarrinyiyi.

Warrarn pala yini Geraza. Warnkumarramarra pala, jurntijartiny kurrn-galjartiny. Geraza-jalu ngurraralu wirrirnikinyijaninyi marlkarrirrangku kaninykurti jurntingirrangu.

Milpanyakanu tingkija katukarna Jesus. Palinykartii milpanyili pirirri, ngawukata, mirurrulu kanganyikinyi paliny.

<sup>3-4</sup> Kurta yananyikinyi, ngurra marnikinyi kaninykurti jurntingirrangu, marlkarrirrangumartaji. Kulikata yiji jirnikinyi mirurrulu. Purlpi jayinju parirrpa jina partarl kunymarnikinyiya marrngurrangulu. Marrjapanu nganimarta jirnikinyi mirurrulu, jayin ngartarnikinyi palalu pirirrilu.

<sup>5</sup> Yana-yananyikinyi jurntingipa warnkurrangungu karrpungupa warrukartingi. Ngawujartinyju kamarn-kamarnikinyipa warnkulu wirrkarnikinyarninyi.

<sup>6</sup> Nyarralu pirirripirrayilu jampa yirrirni Jesus kajamartaja, mirti jarinyalu purrpi, murtingi jurlpi-jurlpi jarrinyili walangkarr.

<sup>7-8</sup> Jesus-ju wurrarnili mirurrungu, "Pirirri yakala! Jalakarti yarra!" Pirirrilu marjalu kamarnalu, "Yakalanyi, Jesus! Ngaju nyuntuku miranu. Nyuntumili japatu kankajirri waninyi, yija nyampali paliny kankakupa ngunarrikurnujirriku. Nyuntu palinymili partany walja! Nganiku karrinyan, wirlalkuluminin? Ngarlu japiirr marnarninti, munu ngakalaminyin wikakarti wirtukarti kampanyaku!" Palajun muwarrpirnili mirurrulu Jesus-ku.

<sup>9</sup> Jesus-ju japiirr marna pirirri, "Nganurtu yini nyuntumili?" Wurrarnili, "Yini ngaju 'Marlu'. Mirurrurrangu kurrngal nganarna."

<sup>10</sup> Ngarlu japiirr marnikinyiya, "Munu ngakalamangananyi nyunguja warrarnja."

<sup>11</sup> Palanga mawurlungu ngurr-ngurrarrangu waninyikinyiyi, kurrngal, 2,000, warruly ngananyikinyiyi.

<sup>12</sup> Jesus ngarlu japiirr marnikinyiyi mirurrurrangulu, "Ngurrngurrkartirrangu ngakalamangananyi. Wunyjurru? Ngalpulupiyirnijanaku?"

<sup>13</sup> Karra marnajanaku, "Yuu, yankulunyurru ngurr-ngurrkartii." Palangangarra pirirri pala yakarnayi, ngurr-ngurrkartii wiyyirr yanayi, ngalpaniyijanaku mirurrurrangu. Palajangarra warnkuja kaninykurnu mirti jarrinyiyi ngurr-ngurr wiyyirr, janpanga ngalpaniyiyi pipurru, marlkari jarrinyiyi ngapanga.

<sup>14</sup> Marrngurrangu ngurr-ngurrku kalkunakatarrangu jinta pirnayarninyi, wirnti mirti jarrinyiyi. Kurrngalja wurrarniyijanaku tawunjapa warrarnja. Palaja kurrgal yirrinaku milpanyiyi.

<sup>15</sup> Jesus-karti milpanyajalu yirrirniyi nyarra pirirri ngawukatapa palanga waninyikinyi, Jesus-martaji kajarnikinyi, wurrujartiny, mirurrurangumajirri, ngawumajirri, ngalypa waninyikinyi. Yirrinakanu wirnti jarrinyiyi.

<sup>16</sup> Jinta palamanga wararr karrinyikinyiyipa. Purlpi yirrirnayijaninyi ngurr-ngurr ngapanga ngalpanyaja. Wurrarniyijanaku jampa milpanyajanga, "Nyungulu Jesus-ju mirurrurrangu ngakarnajaninyi pirirrija ngurrngurrkartirrangu. Palaja mirti jarrinyiyi warnkuja kaninykurnu, yintanga ngalpanyiyi, ngurr-ngurr wiyyirr ngapalu kunanyajaninyi, marlkarri ngaramarnti."

<sup>17</sup> Palaja ngurrararrangulu wurrarniyili Jesus-ja, "Yankuluman. Nganarnamili warrarn yakalamannganaka."

<sup>18</sup> Palaja tingkingi karntinyi Jesus. Pirirrilu wanka jarrinyajalu Jesus japiirr marna, "Milpurnu nyuntungu?"

<sup>19</sup> Puntaju karra marnalu, "Munu. Nyuntumilirrangukarti kulpulumanjanaku. Wurralamajanaku Ngarrka paju karrinyingu, ngalypa jinangu yija."

<sup>20</sup> Palaja Jesus karakurnu kulpanya ngunarrikarti yintanga.

Palinymilija muwarrja pala pirirri kulpanyakana yana-yananyikinyi palanga warrarnja, kakarra, ngapangi, 10 Town-arrangungu. Wiyyirra yana palarrangungu. Wurrarnikinyijanaku, "Ngarrkalu ngalypa yiji jirnija. Jesus-ju jurtu ngakarnajaninyi mirurru ngajuja. Wanka jirninyi." Wiyyirr palanga wurlka jarrinyiyi, ngurnjurnikinyiyalu Jesus-ku.

### *PUNJAJA WURKUJARTINYJA MIRTAWA NGALYPA JIRNI JESUS-JU, PALAJA PARTANY MIRTAWA MARLKARRIJA WANKA JIRNI (5:21-43)*

<sup>21</sup> Ngarti-ngartingi yintanga Jesus-ja kunmu jarrinyiya kurrgal.

<sup>22</sup> Milpanya pirirri, yini Jairus. Palinymilingi tawunja muwarrpintiku mayaku nyampali paliny. Jampa yirrirni Jesus murtingi jurlpi-jurlpi jarrinyili walangkarr.

<sup>23</sup> Ngarlu japiirr marna, "Partany mirtawa ngajumili wurrku yija, marlkarri jarrai. Milpuluman ngurrakarti ngajumilikarti, warlilaman parirrju. Palaja munu marlkarri jarruliny, wanka wantuliny yija."

<sup>24</sup> Jesus palinyja yana, kurrgalju yajarnikinyiyipulinyi. Ngurrku-ngeurrku marnikinyiyarninyi marrngurrangulu.

<sup>25</sup> Nyungulu mirtawalu pukurl yajarna. Wurrku kalkurnikinyi palalu mirtawalu punja, 12 partunurrangu. Pijirri yirrku warrkirnikinyili yija, parra-parra wirtu.

<sup>26</sup> Warinypa warinykartu maparnkarrarrangukarti yananyikinyi. Munu wanka jirnimiyi. Wurrku wirtu jarrinyikinyili. Palaja warnkumajirri yija, yirrku wurrku waninyikinyi.

<sup>27-28</sup> Palinyju pinakarrinyi, "Jesus-ju ngalypa jirnijaninyi wurrkjartiny." Pinakarrinyakanu wurrarnarningu, "Nyinga malamarna wurrujakun palinymili. Nyinga manakanu ngalypa jarrulumarna yija, wurrkjumajirri wantulumarna."

Palajun jirni. Partijirri kaniny wangka milpanyili, nyirrirnilu warlirnalu wurrku.

<sup>29</sup> Palangangarra pijirri paliny warrkinaja jupanya, miranu ngalypa jarrinyi pala mirtawa, pikaly jarrinyi.

<sup>30</sup> Palangangarra palaku miranu jarrinyi Jesus. Karra marnarningu, "Warajalu nyina marnanyi, pala purrpurn jarrinyi." Wararr karrinyi, warinykurnu jarrinyi. Japirr marnajaninyi, "Nganurtulu wurru ngajumili nyina marnaja?"

<sup>31</sup> Karra marnayalu palinymilirrangulu, "Nganijalu palajun muwarr pirnin? Kurrngalju ngurrku marnikinyiyinti. Wunyjurrurti japiirr marnan, 'Nganurtulu nyina marnanyi.'?"

<sup>32</sup> Panypa-panypanyikinyijanaku, yirrkulu parrjarnikinyi.

<sup>33</sup> Pala mirtawa miranu waninyarningu, purrpurn yija, wurrkumajirri. Jannganka pirnikinyi karrartajartiny, milpanya Jesuskarti. Murtingi jurlpi-jurlpi jarrinyili walangkarr palinya jinanga, wurrarnili yija muwarr jurtu.

<sup>34</sup> Ngalypalu wurrarnala Jesus-ju, "Yijalmarta jirnijin ngalypaku. Palajunjalu kuwarri ngalypa waninyan. Yankuluman wirntimajirri, ngalypa wantuluman. Nyungujajakun. Munu yarranakanu pala wurrku mankuluman."

<sup>35</sup> Mirtawanga muwarr pinajanga, jinta milpanyiyi nyarraja Jairus-miliya mayaja. Jairus-ja wurrarniyili, "Partany mirtawa nyuntumili marlkarri. Pala miranu jinakata yakala. Munu yirrnginaku."

<sup>36</sup> Jesus-ju pinakarrinyijaninyi muwarrja. Jairus-ja wurrarnili, "Wirntiwayi, munu ngarlu kurlu jarruluman. Yirrkulu yijalmarta jilipijin."

<sup>37</sup> Kurrngalju yajarnikinyiyipulinyi Jairus-pa Jesus. Wurrarnajanaku Jesus-ju, "Wantayi." Palaja Jesus-ju manajaninyi palinymilija kujarrapa warajajakun, Peter-pa James-pa marrka James-mili, John. Jana yanayi Jesus-pa Jairus pukun ngurrakarti Jairus-milikarti.

<sup>38</sup> Yanayi mayanga milyanga, wararr karrinyiyi. Palanga mayanga yirrirniyijaninyi kurrrgal. Ngangkurlji pirnikinyiyarninyi partanyku mirtawaku.

<sup>39</sup> Ngalpanyakanu Jesus-ju wurrarnajanaku, "Munu ngangkurl jilkulunyurru. Pala partany mirtawa kupalya jarrinyijakun. Munu marlkarri paliny."

<sup>40</sup> Nyurni marnayi. Munu yijalmarta jirnimiyili muwarraja palinymilingi. Palaja palinyju wurrarnajanaku, "Jalakarti yarrayi."

Palaja palarrangungujakun wurrarnajanaku, pipi japatungu partanymilingipa Peter-ngapa James-nipa John-ja, "Yankuluminyalu partanykarti." Palakarti kutukarti partanykarti yanayalu.

<sup>41</sup> Parirr warlirni Jesus-ju, wurrarnili, "Partanykayi, wararr karra!"

<sup>42</sup> Palangangarra Jesus-miliya muwarrja pirlurr palinymili kulpanyalu. Partany wararr karrinyi, marnti yana jinalu, jurrkarna kujarrapa warajamarta. (Kurrimarta paliny, partunurrangu 12-jartiny.) Yirrinajalu wurlka jarrinyiyi, wurrarnikinyiyarningu, "Yuu, purlpilu nyungukapali munu yirrirniminyi. Marlkarrija wanka jirni."

<sup>43</sup> Minyirrju wurrarnapulaku, pipi japatungu pala partanymilingi, "Munu wurralkulunyumpulujanaku wankanyu jirnirni nyungu partany ngajulu." Palaja wurrarnapulaku, "Partany mayi yungkulunyumpulu."

## 6

### PALINYMILIRRANGU 12 NGAKARNAJANINYI JESUS-JU WARINYARRANGUKARTI TAWUNARRANGUKARTI (6:6b-13)

<sup>1</sup> Palaja Jesus yana warrarnkartu palinymilikarti, palinymilirrangulu marrngurrangulu yajarniyi.

**6-11** Jesus yananyikinyi tawunarrangukarti, miranu jirnikinyijaninyi Ngarrkamilaku muwarrku. Palaja palinymilirrangku kayi marnajaninyi, wurrarnajanaku, "Marrngurrangukarti Ngakalamarnanyurrinyi, Ngarrka wurralkulunyurrujanaku. Nyungu muwarr wurrarnarninyurruku ngajulu. Kuwarrija jurtu ngakaliyijaninyi mirururrangku marrnguranguja, nyurralu. Yankulunyurru, munu warnkupa mayi kangkulunyurru. Wirrulkulunyurrarlungu jujika, warajajakun wurru kangkulunyurru, jinta wurrukarra yakalkulunyurru. Yijapa warinyjarrangku tawunja marrngulu wurralkulunyurru, 'Kurtaliyi, jampa nganarnanga wantulunyurru.' Palinymilingi ngurranga palangangarra wantulunyurru palanga tawunja. Yijapa warinyjarrangku tawunja milpulunyurru, panypalapiyinyurraku, munu janalu japiirr malapiyinyurrinyi janamilingi tawunja waninyaku, munu pinakarrulupiyi Ngarrkamili muwarr. Palajunja, munu wantulunyurru palanga tawunja. Kurlurlu jujikaja purany pilkulunyurru. Palajun jinajalu jurti jilkulunyurrujaninyi Ngarrka kuli jarrulinyjanaku, panpanyaja palinymilingi muwarrja. Palaja yakalkulunyurru pala tawun.

**12** Yuu, jipi. Kujarrapa kujarra, palajun yankulunyurru."

Palaja yanayi. Yananyikinyiyi wurrarnikinyijanaku marrngurangu, "Panpanyikinyinyurrulu Ngarrkanga. Yakalaya kurlujartiny jirnikinyinyurrupa, Ngarrkanga yijalmarta jiliyili!"

**13** Kurrngal mirurru jurtu ngakarnikinyijaninyi, kurrngalja wurrkjartinyja wirrirniyijanaku mirrijin, japiirr marnikinyiyi Ngarrka, "Ngalypa jilaman nyungu marrngu." Palaja wurrkjartiny ngalypa jarrinyi. Ngalypa jirnijaninyi Ngarrkalu.

### *JESUS-JU MAYI JIRNIJANAKU 5,000-KU (6:30-44)*

**30** Yarti Jesus-milirrangku ngakanajarrangku kulpanyiyi palinykartu. Wurrarniyili marrngu ngalypa jirnikinyijaninyi, mirurru jurtu ngakarnikinyijaninyi, marrngu miranu jirnikinyijaninyi Ngarrkaku, palajun, Jesus-milia muwarrja.

**31** Palanga Jesus-karti milpanyikinyiyi marrngurrangku kurrngal yiji. Ngurrku marnikinyiyi ngunarrijirrilu, munu-munu jirnikinyijaninyi ngananyaku Jesus-jupa palinymilirrangulu. Palaja Jesus-ju wurrarnajanaku palinymilirrangungu, "Yankuluminyi nganyjurrujakun marrngu-majirrikarti warrarnkartu. Jampalu mimalaminyarningu."

**32** Tingkingi karntinyiyi, marrngumajirrikarti yanayi.

**33** Kurrngalju parrjarnikinyijaninyi, janaku miranu, miranupa wanyjarnikartku yananyi Jesus. Mirti wirliku jarrinyiyi milyanga yintanga ngunarrikarti jinangu, kaninypirti mimarnikinyiyalu.

**34** Jesus-ju katukanajalu yirrirnijaninyi kurrngal mimarnikinyiyalu kaninypirti. Parrjanakanu ngarlu kurlu jarrinyajanaku. Wurrarnarningu palinyju, "Marrngu nyungurrangku kurluny-kurlunyja waninyayi yija, nyampalimajirri. Jana paparlja waninyayi, ngapikapali, kukurnjarirrangku tuku jinakatamajirri." Punjalu miranu jirnikinyijaninyi Ngarrkaku.

**35** Ruka-ruka jarrinyi. Yirrkulu pinakarrinyikinyiyalu muwarrjaku. Palinymilirrangulu wurrarniyili, "Ruka-ruka jarrinyi. Town-arrangku kaja.

**36** Marrngurrangku nyungurrangku ngakalamajaninyi tawunarrangukarti, mayi mankulupiyarninga."

**37** Puntaju Jesus-ju karra marnajanaku, "Yuwayijaninyi mayi nyurralu." Palinymilirrangulu karra marnayalu, "Mayi munu yinganyakayirnijaninyi nganarnalu! Kurrngalku palamarrangku martumpirri mananyaku warnkulu wirtulujakun. Puru warnku wupartujartinyjakun nganyjurru."

<sup>38</sup> Puntaju muwarr pirnijanaku, "Wunjurrumal martumpirri kalkurnanyurru? Parrjaliyi." Yirrinakanu wurrarniyili, "Parirr warajakarti martumpirripa wupartujirri janpamalujirri."

<sup>39</sup> Wurrarnajanaku, "Marrngurrangungu wurraliyijanaku kajanaku." Wurrarniyijanaku warrulymarramarranga kajanaku kunmurrangupa kunmurrangu.

<sup>40</sup> Kajarniyi palinymilija muwarrja, nyungungu 50-rrangu kunmu waninyikinyiyi, palanga 100-arrangu kunmu waninyikinyiyi. Jinta wiyyirr waninyikinyiyi palajun, kunmurrangungu ngunarrijirri waninyikinyiyi.

<sup>41</sup> Jesus-ju manajanaku martumpirri, kankakurnu parrjarna, Ngarkanga wurrarnili, "Nyuntulungarra mayi nyungu yinyanganinyi. Yarranijayi! Wanka jinannganinyi! Nyuntu ngalypakata!"

Palajun wurranakanu, martumpirrangu ngartarna kutapa kuta, yinyajaninyi palinymilirrang, wurrajanaku, "Nyungurrang yungkulunyurrujaninyi." Palajunmarta jirni janpamalujirri pukurl.

<sup>42-44</sup> Nganayi kurrngalju. Piririmartalu 5,000-ju nganayi pala mayi. Wiyyirru marlkaku nganayi. Palaja palinymilirrangulu mujurrangu manayijaninyi, pitirrangungu wirrirniyi, winya jirniyijaninyi 12 pitirrangu wirturrangu.

### *JESUS NGAPANGA KANKARNI JINANGU MARNTI YANA (6:45-52)*

<sup>45</sup> Palaja Jesus-ju wurrajanaku palinymilirrangungu, "Tingkingi karn-tulunyurru, yankulunyurru ngunarrikarti, ngapikarti, Bethsaida-karti. Yarti milpulumarnanyurruku." Tingkingi yanayi walangkarr. Palaja Jesus-ju jinta wiyyirr ngakarnajaninyi ngurrakarti janamilikarti.

<sup>46</sup> Palaja Jesus karntinyi warnkungu kanka, Ngarrkaku muwarr pinaku.

<sup>47</sup> Warrukarti jarrinyi. Kujurl waninyikinyi palanga. Palinymilirrang tingkingi partijirri kaniny ngapanga, kurlungu waninyikinyiyi. Wangal wirtu purrpanyikinyijanaku.

<sup>48</sup> Yirrkulu tingki yananyaku partarl jirnikinyiyi, partarl mungkajartinyju marntiku jirnikinyiyi wangaljamarrwa wirtungumarra.

Jesus-ju kajamartangulu yirrirnijaninyi. Karrpumajirringi milpanyananaku. Jinangu kankarni ngapanga yananyikinyi. Wangka jarrinya kawarnikinyijanaku.

<sup>49</sup> Palinymilirrangulu yirrirniyi paliny, ngapanga kankarni nyirrirnilu yajarnikinyijaninyi. Kakurnikinyiyi, wurrarnikinyiyi mirurrukapali milpanykinyi. Wirnti karrinyikinyiyalu, kamarnayi yija karrartajartiny.

<sup>50</sup> Jesus-ju wurrajanaku, "Wirntiwayi. Ngajurla milpanyarni. Kinti jarrayi, ngalypa wantayi."

<sup>51</sup> Jananga tingkingi karntinyijanaku. Palajangarra wangal jupanya. Palinymilirrang ngurnjul jarrinyiyalu. Wurrarnikinyiyarningu, "Yuu, parrjaliyi! Ngapanga kankarni yananyikinyi jinangu. Jampa milpanya paliny, palangangarra wangal jupanya."

<sup>52</sup> Munu kurlkapirli jarrimiyyi. Purlpi yirrirniyi Jesus-ju mayi yinyajaninyi 5,000 piririmartanga, wupartu janpamalupa martumpirri. Munu mirlkanga kalkurnumiyyi. Yirrku wurrarnikinyiyarningu, "Pururla pala marrngu nganyjurrukapali."

### *WURRKUJARTINYARRANGU NGALYPA JIRNIKINYIJANINYI JESUS-JU GENEZARETH-JA (6:53-56)*

<sup>53</sup> Palaja milpanykinyi palanga warrarnja, Genezareth-ja. Ngarti-ngartingi yintanga tingki kunymarnayi mirrilyilu.

<sup>54</sup> Jesus katukarna tingkija, palarrangulu ngurrararrangulu yirrirniyi, palangangarra palinyku miranu jarrinyiyalu.

<sup>55</sup> Mirti jarrinyiyi ngunarrijirringi palanga warrarnja, wurrarnikinyiyijanaku, "Jesus milpanya!" Palaja palinykartu wurrkujartiny kanganyikinyiyijaninyi ngurrinya.

<sup>56</sup> Palajunngarra jirnikinyiyi tawunjarrangu tawunjarrangu ngurrarrangu ngurranga. Wurrkujartiny kanganyikinyiyijaninyi palinykartu.

Town-jarrangu partijirri kaniny parlkarranga jintalu mayipa nganinanganin warnuku yinganyikinyiyi. Palanga parlkarranga wurrkujartiny wirrirnikinyiyijaninyi ngurrinya jungkanga, Jesus-ja wurrarnikinyiyili, "Wurrkujartinyarrangu nyungurrangu karrinyaaya wurruku nyina manaku nyuntumilaku. Wurrupa warlilipiyangu, ngalypa jarrulupiyi." Yija warlinajarrangu ngalypa jarrinyiyi wiyyirr.

## 7

### *MIRTAWAKU WARINYJAKU WARRARNJAKU NGALYPA JINALU JESUS-JU (7:24-30)*

<sup>24</sup> Palaja Jesus-ju yakarna palinymili warrarn. Yalinyjikurnu yana, warinykartu ngajarrimilikarti warrarnkartu, yinikarti Syro-Phoenicia-karti yana. Wangka waninyikinyi tawunmartaji, yini pala Tyre. Mayanga kaninykurti ngalpanya kujurlmarta waninyaku. Karra marnarningu, "Munumpa ngajuku ngurrararrangu. Kakuluminyiyi." Munu. Partarl karrkarnajanaku.

<sup>25-26</sup> Jampa pinakarrinyi Jesus mirtawalu ngurraralu. Wariny paliny mirtawa, munu Jew, Syro-Phoenicia-ja warrarnja. Partany mirtawajartiny pala mirtawa. Mirurrulu jakurlirnikinya palinymili partany. Pala mirtawalu ngurranga palinymilingi partany yakarna, milpanya Jesus-karti, murtingi juripi-juripi jarrinyili walangkarr, ngarlu japirr marnikinya, "Wupartuja partanyja ngajumilia mirurru jurtu ngakalamampili."

<sup>27</sup> Jesus-ju puntaju ngalypalu karra marnalu, "Partanykarrangulukurra mayi ngalkulupiyi marlkaku, palaja mayi yungkulunyurrujaninyi wupartupani yukurru. Munu miranaku mayi partanykarranguja yinganya parnpinaku wupartupani yukurrurrangukarti." Palalu muwarrju wurrarnili Jesus-ju, "Marrngurrangu Jew-arrangukurra ngalypa jilamarna-janinyi ngajulu, munu kuwarri ngalypa jilamarnajaninyi marrngurrangu warinyarranguja warrarnarranguja. Yartiku."

<sup>28</sup> Mirtawalu puntaju karra marnalu, "Yuu, nyampalikayi! Yijarla pala muwarr. Partanykarrangulu mayi ngalkulupiyi, palaja wupartupanilu yukurrulu ngalkulupiyi. Yija partanykarrangulu ngananyayi mayi, wupartupanilu yukurrulu pungkanyaaja partanykarranguja parirrja muju-muju ngananyayi."

<sup>29</sup> Jesus-ju karra marnalu, "Ngalypa muwarr pirnin! Palaku muwarrku partany nyuntumi ngalypa jilamarna. Yankuluman. Purlpi mirurrulu yakarnanga partany."

<sup>30</sup> Palinyja muwarrja yana pala mirtawa, ngurrakarti yana, partany yirrirni. Ngurrinya kupalya jarrinyi ngalypa. Mirurru purlpi yanalu palinyja.

### *PIRIRRI KURLKA TARLKARRA MANA, JESUS-JU JIRNI (7:31-37)*

<sup>31</sup> Palaja Jesus yarranakanu yalinyjikurnu yana, ngapikarti, Jayitunkarti. Kakarrakurnu, kurilakurnu, warrarnkartu 10 Town-arrangukarti yana, palaja kulpanya Yintakarti Galilee-karti.

<sup>32</sup> Pirirri kurlka ngawu kanyayili, jalin manyurla paliny, partarl-partarl muwarr pirnikinyi. Jesus-ja wurrarniyili, "Parirrju warlilaman palama pirirri, ngalypa jinaku."

<sup>33</sup> Jesus-ju jalakarti kanya yirrinangamarra. Parirrjirri wirrirnili pirirringi kurlkangajirri. Palaja janga pirnarningu parirrja, pirirringi jalinja wirrirni.

<sup>34</sup> Palaja kanka parrjarna Jesus-ju, nganyjurnu wirtu yija. Palaja pirirringi wurrarnili, "Kurlkajirri tarlkarra malapulu."

<sup>35</sup> Palinymilia muwarrja palangangarra kurlkajirri pirirri tarlkarra marnapulu, jalin pukurl ngalypa jarrinyi. Palaja muwarr pirni ngalypa pala pirirri.

<sup>36</sup> Jesus-ju ngurraranga wurrarnajanaku, "Munu warinyjarrangu wurralkulunyurrujanaku ngajulu ngalypa jirnirni kurlkapa jalin pala pirirri." Jesus-milingi muwarrja panypanyiyili. Yirrkulu wurrarnikinyiyijanaku wiyirrja marrngurrangungu, Jesus-ju palajun jirni palaku pirirriku.

<sup>37</sup> Wiyirrju pinakarrinyiyi, yija wurlka jarrinyikinyiyalu, ngurnjulngurnjul jarrinyiyalu. Muwarr pirnikinyijanaku marrngurranguku, "Yijalu yinku jirnikinyi Jesus-ju. Jinta muwarrmajirrija muwarrkata jarrinyiyi, jinta kurlka ngawuja pinakarrinyakata jarrinyiyi. Palarrangu pukun ngalypa jirnikinyijaninyi. Munu ngurnjul palinyku."

## 8

### *JESUS-JU MAYI JIRNIJANAKU 4,000-KU (8:1-10)*

<sup>1</sup> Warajanga karrpungu yarrana kunmu jarrinyiyi kurrngal pirranga. Pinakarrinyikinyiyalu Jesus-ku. Palaja mayi munu jarrinyijanaku. Jesus-ju kayi marnajaninyi palinymilirrangku, wurrarnajanaku,

<sup>2</sup> "Marrngurrangu nyungurrangu punja waninyikinyiji ngajungu, karppurrangungu kujarrapa warajanga. Kuwarri mayi munu jarrinyijanaku. Ngarlu paju karrinyarnijanaku.

<sup>3</sup> Munu janparr ngakalamarnajaninyi ngajulu warrarnkartirrangu janamilikarti. Yananyakanu janparrjartiny pungkulupiyi. Kajamartaja milpanyiyi jana."

<sup>4</sup> Palinymilirrangulu karra marnayalu, "Nyungu marrngumajirri warrarn. Nganurtulu nyungungu kanyinakanu mayi mankulinyjanaku palaranguku wiyirrku? Kurrngal yija-yiji jana."

<sup>5</sup> Jesus-ju japiirr marnajaninyi, "Wunyjurrumal martumpirri kalkurnanyurru?" Puntaju karra marnayalu, "7 wuparturrangu martumpirri."

<sup>6-7</sup> Kujarrapa warajamarta wupartupani janpamalu pukun kalkurnayi. Jesus-ju wurrarnajanaku, "Wurraliyijanaku jungkanga kajalapiyi." Palaja martumpirrirrangku mana, janpamalupirrayi pukun, Ngarrkanga wurrarnala, "Nyuntulungarra nyungu mayi yinyanganinyi. Yarranijayi! Wanka jinannganinyi! Nyuntu ngalypakata!" Palaja ngartarna martumpirrirrangku kutapa kuta, yinyajanaku palinymilirrangungu, janpamalu pukun yinyajanaku, wurrarnajanaku, "Nyungurrangu mayipa kuwiyi yungkulunyurrujaninyi." Palajun jirniyi.

<sup>8-9</sup> Palanga kurrngalju yija nganayi, 4,000-ju marlkaku nganayi piririmartalu. Palaja Jesus-ju wurrarnajanaku, "Yuu, jipi yankulunyurru nyurramili warrarnkartirrangu." Palaja Jesus-milirrangulu muju manayi, 7 wirtu pitirrangungu mujurrangu winya jirniyijaninyi.

<sup>10</sup> Palaja Jesus tingkingi karntinyi, palinymilirrangku pukun, yanayi palakarti warrarnkarti, ngapikarti, Talamanajakarti.

***PIRIRRI PAMPURU NGALYPA JIRNI JESUS-JU (8:22-26)***

<sup>22</sup> Jesus palakarti tawunkarti yana, ngapikarti, Bethsaida-karti. Pirirri wirningi kanyayili jintalu, pampuru yiji paliny, munu yirrernaka. Ngarlu japirr marnayi Jesus, "Nyinga malaman paliny, ngalypa jinaku."

<sup>23</sup> Jesus-ju parirrja kanya pampuru jalakarti tawunja. Janga pirnarningu parirrja, warlirni janga, pirirringi paningi wirrirni, japirr marna, "Yirrinan?"

<sup>24</sup> Pirirrilu parrjarn-parrjarna, wurrarnili, "Marrngurrangu rangkarr yirrernarnjaninyi. Mungkarrangukapali jana wurrarnarnjaninyi. Panilu mitu marnanyi. Munu mungkarrangu waninyakayi. Marnti yana yananyikinyiyi."

<sup>25</sup> Yarrana Jesus-ju parirrjirri wirrirnipulinyi pirirringi paningi. Pirirrilu tukulu parrjarnikinyi, ngalypalu yirrirni.

<sup>26</sup> Jesus-ju ngakarna ngurakarti palinymilikarti. Wurrarnili, "Munu palakarti tawunkarti yankuluman, munu wurralamajanaku palajun jirnirningu."

## 9

***KUJARRAPA WARAJALU YIRRINIYI JESUS PIRRPARNA YIJA. MUJUNGUNGULU MUWARR PIRNIJANAKU NGARRKALU (9:2-10)***

<sup>2</sup> Kujarrapa waraja karrpurranguja Jesus-ju manajaninyi Peter-pa James-pa John, kanyajaninyi warnkukarti wirtukarti. Karntinyiyi pala warnkungu kankajirri. Janajakun yanayi, palarrangu. Palanga janalu kujarrapa warajalu yirrirnikinyiyi Jesus pirrparnikinyi.

<sup>3</sup> Wurru palinymili mirta-mirta jarrinyi, pirrpa jarrinalu. Yijalu marrngulu munu mirta-mirta yiji jinaka palakapali.

<sup>4</sup> Palaja palarrangulu kujarrapa warajalu pirirrilu yirrirniyipulinyi yatiljirri, Ngarrkamili muwarr pinakatajirri purlpijajirri pulany, yini wariny Yilayija, wariny Moses. Palajirripa Jesus kurrgarnikinyiyi.

<sup>5</sup> Peter-lu purrpilu muwarr pirnalu Jesus-ku, "Miranu jinakatakayi, nganarna nyungungungarra waninyayirni. Pala ngalypa. Pamarr yarni malapiyirninyurraku, wariny nyuntuku, wariny Moses-ku, wariny Yilayi-jaku."

<sup>6</sup> Palinypa James-pa John wirnti waninyikinyiyi, munumpa waninyikinyiyi yinkuku muwarrku.

<sup>7</sup> Palanga mujungu milpanya yamarnajaninyi. Ngarrkalu mujungungulu wurrarnajanaku, "Nyungu Jesus ngajumili partany walja, ngarlungu ngajungu paliny. Pinakarrayalu palinyku."

<sup>8</sup> Janyinju parrjarn-parrjarniyi, munu yirrirnimiyipulinyi yatiljirri purlpijajirri. Jesus-jakun yirrirniyi.

<sup>9</sup> Katukana kawarnikinyiyi, Jesus-ju minyirru wurrarnajanaku, "Jipi yirrirninyinyurru, ngaju pirrpanga waninyikinyirni, yirrirninyurrupulinyi Moses-pa Elijah, wurrarnanyurraku Ngarrkalu mujungungulu. Munu wurralkulunyurrujujanaku jintanga. Yarti, marlkarri jarrinyakanu, ngaju wanka turlpulumarna. Palaja wurralkulunyurrujujanaku."

<sup>10</sup> Palinyja muwarra munu muwarr pirnimiyijanaku jintaku. Palar-rangulujakun kukujarrilu kurrgarnikinyiyarningu. "Nganijalu wurrarnanganyjurruku pala muwarr, 'Marlkarri jarrinyakanu, ngaju wanka turlpulumarna'?" Ngunjurnikinyiya.

***PARTANY MIRURRULU KANGANYAJA NGALYPA JIRNI JESUS-JU (9:14-29)***

<sup>14</sup> Kulpanyakanu milpanyiyijanaku jintakarti Jesus-milirrangukarti. Yirriyijaninyi kurrngalja partijirri kaniny. Palanga Jew-arrangumilalu miranu jinakatalu kujarrapa warajalu jalypa pирникинијанинији Jesus-milirrang.

<sup>15</sup> Kurrngalju yirrinakanu wangka yirrirniyi Jesus, wurlka jarrinyiyi, palinykartu purrpi mirti jarrinyiyalu. "Yarranijayi! Milpanyan!"

<sup>16</sup> Jesus-ju japiirr marnajaninyi palinymilirrang, "Nganijalu jalypa pirninyurrujaninyi?"

<sup>17</sup> Warajalu pirirrilu karra marnalu, "Miranu jinakatakayi, ngajumili partany kalkurnu mirurrulu, munu muwarr pirnaka.

<sup>18</sup> Mirurrulu warlirni, jungkanga parnpirni. Jawaja janga purlpurlpukarra marnala, rirra pajirnarninyi, kawu kararr yija jarrinyi. Palajalu kanyarnangu nyuntuku, ngalypa jilaman nyuntulu. Nyuntumilirrang japiirr marnarnajaninyi mirurru jurtu ngakanaku palinyja. Munu. Partarl jurtu ngakarniyi."

<sup>19</sup> Palaja Jesus-ju wurrarnajanaku palinymilirrangungu, "Nyurralu yija munu yijalmarta jirnimanyurrulu Ngarrkanga. Wunyjurrurti? Yirrku mitu yakanakatarrangu nyurra! Wunyjurrumal wantulumarnanyurraku? Punjalu miranu jilkulumarnanyurrinyi? Palaja yijalmarta jilkulunyurrulu Ngarrkanga? Ngajukarti partany kangkulupijinyurru."

<sup>20</sup> Kanyayili. Jampa Jesus yirrinajalu mirurrulu warlirni pala partany, jinarn-jinarn pinakata jirni. Palanga jungkanga pungkanya partany, warli-warli kanganyikinyi warinykurnu warinykurnu, janga jawaja wrirkirnikinyili.

<sup>21</sup> Jesus-ju japiirr marna japaturniny partanymili, "Nyanga palajun jarrinyi? Karra marnalu, "Partanya.

<sup>22</sup> Marlumal mirurrulu parnpirnikinyi wikangapa ngapanga, marlkari jinaku yakurr marnikinyi. Paju karrulumananganaku. Yijapa ngalypa jilaman."

<sup>23</sup> Jesus-ju puntaju karra marnalu, "Yuu, palinyku ngalypa jinaku miranu ngaju. Nganijalu palalu muwarrju karra marnajin, 'Yijapa ngalypa jilaman'? Ngarrkanga yijalmarta jilamanpalu nyuntulu. Palaja japiirr malaman nganikupa Ngarrka, palakungarra miranu yiji paliny, wunyjurru jinaku. Munu ngurnjul Ngarrkaku."

<sup>24</sup> Palangangarra japaturninyu kamarnalu marrjalu, "Yijalmarta jirnirnili Ngarrkanga. Miranu jiliminyinpa yinkuku yijalmarta jinaku!"

<sup>25</sup> Jesus-ju yirrirnijaninyi kurrngal kunmu jarrinyikinyiyi. Palajalu wurrarnili minyirru mirurrungu, "Nyuntu mirurru kurlukata, nyungu partany kurlka ngawu jirnin, muwarrku jama jirnin. Yakala. Jalakarti yarra. Munu yarrana paliny kangkuluman."

<sup>26</sup> Mirurrulu kamarna, partany jinarn-jinarn pinakata jirnikinyi, kurlu yiji. Palaja yakarna, yana ngaramarnti. Pala partany kutukapali. Kurrngalju wurrarnikinyiya, "Marlkari yija paliny."

<sup>27</sup> Parirrja Jesus-ju kanka marna. Palaja wararr karrinyi partany. Ngalypa paliny.

<sup>28</sup> Jesus mayanga ngalpanyaja palinymilirrangulu japiirr marnayi, "Nganijalu pala mirurru munu jurtu ngakarnamiyirni nganarnalu? Partarl ngakarniyirni."

<sup>29</sup> Jesus-ju puntaju karra marnajanaku, "Ngarrkaku muwarr pinajalu-jakun jurtu ngakalkulunyurru mirurru palakapalingarra."

*JESUS-JU WURRARNAJANAKU JINTALU PALINY MARLKARRI JILIPIYI  
(9:30-32)*

<sup>30-31</sup> Jesus-jupa palinymilirrangulu yakarniyi pala, warrarnja Galilee-  
ngi yananyikinyiyi. Paliny karrynijanaku ngurrararrangu kakunaku  
palinyku. Palinyju palinymilirranguku miranu jinaku karrynijinya  
palinyku, jntalu marlkarrri wirlalapiyi. Muwarr pirnikinyijanaku, “Ngaj-  
juku miranu nyurra, marrngurrangukarti ngakarninyijanaku Ngarrkalu.  
Jntalu wurrarnikinyiyi ngaju munu ngakarnaminyi Ngarrkalu. Marlkarri  
wirlanaku karrynijiya. Yijalu warliliminyiyi, warinyarrangukarti marrn-  
gurrangukarti kangkuluminyiyi. Palarrangulu warinyarrangulu marlkarrri  
yiji wirlalaminyiyi. Palaja, warrukartija kujarraja, yija yarranakanu  
wanka jarrulumarna.” Palajun palinymilirrangungu wurrarnajanaku  
Jesus-ju.

<sup>32</sup> Palakupa muwarrku munumpa yija waninyikinyiyalu palinymilir-  
rangu. Malyparr japirr manaku karrynijinyiyalu puntajuku, kurntany  
jarrynijinyiyi.

*WUNYJURRU WIRTUKU JARRINYAKU (9:33-37)*

<sup>33</sup> Yanayi pala tawunkarti, Capernaum-karti. Mayanga ngalpanyaja  
palinymilirrangu jipirr marnajaninyi Jesus-ju, “Milpanya kawarnikinyinyi  
nganijalu jalypa pirnikinyinyurrarninyi?”

<sup>34</sup> Jama waninyikinyiyalu. Munu puntaju muwarr pirnimiyalu.  
Yananyakinyiyi jalypa pirnikinyiyarninyi, palajunju wurrarnayarningu,  
“Nganurtu nganyjurrungu nyampali wantulinynganyjurruku?”

<sup>35</sup> Kajanakanu Jesus, palinykartu kayi marnajaninyi. Wurrarnajanaku,  
“Yijapa nyampaliku karryyanpa, wupartu jilamanparninyi nyuntulu,  
nyirrirni jilamanparninyi, ngalypa jilkulumanjanaku wiyyirru.”

<sup>36</sup> Palaja partany kayi marna, wirni manakanu walangkarr jananga  
wararr jirni. Yampu manakanu wurrarnajanaku,

<sup>37</sup> “Yijapa ngalypa jilamanpalu nyungukapaliku partanyku, ngajuku  
pikaly jinaku. Palangarra ngalypa jirninpalu partanyku, ngajuku pukun  
palangarra nyarra ngalypa jirnjin. Ngarrkalu ngakarnanyi ngaju. Palajalu  
ngalypa jilipijinpa ngajuku, pikaly jiliminyin, pikaly jilaman Ngarrka  
pukun.”

*MARRNGURRANGUA JURTU NGAKARNIKINYIJANINYI MIRURRU  
WARINYJU (9:38-41)*

<sup>38</sup> John-ju wurrarnili Jesus-ja, “Miranu jinakatakayi, pirirri yirrirniyirni,  
nyuntungu yiningi mirurru jurtu ngakarnikinyijaninyi marrngurrangua.  
Marrngu pala munu nganyjurramiliwayi. Palaja wurrarniyirnili munu  
palajun jinaku.”

<sup>39</sup> Jesus-ju puntaju karra marnalu, “Munu kunta jilinyurrulu. Yija palar-  
rangulu ngalypa wirtu jinajalu yinilu ngajumilalu, marntungu warinyja  
munu kurlu jintanga wurralkulupiyijanaku ngaju.

<sup>40</sup> Munu yukuny pinakatarrangu nganyjurruku, purntu manakatarrangu  
jana.

<sup>41</sup> Yija nyungu muwarr wurrarnarninyurruku, warinyarrangulu nyur-  
raku miranu jarrynajalu, ngajumili nyurra, palajalupa wupartu ngalypa  
jilkulupiyinyurruku, yijalu puntaju ngalypa jilkulinyjanaku Ngarrkalu.”

# 10

## *PARTANYKARRANGU KANGANYIKINYIYIJANINYI JESUSKARTI (10:13-16)*

<sup>13</sup> Pipilurrangupa japaturrangulu kanganyikinyiyijaninyi janamilir-rangu partanykarrangu Jesus-karti, japiirr marnikinyiyi, "Miranu jinakatakayi, japiirr malaman Ngarrka ngalypa jinaku nganarnamilaku partanykarranguku." Jesus-milalu marrngurrangulu warnta marnayijaninyi pipipa japatru.

<sup>14</sup> Yirrinakanu ngarlu kurlu jarrinyi Jesus, wurrarnajanaku, "Karrinyarni partanykarranguku ngajukarti milpanyaku. Munu ngampa pinaku nyurralu. Pikalyju Ngarrkanga yijalmarta jirniyalu, pinakarrinyiyalu muwarrja palinymilingi janalu.

<sup>15</sup> Yija nyungu muwarr wurrarnarninyurruku, nyurralu wiyyirru jilku-lunyurru janalukapali, yijalmarta jilkulunyurru Ngarrkanga janalukapali. Munu palajunjalu, munu Ngarrkamili jarrulunyurru."

<sup>16</sup> Palaja warajapa waraja partanykarrangu palarrangu kartingi jirni, yampu marna, partanya jurnturtungu kankarni parirr wirrirni, japiirr marna Ngarrka, "Partanyku nyunguku ngalypa jilamanpalu." Palajunju Ngarrka japiirr marnikinyijanaku.

## *PIRIRRI WURRUKARRAJARTINY WIRTUJARTINY YIJA (10:17-31)*

<sup>17</sup> Palaja jampa yananyikinyi Jesus, palinykartu mirti jarrinyi pirirri, murtingi jurlpi-jurlpi jarrinyili walangkarr, wurrarnala, "Miranu jinakatakayi, ngalypakata nyuntu. Marlkarri jarrinyaja, karrinyarni Ngarrkanga wankanyu waninyaku ngarammarnti. Wunyjurru jilamarna ngajulu?"

<sup>18</sup> Jesus-ju puntaju japiirr marna, "Nganijalu palajun muwarrju wurrarnanyin, 'Ngalypakata'? Warajajakun ngalypa, Ngarrkangarra.

<sup>19</sup> Palinymilaku muwarrku miranu nyuntu. Wurrarnanganyjurruku, 'Munu marrngu marlkari wirlanaku. Mirtawa nyuntumilijakun kalkuluman, munu warinymili mirtawa kanganyaku. Munu warinymili wurrukarra mananyaku. Munu mitulu wariny marrngu ngukarrinaku. Munu wariny marrngu murra yinganyaku. Nyuntumili pipipa japatruku pinakarrulumanpulaku.'"

<sup>20</sup> Puntaju karra marnalu, "Miranu jinakata, muwarrja Ngarrkamilingi pinakarrinyikinyirnili partanyjalu ngajulu."

<sup>21</sup> Jesus-ju parrjanakanu, ngarlungu palinyja kaniny yija-yiji nyungu pirirri. Wurrarnala, "Nyungu wariny pukun jilaman nyuntulu. Jalalu jilaman nyuntumili wurrukarrarrangu wiyyirr. Palaja wiyyirr warnku yungkulumanjaninyi pujunungupa janparrkatarrangungu. Palaja ya-jalaminyin ngajungu. Nyuntulu palajun jinaja, Ngarrkanga yija ngaly-panga wantulumanpili ngarammarnti kankajirri."

<sup>22</sup> Pala pirirri wurrukarrajartinya warnkjartiny, palarrangujartiny yija wirtujartiny paliny. Palarranguku munu yakanaku karrima. Palajalu Jesus-milaku muwarrku malyparr karrinya. Paju karrinyarningu, milya kaniny jarrinyi pala pirirri, puru yana.

<sup>23</sup> Jesus-ju palinymilirrangungu wurrarnajanaku, "Ngajumilirrangukayi, pinakarraya muwarrku. Wurrukarra wirturrangujartiny partarl-partarl Ngarrkamilaku jarrinyaku. Ngurnipali kujarrapa warajajakun palinymili jarrulupiyi."

<sup>24</sup> Palinyja muwarrja palinymilirranguparr-parr kurtarniyi. Yarrana Jesus-ju wurrarnajanaku, "Ngajumilirrangukayi, partarl-partarl yija Ngarrkamili jarrinyaku.

<sup>25</sup> Miranu nyurra pirliku ngapingi, needle-ja milyanga. Wupartu pala. Wunyjurru? Pala pirlingi ngalpuliny kaniny kamal? Munu yiji. Munu yakurr-yakurr malkulinypa. Ngurnjul yija. Palajunmarta wurukarrajartiny wirtu kurrgaljartiny partarl-partarl yakurr malkulupiyi Ngarrkamili jarrinyaku. Janakungarra ngurnjul yija-yiji. Yijapa kujarrapa warajajakun wurrukarrajartiny wirtujartiny Ngarrkamili jarrulupiyi."

<sup>26</sup> Palaja muwarrja palinymilirrangupngurnjurnikinyi ngarramarnti. Wurrarnikinyiyarninyi, "Palajalu nganurturti yija Ngarrkanga wankanyu wantuliny ngarramarnti?"

<sup>27</sup> Jesus-ju minyirru karra marnajanaku puntaju, "Yijalu marrngulu Ngarrkamilirrangungu munu wirrirkunakarningu. Ngarrkalujakun wirrirkuliny marrngu palinyja kankajirri wankanyu ngarramarnti. Yuu. Nganirti yija jinaku karrinyi Ngarrka, palajun jilkuliny palinyju. Munu ngurnjulwayi Ngarrkaku."

<sup>28</sup> Palanga Peter-lu wurrarnili, "Pinakarrakurra, ngurrangarrangupa wurrukarra wiyyakarnayirnijaninyi nyuntuku yajanaku nganarnalu."

<sup>29</sup> Jesus-ju puntaju, "Yija nyungu muwarr wurrarnarninyurruku, nganutulupa ngajuku yajanaku karrinyajalu Ngarrkamilaku muwarrku yimpinaku, yijapa maya yakalapiyijaninyi, mamajipa kangkjipaparrkappa pipipa japatupa partanykarrangupa warrarn mayijartiny yakalapiyi. Yijapa palajun jilipiyyi ngajuku pikaly jinaku.

<sup>30</sup> Wiyyirru palajun jinaja Ngarrkalu kuwarri yungkulinyjaninyi kurrgal mayarrangupa mamajipa kangkjipaparrkappa pipipa partanykarrangupa warrarnarrangu. Nyungu pukun wurrarnarnanyurruku. Jintalu yirrkulu wirlalapiyijaninyi, nyurni malapiyijaninyi, jurntingi wirrilipiyijaninyi. Palajun jilipiyyijaninyi. Yuu. Marlkarri jarrinyaja jana, yijalu Ngarrkalu wankanyu jilkulinyjaninyi, Ngarrkanga wantulupiyi ngarrakuny.

<sup>31</sup> Yija jinta wirtukapali waninyayi kuwarri, yarti, marlkari jarrinyaja, wupartu jilkulinyjaninyi Ngarrkalu. Jinta wupartu waninyayi kuwarri, yarti, marlkari jarrinyaja, wirtu jilkulinyjaninyi Ngarrkalu."

### ***YARRANA JESUS-JU WURRARNJANAKU JINTALU PALINY MARLKARRI JILIPIYYI (10:32-34)***

<sup>32</sup> Jerusalem-karti yananyikinyi. Jesus walangkarr yananyikinyi. Palinymilirrangupngurnjurnikinyiyapa ngarlu kurlu jarrinyiyi. Kurrgaljupukun nyirrirnilu yajarnikinyiyi, wirnti karrinyikinyiyi. Yarranakanu Jesus-ju kujurl kanyajaninyi jalakarti palinymilirrangupmuwarr pirni-janaku wunyjurru paliny jilkulupiyi jintalu Jerusalem-ja.

<sup>33</sup> "Pinakarrayi. Jerusalem-karti yananyanyi. Miranu nyurra, Jewarrangumilalu mangunkatarrangulu wirlanaku karrinyayi ngajuku. Palanga warinyju yungkuluminijanaku ngaju palarrangungu. Kunmu jarrulupiyi yimpinaku ngajuku. Muwarr jilipiyyi. Palaja karra malapijiiyi, 'Marlkari jinaku.' Palaja ngaju yungkuluminijanaku nyampalirranguku ngajarriku, Roman Government-ja.

<sup>34</sup> Palarrangulu ngajarrirrangulu yija nyurni malaminyiyi ngaju, ngajungu janga pilipiyyi, wirlalaminyiyi wily pinapintilu, palaja marlkari wirlalaminyiyi. Palaja, ngurraja kujarraja, wankanyu turlpulumarna."

<sup>35</sup> James-pa John, Zebedee-milijirri partanyjirri, milpanyapulu, Jesus-ja wurrarnapululu, "Miranu jinakatakayi, jilangalayiku waraja?"

<sup>36</sup> "Ngani jilamarnanyumpuluku?"

<sup>37</sup> "Karrpungu warinya Ngarrkalu wirrilamanta nyampali wirtu yija nyuntu. Nyuntujakun wirtu nyampali wantulumanjanaku wiyyirku ngunarrijirriku marrnguku. Palajun jarrinyaja nyampalijirri jilaman-ngalayinyi? Ngalaya nyuntungu wangka kajanaku karrinalayingu, marr-janyukartingipa jampukartingi."

<sup>38</sup> Puntaju marnapulaku, "Palaku japiirr manajaku munu kurlkapirli jarrinyakanyumpulu. Marrjalu yija ngaju wirlalaminyiyi. Wunyjurru ngajukapali jarrinyaku karrinyanyumpulu? Nyumpala pukun marrjalu wirlaliyinyumpulinyili. Ngani wirntimajirri nyumpala palangamarra?

<sup>39</sup> Puntaju marnapulalu, "Wirntimajirri waninalayi." Jesus-ju wurrarnapulaku, "Yuu, marrjalu yija wirlalapiyinyumpulinyi. Kurlungu yija wirrilipiyinyumpulinyi.

<sup>40</sup> Munu nyampalijirri jilamarnanyumpulinyi ngajulu. Munu mankulumarnapulinyi nyampali jarrinyaku, wangka ngajumartaji kajalkuliny-pulu. Ngarrkalujakun pulany mankuliny-pulinyi, palinyju."

<sup>41</sup> Jintalu palinymilirrangulu pinakarrinyajalu kuli jarrinyiyipuluku James-kupa John-ku.

<sup>42</sup> Kayi marnajaninyi Jesus-ju, wurrarnajanaku, "Pinakarrayi! Ngajarrirranguku jintangaku warrarnjarranguku miranu nyurra. Janamilalu nyampalirrangulu kurlungu kalkurnayijaninyi, maaja-maaja jarrinyayijanaku marrngurranguku janamilaku.

<sup>43</sup> Nyurraru yija munu palajunmarta jinakanyurru. Nyurranga yijapa waraja nyampali jarrinyaku karruliny, palinyju warrkamu jilkulinyjanaku marrngurranguku jintaku.

<sup>44</sup> Nyurranga yijapa wariny wirtu waninyaku karruliny, palinyju wupartu mujujakapali jilkuliny-parninyi.

<sup>45</sup> Palajun waninyarni ngaju. Ngarrkalu marrngurrangukarti ngakarninyi ngaju. Munu wirtu nyampali jarrinyaku ngaju milpanyarna. Munu palajun jilamarna ngajulu. Ngaju milpanyarna marrngurrangukarti ngalypa jinaku janaku. Marlkarri jarrulumarnajanaku wankanyu jinaku janaku. Ngajulu marlkarri jarrinyajalu wankanyu jilamarnajaninyi kurrrgal marrngurrangu ngunarrijirri. Palajalu kurrrgal Ngarrkanga kajalapiyi, wankanyu wantulupiyi ngaramarnti."

### *PAMPURU NGALYPA JIRNI JESUS-JU (10:46-52)*

<sup>46</sup> Jesus-pa palinymilirrangupa jinta kurrrgal palanga tawunja milpanyiyi, ngapingi, Jericho-nga. Palanga wapirripirri yanayi. Palanga ngunarrikarti wangka yanayili pirirringi, yini paliny Bartimaeus, partany paliny Timaeus-mili. Pampuru paliny, munu yirrernaka. Ruwurtumartaji kajarnikinyi, warnkukupa mayiku japiirr marnikinyijaninyi marrngurrangu milyanga kanka jukurti pirnikinyiyi pipurru palinyja.

<sup>47</sup> Palanga marrngurrangulu wurrarnayarningu, "Palama pirirri yananyi pipurru Jesus, Nazareth-ja." Pampurulu pinakarrinyajalu kamarnikinyi, "Jesus-kayi, King David-mili pujamukayi, paju karrulupijinkurra."

<sup>48</sup> Jintalu warnta marnikinyiyi, wurrarnikinyiyalu, "Jama jarra!" Munu. Marrja kamarnikinyi yija, "Jesus-kayi. Paju karrulupijinkurra."

<sup>49</sup> Jesus wararr karrinyi, karra marna, "Paliny kayi malayi." Palinyja muwarrja pala pampuru kayi marnayi. "Ngarlu ngalypa jarra. Kayi marnanta."

<sup>50</sup> Palangangarra ngurriny ngurntingi kalkunaja parnpina wirrirni, janyin wararr karrinyi, Jesus-karti milpanyili.

<sup>51</sup> Jesus-ju japirr marna, "Ngani jilamarnanga nyuntuku?" "Miranu jinakata, ngaju panijirri ngalypa jiliminyin."

<sup>52</sup> "Yuu, jipi yankuluman. Yijalmarta jirnijin nyuntulu. Palajalu ngalypa jinarnanta." Palangangarra panijirri ngalypa jarrinyipulu. Palajangarra yajarnikinyi Jesus palalu pirirrilu ruwurtungu.

## 11

### *TANGKI JARLI PIRNI JESUS-JU JERUSALEM-KARTI (11:1-11)*

<sup>1</sup> Jerusalem-karti wangka jarrinyiyi, warnkungu wirtungu karntinyiyi, yini Mount of Olives. Warnkungu nyarranga kujarra tawunjirri, yini wariny Bethphage, wariny yini Bethany. Palanga Jesus-ju kujarra ngakar-napulinyi palinymilrranguja walangkarr yananyaku.

<sup>2</sup> Karra marnapulaku, "Palakarti tawunkarti walangkarr yankulun-yumpulu. Jampa milpanyakanu, tangki yirrulkulunyumpulu, yangupala, kunyamanaja palanga. Munu jarntu jirnimiyi pala. Ruwupu yinji pilipulu mungkaja, tangki yakujani kangkulunyumpulu.

<sup>3</sup> Yijapa warinyju japirr malkulunyumpulinyi, 'Nganijalu pala jirninyumpulu?', karra malkulunyumpulalu, 'Nyampalingarra nyunguku karrinyi. Palaja ngakalkuliny tangki nyungukarti.' Palajun wurrarnapulaku Jesus-ju.

<sup>4</sup> Palaja yanapulu, tawunja yangupala tangki yirrirnipulu, mayamartaji, kunyamanaja jawapirtingi. Ruwupu mungkaja yinji pirnipulu.

<sup>5</sup> Jintalu wararr karrinyajalu japirr marnayipulinyi, "Nganijalu pala ruwupu yinji pirninyumpulu?"

<sup>6</sup> Puntaju karra marnapulu muwarrjalu Jesus-milijalu. Palaja yakarnayipulinyi.

<sup>7</sup> Jesus-karti kanyapulu. Kujarrapa warajalu ngurrinyarrangu janamili tangkingi wirrirniyi. Karntinyili Jesus.

<sup>8</sup> Kurrrgalju janamili ngurrinyarrangu wirrirniyi walpurrikata ruwurtungu walangkarr palinyku. Jintalu parrkarrangu wirrkarnayi ruwurtumartijingi, wirrirniyijaninyi parrka pukurl ruwurtungu. Karrinyayi janalu wirtu nyampali jinaku Jesus-ku, pala nyampali yini marnayi King. Palajalu palajun jirniyalu.

<sup>9-10</sup> Jesus-ju jarlingi pirnikinyi tangki, jinta jinangu yananyikinyiyi nyirrirnipa walangkarr palinymartaji. Kamarnikinyiyi, "Ngarrka ngalypa yiji! Palinya purlipija muwarrja nyungu pirirri ngakarnanganyjurruku, king jarrinyaku nganyjurruku. Nyungu pirirri wantulinynganyjurruku king ngalypakata, palakapali purlipija nyampalikapali, King David-kapali. Kalkulkulinynganyjurriyi ngalypa ngarramarnti. Ngarrka ngalypakata yija!" Palajunmarta wurrarnikinyiyi marrjalu.

<sup>11</sup> Jerusalem-ja kaninykartu ngalpanya Jesus. Palanga punja waninyikinyi maya wirtujina yija, purlipija yarni marnayi, muwarr pinaku Ngarrkaku palanga. Pala maya yini marnikinyiyi Temple. Palakarti Temple-karti Ngarrkamilikarti yana Jesus. Ngalpanyakanu, tukulu parrjarn-parrjarnikinyi. Purli kara ngalpanya karrpu. Palaja Jerusalem-ja jalakarti yanayi Jesus-pa palinymilrrangu piririmarta, kulpanyiyi tawunkarti wupartukarti, Bethany-karti.

*MUNGKAKU MAYIMAJIRRIKU JESUS-JU MUWARR PINALU MINYIRRJU  
(11:12-14)*

<sup>12</sup> Marntungu Bethany-ja Jesus Jerusalem-karti yananyikinyi, janparr karrinyi.

<sup>13</sup> Kaja yirrirni mungka, ngapi, olive mungka, mayikata pala. Parrka marlukata. Jesus palakarti yana, mayiku kanyjin-kanyjinaku. Jampa wangka milpanya, munu, mayimajirri, parrkajakun.

<sup>14</sup> Muwarr pirnalu palaku mungkaku, "Kuwarringulu mayimajirri wantuluman ngarramarnti. Nyuntuja munu yarrana ngalkulupiyi." Palajun wurranaja, pinakarrinyiyi palinymilirrangulu marrngurrangulu.

#### *MARRNGURRANGUPA KUWIYIRRANGU NGARRKAMILIJA TEMPLE-JA KANINYKARTIJA YIRTL MARNAJANINYI JESUS-JU JALAKARTI (11:15-19)*

<sup>15</sup> Jerusalem-ja milpanyiyi, Ngarrkamili Temple-karti yanayi. Temple-ja kaninykartingi waninyikinyiyi kurrgal. Palanga jinta kukurnjarijartiny, jinta kurlukukujartiny. Jintalu warnkujartinyu mananyikinyiyijaninyi palarrangu kuwiyi, marlkarri jinakupa yinganyaku Ngarrkaku. Janamili warnku munu yinganyakayi palarranguku kukurnjarikupa kurlukukuku. Warinyjakun warnkujakun, Temple-mili warnkujakun, palajakun yinganyaku. Jintalu kanganyikinyiyijanaku warnku janamili, puntaju yinganyakinyiyijanaku Temple warnku. Mitulu wirtu warnku kanganyikinyiyijanaku, yinganyakinyiyijanaku wupartumarta Temple warnku.

Ngalpanyajalu Jesus-ju parnpirni tayipularrangu janamili ngarlu kanka, kurlukukukarramili kajanapintirrangu pukun parnpirni. Jalakarti yirtil marnajaninyi warnkuku yinganyakatarrangupa warnkuku mananyakatarrangu.

<sup>16</sup> Jinta Temple-ja yananyikinyiyi wapirripirri, wurrukarra kanganyikinyiyi. Jesus-ju kunta jirnajaninyi.

<sup>17</sup> Wiyirra wurrarnajanaku, "Mirli-mirlingi Ngarrkamilingi purlpija warinyju yarntarna nyungu muwarr: 'Ngarrkamili Maya wiyyirru ngunarriyirriku marrnguku. Nyungungu Ngarrkaku muwarr pilipiyalu.' Munu yiji! Kunta jirnikinyinyurrujaninyi yija. Nyurrealungarra Ngarrkamili Maya ngulyukatamilirrangulu jirninyurru."

<sup>18</sup> Palarrangulu Jew-arrangumilalu mangunkatarrangulu pinakar-rinyikinyiyalu palinymilaku muwarrku. Wirnti waninyikinyiyalu palinyjamarra. Kukujarrilu wurrarnikinyiyarninyi, "Wunyurrulu Jesus marlkarri wirlalaminyi?" Jinta wiyyirr marrngurrangulu karrinyikinyiyalu Jesus-ku. Palinyjalu miranu jinajalu pikaly jirnikinyijaninyi yija.

<sup>19</sup> Jarurrukarti jarrynaya Jesus-jupa palinymilirrangulu Jerusalem yakarnayi.

#### *NYARRA MUNGKA MAYIMAJIRRI TIKIRL JARRINYI (11:20-25)*

<sup>20</sup> Marntungu yarlipala yananyikinyiyi ruwurtungu Jerusalem-karti, nyarra mitukata mungka yirrirniyi, tikirl. Marlkarri ngarramarnti pala.

<sup>21</sup> Peter-lu kurlkarri marna pala muwarr Jesus-mili. Wurrarnili, "Miranu jinakatakayi, parrjala! Pala mungka mayimajirri, warinymaljanga muwarr pirninpalu minyirrju, kuwarri marlkarri yija."

<sup>22</sup> Jesus-ju puntaju wurrarnajanaku, "Yijalmarta jilkulunyurrulu Ngar-kanga.

<sup>23</sup> Yija nyungu muwarr wurrarnarninyurru, yijapa nyuntulu wurralamapili palanga warnkungu wirtungu rurrinyaku, 'Parlpilarninyi kujungurrungu!' Nyuntumilia muwarrja yijalmarta jinaja, munu mitu yakanaja, palajunngarra jarrulumangu.

<sup>24</sup> Nyungu muwarr pirnarninyurraku, jampa muwarr pirnangkuluman-palu Ngarrkaku, nganikupa japirr malaman, palaku Ngarrkanga yijal-marta jilalu. Palaja palangarra jilamanga.

<sup>25</sup> Jampa muwarr pirnangkulumanpalu Ngarrkaku, kurlka jarruluman, 'Nganurtulu kurlu jirnija ngajuku?' Palaja nyuntulu kurlkarri man-ajalu munu kulilu yirrilamanpalu, puru yakalamana paliny. Puntaju nyuntumilalu Japartulu Kankajirringulu munu kulilu yirrilamanta, puru yakalamanta nyuntu kurlu jinaja."

***MANGUNYKATARRANGULU JAPIRR MARNAYI JESUS, "NGANURTULU NYAMPALI JIRNINTI?" (11:27-33)***

<sup>27</sup> Yarranakanu Jerusalem-ja milpanyiyi. Jesus ngalpanya kaninykurti Ngarrkamilingi Temple-ja. Milpanyiyalu palarrangu Jew-arrangumilaku mangunykatarrangu wiyirr.

<sup>28</sup> Minyirru japirr marnayi, "Palarrangu marrngurrangu warinymal-janga Temple-ja yirtil marnajaninyi jalakarti, nganurtulu wurrarnangu palajun jinaku? Nganurtulu nyampali jirninti nyuntu?"

<sup>29</sup> Jesus-ju puntaju karra marnajanaku, "Ngajulukurra jipirr mala-marnanyurrinyi muwarr. Yinku muwarr yungkuluminyinyurru. Palaja wurralamarnanyurruku nganurtulu wurrarniji palajun jinaku.

<sup>30</sup> Wurratalapijinyurru, pala piriti, John, wurrarnikinyijanaku kurlu yakalapiyi, ngapangapa jirnikinyijaninyi. Nganurtulu palajun jinaku wurrarnili John-ja? Wurrarnili Ngarrkalu? Wurrarnili warinyu marrngulu? Nyurralu wurratalapijinyurru muwarr."

<sup>31</sup> Kukujarrilu wurrarnikinyiyarningu. "Wunyjurru muwarr pilaminyi? Yijapa muwarr pilinyili yakujun, 'Wurrarnili Ngarrkalu'. Puntaju palinyu karra malkulinyganyjurruku, 'Palajalu nganijalu palinyu munu yijal-marta jinamanyurrulu?'

<sup>32</sup> Muwarr wariny wurralanayili. Muwarr pilinyili, 'Wurrarnili puru marrngulu'. Munu! Munurla palajun muwarr pirnakanyi!" Palajun kukujarrilu wurrarnikinyiyarningu. Jana waninyikinyiyi wirnti yiji marrngurrangungamarra. Marrngurrangulu wiyyirru kurlkarri marnikinyiyi yija-yiji John ngakarnajanaku Ngarrkalu, miranu jinaku Ngarrkamilaku muwarrku.

<sup>33</sup> Palajalu mangunykatarrangulu wirntilu karra marnayalu, "Munumpa nganarna palaku."

Jesus-ju puntaju wurrarnajanaku, "Munu yinku muwarr yingamijinyurru. Puntaju munu wurralamarnanyurruku nganurtulu wurrarniji jalakarti ngakanaku palarrangu marrngurrangu."

## 12

***PUJUNULU KAMPURTALU MIRTAWALU YINYALU WARNKU NGARKAKU (12:41-44)***

<sup>41</sup> Warajanga karrpungu Jesus palanga mayanga wirtungu kajarnikinyi, mayanga Ngarrkamilingi, Temple-ja. Wirtu pakupi warnkupinti palanga waninyikinyi. Marrngurrangulu kanganyikinyiyalu warnku Ngarrkaku, wirrirnikinyiyi palanga pakujingi. Jesus wangka palanga warnkupinti pakujimartaji kajarnikinyi. Warnku wirrirnikinyiyi, palinyu parr-jarnikinyijaninyi. Jintalu warnkujartinyu kurrngaljartinyu warnku wirtumarta wirrirniyi.

<sup>42</sup> Palaja mirtawa kampurta pujunu milpanya. Palinymili piriti purlpi marlkarri jarrinyi. Kujarra wupartujirri warnkujirri wirrirnalu

Ngarrkaku. Kujupurru pala. Palajirri yinganya ja warnkumajirri pala mirtawa.

<sup>43-44</sup> Jesus-ju wurrarnajanaku palinymilirrangungu, "Yirrirninyurru pala pujunu mirtawa? Wupartu yiji warnkujartiny. Palinyju wiyyirr wirrirnalu Ngarrkaku. Kuwarri warnkumajirri waninyi mayikupa nganikupa paliny. Yija nyungu muwarr wurrarnarninyurruku, palarrangu warinyarrangu warnku kurrngaljartiny. Kurrngalja puru jinta yinyayili Ngarrkaku. Janalu wupartumarta wirrirniyili Ngarrkaku. Palalu pujunulu kampurtalu mirtawalu wirtumarta wirrirnalu. Palinyju puru wiyyirr yinyalu Ngarrkaku."

## 14

### *MANGUNYKATARRANGU KARRINYIKINYIYALU MARLKARRI JINAKU JESUS-KU (14:1-2)*

<sup>1</sup> Palanga warrarnja turparramarta jarrinyajanga Jew-arrangu ngunnarrikurnujirrija kunmu jarrinyikinyiyi Jerusalem-ja. Palanga wupartu kukurnjari wirlarnikinyiyijaninyi, waraja maya warinyku, waraja maya warinyku, palajun. Martumpirri lalypa kamparnakinyiyi raparrku jinapintimajirri. Warrukartingi warajanga, wirlarra wirtu jarrinyaja, paña kuwiypa martumpirri lalypa ngananyikinyiyi. Palajun jirnikinyiyi Ngarrkamilija muwarrja, kurlkarri marnikinyiyi purlpi warrarnja Egypt-ja waninyikinyiyi, kurluny-kurlunya waninyikinyiyi. Palaja Ngarrkalu wanka jirnijaninyi, kanyajaninyi warrarnja Egypt-ja.

Turparra jarrinyijanaku. Kuwarrimarta Jerusalem-ja jana kunmu jarrinyikinyiyi palaku purlpijaku kurlkarri manaku. Karrpuja kujarraja nyarrarrangu wuparturrangu kukurnjarirrangu wirlalapiyi.

Palarrangulu Jew-arrangumili mangunykatarrangulu Jesus-ku kukujarilu warlinaku karrinyiya, marlkarriku wirlanaku.

<sup>2</sup> Wurrarnikinyiyarningu, "Wunyjurru jiliminyi? Munu warlilkunyi kurlkarri manapintingi partijirringi. Kurrngalju wurrarnayi Ngarrkalu ngakarna Jesus nganyjurruku king jarrinyaku, nganyjurrumili nyampali waninyaku ngaramarnti. Yakujun wurrarnikinyiyi marrngurrangulu. Tuku jilkunyarninyi janangamarra, kukujarilu jiliminyi yirrinangamarra. Kurlu jiliyinganyjurrakalu janalu." Palajun muwarr pirnikinyiyarningu palarrangulu mangunykatarrangulu.

### *MIRTAWALU JURNTURTUNGU JESUS-JA JURTIRNILI PARNTI JURIKATA (14:3-9)*

<sup>3</sup> Palanga tawunja Bethany-ngi Jesus milpanya, mayanga kaninykartingalpanya ngapimilingi, Simon Leper-milingi. Ngananyikinyiyi, milpanyanajanaku mirtawa wupartujartiny parturljartiny. Winya pala, parnti jurikata, ngalypakata yija, warnkulu wirtulu yija mana pala. Mirtawalu milya kankarni ngartarnili nyarraja parturlja, parnti jurikata ngalypakata jurnturtungu Jesus-ja jurtirnili.

<sup>4</sup> Jinta palanga kuli jarrinyiyi, wurrarnikinyiyarningu, "Nganijalu palajun jirni? Kurlu jirni yija.

<sup>5</sup> Yingama warnkuku wirtuku pala parnti jurikata. Wirtu warnku manama. Palaja pala warnku yija yingamajaninyi pujunurranguku." Palajun muwarr pirnikinyiyi. Mirtawa nyarra yijalu warnta marnayi.

<sup>6</sup> Jesus-ju puntaju wurrarnajanaku, "Yakaliya paliny. Nganijalu warnta marnanyurru? Yija ngalypakata jirnija.

<sup>7</sup> Nyurranga pujunurrangu wantulupiyi ngarramarnti nyungunu. Kar-purrrangu karrpungu jana warnku yungkulunyurrujaninyipa. Munu nyurranga ngaju punja wantulumarnanyurruku. Jampa wantulumarna, palaja marlkarri jarrulumarna.

<sup>8</sup> Yijalu ngalypa jirnija palinyju. Nyungu parnti jurikata ngaly-pakata kawungu ngajungu jurtirniji kuwarrilu palinyju ngalypa jinaku jungkaraku yartiku.

<sup>9</sup> Yija nyungu muwarr wurrarnarninyurruku, ngunarrijirringi ngaju wurratalapiyijanaku marrngurrangungu wiyyirra, wurratalapiyijanaku pukurl nyungulu mirtawalu palajun jirnija. Kurlkarri malapiyi nyungu mirtawa."

### *KUKUJARRI YANA JUTAJA YATILARRANGUKARTI (14:10-11)*

<sup>10</sup> Palaja waraja pirirri yana nyarrarrangukarti Jew-arrangumili yati-larrangukarti. Paliny yini Judas Iscariot, Jesus-milirrangungu waraja paliny. Wurrarnajanaku yatilarrangungu, "Ngajulu kangkulumarnanyur-rinyi Jesus-karti. Jurti jinaja, warlilkulunyurru."

<sup>11</sup> Palinymili muwarr pinakarrinya pikaly jarrinyiyi, wurrarniyili, "Yijapa palajun jilaman, warnku yija yungkulupiyirninti." Palaja Jutaja mimarnikinya, kurlkarri marnikinyi palinyju, "Nyanga kangkulumarna-janinyi Jesus-ku warlinaku?"

### *JESUS-JUPA PALINYMILIRRANGULU NGANAYI KUKURNJARIPA MAR-TUMPIRRI LALYPY (14:12-21)*

<sup>12</sup> Nyarra karrpu jarrinyijanaku wupartu kukurnjari wirlanaku Jew-arrangulu. Palanga karrpungu palinymilirrangulu japirr marnayi Jesus, "Wanyjarnikarti yankulupiyirni julkulupiyirni kaninypirtilu nganyjurrulu palaku kukurnjarikupa lalypaku martumpirriku ngananyaku?"

<sup>13</sup> Palinymilirrangeja kujarra manapulinyi, wurrarnapulaku, "Yankulun-yumpulu, Jerusalem-ja ngalpulunyumpulu. Pirirrilu ngapapintijartinyju purrpija kululkulinyumpulinyi. Paliny yajalkulunyumpulu."

<sup>14</sup> Wirtungu mayanga ngalpuliny. Ngalpulunyumpulu pukun. Kaninykartu yirralkulunyumpulu pala ngurrara. Muwarr pilkulunyumpulu-lalu, 'Nganarnamilalu miranu jinakatalu wurrarnangu, "Wanyjarningi ruwumu yarta jilaman, palangangarra mayi ngalkulupiyirni, pala kukurnjaripa lalypa martumpirri, ngajulupa ngajumilirrang marrngurrangulu?'"

<sup>15</sup> Palinyju jurti julkulunyumpulinyi wirtukata ruwumu. Palanga jilku-lunyumpulu kaninypirtilu nganyjurruku."

<sup>16</sup> Yanapulu. Jerusalem-ja ngalpanyapulu, palajun jarrinyipulaku Jesus-milija muwarrja yija. Palanga yarta jirnipulu kaninypirtilu.

<sup>17</sup> Jarurrukartingi milpanyiyi Jesus-pa jinta palinymilirrange.

<sup>18</sup> Mayi ngananyikinyiyi, wurrarnajanaku Jesus-ju, "Yija nyungu muwarr wurrarnarninyurruku, nyurraja warajalu kurntanymajirrilu muwarr kangkulinyjanaku yatilarrangukarti, warlilikinyiyi. Palinyjungarra kuwarri ngananya nganyjurrungu nyungunu."

<sup>19</sup> Paju karrinyiyi, ngarlu kurlu jarrinyiyi palinymilirrange. Japirr marnikinyiya warajapa warajalu, "Wunyjurru? Ngajulu?"

<sup>20</sup> Puntaju Jesus-ju karra marnajanaku, "Nyurrajangarra warajalu palajun julkuliny, martumpirri malya julkulupalayi palinyju, nganyjurrungu nyungunu pala.

<sup>21</sup> Marlkarri jarrinyaku ngaju muwarrja Ngarrkamilija, ngajuku mirli-mirlingi Ngarrkamilingi yarntarniyi palajun purlpi. Palaku pirirriku

palajun jinajaku kuwarrijaja palinykungarra kurluny-kurluny jarruliny yiji ngarramarnti.

*JESUS-JU PALINYKU KAWUKUPA PIJIRRIKU MIRANU JIRNIJANINYI  
(14:22-25)*

<sup>22</sup> Maii ngananyikinyiyi Jesus-ju mana martumpirri, Ngarrkanga wurrarnala, "Nyuntulungarra martumpirri nyungu yinyanganinyi. Yarranijayi! Wanka jinannganinyi!" Palaja ngartanakanu yinyajaninyi kuttarrangu, wurrarnajanaku, "Marrayi, maii nyungu ngalayi. Nyungulu martumpirrilu kurlkapirla jilkulunyurrinyi kawuku ngajumilaku. Jampa jintalu kawu ngaju yija wirlalaminyiyi. Kuwarringulu martumpirri ngananyangkulunyurru, kurlkarri malaminyinyurru ngaju kawu, janalu wirlarninyiyi marlkarri."

<sup>23</sup> Palaja minpinapintingi wayin mana, Ngarrkanga wurrarnala, "Nyuntulungarra wayin nyungu yinyanganinyi. Yarranijayi! Wanka jinannganinyi!" Yinyajaninyi, warajapa warajalu minpirniyi.

<sup>24</sup> Wurrarnajanaku, "Nyungulu wayinju kurlkapirla jilkulunyurrinyi pijirriku ngajumilaku. Ngajumili pijirri warrkilkuliny ngajungu marlkarri marrngurranguku kurrngalku. Yijalu Ngarrkalu ngakarnanyi marrngurrangu jurtuku muwarrku yinganyaku. Ngajulu marlkarri jarryajalu nyarra jurtu muwarr Ngarrkaja yija yakalamarnajanaku. Nyurralu wayin minpinangkulunyurru, kurlkarri malkulunyurru pijirri ngajumili, marlkarri jarryarna ngaju marrnguku kurrngalku.

<sup>25</sup> Yija nyungu muwarr wurrarnarninyurru, nyungungu warrarnja munu yarranakanu wayin minpilimarna ngajulu. Yarti Ngarrkalu, ngajumilalu japatulu, ngaju wirriliminyi nyampali wiyyirrku. Palaja yarrana minpilamarna ngajumilirrangunu."

*JESUS-JU WURRARNAJANAKU, "NYURRALU MIRTILU  
YAKALAMINYINYURRU" (14:26-31)*

<sup>26</sup> Palaja yinma Ngarrkaku kurntarniyi, palakarti Mount of Olives-karti yanayi.

<sup>27</sup> Yananya kawarnikinyiyi Jesus-ju wurrarnajanaku, "Yija-yiji ngaju yakalaminyinyurru nyurralu. Mirti-mirti jarrulunyurru jirrja." Jesus miranu nyunguku Ngarrkamilija Muwarrja. Palajun purlpilu yartarna warinyju mirli-mirlingi Ngarrkamilingi, "Ngarrkalu wirlalkuliny marlkarri kukurnjarirrangumi nyampali, kukurnjarirrangku wiyyirr mirti jarrulupiyi jirrja." Miranu Jesus, pala muwarr palinyngarra. Ngarrkalu yini marnikinyi Jesus kukurnjariku nyampali, yini marnikinyijaninyi palinymilirrangku warrkamu pulukurrangu kukurnjarirrangukapali. Ngarrkalu palajun muwarr pirni, palinyju marlkarri wirlalkuliny Jesus, wiyyirr mirti jarrulupiyi palinymilirrangku marrngurrangu.

<sup>28</sup> Palaja Jesus-ju wurrarnajanaku, "Marlkarri jarryakanu ngaju, yarrana wanka jarrulumarna. Galilee-karti yija yankulumarna, ngaju walangkarr jarrulumarnanyurru."

<sup>29</sup> Peter-lu karra marnalu, "Jintalu yakalayintili, munu yakalamarnanta ngajulu."

<sup>30</sup> Puntaju Jesus-ju karra marnalu, "Yija nyungu muwarr wurrarnarningu, warrukartingi nyungungungarra kujarrapa warajamalja ngaju wurralamajanaku, mitu malamanjaninyi, 'Munumparla palinyku ngaju.' Palajun muwarr pilamanjanaku. Palaja rooster-lu kamalkuliny kujaramal."

<sup>31</sup> Puntaju Peter-lu karra marnalu, "Palangarra yija munu wurralla-marnajanaku. Wirlalinyiyili, marlkarringi munu yiji yijalu palajun wurralamarnajanaku." Jintalu wiyyirru Jesusmilirrangulu palajun pukun muwarr Jesus-ja wurrarniyili.

#### *JESUS-JU MUWARR PIRNIKINYALU NGARRKAKU (14:32-42)*

<sup>32</sup> Milpanyiyi palakarti, ngapikarti, Gethsememane-karti. Palinymilir-rangungu wurrarnajanaku, "Kajalkulunyurru nyungungu. Ngarrkaku muwarr pilamarnalu."

<sup>33</sup> Palinyju kanyajaninyi Peter-pa James-pa John, yanayi walangkarr wangkangarra. Jesus ngarlu kurluny-kurluny yija jarrinyi.

<sup>34</sup> Palaja wurrarnajanaku, "Ngarlu wurnmanyarni ngarramarnti ngaju. Paju karrinya yijapa marlkarri jarrulumarna. Nyungungu wantulun-yurru, mintu wantulunyurru, jarrurlju kalkuluminyinyurru."

<sup>35-36</sup> Palaja Jesus wangka yanajanaku, pajulu warnti pirnarninyi jungkanga, palaja marrja yija muwarr pirnikinyili Ngarrkaku. Wurrarnala, "Japartukayi, ngajumili japatu walja, nganikupa karrinya ypa, pala jilaman. Yija marlkarri jinaku karrinyajiyi marrngulu jintalu. Munu marlkarriku karrinyakarna. Nyuntulu kunta jilamanjaninyi. Palaku karrinya yna ngajulu. Puru yakalamarna. Nyuntu karrinya ypa jintalu wirlalaminyiyi marlkarri, puru marlkarri wirlalaminyiyi. Munu kunta jilamarnajaninyi."

<sup>37</sup> Jesus-ju kulpanyakana yirrirnajaninyi, kupalya jarrinyiyi palarrangku kujarropa waraja. Peter-nga wurrarnala, "Nganija Simon Peter-kayi, nyuntu kupalya jarrinya? Jampapa parrily waniman?"

<sup>38</sup> Wurrarnajanaku, "Parrily wantulunyurru, Ngarrkaku muwarr pilkulunyurru. Mirurrulu kawanyurrinyili, kurlu jilinyurrulu. Nyurraru yirkulu Ngarrkanga yijalmarta jinaku karrinyinyurru, yija nyurra manyurla jarrinyanyurru. Palajalu japiirr malkulunyurru Ngarrka, tuku jilkulunyurriy."

<sup>39</sup> Palaja yarranakanu Jesus yana, yarrana Ngarrkaku muwarr pirnikinyili, nyarralungarra muwarrju.

<sup>40</sup> Yarranakanu palarrangukarti kujarropa warajakarti kulpanyakana. Yarrana kupalya jarrinyiyi. Kupalyakarra karrinyikinyiyi. Kurntanya waninyikinyiyarningu.

<sup>41-42</sup> Yarranakanu Jesus yana, muwarr pirnili Ngarrkaku, yarranakanu kulpanya wurrarnajanaku, "Yirru kupalya jarrinyinyurru? Jipi! Parrily jarrayi! Palamalungarra marrngulu ngaju yajarnikinyinyipa warrukartingi kuwarringi ngaju jurti jirninyijanaku kurlujartinyja marrngur-rangungu. Warliliminyiyi. Parrjalayi! Kuwarringarra milpayinyi. Wararr karrayi! Purrpi malaminyijaninyi."

#### *JINMURNTU JIRNIYI JESUS (14:43-52)*

<sup>43</sup> Jampa Jesus-ju muwarr pirnikinyijanaku, wangkapalaji milpanya Jutaja. Jesus-milirrangungungarra paliny. Palinyja milpanyiyi kurrgal, jantujartiny, wirrkanapintipa yurluku. Jew-arrangumilalu mangunykatar-rangulu ngakarniyijaninyi.

<sup>44</sup> Jutajalu purlpi wurrarnajanaku jinmurntu jinakatarrangungu nyungu muwarr: "Yampu malamarna waraja. Palinyngarra warlilkulunyurru, tukulu kangkulunyurru!"

<sup>45</sup> Jampa Jutaja milpanyakanu, Jesus-karti yana, kayi marna "Miranu jinakata", yampu marna.

**46** Palanga Jesus marrjalu warlirniyi.

**47** Warajalu Jesus-milirrangungulu palanga wararr karrinyajalu wirrkanapintijartinyju walyi malyarnili marrnguku. Kurlkajakun wirrkarna. Nyarra marrngu warrkamukata Wirtu Yatilmili.

**48** Palaja Jesus-ju japiirr marnajaninyi, "Nganijalu yurlukujartintypa wirrkanapintijartiny milpanyanyurru ngajuku warlinaku, jinmurntu jin-naku? Ngaju kulikatawayi, ngulyukatawayi."

**49** Karrpurrangu karrpungu Ngarrkamilingi Temple-ja miranu jirnikinyirnijaninyi. Nyurra palangangarra waninyikinyinyurru. Nganijalu munu jinmurntu jirniminyinyurru palanga? Mirli-mirlingi Ngarrkamilingi purlpi yija yarntarna ngajuku, palajun jiliminyinyurru. Palajun jiliyi. Munu kunta jilamarnanyurrinyi."

**50** Palaja palinymilirrangulu Jesus yakarnayi ngarramarnti, mirti jar-rinyiyi yija jana wiyirr.

**51** Warinyju, yangupalalu pirirrilu, Jesus yajarnikinyi. Palinyju kawu yamarnarninyi waralu warajalujakun. Jintalu jinmurntu jinaku partarl warlirniyi.

**52** Palinymili wara yakarna, mirti jarrinyi kurta.

### *JESUS KANYAYI WIRTUKARTI KIMITIKARTI (14:53-65)*

**53** Yatilarrangupa miranu jinakatarrangupa mirtanyarrangu mayanga wirtujinanga kunmu jarrinyikinyiyi. Pala maya Wirtu Yatilmili. Jinmurntu jinakatarrangulu palakarti mayakarti kanyayi Jesus.

**54** Peter-lu yajarnikinyijaninyi, kajamartalu, Wirtu Yatilmilingi mayanga kiyirtingi ngalpanya paliny pukun.

Pala maya wirtujina yiji, ruwumurrangu nyarrakurnujirri, courtyard-jartiny partijirri kaniny. Peter palangangarra courtyard-ja ngalpanya. Palanga partijirringi warrkamukatarrangu kajarnikinyiyi, Wirtu Yatilmilirrangulu marrngurrangu jana. Parrpa jirnikinyiyarninyi wikanga. Peter kajarnajanaku, parrpa jarrinyaku.

**55** Mayanga palarrangulu yatilarrangulupa nyampalirrangulu, wiyyirru Wirtulu Kimitilu, malyparr karrinyiyalu Jesus-ku. Palinyku marlkari jinaku karrinyiyalu. Kanyjirnikinyijanaku marrngurranguku muwarr pinaku, mitu manaku, "Ngajulu yirrirnirni Jesus-ju panpanyala Ngarrkamilingi mangunyu."

**56** Kurrgalju mitulu muwarr kanganyikinyiyi Jesus. Warinypa wariny muwarr janamili, janamilirranglu muwarr rurru pirnayarninyi.

**57** Jinta wararr karrinyiyi, nyungu mitulu muwarr kanyayi Jesus,

**58** "Paliny muwarr pirni, pinakarrinyiyirni nganarnalu, 'Ngarrkamili Temple, yarni marnayi marrngulu, yija ngartalamarna ngajulu, karr-purrangungu kujarrapa warajanga wariny Temple yarni malamarna ngajulu, munu marrngulu palajun yarni marnakayi.'" Palajunju mitu marnikinyiyi.

**59** Janalu pukun muwarrarrangu warinykurnu jirnikinyiyi.

**60** Palaja wararr karrinyi Wirtu Yatil, walangkarr wararr karrinyijanaku. Wurrarnili Jesus-ja, "Ngukarri marnikinyiyinti. Nyuntulu puntaju karra marnamanjanaku. Ngani muwarr pilamanjanaku?"

**61** Jesus jama waninyi, munu muwarr pirnama. Yarrana Wirtulu Yatilju wurrarnili, "Ngarrkalu ngakalkulinyganyjurru partany walja, nyampali wirtu waninyaku nganyjurru. Wunyjurru? Ngani wurrarnanparningu? Nyuntungarra nyarra Ngarrkamili?"

<sup>62</sup> Puntaju Jesus-ju, "Yuu, palangarra ngaju. Yirriliminyinyurru ngaju, kajalamarna Ngarrkamartaji, marrjanyukartingi palinyja. Palaja yirriliminyinyurru kankajirrija mujungungu kulpulumarna."

<sup>63-64</sup> Palaja muwarrja Wirtulu Yatilju wurru palinymili ngartarnarningu. (Jew-arrangulu kuli jarrinya jalu palajun jirnikinyiyi purlpilu.) Karra marnajanaku, "Nyurraru pinakarryinyinyurru palinymili kurlu muwarr. Muwarrja palinymilija yijalu jakurl kanganyamajirri miranurla nyurra. Wunyjurru wurralkulunyurrulu?" Puntaju kulpanya wurrarniyili wiyr-rju, "Yija markkarriku wirlanaku."

<sup>65</sup> Jintalu janga pирникinyili Jesus-ja. Palanga ngumpa paliny kunymarniyi waralu, parirrju wirlarnikinyiyi. Nyurni marnikinyiyi, "Nganurtulu wirlarnanta?" Palanga marrngurrangulu Wirtulu Yatilmilalu kanyayi, parirrju parlju wirlarnikinyiyi.

#### *PETER-LU WURRARNAJANAKU MUNUMPA PALINY JESUS-KU (14:66-72)*

<sup>66</sup> Palajun jarrinya kinyi Jesus-ku, Peter yirrkku kaniny waninyikinyi, courtyard-ja. Warrkamukata mirtawa milpanyili, Wirtumili Yatilmili paliny.

<sup>67</sup> Peter yirrirni wikanga wangka, parrpa jarrinya kinyi. Jurtu yirrinajalu wurrarnili, "Pala Jesus, Nazareth-ja, yija palinymilirrangija nyuntu."

<sup>68</sup> Peter-lu mitu marna, "Palinyku munumparla ngaju. Kakurnarnanta muwarr nyuntumili!" Palanga jampa yananyikinyi Peter jawapirtikarti, kiyirtikarti, rooster-lu kamarna palanga.

<sup>69</sup> Mirtawalu jawapirtimartajingi yirrirni, wararr karrinya jarrangungu wurrarnajanaku marrngungu, "Nyungu pirirri waraja Jesus-milirrangija."

<sup>70</sup> Yarrana Peter-lu kunta jirni, "Munu!"  
Yarti palarrangulu wararr karrinya jalu wurrarniyili, "Yijarla Jesus-mili nyuntu. Galilee-ja nyuntu."

<sup>71</sup> Palaja Peter-lu wurrarnajanaku, "Yija muwarr pirnirni. Ngajuku miranu Ngarrka. Mitu muwarrja ngaju wirlalinyili Ngarrkalu. Nyarra pirirri wurrarnijinyurru, yija palaku ngaju munumpa!"

<sup>72</sup> Palaja kamarna rooster-lu. Peter-lu pinakarryakanu, kurlka jarrinya yija muwarr Jesus-mili, "Kujarrapa warajamalja ngaju wurralanjanaku, mitu malamanjaninyi, 'Munumparla palinyku ngaju'. Palajangarra rooster-lu kamalkuliny kujarramal." Palajun purlpil Jesus-ju wurrarnala Peter-nga. Peter tarlkarra manakanu kurkapirli jarrinyi, palajunngarra palinyju jirni. Ngarlu wurnmanya kurntanyjartiny, ngangkurl jirnikinyi.

## 15

#### *JESUS KANYAYI NYAMPALIKARTI, YINI PALINY PILATE (15:1-5)*

<sup>1</sup> Pirrpa-pirrpa jarrinya ja kunmu jarrinya yiti yatilarrangupa miranu jinakatarrangupa mirtanyarrangupa jinta wiyyirr nyampalirrang, Wirtungu Kimitingi. Muwarr yimpirniyarningu. "Kangkuluminji Jesus Roman-karti." Palaja Jesus kunymarniyi, kanyayi Roman-karti wirtukarti nyampalikarti, yini paliny Pilate. Paliny Roman-milija warrarnja, Roman-milalu King-ju wirrirni Pilate nyampali Jew-arranguku.

<sup>2</sup> Pilate-ju japiirr marnikinyi Jesus, "Wunyjurru? Jew-arrangumili King nyuntu?" Jesus-ju puntaju marna, "Nyuntu palajun muwarr pirnan."

<sup>3</sup> Yatilarrangulu mitulu ngukarrirnikinyiyi Jesus, "Nganarnamilingi mangunyja panypanyikinyili palinyju."

<sup>4</sup> Palaja yarranakanu Pilate-ju wurrarnili, "Pinakarrajaninyi, palarrangulu ngukarrirnikinyiyinti. Puntaju karra malaman?"

<sup>5</sup> Jama waninyikinyi Jesus, munu puntaju marnamalu. Pilate-ju ngurnjul jarrinyikinyalu.

### *WURRARNIKINYIYILI PILATE-JA JESUS MARLKARRI JINAKU (15:6-15)*

<sup>6</sup> Purlpi turlparrarrangu turlparranga, Jew-arrangulu kukurnjaripa lalypa martumpirri ngananyikinyiyi, Pilate-ju yinyji pirnikinyijanaku marrngu jinmurntuja, waraja ngakarnikinyijanaku. Nganurtuku kar-rinyikinyiya Jew-arrangulu, palaku japiirr marnikinyiyalu, palangarra Pilate-ju ngakarnikinyijanaku.

<sup>7-11</sup> Palaja kuwarri kurrgal kunmu jarrinyiyi Jew-arrangulu, Pilate-ku japiirr manaku, "Jinmurntuja yinyji pilamannganaku waraja." Pilate miranu jarrinyijanaku, yatilarrangulu mikulu yirrirniyili Jesus-ja, palajalu kanyayili. Palaja japiirr marnajaninyi Pilate-ju, "Ngakalamarnanyurruku Jesus, Jew-arrangumili King?" Yatilarrangulu purlpilu wurrarnikinyiyijanaku Jew-arranguku marrngurranguku, jakurlirniyijaninyi japiirr manaku Pilate-ku, "Yinyji pilamannganaku pala wariny pirirri, yini Barabbas." Pala Barabbas jinmurntungu waninyikinyi, jinta pukurl palinykapali. Purlpi kuli partirniyijanaku Roman soldier-rrangungu, Roman-arrangu kujarropa waraja marlkarri wirlarniyijaninyi.

<sup>12</sup> Nyarraku Barabbas-ku japiirr marnikinyiyi, puntaju Pilate-ju japiirr marnajaninyi, "Pala Barabbas yinyji pilirnili, palaja wunyjurru jilirnili ngajulu nyungu wariny, pirirri yini marnanyurru 'Jew-arrangumili King'?"

<sup>13</sup> Puntaju kamalu karra marnikinyiyili, "Paliny nayilamu jilaman mungkanga. Palajun jinajalu marlkarri wirlala."

<sup>14</sup> Yarranakanu Pilate-ju japiirr marnajaninyi, "Nganijalu? Ngani kurlu jirni palinyju?" Kamarnikinyiyi yija marrjalu, "Paliny nayilamu jili mungkanga."

<sup>15</sup> Jew-arranguku pikaly jinaku karrinyi Pilate. Palaja Barabbas yinyji pirnijanaku, Jesus yinyajanaku soldier-nga, wurrarnajanaku wilypurn-jartinyju wirlanakupa mungkanga nayilamu jinaku.

### *SOLDIER-RRANGULU NYURNI MARNIKINYIYI JESUS (15:16-20)*

<sup>16</sup> Soldier-rrangulu kanyayi Jesus ngurrakarti janamilikarti, mayanga wirtujinanga ngalpaniyiyi, courtyard-ja kaniny partijirringi kanyayi. Jinta soldier-rrangu kayi marnayijaninyi, "Kurtaliyi nyungukarti." Palaja wurraku palinymilaku mirarniyi, Pilate-ja muwarrja Jesus wilypurnjartinyju wily pirniyi. Palaja nyurni marnikinyiyi yija.

<sup>17</sup> Manayi ngurriny pilyarri, ngalypakata yija, wirrirniyili. Mungkaja yir-ijartinyarrangu manayi, yarni marnayi ngapi, mangkakapali, wirrirniyili jurnturtungu Jesus-ja.

<sup>18</sup> Palaja nyurni marnikinyiyi, wurrarnikinyiyili, "King Jew-arranguku yija nyuntu."

<sup>19</sup> Mungkalu jurnturtu wirlarnikinyiyi, palinyja janga pirnikinyiyili, murtingi jurlpi-jurlpi jarrinya jinanga palinyja milya kaniny jungkanga jarrinyikinyiyili. Palajunmarta jirnikinyiyi palinyku nyurni manaku, wirtukapali paliny janaku.

<sup>20</sup> Jipi nyurni manakanu, paliny ngurrinyku ngalypakataku mirarniyi, wurru palinymilingarra wirrirniyili. Palaja mungka wirtu palinyja ngurntingi wirrirniyi, palinyju kanganyaku, jinangu marntiku jirniyi jalakarti, ngapikarti, Golgotha-karti, mungkanga nayilamu jinaku, palanga marlkarri jinaku.

### *JESUS KANYAYI, MUNGKANGA NAYILAMU JIRNIYI (15:21-27)*

<sup>21</sup> Partijirri jarrinya soldier-rrangulu pirirri warlirniyi, ngajarri. Warrarnja Cyrene-ja paliny, yini Simon. Japartu Alexander-milipa Rufus-jumili. Jerusalem-karti milpanyikinyi. Roman soldier-rrangulu warlirniyi, jakurlirniyi kuliny-kulinyju paliny palaku wirtuku mungkaku kanganyaku, pala mungka Jesus-ku.

<sup>22</sup> Golgotha-nга milpanyiyi. (Pala yini Golgotha Jew-arrangumilingi muwarrja Pinka-Pinka wurrarnayi.)

<sup>23</sup> Palanga Jesus partarl yinyayi wayin mirrijinjartiny minpinaku. Parra-parrangamarra pala mirrijin. Jesus-ju munu minpirnama.

<sup>24-26</sup> Soldier-rrangulu mungkanga nayilamu jirniyi, parirrirri nayilamu jirniyi, jinajirri pukun. Mirli-mirlingi yarntarnayi nyungu muwarr, "Nyungu Jew-arrangumili King", wirrirniyi pala kankarni mungkanga palinymartaji. Marntungu karrpu kanka jarrinyi, yarlipala, nayilamu jirniyi mungkanga Jesus. Palaja wurruku palinymilaku witi karrinyiyi, nganurtulu kangkulinya pala.

<sup>27</sup> Ngulyukatajirri nayilamu jirniyipulinyi warinyajirri mungkangajirri palinymartaji, marrjanyukartipa jampukarti.

### *JINTALU PUKUN NYURNI MARNIKINYIYI (15:29-32)*

<sup>29</sup> Marrngurrangulu jukurti-jukurtilu parrjarnikinyiyi wangkalu nyurni marnikinyiyi paliny. Karra marnikinyiyalu, "Wurrarnan ngartalamen Ngarrkamili Temple, nyuntulu, karrpurrangungu kujarrapa warajanga yarni malaman.

<sup>30</sup> Katukala mungkaja, yinyji pinakanu wanka jilarninyi nyuntulu!"

<sup>31</sup> Palajunju wurrarnikinyiyi palarrangulu mangunykatarrangulu pukun, nyurni marnikinyiyi Jesus. Wurrarnayarningu, "Jinta wanka jirnikinyijaninyi. Munu palinyju wanka jinakarninyi.

<sup>32</sup> Purlpi wurrarnikinyi palinyju, 'Ngaju ngakarnanyi Ngarrkalu. Jew-arrangumili King ngaju.' Jampa katukalkuliny mungkaja paliny. Palajan-garra nganyjurrulu yijalmarta jiliminyalu palinyja."

Mungkangapa ngulyukatalujirri pulanyju pukun nyurni marnikinyipulu Jesus.

### *JESUS MARLKARRI JARRINYI (15:33-41)*

<sup>33-34</sup> Karrpu partijirringi parlparr warrukurla jarrinyi. Warrukurla palajunngarra waninyikinyi ruka-rukakartijakurl. Palaja Jesus marrja muwarr pirni, purlpimalulu muwarrju japirr marna Ngarrka, "Yiluyi, Yiluyi, lama japakajani?!" Pala muwarju wurraninyi, "Ngarrkakayi! Ngarrkakayi! Nganijalu parnpina wirrirnanyin nyuntulu?"

<sup>35</sup> Jintalu palangapa wararr karrinyajalu pala muwarr pinakarrinyajalu wurrarniyi, "Pinakarrayi! Kayi maninyi palinyju pala purlpija pirirri, Ngarrkamili Muwarr Pinakata, Yilayija."

<sup>36</sup> Waraja mirti milpanya, wara malya jirni wayinja, milyanga mungkanga wirrirni, kanka jirni Jesus-ja jawanga, jangka jirnili ngumanaku Jesus-ju. Wurrarnajanaku, "Kula! Parrjalkunya! Yijapa milpuliny Elijah palinyku mungkaja kaniny jinaku."

<sup>37</sup> Palaja Jesus-ju kamarna yija, warajamal nganyjurnu, wurrjirni.

<sup>38</sup> Jerusalem-ja Ngarrkamilingi Temple-ja kaninykartu milyanga Ngarrkamili jakun pala. Wirtu Yatiljakun ngalpanyangkuliny palanga, munu jinta marrngurrang. Walangkarr pala Ngarrkamilingi wilitiny jar-rinyikinyi wirtu ngurriny. Ngampa pirnikinyi pala, ngalpanyangamarra marrngurrangungumarra. Jampa Jesus marlkarri jarrinyi pipurrungarra

ngurriny pala laarr kanya yija, kankajirrija kaninykurnu jungkakartijakurl.

<sup>39</sup> Ngapingi, Golgotha-nga, pala Roman soldier nyampali Jesus-martajingi wararr karrinyikinyi walangkarr parrjarnikinyi. Palaja yirrirnajalu palajun marlkarri jarrinyi Jesus, wurrarna, "Yijangarra nyungu pirirri Kankajirrikarringumili Partany."

<sup>40-41</sup> Palanga kurrgal mirtawarrangu wararr karrinyikinyiyi, ka-jamartangulu parrjarnikinyiyi. Purlpi, Jesus yananyikinyi Galilee-nga, palarrangulu mirtawarrangulu yajarnikinyiya, palinyku mayi kam-parnikinyiyalupa nganin-nganin. Galilee-ja yajarniya paliny Jerusalem-karti. Kuwarri parrjarnikinyiyi kajamartangulu. Jananga Mary Magdalene-pa Salome-pa wariny Mary. (Pala wariny Mary pipi palinyn-garra pulanyku, James Wupartukupa Joses-ku).

### *WIRRIRNIYI JESUS KAWU MARLKARRI JURNTINGI (15:42-47)*

<sup>42-43</sup> Palakurtirra pirirri, yini Joseph. Paliny ngapija, tawunja Aramathea-ja. Nyampali paliny, mirtanya, Wirtu Kimiti marrngu paliny. Palinyku ngalypa wurrarnikinyiyalupi wiyyirru. Punja mimarnikinyi, wurrarnikinyi, "Jampa Ngarrkalu ngakalkuliny wirtu, palinyjungarra milpanyajalu ngalyalupi kalkulkulinyganyjurrinyi ngarramarnti." Palangarra Joseph mar-rpalya yanalu nyampalikarti, Pilate-karti, japirr marna, "Kawu kangku-lumarna Jesus, jungkaranga wirrilamarna?"

Purlpi ruka-ruka. Jampa karrpu kara ngalpuliny. Palaja Sabbath jar-rulinyjanaku, Jew-arrangumili karrpu Ngarrkaku. Janamilija mangunyu munu warrkamu jarrinyaku jana. Palangamarra Jesus kawu marlkarri jungkaranga wirrinaku karrinyikinyalu Joseph-ju palanga ruka-ruka.

<sup>44</sup> Ngurnjulju japirr marna Pilate-ju, "Purlpi marlkarri jarrinyi paliny?" Soldier nyampali kayi marna, japirr marna, "Punja marlkarri waninyi Jesus?"

<sup>45</sup> Palalu soldier-lu nyampalilu wurrarnala, "Yuu, purlpi marlkarri paliny." Palaja Pilate-ju wurrarnili Joseph-ja, "Yuu, kawu paliny marlkarri kangkuluman."

<sup>46</sup> Joseph store-karti yana, mana warnkulu wara makanu mirta-mirta, ngalypakata yija. Mungkaja Jesus kawu marlkarri kaniny jirni, waralu kunymarna, wakany kawu yamarna. Palaja jurntikarti kanya. Pala jurnti kapulyakata warnkungu purlpija wirrkarniyi jungkaraku. Palanga kaninykartii wirrirni Jesus kawu marlkarri. Palaja warnku wirtujina jujirni jurntikarti, jawaperti yamarna yijalu ngarramarnti.

<sup>47</sup> Mirtawajirrilu parrjarnikinyipulu, nyarralujirri, Mary Magdalene-lupa wariny Mary-lu. Parrjarnikinyipulu Jesus kanya wirrirni Joseph-ju jurntingi, palanga yirrirnipulu.

## 16

### *JESUS WANKANYU JARRINYAKANU TURLPANYA (16:1-8)*

<sup>1</sup> Sabbath-ja, kara ngalpanyajalu, yarranakanu warrkamu jilipiyi Jew-arrangulu. Palangarra kara ngalpanyajanga, yanayi store-karti Mary Magdalene-pa Salome-pa wariny Mary. Manayi warnkulu ngalypakatar-rangu yangkanapintirrangu, parnti jurikata yija, kawungu yangkanaku Jesus-ja.

<sup>2</sup> Wiyikingi yanayi pirrpangangarra palakarti jurntikarti. Jampa karrpu milyapal jarrinyajanga jurntingi milpanyiyi palanga.

<sup>3-4</sup> Yananya kawarnikinyiyi muwarr pirnikinyiyarningu, "Pala yamanap-inti warnku, jurntingi jawapirtingi, nganyjurrulu munu rurriji pirnakanyi, warnku wirtujina yija. Nganurturrangulu rurriji pilipiyinganyjurruku pala warnku?" Jampa milpanyajalu yirrirniyi, parrjarniyi nyarra warnku purlpi rurriji pirni warinyju.

<sup>5</sup> Palaja jurntingi ngalpaniyiyi, yirrirniyi yangupala pirirri, wurrujartiny mirta-mirtajartiny, marrjanyukarti kajarnikinyi. Wirnti karrnyikinyiya mirtawanyjarri.

<sup>6</sup> Palinyju wurrarnajanaku, "Wirntiway! Yija kanyjirnanyurralu kawuku Jesus-ku Nazareth-jaku, nyarra purlpi mungkanga nayilamu jirniyi. Marlkarri jarrinyaaja yija wanka jirni Ngarrkalu. Munu nyungungu kuwarri. Parrjaliyi! Nyungungungarra wirrirniyi. Nyunguja yana.

<sup>7</sup> Yankulunyurru, nyungu muwarr wurralkulunyurrujanaku Peter-ngapa jintanga Jesus-milirrangunu, 'Paliny Galilee-karti walangkarr yankulunyurru. Palangangarra yirrilkulunyurru, palinyja muwarrja yija."

<sup>8</sup> Jalakarti yanayi palarrangu mirtawanyjarri, jurntija mirti jarrinya. Wirnti yija, jannganka pirnikinyiyipa ngurnjurnikinyiya yija. Wirntilu jintanga munu muwarr pirnimiyijanaku warinyarranguku.

(Warinyju nyungu muwarr yarntarna, Jesus marlkarri jarrinyaaja wankanyu waninyi, miral jarrinyaajanaku palinymilirrangunu.)

#### *JESUS MIRAL JARRINYIJANAKU PALINYMILIRRANGUNU (16:9-18)*

<sup>9</sup> Wiyikingi marntungu, pirrpa-pirrpamajirringi, Jesus yarrana wanka jarrinya, turlpanya. Miral jarrinyili Mary Magdalene-nga. Purlpi palinyjangarra Jesus-ju jurtu ngakarnajaninyili 7 mirurru.

<sup>10-11</sup> Kuwarri yirrinakanu Jesus Mary yana palinymilirrangukarti. Kulurnikinyiyarninyi janalu. Wurrarnajanaku, "Nyampali nganyjurrumili, Jesus, munu marlkarri wanima. Marlkarri jarrinyaaja wanka jarrinya, yirrirnarna ngajulu." Mary-nga munu yijalmarta jirnimiyyili. Panpanyiyili muwarrja.

<sup>12</sup> Ruka warinyjirri Jerusalem-ja jalakarti yanapulu. Purlpi Jesus-ja yijalmarta jirnikinyipululu. Kuwarri Jesus miral jarrinyaapulaku. Pulanyju warinykapali wurrarnapulu, palinyngarra kakurnapulu.

<sup>13</sup> Palaja, miranu jarrinyaaja, kulpanyapulu Jerusalem-karti, jintanga palinymilirrangunu wurrarnapulujanaku, "Jesus wanka yija. Yirrirnalayi ngalayalu." Puru pinakarri miyyipulinyi, munu yijalmarta jirnimiyyipulaku.

<sup>14</sup> Palaja, ngananyikinyiyi, miral jarrinyaajanaku Jesus palinymilingi 11 marrngurrangunu. Yijalu warnta marnajaninyi. Warinyarrangulu Jesus wanka yirrinajalu purlpi wurrarniyijanaku, yirrkulu jalypalu jirnikinyiyi, palarrangulu 11 marrngurrangulu munu yijalmarta jirnimiyyijanaku. Palajalu Jesus-ju warnta marnajaninyi.

<sup>15</sup> Palaja wurrarnajanaku, "Warrarnjirringi wiyyirra yananyakanu, wurrabayjanaku marrngungu wiyyirra Ngarrkamili ngalypakata muwarr.

<sup>16</sup> Kurrngalju yijalmarta jilipijiya ngajungu. Warinyju ngapanga jinaku janaku. Jana marlkarri jarrinyaaja, Ngarrkalu wankanyu kalkulkulinyjaninyi ngarramarnti. Jintalu munu yijalmarta jilipijiya ngajungu. Jana marlkarri jarrinyaaja, Ngarrkalu jurtu ngakalkulinyjaninyi ngarramarnti.

<sup>17</sup> Ngajungu yijalmarta jinakatarrangulu ngajungu yiningi mirurru jurtu ngakalapiyijaninyi marrngurranguja. Muwarr warinyarrangu muwarr pilipiyi.

<sup>18</sup> Jurru watarrkulu marrayili, yijalu munu marlkarri jilkulinyjaninyi palalu jurrulu. Marlkarri jinapinti watarrkulu minpiliyili, yijalu munu

kurlu jilkulinyjaninyi palalu kurlujartinyju. Janalu wirrilipiyijanaku parirrju wurrkujartinyjarrangu, Ngarrka japiirr malapiyi ngalypa jinaku, yijalu Ngarrkalu ngalypa jilkulinyjaninyi wurrkujartiny. Yijalmarta jinakatarrangulu palajun jilipiyi. Palaja marrngurrangu miranu jarrulupiyijanaku warrkamu jirnirni ngaramarnti ngajulu yijalmarta jinakatarrangungu." Palajun Nyampali Jesus muwarr pirnajanaku.

*JESUS KANYA KANKA NGARRKALU, NYAMPALI WIYIRRKU WIRRIRNI  
(16:19-20)*

<sup>19</sup> Palaja Ngarrkalu kanya kanka, wirrirni marrjanyukartingi wangka yija palinyja. Palanga wirrirni Jesus wirtu yija nyampali wiyirrkku ngunarrikurnujirriku.

<sup>20</sup> Jesus-milirrangulu yananyakanu wurrarnikinyijanaku ngunarrikurnujirringi marrngurrangungu Ngarrkamili muwarr ngalypakata. Yirrkulu Nyampalilu Jesus-ju warrkamu jirnikinyi palinymilirrangungu, marrngurranguku jurti jinaku janamili muwarr yija jurtu. JIPI.

## Luke

Unknown if consultant checked.

### 15

<sup>1</sup> Jiyijajilu wurrarnikinyijanaku marrnguku Ngarrka. Kurrngalju palanga pinakarrinyikinyiyalu. Kurlujartiny marrngurrangupa pukun milpanyikinyiyalu palinykartu pinakarrinyaku.

<sup>2</sup> Palanga kurrngalja kujarraapa waraja miranu jinakatarrangu janamilaku Juwumilaku mangunyku. Jinta pukun palanga, yini marnikinyiyarninyi Pariji. Palarrangulu Parijilupa miranu jinakatarrangulu parrjarnikinyiyi Jiyijaji. Wurrarnikinyiyarningu, "Nyungu Jiyijaji kurrngarnajanaku kurlujartinyku marrnguku, mayipa nganinyi janamilingi ngurranga palinyju. Palajun kurlujartiny."

<sup>3</sup> Jiyijaji miranu janaku wunyjurru wurrarnikinyiyarningu. Palajalu yimpirnajanaku palinyju nyungu muwarr miranu jinaku janaku.

<sup>4</sup> "Nyungu pinakarrayi! Ngurnipali warajalu nyurraja kalkulajaninyili 100 kukurnjari ngunarringi pirranga. Palaja ngurnipali waraja kukurnjari ngawu kanyjil-kanyjil yarrala. Ngani jilaman nyuntulu? Yakalamanjaninyi jinta 99 kukurnjari pirranga. Palaja tukulu kanyjilamanpalu warajaku kukurnjariku ngawu kanyjil-kanyjil jarrinyaajaku.

<sup>5</sup> Maninyajalu nyuntu ngarlu yija pikaly jarruluman. Nyuntulu mankuluman pala kukurnjari waraja ngawu kanyjil-kanyjil. Palaja kangkuluman nyuntungu warntaranga, walarni jilaman ngurrakarti.

<sup>6</sup> Palaja nyuntulu kamalamanjanaku nyuntumilaku marrngurranguku, 'Kurtaliyi nyungukarti! Nyungu kukurnjari ngajumili ngawu kanyjilkanyjil jarrinyi pirrangapa. Yijalu manarna. Kuwarri ngarlu pikaly waninyarni. Pikaly wantunyi!"

<sup>7</sup> Palaja Jiyijajilu wurrarnajanaku, "Yu! Nyuntu yija pikaly jarrinyin nyuntumilia kukurnjari maninyajalu. Yakujun kankarni Ngarrkapa yayinyjilarrangu palinymili pikaly jarrulupiyi marrnguja waraja kurlujartiny jinaja kulpanya Ngarrkakarti. Pikaly waninyayi 99 marrnguku ngalypakataku, Ngarrka yajarniyipa. Yijangarra pikaly yiji jarrulupiyalu warajakujakun marrnguku kurlujartinyja jinajapa wirki jarrinya jina warajanga, kulpanya yajanaku Ngarrkaku.

<sup>8</sup> Palaja yimpirnajanaku nyungu wariny muwarr Jiyijajilu. "Ngurnipali 10 warnku turru-turru kalkulali mirtawalu. Palaja ngurnipali kurlu jilkuliny waraja. Ngani jilkuliny palinyju? Tili jilkuliny tilipinti, maya purumu jilkuliny, tukulu kanyjilkulinypa nyarrakurnujirri.

<sup>9</sup> Maninyajalu kamalkulinyjanaku marrnguku jintaku, 'Kurtaliyi nyungukarti! Warnku nyarra kurlu jinirni, yijalu manarna! Kuwarri ngarlu pikaly waninyarni. Pikaly wantunyi!"

<sup>10</sup> Palaja Jiyijajilu wurrarnajanaku, "Yu! Yakujun kankarni Ngarrkapa yayinyjilarrangu palinymili pikaly jarrulupiyi marrnguja waraja kulpanyaya kurlujartiny jinaja.

<sup>11</sup> Palaja wurrarnajanaku nyungu wariny muwarr, "Purlpi waninyikinyi pirirri kujarrajartiny pirirrijartinyjirri.

<sup>12</sup> Warajanga karrpungu nyirtingunyamurninyju wurrarnala japatumburniny pulanymili, 'Japartukayi, marlkarri jarrinyaajalu nyuntu ngalayalu mankulupalayi warrarn nyuntumili. Jinta pili ngalayaka warrarn kuwarri, ngajumili yungkulupijin kuwarri.'

Palaja yijalu jinta pinipuluka pala japatumurninyju.

<sup>13</sup> Palaja nyirtingunyamurninyju palinymili warrarn jinta yinyajaninyi warnkuku, yakarna ngurra, kaja yana warrarn warinykart. Palanga warrarnja palarrangujartiny warnkujartinyju kurlu pinikinyjaninyi. Karipa minpirnikinyi, witi karrinyikinyipa, yijalu kurlu pinarninga wiyyirru palinymilalu warnkulu.

<sup>14</sup> Palaja paliny ngurnjurnikinyi, warnkumajirri.

Palaja palanga warrarnja ngapamajirri jarrinyi, mungkapa warruly tikirl jarrinyikinyiyi. Mayimajirripa marrngurrangu palanga warrarnja waninyikinyiyi. Nyirtingunya pala pirirri janparr karrinyikinyi.

<sup>15</sup> Palaja palinyju kurlkarri marnikinyi, 'Wunyjurru mayi mankulurnama nganinyaku? Warrkamuku japirr malamarnajaninya. Palaja yijamarta yungkuluminyyi mayi warrkamuja.'

Warrkamu jinikinyalu ngurraraku. Palalu ngurraralu wurrarnala, 'Nyungu ngajumili ngurr-ngurr kalkulumanjaninyi, mayipa yungkulumanjaninyi.'

<sup>16</sup> Palaja ngurr-ngurrpa kalkurnikinyjaninyi. Nyampalilu munu yingama mayi paliny nganinyaku. Paliny yija janparr karrinyikinyi mayipirrayiku ngurr-ngurrmilaku.

<sup>17</sup> Yartikarra yija paliny kurlkapirli jarrinyi. 'Ngajumili japatumili warrkamu puluka mayi nganinyayi ngalypakata marlkaku yiji. Ngaju nyungungu janparr karrinyarni, janparrja marlkarri jarrarnili.

<sup>18</sup> Ngaju yankulumarna, kulpulumarnalu ngajumili japatukarti, wurralamarnala palinyja, "Japatukayi, ngajulu kurlujartiny jinirni. Panypanyarnala Ngarrkangapa panypanyarnanga nyuntungu.

<sup>19</sup> Munu ngaju wurralaminyin nyuntumili partany, puru wantulumananga ngaju nyuntumili warrkamukata, warrkamu jilamarnanga nyuntuku."#

<sup>20</sup> Jampangarra paliny yana, kulpanya palinymili japatumilikarti. Kajaja ngarrany yirrirni palinymilalu japatulu. Japatumurniny paju karrinyalu, mirti jinalu palinymilaku partanyku. Ngampal jini, ngangkurlu jinikinyipularninyi.

<sup>21</sup> Partanymurninyju wurrarnala, 'Japatukayi, ngajulu kurlujartiny jinirni. Panypanyarnala Ngarrkangapa nyuntungu. Munu ngaju wurralaminyin nyuntumili partany.'

<sup>22</sup> Munu puntaju japatumurninyju pinakarrimalu palinymilaku partanymurninyku. Wurrarnajanaku palinymilaku warrkamu pulukurrangu, 'Nyampal marayalu wurrukarra ngalypakata palinyku, wirriliyili, jujika wirriliyili jinanga, palaja parirra palinyja wirriliyili ringi!

<sup>23</sup> Palaja marrayi purlika, jinjimama, wirlaliyi, wirlanajalu kampalkuluyurru. Palaja ngalkuluminyalu nganyjurrulu ngajumilaku partanyku. Ngalypa wantuluminyi pikaly yiya!

<sup>24</sup> Ngajulu wurrarnarna nyungu ngajumili partany yijakapali marlkarri jarrima ngarramarnti. Munurla! Wankanyu! Kaja yiji yana. Yakarnaminyikapali ngarrakunyuju. Munurla! Kulpanyaji wankanyu ngarrany!

Palamaja pikalyju kurntarnikinyipa yaku jarrinyikinyiyi.

<sup>25</sup> Murrkangunyamurninyju warrkamu jinikinyi ngunarri. Palaja warrkamuja kulpanya ngurrakarti. Wangka jarrinyikinyi, pinakarrinyijaninyi kurntanaja ngurrangalu yaku jarrinyikinyipa.

<sup>26</sup> Palaja palinyju kamarnalu marrnguku warajaku palinymilaku japatumilaku warrkamu jinakataku. 'Nganja palanga pikalyju kurntarnikinyipa yaku jarrinyikinyiyi?'

<sup>27</sup> Puntaju pala marrngulu wurrarnala, 'Nyuntumili marrka kulpanya kuwarri. Nyuntumilalu japatulu wurrarnanganaku, "Nyungu ngajumili partany kulpanyaji ngajukarti. Wirlaliyi nyarra purlika, jinjimama."#'

<sup>28</sup> Murrkangunyamurniny yurnturi jarrinyi, munu yanama mayakarti, jalakarti waninyi, kajamarta.

Palaja palinymili japatu yanalu palinykartu, ngarlu japirr marna, 'Kurtali mayakarti kaninykurti.'

<sup>29</sup> Murrkangunyamurninyju yurnturijartinyju puntaju wurrarnala japatumurninyja, 'Ngaju yija nyuntuku waninyikinyirnangu, warrkamu jinikinyirnangupa nyuntuku partunupa yurranga. Ngajulu yirrkulu nyuntuku pinakarrinyikinyirnangu nyuntuku muwarrjaku. Puntaju munu yingaminyin ngaju wupartupa nanikutu. Ngajumilirrangulu jarnturrangulu yijapa nganamiyirni kuwiyi pikalyju. Munurla! Kumarri marnanyin wirlanaku kuwiyiku nganinyakupa.

<sup>30</sup> Ngaju munu nyungukapali nyuntumilikapali nyirtingunyakapali, nyuntulu nyuntumili warrarn yinyanpa. Palinyju warrarnku warnku mana, wiyyirr warnku kurlu jini mirtawanga. Kuwarri paliny kulpanyajalu nyuntulu wirlarnanpalu palinyku kuwiyi jinjimama.'

<sup>31</sup> Japatumurninyju wurrarnala, 'Partany, nyuntu waninyijin ngajungu, ngajulu kalkurnarnanta japatulu. Nyungu waninyiyinga nyuntumili nganin-nganin. Ngajulu wiyyirr kalkurnarnanga nyuntuku. Marlkarri jarrulumarnapa yija nyungu wantulupiyinga nyuntuku.

<sup>32</sup> Ngajulu wurrarnarna nyungu nyuntumili marrka yijkapali marlkarri jarrima ngarramarnti. Munurla! Wankanyu! Kaja yiji yana. Yakarnaminyikapali ngarrakunyu. Munurla! Kulpanyaji wankanyu ngarrany! Palajunjalu jurtungu pikaly yiji jarruluminyi.'#"

## 16

<sup>16</sup> [Yayipirayamulu karra marnalu]...nyarra waninyi wirtu yiji wuju partijirri kaniny nganarnangapa nyurranga. Palarranguku nganarnanga ngarnurtupa karrinyi yananyaku nyurrakartiku munu yiji, ngunjul yija palaku. Palarranguku pukun nyurranga ngarnurtupa karrinyi milpanyaku nganarnakarti munu yiji, ngunjul yija palaku.

## 22

<sup>31-32</sup> "Jayiman, Jayimankayi, Jayitanju Ngarrka japirr marna nyurraku, marrjalu yakurr manaku nyurraku. Ngajulu ngarlu japirr marnarnangu Ngarrka nyuntuku, Jayimankayi, nyuntuku yijalmarta jinaku Ngarrkanga ngarrakunyu. Nyuntulu warinykurnu jarrinya ja kulpanyaku ngajukarti ngajuku yajanaku, palarrangu jinta pukun ngajuku miranu jilamanjaninyi, janalu ngajuku yirnkulumarta yajanaku."

## John

SECOND TENTATIVE DRAFT of JOHN 3:16-21 (not final).

### 3

<sup>6</sup> Marrngumili kawu nyarra paliny palinymilijangarra pipi japatuja. Palinymili pirlurr nyarra Ngarrkamilija Pirlurrja.

<sup>16</sup> Marrngurrangu ngarlungu yija Ngarrkanga / God-ja. Palajunjalu yinyanganyjurrinyi pujamu walja palinymilingarra, palinyja yijalmarta jinakatarrangu munu pujunuku jarrinyaku, ngarramarnti wankanyuku waninyaku palinymilingi ngurranga.

<sup>17</sup> Munu ngakarnama palinymili pujamu nyungukarti ngapiku, jurtu ngakanaku wiyirru. Palinyu ngakarna nganyjurruku kartuwarra manaku wiyirru!

<sup>18</sup> Nganurtulupa yijalmarta jilkulinpili God-mili pujamungu, munu jurtu ngakalkulinyjaninyi. Wiyirr yijalmarta jinakatawayi palajunmarta kurluny-kurlunyjangarra waninyayi kakuputu, God-mili pujamu waljanga yakal manakata.

<sup>19</sup> Yakujunngarra: Tili God-milingarra milpanyanganyjurru, marrngulu warrukurlaku karrinyaya, kurlujartinykungarra karrinyaya.

<sup>20</sup> Malyparr karrinyaya Tili God-milakungarra kurlujartiny jinakata, munu milpanyakayi Tili God-milikarti, kurntanya jinangamarra.

<sup>21</sup> Wiyirr ngalypaku jinakata Tili God-milikarti milpulupiyi, jintalu yirrilapiyi wunyjurrukali warrkamu jarrinyajanaku jananga.

### 14

<sup>1</sup> Jiyijajilu wurrarnajanaku piririmartanga palinymilirrangungu, "Munu wantayi ngarlu kurluny-kurluny. Yijalmarta jiliyili Ngarrkanga, ngajumilingi kankajirringi Japartungu. Yijalmarta jiliyiji ngajungu pukun.

<sup>2</sup> Ngajumili Japartu ngurrarrangu kurrngaljartiny palinymilingi warrarnja. Yija wurrarnarninyurraku.

<sup>3</sup> Walangkarr yankulumarna Japartumilikarti. Palanga ngurra parljulumarnanyurraku. Palaja kulpulumarna, kangkulumarnanyurriyi palakarti, ngajumilikarti Japartumilikarti ngurrakarti, nyurraku waninyaku ngajungu ngarramarnti. Kunmu jarruluminyi ngajumilingi Japartumilingi ngurranga.

<sup>4</sup> Palakarti yankulumarna. Palaku ruwurtuku palakartiku miranu nyurra." Palajun Jiyijajilu wurrarnajanaku.

<sup>5</sup> Warajalu, ngapilu, Tamajilu, ngurnjurnikinyi palaku muwarrku, karra marnalu Jiyijajiku, "Nyampali! Wanyjarni yananyan? Munumpa nganarna palaku. Munumpa nganarna ruwurtuku palakartiku. Wunyjurru yajalapiyirninti palakarti?"

<sup>6</sup> Wurrarnajanaku Jiyijajilu, "Japartukarti kangkulumarnajaninyi warajapa waraja marrngu parirra ngajulungarra. Yijaku muwarrku miranu jilamarnajaninyi Japartuku ngajulungarra. Wankanyu ngarrany jilamarnajaninyi ngarrakuny ngajulungarra. Yija ngajumili muwarr: marrngu munu yiji yankuliny ngajumajirri Japartukarti. Yankulupalayi Japartukarti ngalayangarra."

**15**

5-8 ...[Jiyijajilu karra marnajanaku palinymilirrangku piririmartaku], munu yiji nganipa jilkulunyurru ngajumajirralu. Yijapa warinyju warinykurnulu yakalanyili ngaju, paliny wurrulykapali tikirlkapali jar-ruliny. Wurruly nyarra palajunmarta marrngurrangulu kuru marnay-ijaninyi minyjinaku. Ngajungungarra kuluna wantulunyurru tukulu jilkulunyurru ngajumilija muwarrja, palajunjalu nganikupa Ngarrkan-garra japirr malkulunyurru, nganipa pala palangarra jilkuliny. Ngajumilirranglu marrngurrangu ngalypakata jinakatarrangu, kakuputulu ngalypa yiji jinayi. Marrngurrangulu yirrinajalu yijalu yiji nyurra malapiyi Japartu ngajumili.

## Acts

Unknown if consultant checked.

### 2

<sup>8</sup> ...Nganyjurrulu wiyirru pinakarrinyanyijaninyi, jana muwarr pinayi nganyjurrumilingi waljarrangungu muwarrjarrangu.

### 3

<sup>19</sup> Kuwarringulungarra yijalu yiji kurlkarri malkulunyurru julkulunyurru ngarlulu warinyju, Ngarrkakartingarra jarrayalu; palajunjalungarra kurlujartinyja kurlparr pilkulinyurraku.

### 17

<sup>30</sup> Purlpija Ngarrka miranu waninyijanaku marrngurranguku, yirrkulu kurlu jinikinyayi munumpalu janamilalu. Puntaju munu kurlu jinama-janaku, yakarnajaninyi. Kuwarri yartikarra ngawu kanyjil-kanyjiljaja wurrarnajanaku wiyirru ngunarrijirriku, “Pinakarrayi! Munu kurlujartiny jinaku. Yakaliya! Kulpanya walarni jarrayi yakujani! Kuwarrija jilkulunyurru ngajumilija muwarrja.”

## Romans

Unknown if consultant checked.

### 6

<sup>4</sup> Jiyijaji Kurayiji nyarra marlkarri jarrinyajanga, nganyjurru pukun marlkarri jarrinyinyikapali; paliny jungkaranga wirrinajanga, nganyjurru pukun jungkarangakapali jarrinyinyi. Wankanyu jinajanga Japartulu, nganyjurru pukun wankanyu jirninganyjurrinyi Kurayijingi kuluna. (Yijalu yiji yarni-yarnilu Japartulu nganin-nganinkupa jinakata, munu ngarnurtulupa kurnta jinakayi.) Palajunngarra jarrinyanganyjurruku nyarra jampa warinyju ngapanga jirninganyjurrinyi. Palajunngarra Ngarrkalu jirni, nganyjurruku wariny jarrinyakupa ngalypanga yiji waninyaku.

<sup>23</sup> Marrngurrangulu kurluny-kurluny jinayi ngarrakunyu, puntaju marlkarri jarrulupiyi. Marrngurrangu nyarra Jiyijajingi Kurayijingi nganyjurumilingi Nyampalingi kulunaja puntaju ngalypanga wantulupiyi. Ngarrkalu wankanyu ngaramarnti kalkulkulinyjaninyi.

### 8

<sup>7-8</sup> Jampa marrngulu pinakarrinyalu palinymilaku waljaku ngampankataku pirlurrku, paliny yukunkata jarrinyalu Ngarrkaku. Munu pinakarrinyakalu Ngarrkamilaku muwarrku, munu yiji ngunjul palinyku! Palarrangu pinakarrinyakata waljaku ngampankataku pirlurrku, ngunjul yiji janalu munu pikaly jinakayi Ngarrka.

### 13

<sup>13</sup> Nganyjurru yijalu nganin-nganin jilkunyi jurtulu, nyarra ngalypa wiyyirru yirrinaku kurlumajirri, pirlpanga. Munu kurntany yiji nganipa jinaku, munu yawurr jarrinyaku, munu nganinyaku marlkaku, munu jintamilingi nyupanga karta karrinyaku, munu kurla-kurla jarrinyaku jintanga, munu kulipatinaku, munu mikulu yirrinaku jinta.

### 14

<sup>21</sup> Nyarra jintalu kuwiyi mirurruku yinganyikinyijanaku, palajunju wurranikinyijaninyi mirururrangu nyampali janaku. Nyuntulu pala kuwiyi ngalkuluman, nyuntu miranu ngalypangarra palajun jinaku. Nyuntu miranu munu kurluny-kurluny palajun jinaku nyuntulu. Ngurnipali nyuntulu wayin minpilamanpa kuwiyi ngalkuluman. Warinyju marrngulu ngurnipali yirrilantili palajun jinaja, palinyju kurlkarri malali kurluny-kurluny yiji palajun jinaku, palinyju pukunngarra palajun jinaku ngurnipali karrulinypa, palinyju palajunku jinaku karruliny jampa nyuntulukurra yirrininti jinaja. Palinyju kurlkarri malkuliny nyarra kurluny-kurlunyngarra yiji palajun jinaku. Palajunjalu kurluny-kurlunyngarra yiji palinyku. Ngarrkalu wirlalkuliny paliny palajun jinaja.

## 1 Corinthians

Draft.

### 5

**11** ...Jintalu marrngurrangulu wurranayarninyi Kurijin, kurlujartiny ngarrany jinayi. Ngurnipali jana kurla-kurlakatarrangu, ngurnipali lirr-jalkatarrangu, ngurnipali ngarluja nyurra marnayijaninyi jinkanajarrangu mangunykapalirrangu, ngurnipali mitulu yimpinakatarrangu, ngurnipali karikatarrangu, ngurnipali ngulyukatarrangu. Munu kulunaku marrngurrangulu palajunmarta jinakatarrangu, munu yiji nganinyaku palarrangungu.

### 6

**9-11** Yija yiji nyurra miranu nyarra kurlujartiny jinakatarrangu munu Ngarrkamilingi warrarnja jarrulupiyi. Munu mitu malkulunyurrarningu. Jinta marrngurrangu kurla-kurlakatarrangu waninyayi, jintalu ngarluja nyurra marnayijaninyi jinkanajarrangu mangunykapalirrangu, jinta karta karrinyayijanaku warinymilingi nyupajingi, jintalu piririmartalu yikarnayarninyi, jinta ngulyukata waninyayi, jinta lirrjalkatarrangu, jinta karikatarrangu, jinta mitu yimpinakatarrangu, jintalu kulilu ngulyulu mananyakatarrangu. Palajunmarta jinakatarrangu munu Ngarrkamilingi warrarnja jarrulupiyi. Jinta nyurra palajunmartangarra waninyikinyinyurru, kuwarri nyurra wariny. Nyampalilu Jiyijaji Kuray-ijilupa Pirlurru Ngarrkamilalu jinta pirnapulunyurrinyi kurlujartinyja, nyuku jirnapulunyurrinyi Ngarrkakungarra, kulurnapulunyurrinyi ngaly-panga Ngarrkanga.

### 10

**12-13** Ngurnipali nyuntulu kurlkarri malkulamanparningu nyuntulu jinan jurtulu. Mintu wantuluman puru kurlujartiny jinangamarra. Nyarralu Wirtulu Mirurrulu yirrkulu yakurr malamanta warinypa warinyku kurlujartinyku jinaku. Wiyirr pukun jinta yakurr marnajaninyi marrngurrangu palajunmartalu. Kakuputulu yijalmarta jilali Ngarrkanga, palinyju pirlurr nyuntumili tarn-tarn yiji jilamangalu yakurr manangamarra. Palajun yakurr manajalu, jurtungu nyuntu kurlujartinymajirri.

### 14

**26** Kunmungu jarrinyaja muwarr pinaku Ngarrkanga, wariny Christian-mili yinmajartiny, wariny miranu jilkulinyurrinyi Bible-ja, wariny pinakarrinyaja Ngarrkaja, wariny muwarr pinaku karrinyi muwarrju kajamartajalu warrarnjalu ngajarrijalu, wariny pala warinymili muwarr explain jinaku karrinyi. Wiyirr jilkulinyurru ngalypa jinaku nyurramili church.

**27** Yijapa wariny muwarr pinaku karrinyi muwarr warinyjalu muwarralu, yijapa kujarra muwarr pilkinypulu, yijapa kujarrapa warajakartijakun, warajangapa warajanga. Palaja wariny muwarr explain jinaku.

**28** Yijapa wariny explain-a-kata-majirri, palarrangu muwarrku pinaku muwarrju kajamartajalu muwarr pinaka, muwarr pinaku Ngarrkanga-jakun.

**29** Yijapa Ngarrkalu muwarr yinyajaninyi, jinta muwarr pinaku, kujarrapa warajalu, jinta (the rest) janamili muwarrku kurlkapirli jarrinyaku, pala ngalypa, pala kurlu?

<sup>30</sup> Yijapa warajalu muwarr pinikinyi, palaja Ngarrkalu muwarr yin-ganyalu muwarr winyja wariny marrngu, pala walangkarr marrngu muwarr pinakarrinya ja kajanaku, jama jarrinyaku.

<sup>31</sup> Nyurra wiyyirr muwarr Ngarrkaja muwarr pilkununyurru, warjanga warajanga. Palajunjalu wiyyirr miranu jarrulinyurru. Ngarrka muwarr yinganya ja, muwarr pinakata jiparnarnparninyi jalpu. Ngarrka munu karrinya ma dis-order, paliny karrinyikinyinganinyi yijalu jinaku wiyyirr.

## 15

### THE RESURRECTION

<sup>1</sup> Yuu, Christian marrkarrangupa [Christian brothers, friends, brothers and sisters ??] nyurraku kurlkapirli jinaku karrinyaarna pala muwarr ngalypakata. Nyarra "muwarr pirnirninyurraku" [wurrarnarnanyurraku ??] Pikalyjartinyju pinakarrinyinyurralu pala muwarr, yijalmarta jirninyurralu, kuwarri yirrkulu tarlka kalkurnanyurru.

<sup>2</sup> Yirrkulu yijalmarta jinakanu, nyungulu muwarrju ngalypakatalu Nyampali Jesus Christ kartuwarra marnanyurrinyi. [Actually it is the Lord Jesus Christ who saves you, when you believe the message.] Palajun yijalu yijalmarta jinajalu, munu partarl yijalmarta jirnanyurra.

<sup>3</sup> Warinyarrangulu purlpi yinku muwarr jakurl kanyajiya. Palaja pala muwarr jakurl kanganyarnanyurraku ngajulu. Pinakarrayi! Nganyjurru wiyyirr Ngarrkanga panypanyiyirni. Palajalu Ngarrkalu nganyjurru wirlanaku. Christ marlkarri jarrinyinganyjurruku kartuwarra manaku, Ngarrkamilijangarra muwarrjangarra. Palajun.

<sup>4</sup> Jungkaranga wirrinyai, kujarropa warajangangarra turlpa jini mar-lkarrija Ngarrkalu, Ngarrkamilijangarra muwarrjangarra.

<sup>5</sup> Yirrirni Peter-lu, palaja yirrirnayi Twelve-jungarra [??].

<sup>6</sup> Palaja kurrgalju yija yirrirnayi, yajanakatarrangulu 500-ju warajangangarra. Jinta [??] purlpi marlkarri jarrinyiyi. Kurrngal [??] wanka jarrinyiyi kuwarri.

<sup>7</sup> Palaja James-ju yirrirni, yarti wiyyirru Apostles-ju [??] yirrirnayi.

<sup>8</sup> Yartikala yirrirnirni ngajulu pukun nyirrirnikartilu.

<sup>9</sup> Jintanga Apostles-ja [??] ngaju puru, wupartukapali yija. [I am not even worthy to be called an Apostle - key term: Apostle ?] Purlpi wirlarnakinyirnijaninyi Christian-arrangu Ngarrkamilirranglu ngajulun-garra [key term: 'ekklasia' / 'congregation' / 'ones called together for a meeting'].

<sup>10</sup> BUT, Ngarrka ngalypa yija ngajuku [key term: gracious, showing favour to people who don't deserve it ??]. Palinyjungarra ngaju jirninyi nyungukapali kuwarri. Yuu, munu partarl ngajunga ngalypa jirniji. Munurti! Ngajulu wirtu yija warrkamu jirnirni, ngajunga palarrangulu jintalu Apostles-ju wupartujakun warrkamu jirniyi. Munurti ngajulu, Ngarrkalungarra jirnikinyiji ngajunga.

<sup>11</sup> Yijapa ngajulu muwarr pirni, yijapa palarrangu muwarr pirniyi, puru wanta, nganarnalu wiyyirru muwarr pirniyi pala warajajakun muwarr, nyarra muwarr ngalypakata yijalmarta jirnikinyiya nyurralu wiyyirru.

### NGARRKAMILI MARRNGURRANGU MARLKARRI JARRINYAJA WANKANYU KIN JILKULINYJANINYI

<sup>12</sup> Nganarnalu miranu jinakinyiyirni Christ marlkarri jarrinya ja Ngarrkalu mana kanya kanka. Jintalu nyurranga wurrarnayi marlkarrinyjarri marlkarri wantulupiyi, munu wankanyu jarrulupiyi.

<sup>13</sup> Yijapa marlkarrynyjarri marlkarri wantulpiyi, Christ-ngarra pukun marlkarri wantuliny.

<sup>14</sup> Yijapa Christ munu wankanyu jarrima, nganarnalu wurranakinyiyirni mitu wakany, nyurralu puru yijalmarta jarrinyinyurru mitungu.

<sup>15</sup> Yijapa marlkarrynyjarri munu wankanyu jilkulinyjaninyi Ngarrkalu, nganarnalu mitu marnayirni Ngarrka. Wurrarnayirni Ngarrkalu kanka mana Christ. Janamilija muwarrja, nganarnamili muwarr munu yija muwarr.

<sup>16</sup> Yijapa marlkarrynyjarri munu kanka manamajaninyi Ngarrkalu, Christ munu kanka manama Ngarrkalu.

<sup>17</sup> Yijapa Christ munu kanka manama Ngarrkalu, puru yijalmarta jirnanyurru, yirrkulu panypanyakatarrangu nyurra. ??

<sup>18</sup> Palarrangu yijalmarta jarrinyiyi Christ-japa yarti marlkarri jarrinyiyi Wikakarti Wirtukarti yanayi, munu kulpulupiyi!

<sup>19</sup> Yijapa nyungungujakun warrarnajakunngarra wankanyu waninyanga, pikaly waninyanyi Christ-ja, wurrarniyarninyi wankanyu jilinganinyi Ngarrkalu, jinta paju yija jarrulupiyinganaku! [more sorry for us than for anyone else] ??

<sup>20</sup> Pala mitu. Nyungu yija-yiji muwarr: Ngarrkalu marlkarryny jarrinya ja kankangarra mana Christ! Paliny walangkarr yana, palinyja yarti kanka malkulinyjaninyi kurrgal yiji Ngarrkalu!

<sup>21</sup> Warajalu marrngulu jinajalu wiyirr marlkarri jarrayinyi. Palakapalingarра warinyju marrngulu jinajalu wiyirr wankanyu jarrinyinyi.

<sup>22</sup> Nganyjurru marrngurrangu wiyirr Adam-milirrangu nyirrirnikartijarrangu. Palaja marrngurrangu wiyirr marlkarri jarruliny nganyjurra. Yakujun nganyjurra wiyirr Christ-milirrangu wankanyu jilkulinynganyjurrynyi Ngarrkalu. [Note the forward reference, followed by return to present time:]

<sup>23</sup> Jurtungu yajalkulupiarninyi. Christ walangkarr, palaja, kulpanaya Heaven-ja paliny, palinyja yijalmarta jinakatarrangu wiyirr.

<sup>24</sup> Palaja Christ-ju jipi jilkulinyjaninyi [all rulers and powers and forces — shall we specify Satan and the mirurrurrangu ?] Yartikarra Christ Nyampali Wirtu jarruliny. Palaja wiyirr yungkuliny Ngarrka. Palaja Ngarrkalu wurralkuliny, "Jipi!"

<sup>25</sup> Pala yartiku. Kuwarriku Christ nyampali jarrinyakupa wirlalkulinyjaninyi wiyirr yukuny pinakatarrangu palinyku.

<sup>26</sup> Yukuny pinakata nyirrirningarra Death.

<sup>27</sup> Ngarrkamili muwarr wurraninyi, "Ngarrkalu wirrirni wiyyirr kaninykurti Christ-mili jina." (Ngarrkalu munu wirralkulinyparninyi kaninykurtingi Christ-mili jina. Ngarrkalu jinta wiyyirr wirrirni kaninykurtingi Christ-mili jina.)

<sup>28</sup> Palaja, Christ wiyyirru Nyampali jarrinya ja, wirlalkulinyparninyi kaninykurtingi Ngarrkamili jina. Palajunju Ngarrka Nyampali Wirtu jarruliny wiyyirru, nyarakurnujirri.

### *JINTALU JANPA JINIJANINYI WARINYARRANGU MARLKARRINYJARIKU*

<sup>29</sup> Warinyarrangu marlkarri jarrinyiyi janpa jinamajirri. Jintalu wariny marrngu janpa jinijaninya, wurrarnayi, "Palajunju jinajalu ngalypa jilkulinyjanaku marlkarrynyjarriku." Nyarra warinyarrangulu wurrarnayi, "Marlkarri jarrinya ja, marlkarri wantuluman ngarramarnti." Janamilirrangu muwarr rurru pirnayarninyi. Yijapa marlkarrynyjarri

marlkarri wantulupiyi, janpa jinaku marrngu wariny munu ngalypa jilkuliny, munu wankanyu malkuliny!

<sup>30</sup> Kurlkapirli jarrulinyurru nganarnapa. Jinta wirlawirlalkulinyanganinyi karrpurrangu karrpu.

<sup>31</sup> Karrpurrangu warinypa wariny marlkarri wirlalajiyili! Yijarla pala muwarr! Kamparta ngaju Christ-ju jinajalu nyurranga. Yijarla pala muwarr pukun!

<sup>32-33</sup> Palarrangulu marrngurrangulu Ephesus-ja kulipartirnajiya. Jana lion-arrangukapalipa tiger-arrangukapali! Yijapa marlkarryjarri marlkarri wantulupiyi, kulipartinajalu munurti yija jirnirni! Yijapa marlkarryjarri marlkarri wantulupiyi, "Ngalkunyi, minpilkunyi, marntungu marlkarri jarruluminyi!" Jintalu wurrarnayi muwarrarrangu palakapali. Mitu muwarr janamili. Munu pinakarrayijanaku! ["Bad company corrupts good character."]

<sup>34</sup> Jurtulu yija kurlkapirli jarrayi, munu kurlujartiny jilkulinyurra [stop sinning!] Jinta nyurranga munumpa waninyayi Ngarrka. Kurntany wantayi palaku.

### KAWURRANGU NGANYJURRUMILI WARINY JARRULUPIYI

<sup>35</sup> Jintalu japiirr marnayi, "Wunyjurru Ngarrkalu kanka malkulinyjaninyi marlkarryjarri? Nganikapali kawu janamili?"

<sup>36</sup> Munu ngawu wantulinyurru. Jijirr jungkanga wirrinaja, marlkarri jarrinyaku. Palajanggarrajakun turlpalkuliny, wirtu jarruliny, warruly jarruliny.

<sup>37</sup> Pala warruly turlpanyaaja wariny yija, munu jijirrkapali.

<sup>38</sup> Ngarrka miranu palaku jijirrku, yinganya kuwarrija kawu, karrinya palangarra.

<sup>39</sup> Marrngurrangulu, kuwiyyirrangu, wirrujartinyarrangu, janpamalur-rangu majangujartiny, warinypa wariny.

<sup>40</sup> Wiyirr parlparrja waninyayi kawujartiny. Wiyirr jungkanga waninyayi kawujartiny. Warajapa waraja, wariny yija jintanga wiyyirrja.

<sup>41</sup> Karrpu munu wirlarrakapali. Wirlarra munu panikatarrangukapali. Waraja panikata munu warinykapali panikatakabali.

<sup>42</sup> Palakapali jarruliny kawuku nganyjurrumilirranguku. Nyungurrangu kawu marlkarri jarrulupiyi, wirrilapiyijaninyi jungkanga, jijirrkapali. Kanka manaja, wankanyu wantulupiyi ngaramarnti.

<sup>43</sup> Nyungurrangu kawu manyurla, munu ngalypa yirrinaku. Kanka manaja ngalypa yiji wantulupiyi, marrjapanu.

<sup>44</sup> Nyungunga warrarnja waninyaja, marrngulu warlininyi nyungu kawu. Partarl warlilkuliny wariny kawu, kanka manaja kawu, parlparrja kawu.

<sup>45</sup> Ngarrkamilalu muwarrju wurraninyi, "Nyarra walangkarr pirirri, yini Adam, marrngu wankanyu jarrinyi. Nyirrirnikata pirirri, Christ, pirlurr wankanyu jinakata jarrinyi.

<sup>46</sup> Pala kawu warlinapinti walangkarr jarrayinyi, yarti pala parlparrja kawu jarrayinyi, warlinawayi kawu.

<sup>47</sup> Ngarrkalu yarni mana pala walangkarr pirirri, Adam, kurlurluja. Pala nyirrirnikata pirirri, Christ, parlparrja milpanya.

<sup>48</sup> Marrngurrangulu nyungunga warrarnja kawujartiny Adam-kapali. Marrngurrangulu parlparrja kawujartiny Christ-kapali.

<sup>49</sup> Kuwarri nyungunu warrarnja nganyjurru kawu Adam-kapali. Yarti parlparrja kawu nganyjurrumili Christ-kapali jarrulupiyi.

<sup>50</sup> Marrkarrangu ngajumili [??], Ngarrkamili ngurra parlparrja waninyi ngarramarntiku. Nyungurrangu kawu nganyjurrumili, majangujartintypa pijirrijartiny, nyilykirr jarrulupiyi. Munu waninyakayi ngarramarnti. Partarl wantulupiyi Ngarrkamilinga warrarnja parlparrja.

<sup>51</sup> Yuu, ngurnjul ngalypakata yija wurralamarnanyurraku: Nganyjurranga jinta munu marlkari jarrulupiyi. Nganyjurra wiyirr warinykapali jarruluminyi.

<sup>52</sup> Jampangangarra jarruliny, wirlujartukapali. Angel-ju trumpet-jartinyu wirtu ngurntirri jilkuliny. Ngarrkalu wiyyirr marlkarrynyjarri kanka malkulinyjaninyi, ngarramarntiku munu nyilykirr jarrulupiyi. Palanga wankanyurrangu nyungungu warrarnja wariny jilkulinyjaninyi, nganyjurru munu marlkari jarruluminyi, wankanyu wantuluminyi ngarramarntiku.

<sup>53</sup> Nyungurrangu kawu nyilykirrpinti Ngarrkalu wariny jilkulinyjaninyi, marlkariwayipa nyilykirrwayi.

<sup>54</sup> Nyungurrangu kawu nganyjurrumili manyurla, marlkari jarrulupiyi. Ngarrkalu wariny jilkulinyjaninyi, munu yiji marlkari jarrulupiyi. Palaja marrngu wiyyirr miranu jarrulupiyi, Ngarrkamili purlpija muwarr yija:

<sup>55</sup> “Marlkari jinakatakayi, Christ-ju marlkarringarra wirlarnanta! Marlkari jinakatakayi, partarl kampalkulinynganyjurrinyi!”

<sup>56</sup> Marrngurrangulu munu pinakarrinyayi Ngarrkanga. Palaja Ngarrkamili Manguny marlkari wirlanaku. Parra-parra wirtu yija jilkulinyjanaku.

<sup>57</sup> Ngarrkalu ngakarnanganyjurraku Christ, kartuwarra manakata jarinyaku nganyjurraku. Christ-ju marlkari jirni pala marlkari jinakata. Palajalu nganyjurrulu wurralaminyi Ngarrka, “Yarranija!”

<sup>58</sup> Palajalu, marrkarrangu, tarlka wantulinyurru, janngankawayi. Yirkulu pikalyju warrkamu jilkulinyurralu Nyampali Jesus-ku. Wiyyirru jinajarrangulu palinyku Ngarrka pilaly jilkuliny. [??]

## Galatians

Unknown if consultant checked.

### 5

<sup>13</sup> Jipi, muwarr pilamarnanyurraku, Kurijinarranguku. Jintalu wurrapiiyinyurruku, "Yijalu pinakarrulunyurru Mujujumili muwarrarrangu, purlpi wirrirnijanaku Juwurranguku marrnguku. Palinyja muwarrja julkulunyurru. Munujalu nyurra munu Jiyijaji Kurayijimili." Palajun wurrapiiyinyurruku. Mitu yiji janamili muwarr. Jiyijaji milpanya Ngarrkaja kartuwarra manaku nganyjurruku. Yijalmarta jininyurrulu palinyja. Palajalungarra nyurra palinymilirrangu jarrinyinyurru. Munu Jiyijajimili jarrimanyurru pinakarrinyajalu Mujujumilaku muwarrku.

Tuku jarrulunyurru mitungumarra! Munu wurralanayurrarningu, "Jiyijaji Kurayijimili nganyjurru, puru ngakarnanganyjurrinyi. Munu pinakarruluminyalu Muwujujumilaku muwarrku. Kuwarri nganyjurrulu turrpalu jinanyi nganiwarralpirtiku karrinyanyi jinaku!" Munu palajun muwarr pilkulunyurru! Palajunja muwarrja lirrjal wirtu jarranyurrulu mayiku, kariku, mirtawaku, pirirriku, nganin-nganinkurrangu, puntaju wirlalanyurrarninyili, ngulyu marranyurrulu, warinyirrangupa kurlujartiny jilkulunyurru. Munu kurlujartinya yungkulunyurrarninyili. Munu yiji palajun jilkulunyurru! Nyurra Kurayijimilirrangu. Palajalu kuwarringulu yija yiji munu kurlujartiny jilkulunyurru, Kurayijimilia muwarrja jilkulunyurru ngaramarntilu, nyurranga ngarlungu jilkulunyurrarningu, palajunjalu yija-yiji tuku jilkulunyurrarninyi.

<sup>14</sup> Ngarrkalu wirrirninganyjurruku warinypa wariny muwarrarrangu. Yinyanganyjurrinyi palarrangu muwarr ngalypa wantuluminyi ngungku wiyyirr, ngalypa kalkuluminyijaninyi jinta, munu kurlu jilkuluminyijanaku. Waraja wirtu yiji muwarr wirrirninganyjurruku: Nyungulu warajalu muwarrju warliranajaninyi jinta wiyyirr muwarrarrangu Ngarrkaja: "Nyuntulu yijalu yiji tuku jinanparningu. Palajunju wiyyirr jinta pukun marrngurrangu tuku jilamanjaninyi nyuntulukapali tuku jinanparningu."

<sup>15</sup> Kurlkarri marnarnanyurrinyi yarranyurrulu warinykurnu. Wunyurru? Muwarrja kulilu yirrinnyurrarningu? Nyurni marnanyurrurnarningu? Tuku jilkulunyurrarningu! Palajunjalu kurlujartinya yiji jilkulunyurrarningu mujujakartijakun.

<sup>16</sup> Nyungu muwarr wirtu wurrarnarnanyurraku: Ngarrkamilaku Pirlurrku yiji pinakarrinyaku. Yirrkulu pinakarrayalu palinyku, palinyja muwarrja yirrkulu jilkulunyurru. Palajun jinajalu munu kurlujartiny jilkulunyurru. Yirrkulu wurralkulunyurrarningu, "Yijalu munu pikaly jilkulumarnarningu ngajulujakun, ngajulu pikaly jilkulumarna Ngarrkangarra."

<sup>17</sup> Miranu nyurra marrngurranguku, nganyjurru wiyyirr pirlurr ngarlu ngampankata, yirrkulu pikaly jinaku karrinyinyarningu nganyjurrulu. Nganyjurru karrinyanyi warinyku, kurluku, Ngarrka Pirlurr karrinyi warinyku, ngalypaku. Paliny karrinyi ngalypakataku, ngungkuku. Wiyyirr pinakarrinyakatarrangu Ngarrkamili Pirlurrku jurtungu jilkulinyjaninyi ngungkuku, ngarlu nyinga malkulinyjaninyi kurlujartiny jinajamarra.

<sup>18</sup> Ngarrkaku Pirlurrku yiji pinakarrulunyurrulu. Palajunjalu munu kurlkarri manaku muwarr nyarra Muwujujuja.

<sup>19</sup> Kurrngalju marrngurrangulu munu pinakarrulupiyalu Ngarrkamilaku Pirlurrku. Palarrangu jankanyakatarrangu yiji. Nyurra miranu wunyjurukata marrngurrangu, jampa ngayarta jarrynyanyi nganyjurru-mili wiyyirmili pirlurr ngampankata ngarrakuny, kurlujartinyarranguku jinaku karrynyanyi ngarramarnti, kurlujartiny jinanyi ngarramarntilu. Palajunjalu jinta kurla-kurlakatarrangu jarrynyayijanaku jintaku, jintalu piririmarta yikarnayarninyi, jintalu mirtawanyjarri yikarnayarninyi, jintalu munu jurtungu warlirnakayarningu;

<sup>20</sup> jintalu marni pinayi miyu mangunyarrangukapali, ngarluja nyurra marnayijaninyi, kurlujartinyarrangu maparnjukapali yumuny jinayijanaku jintanga, yukuny pinayarningu, warnta marnayarninyi, miku jar-rinyayarningu, wirrilyi jarrynyayi, raka-raka jarrynyayi, jinta pinayarninyi, yirru waninyayi waljangajakun,

<sup>21</sup> jintamilaku wurrukarraku karrynyayijanaku, yawurr jarrynyayi, yawurrja warajanga ngawu jarrynyayi, kurlujartinyarrangu jinayi, nganinin-ganinarrangupa jinayi palajunmarta. Palajunmarta yirrkulu jinayi pirlurralu ngampankatajalu. Palajunmarta jinakatarrangu munu wantulupiyi Ngarrkanga palinymilingi warrarnja. Yija pala muwarr. Purlpi wurrarnarnanyurraku minyirru, kuwarri yarrana kurlkapirli jinirninyur-rinyi: Palajunmarta jinajarrangu munu wantulupiyi Ngarrkanga.

<sup>22</sup> Jintalu marrngurrangulu yirrkulu pinakarrulupiyalu Ngarrkamilaku Pirlurrku. Palinyu kurlkapirli jinajaninyi marrngurrangu warinykurnu, ngalypakurnu. Ngarlu nyina manajaninyi marrngurrangulu ngarlungu wirrilapiyarningu, ngarlu pikaly jinajaninyi, ngarlu wuta jinajaninyi, palinyu nyampa-nyampa jinakatawayi jinajaninyi, ngalypakatarrangu jinajaninyi, yirnikatarrangu jinajaninyi,

<sup>23</sup> jakartakata jinajaninyi marrngurranguku, warlilapiyyarningu janamili walja ngampankata pirlurr. Wayirti? Nganurtu marrngulu karra malkuliny, "Palajunmarta jinaku kurlu. Munu palajun jilaman!" Munu yiji marrngulu palalu muwarr pilkuliny palajunmarta!

<sup>24</sup> Palarrangulu Kurayiji Jiyijajimilirrangulu yirrkulu wurralkulupi-yarningu, "Ngaju ngampankata pirlurr kurlujartinyku karrynyarni. Munu yiji! Ngajulu yakalamarna kurlujartiny. Munu ngampankata jarrumarna. Ngajulu pinakarrulumarnalu Ngarrkamilakujakun Pirlurrku!"

<sup>25</sup> Yu! Kurlumajirrilu Pirlurrju wankanyu jininganyurrinyi. Palajalu nganyjurrulu palinyku yijalu wurralaminyili nyampali jarrulinnganyjur-ruku.

<sup>26</sup> Yija munu raka jarruluminyi, yijalu munu yirrgilaminyarninyi, yija munu miku jarruluminyarningu.

## 6

<sup>1</sup> Kurijinarrangukayi, miranu nyurra nganiku Ngarrka karrynyi. Yijapa warinyu Kurijinu kurlujartiny jilkuliny. Kurlumajirriku Pirlurrku pinakarrulunyurrulu, palaja ngalypaku jurti jilkulunyurrulu pala Kurijin, jakartalu. Kurlkapirlilu jilkulunyurru — munu nyurralu jilkulunyurru nyarralukapali.

<sup>2</sup> Paju karrulunyurrulanaku ngurnjurljartinyarranguku. Yakujun jinajalu jilkulunyurru Kurayijimilia muwarrja.

<sup>3</sup> Munu nyurra-nyurra wantulunyurru. Yijapa nganurturrangulupa wuparturrangulu wurrapiyarningu, "Ngaju wirtu". Palajunmarta wurranajalu mitu marnarninyi. Yijarla wuparturrangujakun jana.

<sup>4</sup> Nyuntulu yirrkulu japirr malamanparningu, “Wunyjurru? Pala jinirni Ngarrkaja muwarrja?” Yijapa ngalypa. Palaja ngarlu ngalypa jarruluman. Munu wurralamaparningu, “Palarrangulu jintalu kurlu jinikinyiyi, ngajulu ngalypamarta jinikinyirni.”

<sup>5</sup> Nyuntumilingarra jurtu jilkuluman nyuntulu. Palajunku karrinyi Ngarrkalu. Munu parrjalamanjaninyi jinta yimpinaku.

<sup>6</sup> Yijapa marrngulu miranu jilkulinyurrinyi Ngarrkamilaku muwarrku. Puntaju nyurralu yungkulunyurrulu mayipa warnkupa wurrupa nganin-anganin nyurramilaku pirnti pinakataku.

<sup>7</sup> Pinakarrayi! Marrngulu mitu yakalali Ngarrkanga. Yijapa kurlkarri maninyi, “Ngarrka munumpa ngajuku.” Palinyju puru mitu marnarninyi! Kurlu pini yiji! Ngarrkalu yirrkulu parrjarna, tarn-tarn jilkulinypalu panpanyajaku.

<sup>8</sup> Yijapa marrngulu kurlu jilkuliny. Puntaju kurlu jilkulinypalu Ngarrkalu. Yijapa marrngulu ngalypa jilkuliny. Puntaju ngalypa jilkulinypalu Ngarrkalu. Yijapa marrngulu yirrkulu jilkuliny ngampangampankatalu pirlurru. Puntaju marlkarri jarrinya Ngarrkalu jurtu ngakalkuliny ngarammarnti. Yijapa marrngulu yirrkulu pinakarrulinypalu Pirlurru Kurlumajirriku. Puntaju marlkarri jarrinya Ngarrkalu wangkamarta wirrulkuliny, palanga wantuliny Ngarrkanga ngarammarnti.

<sup>9</sup> Palajalu purnku-purnkuwayilu nganyjurru yirrkulu ngalyparrangu jilkuluminyi. Palajun jinaja yartikarra puntaju Ngarrkalu ngalypa yiji jilkulinnganyjurru.

<sup>10</sup> Palajalu yirrkulu ngalypa jiliminyijanaku marrnguku wiyyirru, yija-yiji ngalypa jiliminyijanaku yijalmarta jinakatarranguku.

## Ephesians

Unknown if consultant checked.

### 5

<sup>18</sup> Munu yawurr jarrinyaku wayinjartiny, pala nyarra ngawu jinakata, kurlkarri manamajirrilu kurlujartiny jilaman. Yijamarta yungkulunyur-rarninyili Ngalypakatanga Pirlurrja, palinyju jipanaku nyurraku jurtungu.

<sup>28</sup> Piririmartalu nyarra yijalu yiji tuku jinayarningu jana kawu. Pala-junju pukunngarra yijalu tuku jilapiyarninga janamili mirtawanyjarri. Ngarnurtulupa tuku jinarninga mirtawa palinymili tuku jinarninyi palinyju pukunngarra.

## PAUL'S FIRST LETTER TO THE PEOPLE IN THESSALONICA

Unknown if consultant checked.

English names and loan words are now spelled as in English, with a hyphen before any Nyangumarta suffixes. All jini and pini have now been standardised as jirni and pirni. Should we change 'ngayiny' back to 'ngarlu'? Should we change 'yijalmarta jinakata' to 'Christian'? Now that the Translation Team have revised parts of it, we will need to update the English back translation to match it.

**(1:1)**

**1a** Nyungu muwarr ngajuja Paul-ja, ngapija, Silas-japa Timothy-ja pukun. Nganarnalu mirli-mirlingi yarntarniyirni nyurraku yijalmarta jinakatarranguku ngurnungungu, Thessalonica-nга. Ngarrkamiliipa Jesus-mili nyurra. Nyarra Ngarrka Japartu nganyjurrumili, nyarra Jesus Christ Nyampali nganyjurrumili. Pulanymilingarra nyurra wiyyir. Nyungu muwarr nyurraku wiyyirku.

**1b** Nganarnalu japiirr marnayirni nyurraku Ngarrka Japartu nganyjurru-miliipa Jesus Christ nganyjurrumili Nyampali pukun, pulanyju ngalypalu kalkulkulinypulunyurrinyipa ngayiny wutaku jilkulunypulunyurrinyi.

**(1:2-10)**

**2-3** Yirrkulu japiirr marnayirni Ngarrka ngalypa jilkulunyurraku wiyyirku. Kurlkarri marnayirninyurrinyi, yijalmarta jirninyurrulu Nyampali Jesus Christ-ja, palajunjalu yirnku jirnanyurru ngarrakuny. Ngayinyja nyurranga Ngarrka, palajunjalu nyurralu yirrkulu nganiwarralpirti jirnanyurru yirnkulu jirnanyurru Ngarrkaku. Nyurralu yijalmarta jirnanyurru Nyampali Jesus kulpuliny kankajirrija, palaja kangkulunyurrinyi Ngarrkamilikarti warrarnkart. Palajunjalu yirrkulu paliny yajarnanyurru. Jintalu kurlujartiny jirnayinyurraku, munu purlu jarrimanyurrulu. Nganarnalu kurlkarri marnayirninyurrinyi nganikapali nyurra. Palajalu yirrkulu karra marnayirnalu Japartu Kankajirriku, "Yarrarnija!"

**4** Yu, nganarna miranu nyurraku, Ngarrkanga ngayinyja nyurra, ngurru marnanyurrinyi palinymilirrangku jarrinyaku.

**5** Nganarna milpanyiyirni nyurraku, wurrarniyirni nyurraku, "Ngarrkalu ngakarna Jesus nyurraku kartuwarra manaku." Munu nganarnamili muwarrjalujakun yijalmarta jirninyurrulu. Munu! Ngarrkamili Pirlurr Ngalypakata milpnya nyurraku, palinyjungarra wurrarnanyurraku, "Yija pala muwarr!" Nyurralu yijalmarta jirninyurrulu palanga muwarrja. Palajunjalu nganarna miranu nyurraku Ngarrkalu ngurru marnanyurrinyi palinymilirrangku jarrinyaku.

Nyarra waninyikinyiyirninyurraku, miranu nyurra nganarnaku, nganiwarralpirti jirniyirni, nyurralu palajunngarra jilkulunyurru nganarnalukapali.

**6** Jampa pinakarrinyinyurrunganinyi, nyurralu pukun jirninyurrulu nganarnalukapali nganyjurrumilalu Nyampalilu Jesus-jukapali, yirnkulu nganiwarralpirti jirninyurru. Jintalu kurlujartiny jirnayinyurraku, partal ngampa-ngampa pinayinyurrinyi yijalmarta jinaku palinyja. Nyurralu yirrkulu pikalyju yijalmarta jirninyurrulu. Ngalypakatalu Pirlurru pikaly kalkurnanyurrinyi.

**7** Palajalu jinta yijalmarta jinakatarrangu palangajirri warrarnjajirri, Macedonia-ngapa Achaia-nga, kurlkapirli jarrinyiyi jana nyurrakapaliku jarrinyaku.

**8** Nyarra muwarr Nyampali Jesus wirtu jarrinyikinyi nyurraja ngunarrijirri wiyyirkarti marrngurrangukarti Macedonia-ngapa Achaia-nga, palangajirri. Munu palarrangulujakunwayi pinakarrinyiyi pala muwarr, jintalu pukun ngunarrijirri warrarnjajirri pinakarrinyiyi pala muwarr, palarrangu wiyyirr miranu nyurraku yijalmarta jirninyurrulu Ngarrkanga. Nganarnalu munu wurrarnamiyirnijanaku nyurra, purlpi ngarrany kaninypirti miranu waninyikinyiyi nyurraku.

**9** Marrngu ngunarrijirri warrarnjarrangu wurrarnayinyurrinyi. Jana miranungarra nyurraku, pinakarrinyinyurru nganarnamili muwarr, palajunjalu wirrini yakarnanyurrujaninyi mitu mangunykapalirrang, Ngarrkamilirrang, jarrinyaku karrinyinyurru yija-yiji. Ngarrkangarra yija wankanyu waninyi ngarrakuny.

**10** Yu, nyurralu yijalmarta jirninyurrulu nyarranga wankanyu waninyipa ngarrakuny, mimarnanyurralu palinymilaku Pujamuku Jesus-ku. Palinyju wankanyu jirni Jesus marlkarrija. Kuwarri mimarnanyurralu Jesus-ku kulpanyajaku parlparrjaja. Palinyjungarra kartuwarra marnanganyjurrinyi yijalmarta jinakatarrangu. Palajunjalu Ngarrkalu munu kulilu yirrkulinynganyjurrinyi.

## 2

(2:1 - 16)

**1-2** Yu, nyurra miranu milpanyiyirninyurraku, munu puru wurrarnayirninyurraku Ngarrkamili ngalypakata muwarr. Yijalu yijalmarta jirninyurralu. Purlpi Philippi-nga jintalu marrngurrangulu kulilu yirrirniyinganinyi, wirlarniyinganinyi, kurlujartinyja kalkurnikinyiyin-ganinyi. Miranu nyurra palaku. Palaja yakarniyirni Philippi, milpanyiyirninyurraku Thessalonica-karti. Palanga wurrarniyirninyurraku Ngarrkamili muwarr. Jintalu marrngurrangulu munu pinakarriimiyinganaku. Partal ngampa-ngampa pirniyinganinyi muwarr pinaku. Nganarna munu wirnti karrimiyirnijanaku, Ngarrkalu muwarr pinaku tarn-tarn jirninganinyi.

**3** Wurrarnikinyiyirninyurraku nyarra yija muwarr, munu purulu mitu manamiyirninyurrinyi ngapiku warnkukupa yingamanyurrunganinyi. Munu. Yirrkulu yirnkulu jirnikinyiyirni nganarnalu.

**4** Ngarrkalu ngarrakunyju parrjarnanganyjurrinyi, paliny miranungarra nganikupa nganyjurrulu kurkarri marnanyi. Palinyjungarra ngurrju marnanganinyi nganarna jakul kanganyaku nyungu palinymili yija muwarr nyurranga. Palajalu nganarnalu karrinyiyirnalu Ngarrkakungarra pikaly jinaku, munu marrngurranguku pikaly jinaku.

**5** Munu nyurra marnamiyirninyurrinyi, ngapi nyarra nyurralu puntajulu wurrarnamanyurrunganinyi yija ngalypakata. Munu lirrjalkatarrangu jarrimiyirni warnkukupa nganiwarralpirtiku.

**6-7** Munu japiirr marnamiyirninyurrinyi nyurralu nyurra manaku nganarnakupa jintalu pukun. Ngarrka miranu ngajuku, ngajulu yijalu wurrarnarni.

Nganarnalungarra wurrarniyirninyurraku muwarr nyarra Jesus Christ. Palinyjungarra nyungu ngakarnanganinyi nyurrakarti. Palajunjalu nganarnalu japiirr marnamiyirninyurrinyi nyurralu ngalypanga

kalkurnamanyurrunganinyipa warnku yingamanyurrunganinyi. Munu! Nganarna panyju karrnyiyirni palajun jinaku. Nganarnalungarra kalkurniyirninyurrinyi ngalypalu. Nyurra miranu nyarra pipilu tukulu kalkurnikinyi partany wupartu palinymili, palajunmartakapali jarrnyiyirninyurraku.

<sup>8</sup> Nganarnanga ngayinya yiji nyurra, kurlkarri marnayirninyurrinyi ngarrakuny [ngarrakunyju ??]. Palajalu munu muwarrjakun yinyayirninyurrinyi ngalypakata Ngarrkaja. Waljakapali jirniyirninyurrinyi nganarnamilikapali pukun.

<sup>9</sup> Yu, wurrarniyirninyurrakupa muwarr Ngarrkaja, warrkamu jarriyikinyiyirna mayipinti warnkuku. Munu japirr manamiyirninyurrinyi mayiku. Munu nganamayirni mayi nyurramili. Nganarna marrja warrkamu jarrikinyiyirna karrpungupa warrukartingi pukun warnkuku maninyaku nganarnamilaku. Nyurra miranu palajunngarra [palajunjungarra ??] jirnikinyiyirni.

<sup>10</sup> Nyarra wanikinyiyirninyurraku, ngarrakunyju yirnkulupa kurluma-jirralu jirnikinyiyirni Ngarrka pikaly jinaku. Nyurra miranu palaku, Ngarrka pukunngarra, yija-yiji pala muwarr.

<sup>11-12</sup> Nyurra miranu nyarra japatulu miranu jininyi yirnkulu jinaku partany palinymili, palajunmartakapali jarrnyiyirni nyurraku. Nganarnalu ngarrakunyju wurrarniyirni nyurraku yirnkulu julkulunyurru pikaly jinaku Ngarrkaku. Palinyungarria ngurrju marnanyurrinyi. Yarti palinyju kangkulinyurrinyi palinymilikarti ngalypakatakarti warrarnkart. Palajunjalu nyurralu yirnkulu nganiwarralpirti julkulunyurralu palinyungarria pikaly jinaku.

<sup>13</sup> Jampa wurrarniyirninyurraku pala ngalypakata muwarr nyurralu pikalyju pinakarryinyurru. Kurlkarri marnanyurru, "Nyungu Ngarrkamilingarra muwarr, munu Paulmilijakun." Pala yijangarra Ngarrkamili muwarr. Nyurralu yijalmarta jirninyurrulu palanga muwarrja, kurlujartiny jinajalu warinykurnu jarrnyinyurru, kuwarri yirnkungu jarrnyinyurru. Palajunjalu nganarnalu yirrkulu karra marnayirnalu Ngarrkaku, "Yarrarnija!"

<sup>14</sup> Jampa yijalmarta jirninyurrulu Ngarrkamilingi muwarrja nyurramili warrarn waljarrangu marrngurrangu kuli jarrnyiyinyurraku. Nyurra jintakapali jarrnyinyurru, palarrangu yijalmarta jinakatarrangukapali ngapinda, Judea-nga. Janamili warrarn waljarrangu marrngurrangu kuli jarrnyiyijanaku, partal ngampa pirnikinyiyijaninyi Jesus Christ yajanaku. Palajunmartakapali nyurramilalu warrarnja waljarrangulu partal ngampa pirnikinyiyinyurrinyi yajanaku palinyku.

<sup>15-16</sup> Kurrngalju Jew-arrangulu marrngurrangulu panyju karrnyiyili Ngarrkamilaku muwarrku. Purlpilu jintalu marlkarri wirlarnikinyiyijaninyi Ngarrkamili muwarr jakul kanganyakatarrangu. Nyarra purlpi wirlarniyi jintalu nganyjurrumili Nyampali Jesus. Kuwarrimartanga jintalu jurtu ngakarniyinganinyi nyurramilija tawunja. Janalu ngarrakunyju partal ngampa pirniyinganinyi kanganyaku yija muwarr Nyampali Jesus-mili nyurrakupa warinyarranguku.

Yini marnayarninyi "Jew-arrangu", wiyirr jinta ngunarrijirri ngapi yini marniyijaninyi, "Gentile-arrangu". Nganarna karrnyiyirnijanaku wiyirrku ngapi Gentile-arranguku miranu jarrnyaku Nyampali Jesus-ku, yijalmarta jinaku palinyja. Wiyirr palajun jinajarrangu Ngarrkalu kartuwarra malkulinyjaninyi. Nyarrarrangu Jew-arrangu ngampa-ngampa pinakatarrangu wiyirrku jintaku. Jana panyju karrnyikinyijanaku

jintaku Jew-arrangukupa Gentile-arranguku pinakarrinyaku muwarrku Nyampali Jesus-mili. Jana kurlujartinykatarrangu. Palajalu Ngarrka kuli jarrinyijanaku. Yartikala wirlalkulinyjaninyi marrjalu yiji.

### (2:17 - 3:13)

**17-18** Yu, nyarrarrangu Jew-arrangulu jurtu ngakarniyinganinyi nyurramilija tawunja. Palajalu yirrkulu kurlkarri marnayirninyurrinyi, ngayinya nganarnanga yiji nyurra. Kulpanyaku karrinyikinyiyirninyurraku nyurrakartiku, marrapa karrinyikinyiyirninyurraku. Ngajulu Paul-ju marlumal yakurr marnarna kulpanyaku nyurrakartiku, Jayitanju ngampangampa pirnikinyinyi.

**19-20** Yu, yija yiji nyurraku kulpanya yirrinaku karrikinyirna. Purlpikurra Nyampali Jesus wurrarniyirninyurraku, yijalmarta jirninyurrulu, kurlujartiny yakarnanyurru, ngalypakatarrangu [ngalypa jinakatarangu ??] jarrinyinyurru. Palajunjalu nyurralu pikaly jirninyurrunganinyi yija. Yarti Jesus nganyjurrumili Nyampali kulpuliny parlparrjaja. Palanga nganarnapa nyurra pukun kunmu wararr karruluminyi wangka yiji, palinyju warajanga yirrulkulinynganyjurrinyi. Miranu jarrulupiyirni nyurraku, munu puru wurrarnikinyiyirninyurraku Ngarrkamili ngalypakata muwarr. Palajunjalu pikaly yija yiji jarrulupiyirni.

## 3

**1-2** Ngajulu munu kakurnamarnanyurrinyi, ngayiny kurluny-kurluny jarrinyikinyirni nyurraku. Karrinyikinyirni nyurraku yaninya yirrinaku. Yartikarra ngakarnarna nyurraku Timothy. Timothy waraja, nganarnamilingarra paliny Ngarrkamili jakul kanganyakata, marrngurranguku jakul kanganyajanaku muwarr Jesus Christ-mili. Wurrarnarnala, "Ngaju wantulumarna nyungungu Athens-ja. Nyuntu kulpulumanjanaku Christian-arranguku ngapinga Thessalonica-nga." Paliny ngakarnarnayurraku jakurlinaku marrjalu, [??] Nyampali Jiyijajinga yijalmarta jilkulinyurrulu ngayiny tarn-tarnjupa wirntimajirralu ngarrakuny.

**3-4** Jintalu kurluny-kurlunyja wirrilapiyinyurrinyipa wirntiji pilayinyurrinyili, warinykurnu jiliyinyurrinyili yajanaja Nyampalija Jesus-ja. Nyarra waninyiyirninyurrakupa wurrarniyirninyurraku palajunmarta jilkulupiyinyurrinyi. Kuwarri nyurra miranu wurrarniyirninyurraku yija muwarr.

**5** Yu, ngajulu ngayiny kurluny-kurlunyju kurlkarri marnikinyirninyurrinyi. Kurlkarri marnikinyirni, "Ngurnipali Jayitanju yakurr marnajaninyi, palajalu ngurnipali kuta yakarnaya yajanaku Nyampali Jesus. Yijapa Ngarrkamili muwarr puruku wurrarniyirnijanaku." Palajunngarra kurlkarri marnikinyirni. Ngaju kurlkapirli jarrinyaku karriyikinyirninyurraku. Palakungarra Timothy ngakarnarnanyurraku parnjana yirrinaku.

**6** Timothy kuwarrimartangarra kulpanya. Palinyju wurrarnaji nyurralu yirrkulu yijalmarta jirninyurrulu Ngarrkangapa tuku jirnanyurrarningu ngalypalu. Ngayiny ngalypalu kurlkarri marnanyurrunganinyi, nyurralu karrinyinyurrunganaku [karrinyanyurrunganaku ??] yirrinaku nganarnaku. Palajunju pukun nganarnalu karrinyiyirninyurraku yirrinaku nyurraku.

**7-8** Yu, Timothy-lu jakul kanyaji, pikaly yiji jirninyi palinyju. Nyungungu jintalu kurluny-kurlunyja wirrirnikinyinyi. Ngayiny kurlu jirninyiyi. Kuwarri ngaju miranu nyurraku, yirrkulu yajarnanyurru Nyampali Jesus. Palajunja ngaju pikaly jarrinyarninyurraku.

<sup>9</sup> Muwarr pinaja Ngarrkaku, kurlkarri marnayirninyurrinyi, pikaly yiji nganarna. "Yarrarnija!" karra marnayirnalu Ngarrkaku.

<sup>10</sup> Yirrkulu [?? night and day] muwarr pirniyirnalu Ngarrkaku nyurraku, wurrarniyirnili karrinyiyirninyurraku yarrana yirrinaku, nyurra miranu jilapiyirninyurrinyi Ngarrkaku. Palajunjalu nyurra miranu yiji jarrulunyurralu palinyku.

<sup>11</sup> Palakungarra japirr marnayirnipulinyi Ngarrka nganyjurrumili Japartupa Jesus nganyjurrumili Nyampali, "Yijapa tukulu kulpanyakanu kawapulunganinyili palamakarti marrngurrangukarti Thessalonica-nga."

<sup>12</sup> Japirr marnayirninyurraku Nyampali Jesus, yijalu ngayinyju ngalypalu tuku jilkulinyurrarninyi. Nganarnanga ngayinyja yiji nyurra, palajunmartalu yijalu ngayinyju ngalypalu tuku jilkulunyurrarninyipa jintaku marrngurranguku pukun.

<sup>13</sup> Karrinyiyirninyurraku tarlka waninyaku pirlurrja nyurramilingi, kurlumajirri yiji waninyaku [?? May he make your hearts strong, blameless and holy]. Palajunmartalu japirr marnayirni Nyampali Jesus tarn-tarn jinaku nyurraku. Paliny kulpanyaja parlparrjaja palinymili angel-arrangujartiny [?? "with all his holy people" — does this include Christians/saints?] nyurra kurlumajirri wararr karrulunyurru Ngarrkanga nganyjurrumilinga Japartunga.

## 4

(4:1 - 12)

<sup>1-2</sup> Yu, nyurra miranu muwarrarranguku nyarra wurrarniyirninyurraku. Pala muwarrarrangu nganyjurrumilija Nyampalija Jesus-ja. Nganarnalu miranu jirniyirninyurrinyi wunyjurrukataliku waninyaku pikaly jinaku Ngarrkaku. Nyurralu pinakarrinyinyurrunganaku. Kuwarri nyungu wurrarniyirninyurraku Nyampalija Jesus-ja: Yirrkulu jirnarrayi yirnkulu yiji nganarnamilija muwarrja.

<sup>3</sup> Ngarrkalu karrinyinyurraku yakujun waninyaku. Palinykapali jarrulunyurru, kurlumajirri. Nyurra wiyyirr wantulunyurrarningu waljanganjakun nyupajingi, munu marru manaku warinymili nyupaji. Munu yiji! [?? - sexual sins - sensitive subject] kurla-kurlakatakatalirrangu

<sup>4-5</sup> Jinta marrngurrangu munampa yiji Ngarrkaku, janalu yirrkulu marru marniyijaninyi mirtawanyjarri warinymili [?? - sexual sins - sensitive subject] kurla-kurlakatakatalirrangu.

Munu janakapali jarrinyaku [??] yijalmarta jinakatawayirrangukapali. Munu! Nyurramilinga wantulunyurrujanaku waljanganjakun nyupajinga. Panyjarrmajirrilu kalkulumanpa ngalypalu jilamanpalu.

<sup>6</sup> Yijapa nyurranga warinyju ngulyulu kawali warinymili mirtawa. Ngarrkalu kuli jarrulinypalu palaku ngulyukataku. Ngarrkalungarra wirlalkulinyjaninyi palajunmartarrangu. Purlpi nganarnalu minyirru wurrarniyirninyurraku pala muwarr.

<sup>7</sup> Ngarrkalu wurrarnanganyjurruku Christian-arranguku palinykapaliku waninyaku, kurlumajirri, munu jintakapali kurla-kurlakatakatalirrangu [?? - sexual sins - sensitive subject].

<sup>8</sup> Jintalu panypanyayili nyungungu muwarrja. Palarrangulu panypanyakatarrangulu panypanyayinganakupa, panypanyayili Ngarrkanganagarra. Ngarrkalungarra yinyanyurrinyi palinymili Ngalypakata Pirlurr, munu panypanyaku palinyja.

<sup>9</sup> Yu, Ngarrkalu purlpi wurrarnanyurraku ngalypalu tuku jilkulunyurrarninyi. Munu palaku nyungungu mirli-mirlinga yarntalapinyinyurraku, nyurra purlpi miranungarra palaku.

<sup>10</sup> Yu, nyurralu ngalypalu tuku jirninyurrujaninyi Christian-arrangu nyurramilinga warrarnja, Macedonia-nga. Kuwarri wurrarniyirninyurraku, yirrkulu palajun jiliyi.

<sup>11</sup> Munu yananyaku jintamilikarti ngurrikarti yimpinaku, jinta marrngurrangu kurrpanakata. Palajunmartaja ngayiny kurlujartiny kuli jarrayili. Yirrkulu marrjalu warrkamu jiliyi. Palangarra nyarra wurrarniyirninyurrakupa purlpilu.

<sup>12</sup> Warrkamu jarrayi mananyaku warnkuku mayipinti. Palajunjalu nyurra munu kulyi yankulunyurrujanaku jintaku. Marrngurrangulu jinta wurratalapiyinyurrinyi ngalypanga yirnkungu waninyanyurru.

#### (4:13 - 5:11)

<sup>13</sup> Yuu, pinakarrayi nyungu muwarr yijalmarta jinakatarrangu purlpi marlkarri jarrinyiyipa. Karrinyiyirninyurraku miranu jarrinyaku palaranguku. Palajalu munu yirrkulu paju karrulunyurrujanaku. Jinta munumpa waninyayalu Ngarrkaku, palajalu paju karrinyayi janaku ngarrakuny. Munu paju karrulunyurru janaku nyarrarrangukapali. Nyarrarranglu yijalmarta jinakatawayirrangu Nyampalingi Jiyijajingi, jana paju yiji marlkarri jarrinyajarranguku.

<sup>14</sup> Jesus marlkarri jarrinyi. Palaja Ngarrkalu yarrana wankanyu jirni. Yijalmarta jirninyili palanga muwarrja. Palajunjalu yijalmarta jirninyili nyungungu warinyja muwarrja pukun: Yarti Ngarrkalu ngakalkuliny Jesus parlparrjaja mananyaku yijalmarta jinakatarranguku marlkarrinyjarriku. Palarranglu Nyampalilu Jesus-ju kangkulinyjaninyi Japartukarti, yijalmarta jinakatarrangu.

<sup>15-16</sup> Nganarnalu wurrarniyirninyurraku nyungu muwarr nganyjurru-milia Nyampalija Jesus-ja. Paliny kulpuliny parlparrjaja mananyaku wiyyirrkulu yijalmarta jinakatarranguku, palinyju kangkulinynganyjurrinyi Japartumilikarti warrarnkartu. Palinyju kangkulinyjaninyi kuwarri wankanyupa waninyayi, marlkarri jarrinyaja pukun. Nyarra wankanyu waninyayipa munu jana palaji walangkarra yankulupiyi kanka parlparkarti. Munu! Pala yakujun jarruliny: Nganyjurrumili Nyampalingarra milpuliny parlparrjapa kamalkulinyjanaku marrjalu marlkarrinyjarriku yijalmarta jinakatarranguku. Wirtulu angel-ju puyu pilkulinpili wirtungu trumpet-ja. Nyarrarrangulu marlkarrinyjarriku pinakarrulupiyi pala trumpet, Nyampali Jesus pukun kamanaja. Palajunja palarranglu marlkarrinyjarri wanka jarrulupiyi.

<sup>17</sup> Palaja nyarra wankanyupa waninyayi yijalmarta jinakatarrangu kanka jilkulinyjaninyi. Nganyjurru wiyyirr kuru malkulinynganyjurrinyi kanka mujungungu, nyarra marlkarri jarrinyajapa jinta pukun. Palajunngarra nganyjurru wiyyirr wantuluminyili nganyjurrumilinga Nyampalinga Jiyijajinga ngarrakuny.

<sup>18</sup> Palajunjalu nyurralu yirrkulu ngayiny tarlka jiliyarninyipa pikaly jiliyarninyi muwarrjartinyju nyungujartinyju.[??]

**1** Ngurnipali jintalu kurlkarri marnayi, "Nyanga Nyampali Jesus kulpulinynganyjurruku mananyaku? Nyanga wirlalkulinyjaninyi nyarrar-rangu kurlujartiny jinakatarrangu?" Nyampa palaji milpuliny Nyampali nganyjurrumili. Purlpi miranungarra nyurra palaku muwarrku. Munu nyungu mirli-mirlilu miranu jilamarnayurrinyi palaku. Nyanga milpuliny? Palaku wiyyirr munumpa nganyjurru.

**2** Nganarnalu nyarra wurrarniyirninyurraku paliny, nyampangarra turlpuliny. Kurrngal marrngurrangu munu mira karrulupiyalu palinyku. Yuu. Ngurnipali ngulyukata yarrali warinymilikarti ngurrikartu warrukartingi. Palarrangu jinta munumpa palaku nyanga milpulinyjanaku janamilinga ngurranga. Janalu munu mintulu mimalapiyalu palaku ngulyukataku. Palajun Nyampali Jesus wangka palaji turlpulinynganyjurruku, kurrngal marrngurrangu munu mira karrulupiyalu palinyku.

**3** Palanga janalu wurratalapiyi, "Nganiwarralpirti ngalypa. Jintalu munu kulilu wirlalapiyinganinyi." Nyarrarli palajunmarta muwarr pirnalupiyipa, palangangarra Nyampali Jesus ngayarta jarruliny. Palinyju wirlalkulinyjaninyi nyampalu palaji, marrjalu yiji wirlalkulinyjaninyi, partal kuku jarrulupiyalu. Nyurra miranu nyarra mirtawanyjarrilu ngayinykarralu partany kanganyiyijaninyi, parra-parra wirtu, munu partal ngampa pilkulupiyijaninyi partany ngayarta jarrinyaku. Palajunkapalingarra jarrulinyjanaku marrngurranguku, nyarrarrangu palal waninyiyipa, kulpanyajaku munu mira karrulupiyalu Nyampaliku Jesus-ku. Jana partal kuku jarrulupiyalu palinyamarra. [??]

**4-5** Yuu, nyurra munu jintakapali, Ngarrkamiliwayi. Jana waninyayi warrukurlangakapali, Satanmilinga warrukurlanga. Jana munu mira karrinyakayalu Nyampaliku Jesus-ku kulpanyaja. Palinyja kulpanyajanga jana marrpalapiyi. Nyurra munu janakapaliwayi. Nyurra Ngarrkamili, waninyinyurru palinymilinga tilinga. Mimarnanyurralu Jesus-ku. Palinyja kulpanyajalu nyurra munu marrpalkulunyurru, pikaly jarrulunyurru.

**6** Nganyjurru munu warrukurlangawayi waninyayinyi. Munu karta karruluminyi ngarrakuny jintakapali. Parrilyju mimalaminyalu mira-mira Nyampaliku Jesus-ku kulpuliny. Nganyjurru munu wantuluminyi karikatarrangukapali, nyarrapa minpirnayi yirrkulu.

**7** Marrngurrangu karta karrinyayi warrukartingangarra, karikatarrangulu minpirniyi warrukartinga pukunngarra.

**8** Nganyjurru munu wantuluminyi palarrangukapali, jana warrukurlanga waninyayi. Nganyjurru Ngarrkamili, nganyjurru waninyayinyi palinymilinga tilinga. Palajunjalu nganyjurru yirnkungu wantuluminyalu, munu karikatarrangukapali. Nganyjurrulu yirrkulu Ngarrkanga yijalmarta jiliminyilipa ngalypalu tuku jiliminyarninyi. Kurlkarri malaminyi, Nyampali Jesus-jungarra kangkulinynganyjurrinyi palinymili Japartumilikarti warrarnkartu. Palajunjaja Ngarrkalu tuku jilkulinynganyjurrinyi Satanamarra.

**9-10** Ngarrkalu mananganyjurrinyi, palinymili waljarrangu jirninganyjurrinyi. Pala jirni munu kulilu yirrinakupa wirlanaku nganyjurru. Mananganyjurrinyi tuku jinaku, kangkulinynganyjurrinyi palinymilikarti waljakarti warrarnkartu. Palajunjangarra ngakarnanganyjurruku Jesus nganyjurrumili Nyampali. Palinyngarra kartuwarra manaku marlkarri jarrinyinganyjurruku. Yarti wiyyirku kulpulinynganyjurruku mananyaku, wankanyurrangupa marlkarrinyjarri. Palinyju kangkulinynganyjurrinyi wiyyirr palinyja waninyaku ngaramarnti.

**11** Palajunjalu kurlkapirli jilkulunyurrarninyi nyungulu muwarrju,

palaja munu ngayiny kurluny-kurluny jarrulunyurru. Nyurralu purlpilu pala muwarr wurrarnikinyurrarningu. Palajun yirrkulu jilkulunyurru tarn-tarnju yijalmarta jinaku.

<sup>12</sup> Yu, japiirr marnayirninyurrinyi ngalypalu kurlkarri malkulunyurru-janinyi nyurramili nyampalirrang. Ngarrkalungarra ngurrju marna-janinyi palarrangu nyampalirrang nyurraku. Janalu yijalu yiji tuku jir-nayinyurrinyipa miranu jirniyinyurrinyi nyurra yijalmarta jinakatarrang yirnkungu yananyaku.

<sup>13</sup> Palajunmarta warrkamu jirnayinyurraku. Palajunjalu yijalu yiji ngalypalu kurlkarri malayijaninyipa ngayinya nyurramilinga jiliyijaninyi.

Munu warnta-warnta malkulunyurrarninyi.

<sup>14</sup> Yakujun jinaku karrinyiyirninyurraku: Jinta nyurranga warrkamu jinakatawayi, wurrabayjanaku warrkamu jinaku. Jinta nyurranga wirnitikata, wurralkulunyurrujanaku, "Yijalmarta jilayili Ngarrkanga! Tukulu kalkkulunyurrinyi palinyjungarra. Wirntiway!" Jinta nyurranga nyangalykata, wurrabayjanaku, "Yijalu yajalayi Nyampali Jesus!" Kintilu jilkulunyurrujanaku wiyyirku.

<sup>15</sup> Jintalu kurlujartiny jiliyinyurrakulu, munu nyurralu kurlujartiny jilkulunyurrujanaku puntajulu. Tuku jilkulunyurrarninyi ngalypalu yiji, jinta pukun tuku jilkulunyurrujaninyi, munumparrangu Nyampaliku Jesus-ku.

<sup>16</sup> Yirrku yiji pikaly wantulunyurru.

<sup>17</sup> Yirrkulu muwarr pilkulunyurraru Ngarrkaku.

<sup>18</sup> Karra malkulunyurraru yirrkulu Ngarrkaku, "Yarrarnija!" Palajun karra malkulunyurraru ngalypangapa kurlungu pukun. Christian-arrangulu palajunju jinaku. Palajunmartakungarra Ngarrka karrinyi.

<sup>19-20</sup> Yijapa Ngalypakata Pirlurr muwarr pilkulunyurraku, munu palal yakalkulunyurru. Yijapa warinyu marrngulu wurralkulunyurraku palinyu muwarr pirninyi muwarr Ngarrkaja. Munu panpanyaku palanga muwarrja.

<sup>21-22</sup> Kintilu yiji pinakarrulunyurru pala muwarr. Japiirr malkulunyurrarningu, "Yija pala muwarr? Ngarrkaja pala?" Yijapa yija-yiji, palajangarra muwarra jilkulunyurru. Yijapa mitu yiji, munu Ngarrkaja, kurlu pala. Munu kurluja muwarrja jilkulunyurru.

### (5:23 - 28)

<sup>23</sup> Ngarrka waninyinyurraku nyurranga, palinyjungarra ngalypanga kalkurnanyurrinyi. Palajunja ngayiny wuta waninyinyurru. Japiirr marnarnanyurraku Ngarrka, tuku jilkulunyurrinyi, kurlumajirri. Japiirr marnarnanyurraku ngalypalu kalkunaku nyurramili pirlurrpa kurlkapa kawu pukun. Kurlumajirri yakujunngarra wantulunyurru ngarrakuny. Warajanga karrpunga Jesus Christ Nyampali nganyjurrumili kulpuliny parlparrjaja, palinyu wurralkuliny, ngalypa yiji nyurra, kurlumajirri.

<sup>24</sup> Ngarrkalungarra ngurrju marnanyurrinyi palinymili waljarrangu jarrinyaku. Paliny yirnikata, ngalypa yiji jilkulunyurrinyipa tukulu kalkkulunyurrinyi palinyu.

<sup>25</sup> Yuu, japiirr malkulunyurrunganaku Ngarrka, tukulu kalkulkulinnganinyi nganarna pukun.

<sup>26</sup> Nyurra wiyyirr Nyampali Jesus-mili. Wiyyirr nyurra warajanga jarrinya-janga pikalyu yampu malayarninyi.

<sup>27</sup> Ngajulu Paul-ju wurrarnarnanyurraku, Ngarrkalu karrinyinyurraku pinakarrinyaku nyunguku muwarrku. Read-amu jilkulunyurru nyungu mirli-mirli wiyirru pinakarrinyaku.

<sup>28</sup> Japirr marnarnanyurraku Jesus Christ nganyjurrumili Nyampali yirrkulu ngalypalu tukulu kalkulkulunyurrinyi. Jipi.

## KURIJINARRANGUKU NGAPINGA, THESSALONICA-NGA (PAUL'S SECOND LETTER TO THE PEOPLE IN THESSALONICA)

<sup>1</sup> Nyungu muwarr ngajuja Paul-ja, ngapija, Silas-japa Timothy-ja pukun. Mirli-mirlinga yarntarniyirninyurraku yijalmarta jinakatarranguku ngur-nungungu, Thessalonica-nga. Ngarrkamilipa Jesus-mili nyurra. Nyarra Ngarrka Japartu nganyjurrumili, nyarra Jesus Christ Nyampali nganyjur-rumili. Pulanymilingarra nyurra wiyyir.

<sup>2</sup> Japirr marnayirninyurraku Ngarrka Japartu nganyjurrumilipa Jesus Christ nganyjurrumili Nyampali pukun, ngalypalu kalkulkulinypulunyur-rinyipa ngayiny ngalypa jilkulinypulunyurrinyi.

### *Pikaly yiji jirninyurrunganinyi.*

<sup>3</sup> Yuu, kurlkanga jirninyurru yiji. Nyurralu yijalu yijalmarta jirninyur-rulu Ngarrkangapa ngalypalu tuku jirninyurrarninyi. Yirnku palajun-ngarra jirninyurru. Palajunjalu pikaly yiji jirninyurrunganinyi. Palakun-garra yirrkulu karra marnayirnalu Ngarrkaku, "Yarrarnija!"

<sup>4</sup> Nganarnalu nyurra marniyirninyurrinyi jintanga Kurijinarrangungu ngurnarrijirri tawunjarrangu. Wurrarnayirnijanaku nyurralu Thessalonica-nga yijalmarta jirninyurrulu Ngarrkanga, kurlkanga jirninyurru yija. Jinta marrngurrangu kuli jarrinyiyinyurrakupa kurlujartiny jirniyinyurraku, Nyampali Jesus yajanaja partal ngampa-ngampa pirnikinyiyinyurrinyipa. Yirrkulu ngarrany yajarnanyurru paliny.

*Ngarrkalu wurralkulinyngeanyjurruku, "Ngalpayi ngajumili warrarnja!"*  
[??]

<sup>5-7</sup> Palajunjalu Ngarrkalu yarti wurralkulinyngeanyjurruku, "Ngalpayi ngajumili warrarnja!" Palanga paliny Nyampali wantuliny ngarramarnti. Ngarrka ngalypa yiji, yirnkulu jininyi ngarrakuny. Puntaju nyarrarrangu kulikatar-rangu wirlalkulinjaninyi. Palanga nyurralu ngalypa jilkulinyngeanyjurruku, nganarnaku pukun. Ngarrkalu palajun jilkulinyngeanyjurruku parlparrja kulpanyaja Nyampali Jesus. [??]

Yuu! Ngarrkalu ngakalkuliny Jesus nganyjurrumili Nyampali parl-parraja wikanga lalyurr-lalyurrkarranga kaninykurnu, palinymilirrang marrjapanu angel-jartiny pukun.[??]

<sup>8</sup> Palangangarra Ngarrkalu wirlalkulinjaninyi nyarra palinyku munumparrangu. Panypyankinyiyili ngalypanga muwarra Nyampalimili Jesus-mili, panyju karrikinyiyalu. Palajunjalu wirlalkulinjaninyi wiyyir.  
[??]

<sup>9-10</sup> Jurtu ngakalkulinjaninyi ngarrakuny. Nyarrarrangu marrn-gurrangu munu wangka palanga wirtunga pirrpanga Jesus-milinga waninyakayi. Munu yiji! Nyampalinga Jesus-ja kaja yija yiji wantulupiyyi ngarramarnti.[??]

Wariny jarrulinyngeanyjurruku, palinymilirrang nganyjurru. Nyampalinga Jesus-ja wangka yiji wantuluminyi. Wiyirru yijalmarta jinakatarrangulu paliny nyurra malaminyi. Yuu, yijalmarta jirninyurrulu nganarnamili muwarrja Nyampaliku Jesus-ku. Palajunja nyurra palanga

wantulunyurru palinya. Warajanga wiyyirru nyurra malaminyi Nyampali Jesus, nyurratalupa nganarnalupa jintalu yijalmarta jinakatarrangulu pukun.

*Japirr marnayirninyurraku Ngarrka, palinykapali yarni malkulunyurrinyi.*

<sup>11</sup> Palajunjalu yirrkulu japirr marnayirninyurraku Ngarrka, palinykapali yarni malkulunyurrinyi palinya. Ngarrkalungarra ngurru marnanyurrinyi palinymili jarrinyakupa palinykapali jarrinyaku, kurlumajirri. Nyurratalu yijalmarta jirninyurrulu palinya. Palajunjalu yijalu yiji warrkamu jirninyurratalupa yirnkulu jirninyurru palinykungarra pikaly jinaku. Japirr marnayirninyurraku Ngarrka nyurramilaku pirlurrku tarlka jinaku, yijalmarta jilkulunyurru yirnkungu ngaramarnti.

<sup>12</sup> Yirnkulu jilkulunyurru, palajunjalu jintalu nyurra malapiyi Jesus nganyjurrumili Nyampali. Palinyu nyurra pukun nyurra malkulunyurrinyi ngalypa jinaja. Ngarrkalupa Nyampalilu Jesus-ju ngalypalu kalkulkulinypulunyurrinyi.

## 2

*Nyampali Jesus munu puripi kulpanyama.*

<sup>1-2</sup> Yuu, ngurnipali warinyu wurratalu nyurru muwarr palajun: "Nyampali Jesus Christ puripi kulpanya, kanyajaninyi marrngurrangu palinymilirrangu Ngarrkamilikarti warrarnkarti." Mitu pala muwarr. Ngurnipali warinyu wurratalu muwarr yakujun: "Ngarrkamilalu Pirlurru wurrarnaji nyarra muwarr." Ngurnipali jintalu wurraliyili nganarnalu yarntarniyirni mirli-mirlinga, "Nyampali Jesus puripi kulpanya." Pinakarriyajalu muwarr palajunmartaja, munu ngayiny kurlu jarrulunyurru, munu wirnti karrulunyurru.

<sup>3a</sup> Munu yijalmarta jinaku palajunja muwarrja. Puru yiji mitu marnayinnyurrinyi.

*Kurlujartinykata Marrngu turlpuliny.*

<sup>3b</sup> Walangkarra palaji wariny marrngu turlpuliny, paliny Satan-mili, paliny yini Kurlujartiny Marrngu. Kurrgalju yiji marrngurrangulu pinakarrulupiyalu palaku Marrnguku, warinykurnu jilkulinyjaninyi Ngarrkangamarra.

<sup>4</sup> Nyarralu marrngulu wurralkulinyparninyi wirtu yiji paliny. Jakurlulkulinyjaninyi marrngurrangu pinakarrinyaku palinyku. Kajalkuliny Ngarrkamilinga Temple-japa karra malkulinyjanaku wiyyirku, "Ngajungarra nyarra wirtu yiji kankajirrija. Yijalu yiji jilkulunyurru ngajumilija muwarrja. Munu yijalmarta jilkulunyurrulu Ngarrkanga. Munu pinakarrulunyurrujanaku jintaku mangunyarranguku. Yijalu ngajuku pinakarrulupijinyurru!" Yuu, palajun jilkuliny painyju.

<sup>5</sup> Nyarra wanikinyinyi palanga wurrarnikinyiyirninyurraku nyungu kurlujartinykata marrngu. Kurlkarri malkulunyurru nyungu muwarr.

<sup>6</sup> Nyarra munu ngayarta jarrima, warinyu ngampa pininyi ngarrany. Nyurra miranu palaku ngampa pinakataku. Yarti pala kurlujartinykata marrngu ngayarta jarruliny Ngarrkamili muwarrja.

<sup>7</sup> Kuwarri kurrgalju marrngurrangulu yirrkulu panypanyayili Ngarrkanga. Satan-ju kukujarrilu kanganyajaninyi warinykurnu, kurlujartinykurnu. Yartikala Ngarrkalu purlu jilkulinypalu nyarra ngampa pinakata.

**8-10** Palajangarra pala nyarra Kurlujartinykata Marrngu ngayarta jar-ruliny. Yuu, Satan-ju ngakalkuliny paliny, mitu marnarrulinyjaninyi maparnjartinyu wirtujartinyjupa. Jilkuliny warinypa wariny kurlujartiny, mitulu palinymilalu ngurra malkulinyjaninyi jinta warinykurnu, kurlungu. Kurlkarri malapiyi paliny wirtu yiji, Ngarrkakapali, pinakar-rulupiyalu palinyku.

Palaja Jesus nganyjurrumili Nyampali kulpuliny pirrpanga wirtungu yiji parlparrjaja. Wurralkulinypili Kurlujartinykatanga Marrngunga, "Marlkarri wirlalamarnanta kuwarri." Yija, palalu muwarrju wirlalkuliny.

Nyarrapa pinakarrinyiyili palanga Kurlujartinykatanga wirlalkuliny-janinyi wiyyirr Ngarrkalu. Pinakarrimayi muwarr yija yiji Ngarrkamili, yi-jalmarta jirnimayili palinyja, kartuwarra marnamajaninyi. Yakal marnayi muwarr Ngarrkaja. Palajunjalu jurtu ngakalkulinyjaninyi ngarramarnti.

**11** Pala yija! Jana panyju karrinyiyi pinakarrinyaku Ngarrkamilaku yijaku muwarrku. Palajunjalungarra Ngarrkalu ngakumpa jilkuliny-janinyi wiyyirr kurlkapirlja. Janalu kurlkarri malapiyi warinykurnu, pinakarrulupiyalu palaku kurlujartinykataku mitukataku marrnguku.

**12** Pikalyju kurlujartiny yajarnayi. Ngarrkalu wirlalkulinyjaninyi palar-rangru yakal-yakal manakata palinymilaku yijaku muwarrku.

*Nyampalilu Jesus-ju ngurrju marnanyurrinyi palinymilirranguku jar-rinyaku*

**13** Yuu, Nyampalinga Jesus-ja ngayinya waninyinyurru. Purlpi walangkarrangungarra ngurrju marnanyurrinyi palinymilirranguku jar-rinyaku. Ngakarnanyurraku palinymili Ngalypakata Pirlurr kartuwarra manaku nyurraku, ngalypakatarrangu jinaku nyurraku pukun. Pinakar-rinyinyurru Ngarrkamili yija muwarrpa yijalmarta jirninyurrulu. Palajunjangarra Ngarrkamilirrangru jarrinyinyurru. Palajunjalu nyurraku yirrkulu karra marnayirnalu Ngarrkaku, "Yarrarnijayi!"

**14** Ngarrka karrinyanyurraku Nyampalikapali Jesus Christ-kapali jar-rinyakupa waninyaku palinyja ngarramarnti. [??] Palajunjalungarra ngakarnanganinyi nyurrakarti jakul kanganyaku palinymili ngalypakata muwarr.

**15** Yuu, tarlka wantayi! Ngarrakunyu yijalmarta jiliyili nyarra muwarr wurrarniyirninyurraku palanga, mirli-mirlinga muwarr yarn-tarniyirninyurraku.

**16-17** Ngarrkanga nganyjurrumilinga Japartunga ngayinya yiji nganyjurru wiyyirr, palinyju ngalypalu kalkurnanganyjurrinyi. Palajunjalu miranu jarrinyinyi nganyjurru marlkarri jarrinyaja yarrana wankanyu jilkulinynganyjurrinyi, palinyja waninyaku ngarramarnti. Nganarnalu jipirr marnayirnipulinyi Jesus Christ nganyjurrumili Nyampalipa Ngarrka Japartu nganyjurrumili, pulanyju ngayiny tarlkapa wirntimajirri kalkulkulinypulunyurrinyi, yirrkulu nyurralu yirnkulu jirnarrayipa yirnku muwarr pirnarrayi.

### 3

*Ngarrkanga muwarr pilkulunyurrunganaku.*

**1** Yuu, jipirr marnayirninyurrinyi, nyurralu Ngarrkanga muwarr pilku-lunyurrunganaku puntaju. Jipirr malkulunyurrunganaku ngayiny tarlka jilkulinyganinyi nyampalu jakul kangkulupiyirnijanaku muwarr Nyampali Jesus jintanga marrngurrangungu ngurnarrijirri. Karrinyayirnijanaku

pinakarrinyaku pala muwarr, janalu pukun yijalmarta jilapiyili, wunyjrrulu kapali Jakul kanganyikinyiyirninyurraku muwarr Nyampali Jesus-mili. Pinakarrinyaja, pikalyju yijalmarta jirninyurrulu. Palajunju pukun nganarnalu karrinyayirnijanaku jintaku pikalyju yijalmarta jilapiyili.

<sup>2</sup> Jinta marrngurrangu ngayiny jalypakata, janalu munu yijalmarta jinakayili muwarrja Nyampalinga Jesus-ja. Kuliny-kuliny jarrinyiyi nganarnakupa wirlaliyinganinyili. Japirr malkulunyurru Ngarrka nganarnaku paliny mingka wantuliny nganarnaku palarrangungamarra kurluny-kurluny marrngurrangungamarra.

<sup>3</sup> Jesus nganyjurrumili Nyampali waninyi nganyjurrunga ngarramarni, munu wirrina parnpilkulinynganyjurrinyi. Yija yirnkukata paliny. Nyurra yirnkukata julkulunyurrinyi palinyjupa tuku julkulunyurrinyi Satan-jamarra.

### *Yirnku jinarrayi Ngarrkamilija muwarrja.*

<sup>4</sup> Nyampalilu Jesus-ju ngayiny ngalypa jirninganinyi, nyurralu kuwarri yirnku jirninyurru. Yijalu yirnku jirnarrayi nganarnamilija muwarrja.

<sup>5</sup> Japirr marnayirninyurraku Jesus-ju nganyjurrumilalu Nyampalilu miranu julkulunyurrinyi Ngarrkaku, nyurralu yijalu ngayinyja julkulunyurrarningu Ngarrka. Japirr marnayirni Nyampali Jesus, nyurralu ngayinyju tarlkalu julkulunyurrulu muwarrja Ngarrkamilija. Jesus-ju nganyjurrumilalu Nyampalilu ngarrakunyu jirnikinyi palinymilija Japartumilija muwarrja. Jintalu kurlu jirnikinyiyalu palinyku, nganin-nganin kurlujartinya wurrarnikinyayili, palinyju yirrkulu ngarrany jirnikinyi palinymilija Japartumilija muwarrja. Nganarnalu karrinyiyirninyurraku yirrkulu palajunju jirnarrayi Ngarrkamilija muwarrja.

### *Warrkamuwayikatarrangu mayiku jamilkulunyurrujaninyi.*

<sup>6</sup> Yuu, purlpilu wurrarniyirninyurraku, yija yiji warrkamu jarrulunyurru waljaku warnkuku mayipintiku mananyaku. Jintalu nyurranga panpanyayili nganarnamilia muwarrja, puru kajan-kajarnayi, warrkamumajirri. Pinakarrayi! Wurralapiyirninyurraku muwarr Jesus Christ-ja nganyjurrumilia Nyampalija. Kajamarta wantulunyurru janangamarra palajunkatarrangungamarra, munu kululkulunyurrujaninyi.[??]

<sup>7</sup> Nyurra kurlkapirli, nyurralu julkulunyurru nganarnalukapali. Nyarra wanikinyinyi palanga, warrkamu jarrikinyiyirni, munu puru kajan-kajarnamiyirni.

<sup>8</sup> Munu japirr marnamayirninyurrinyi mayiku. Mayiku warnku yinyayirninyurrinyi. Warrkamu jarrinyiyirni. Nganarnalu yija warrkamu jarrikinyiyirna karrpungapa warrukartinga warnkuku waljaku mananyaku nganarnamilaku. Munu mayi ngulyulu nganamiyirninyurruka nyurramili.

<sup>9</sup> Nyampalilu Jesus-ju ngakarnanganinyi wurranaku muwarrku palinymilaku nyurranga. Palajunjalu japirr marnamiyirninyurrinyingarra mayiku. Puru yakarniyirni. Nganarnalu miranu jinaku karrikinyiyirninyurraku wunyjurruku julkulunyurru. Palajunjalu marrja yiji warrkamu jarrikinyiyirna. Yakujun pukun ngarra julkulunyurru nyurralu, warrkamu jarrulunyurru waljaku mayipintiku warnkuku nganarnalukapali.

<sup>10</sup> Nyarra wanikinyinyi palanga minyirrju wurrarniyirninyurraku, "Warrkamuwayikatarrangu mayiku jamilkulunyurrujaninyi."

<sup>11</sup> Wurrarniyinganaku jintalu, nyurranga jinta munu warrkamu jarinyakayi. Yani-yaninyayijanaku jintamilikarti ngurrakarti, muwarr yimpin-yimpinakata.

<sup>12</sup> Nyungu muwarr Nyampalija Jesus Christ-ja wurrarnayirnijanaku palarrangungu marrngurrangungu minyirrju: "Minyirr jarrayi! Warrkamu jarrayi yiya mayipinti warnku waljaku!"

<sup>13</sup> Yuu, wiyyirra nyurranga wurrarnayirninyurruaku nyungu: Purnku-purnku karrinyawayi, yirnkulu jinarrayi.

<sup>14</sup> Ngurnipali jintalu nyurralu, nyungungu mirli-mirlingi yakal malku-lunyurrunganaku. Yini malayijaninyi palarrangu marrngurrangu. Munu kululkulunyurrujaninyi palajun jinakatarrangu. Palajunjalu jana yiya kurntanya wantulupiyarningu.

<sup>15</sup> Munu yukuny pilkulunyurrujaninyi. Jana Nyampali Jesus-milirrang pukun nganyjurrukapalingarra. Palajunjalu jinulu wurralkulunyurrujanaku kurlujartiny jirniyi, jurti jilkulunyurrujanaku yirnkuku jinaku.

*Jesus-ju nganyjurrumilalu Nyampalilu ngayiny ngalypa jirninganyjirnyi.*

<sup>16</sup> Jesus-ju nganyjurrumilalu Nyampalilu ngayiny ngalypa jirninganyjirnyi. Japirr marnayirninyurruaku, palinyju ngayiny ngalypa jilkulunyurrinyi ngarramarnti. Japirr marnayirninyurruaku, nyurranga paliny wantulunyurruaku ngarramarnti.

<sup>17</sup> Nyungungarra milyanga ngajulu Paul-ju yarntarnarnanyurruaku parirrju ngajumilalu. Yakujunngarra yarntarnarna milyanga mirli-mirlingarrangu ngajumilirrangu wiyyirra.

<sup>18</sup> Japirr marnayirninyurruaku Jesus Christ nganyjurrumili Nyampali, ngalypalu tukulu kalkulkulinyurrinyi palinyju. Jipi.

## 1 Timothy

Unknown if consultant checked.

### 3

2-3 Kurijin nyampali nyarra wantuliny yija yiji kurlumajirri. Paliny yija yirti kaniny marrngu wantuliny, paliny nyampali waljaku palinykun-garra...munu yawurrkata,...munu kulikata...

## 2 Timothy

Unknown if consultant checked.

<sup>7</sup> Ngarrkanga yirnkulu yijalmarta jininyalu nganyjurrulu. Palajalu Ngarrkalu Ngalypakata yinyanganyjurrinyi palinymili Pirlurr, yija yiji kurlumajirri paliny. Nyarra Pirlurr Ngarrkaja nganyjurrungu kawungu wantuliny ngarramarnti. Munu wirntikata jinanganyjurrinyi. Munu kurntanykata jinanganyjurrinyi. Yirnkuku ngarlu nyina marnanganyjurrinyi Ngarrkamilija muwarrja jinaku. Ngarlu nyina marnanganyjurrinyi ngarlungu jinaku Ngarrkapa marrngurrangu pukun wiyirr. Ngarlu nyina marnanganyjurrinyi ngalypa jinakupa kurluku yakanaku pukun.

### 3

<sup>4</sup> Kurlkarri mala nyarra wurrarnarnangu, marrngurrangu kurluny-kurluny yija yiji jarrulupiyi. Marrngurrangu wantulupiyi ngampankata, lirrjalkata warnku, nyurra-nyurrukata, rakakata, nyurni manakata, panpanyakata pipi japartku, munu puntaju yinganyakata, wirntimajirri Ngarrkaku; pajuwayikata, yukuny pinakata, jintaku mitu yimpinakata, rirra kararrkata, kulikata, malyparrkata ngalypaku, mitulu kuku jar-riku jinayi marrnguku kurlu pinaku, turrpalu kurlujartinyu jinakata, munu kurlkarri malkulupiyi nganipa jarruliny puntaju, wirtu-wirtu jar-rinyakata; pikaly jinayarninyi janalujakun, munu Ngarrka ngarlungu jinakayiyarningu; Kurijinkapalirrang mitukata wantulupiyi, munumpa wantulupiyi Ngalypakataku Pirlurrku, palinyu Kurijinarrangu ngarlu yirnkukata jinajaninyipa kurlujartinyku karrkanaku jinajaninyi. Munu yiji kulunaku marrngurrangu nyarrarrangu kurlujartiny jinakatarrangu.

## **Titus**

Unknown if consultant checked.

<sup>7</sup> ...Kurijin nyampali...yija yiji, munu nyurra-nyurrakata wantuliny, munu pipurru wirrilyakata, munu yawurrkata, munu kulikata, munu warnkuku lirrjalkata.

### **3**

<sup>14</sup> Christian-arrangulu miranu jarrinyaku yirnkumilaku muwarrkupa ngalypalu warrkamu jilkulupiyi ngarramarntilu. Munu puru kajan-kajanaku watapirti.

## Hebrews

Unknown if consultant checked.

### 12

1-2 Kurrngalju purlpijalu marrngurrangulu parrjarnayinganyjurrinyi. Palajunjalu parnpina wirrulkunyijaninyi nganin-nganin nyarra jinu jinan-ganyjurrinyipa jurtuku jinaku, nyarra kurlujartinyjurrangu pukun karrpa-karrpa warlirnayinganyjurrinyi. Nganyjurrulu yajalkunyi Jiyijaji jalypalu, kurlkarri malkunyi palinya ngarrakunyu. Palinyu walangkar-ranguja jipikartijakun Ngarrkanga yijalmartaku jinanganyjurrinyi yijalu. Marlkarri jarrinyaku nayilamu jinajalu kanka mungkanga kurntany yiji yiji. Jiyijaji miranungarra palaku, paliny munu purlu jarrima, kurlkarri marnikinyi yarti Ngarrkalu pikaly yiji jilkuliny, nyarra kurntany puru yakarna. Kuwarri kajaninyi wangka yiji Ngarrkanga.

## James

Unknown if consultant checked.

13-15 Kurlkarri mala, ngarnurtulupa karrinyi kurlujartiny jinaku, munu yiji palinyju karra malkuliny, "Ngarrkalu kurlujartinyku jinaku yakurr marnanyi." Munu nganurtulupa yakurr marnaka Ngarrka kurlujartiny jinaku, Ngarrkalungarra munu yakurr malkuliny ngarnurtupa kurlujartiny jinaku. Nganyjurrulungarra waljalu karrinyanyi kurlujartiny jinaku ngarramarntilu, kurlkarri manajalu yakurr marnanganyjurrinyi palangarra kurlujartiny jinaku. Palajunmarta yirrkulu kurlujartiny jinaja nganyjurru marlkarri jarruluminyi.

### 4

7-8 Wurrallala Ngarrkanga, "Nganikupa karrinyajin jinaku, palangarra jilamarnangu nyuntuku." Ngarntanaku Mirurruku Wirtuku, mirti jar rulumangalu. Wangka jarra Ngarrkanga, paliny wangka jarrulumangu nyuntungu...

## 1 Peter

Unknown if consultant checked.

What the Apostle Peter wrote to the Christians in his day about living the Christian life (Last verse of chapter 3 and 4:1-5 not yet checked!).

**18-19** Nyurramilirrangulu walangkarrangujalu kurlujartiny jinikinyiyi, palajun nyirrnikartijalu yakurr marnayijaninyi. Palajunngarra nyurra pukun waninyikinyinyurru. Nyurra miranu nyarra warajaku, Jiyijaji Kurayijiku, marrngurrangulu marlkarri wirlarniyi. Janalu palinyja palajun jinajalu, paliny ngapikapali jarrinyi, kukurnjari wupartukapali jarrinyi, nyarra kukurnjari purrpurn yiji, wurrkumajirripa pitamajirri, purlpilu kurlujartiny jinajalu marrngurrangulu, marlkarri wirlarnikinyiyi kukurnjari, wurrarnikinyiyalu Ngarrkaku, "Kurlujartiny jinirni. Palajunjalu nyungu wirlarnarna kukurnjari, puntaju ngaju munu wirlalaminyinkurra palaku kurlujartinyku, puru ngakalaminyin." Jiyijaji Kurayiji nyarra kukurnjarikapali jarrininganyjurru. Wirtu yiji jininganyjurru, nganyjurrumili Nyampalingarra marlkarri jarrininganyjurru! Jayitanju munu warlirnakanganyjurrinyi, kuwarringulu Jayitan munu nyampali nganyjurru! Jiyijajilu kartuwarra marnanganyjurrinyi, warajamalngarra jirni wiyirru marrngurranguku ngarramarnti. Palajunjalu minyirru yijalu yiji kurlkarri malkulunyurru paliny, wirntilu pukun.

## 3

**22** Jungkanga waninya Christ parlparrkarti yana. Palanga Ngarrkanga kajaninyi marrjanyukarti. Palinyngarra wirrirni Ngarrkalu nyampali wirtu angel-arrangukupa nyampalirrangukupa, jungkangapa parlparrja, wiyirru nyarrakurnujirri.

## 4

**1-5** Jungkanga Christ kurluny-kurlunyja wirrirnikinyiya. Munu ngampa pinamajaninyi. Palaja palajun kurlkarri malayi Christ-kapali, nyurralu! Kurluny-kurlunyja waninyajanga nyurra kurlu jinajamajirri, nyurralu miranu wantulupiyi warinyarrangu, nyurralu jipi kurlu yakarnanyurru ngarramarntilu. Kuwarringulu wantulinyurru nyungungu jungkanga Ngarrkamilingi nganirrangupa jilkulinyurru, munu nyurramilingi waljanga jilkulinyurru. Nyurralu jipi kurluny-kurluny yakarnanyurru nyarra purlpilu jinikinyinyurrupa nyarrarrangukapali Ngarrkamajirrinnangukapali. Nyurralu nganiwarralpirti kurntanymajirrilu jinikinyinyurru, kurla-kurlaku kurlkarri marnikinyinyurru, yawurr jarrinyikinyinyurru, ngananyikinyinyurru lirrjalju kuwiypa mayi wirtu, kurlujartinyju yikarnikinyinyurrarningu, nyurralu marni pinaja mirurrukapali mangunyarrangu, ngayinya nyurra marnikinyinyurrujaninyi, Kuwarri Ngarrkangalu panypanyakatarrangulu japirr manayinyurrinyi yarrana palajun jinaku, palarrangu kurlujartinyarranguku turrpau-turrpalu jinakata. Munu jinajalu nyurnpaly jarrulupiinyurraku. Yartikala Ngarrkalu japirr malkulinyjaninyi, pirlpalkulinyparninyi nganirrangupu nyarra kurlujartintypa jinikinyiyi palarrangulu marrngurrangulu. Muwarr yungkulinyjaninyi ngungku yiji wankarrangupa marlkarrinyarri.

**5**

<sup>8</sup> Mintu wantayi! Parrjarn-parrjarnarra! Pala mirurru yukuny-yukunykata nyurraku. Pala wirtu kuwiyi, ngapi, yini layin pala, ngarurr-ngarurr karra manakata, marnti yananyi kuwiyi ngananyaku kanyjin-kanyjininya. Palakapali marnti yananyi Mirurru Wirtu kanyjin-kanyjininya marrnguku warlinakanu mujujakapaliku jinaku.

<sup>9</sup> Tarn-tarn wantayi, kakuputulu yijalmarta jilayili Ngarrkanga. Mirurru ngarntarn-ngarntarnarra! Jintaku miranu nyurra, Ngarrkanga yijalmarta jinakatarrangu ngunarrijirringi yajarri kurlungungarra nyurrakapali.

## 1 John

Unknown if consultant checked.

<sup>5</sup> Nyungungarra muwarr wurrarnanganyjurrku palinymilalu partanyju, nganarnalu kuwarri wurrarnayirninyurraku nyurranga: Ngarrka kurlumajirri yija yiji, yija yiji paliny ngalypakata ngarramarnti.

<sup>6</sup> Ngurnipali nganyjurrulu wurralaryili, ngalypangakapali waninyanyi Ngarrkanga, kurlujartiny pukun jinanyi. Palajun jinajalu nganyjurrulu mitu wurrarnanyi, munu jinanyi Ngarrkamilija muwarrja.

<sup>7</sup> Jampa waninyanyi kurlumajirri, palinypakali kurlumajirri waninyi, pikaly yiji jarruluminyi warajanga, palajunjalu palinymilalu partanyju Jiyijajimilalu pijirrilu janpa jinanganyjurrinyi wiyyirra kurlujartinyja nganyjurrulu jinaja.

<sup>8</sup> Yijapa nganyjurrulu wurralaryarninyili nganyjurru kurlujartinyjamirri, yija yiji mitu marnayinyarningu nganyjurrulu waljalungarra, yijalu jurtu wurrarnakanyi.

<sup>9</sup> Jampa wurrarnanyili Ngarrkanga kurlujartiny jinanyi, yijakata paliny, jilkuliny palinymilija muwarrja, jurtulu jilkuliny: puru yakalkulinynnganyjurrinyi kurlujartiny jinaja, janpa jilkulinynganyjurrinyi wiyyirra kurlujartinyja jinaja nganyjurrumilija.

## **Revelation**

Unknown if consultant checked.

### **22**

<sup>5</sup> Palanga wantuliny warrukurlamajirri, Ngarrkalungarra pirrpa jilkuliny wiyirr, janyjamajirripa lampumajirri. Nyarrarrangu yijalmarta jinakatarrangu wirtukapali nyampalikapali wantulupiyi ngarrakuny.

## **Nyungurrangu Payipulja Muwarrarrangu Walangkarranguja Yajarnayarninyi Yakujun**

Unknown if consultant checked.

**Nyungulu mirli-mirlilu kalkurnajaninyi  
muwarr marlu Payipulja. Miranu  
wantuluman palarranguku, wunyjurrulu  
walangkarrangu yajarnayarninyi.  
Kurrngal yiji muwarr Payipulja.**

**Nyungungungarra mirli-mirlingi jinta  
murlkurrangu wirrirniyirnijaninyi  
jukurrangu muwarr. Yijapa karrulunyurru  
muwarrku makunurranguku  
yirrilkulunyurru Payipulja.**

### **Original postface information**

The Nyangumarta title of this book is, "Nyungurrangu Payipulja Muwarrarrangu. Walangkarranguja Yajarnayarninyi Yakujun." In English this title means, 'These are Stories From The Bible. From The Beginning They Followed Each Other In This Way'.

Nyangumarta is understood by approximately 1,000 Aborigines living in the eastern half of the Pilbara Region of Western Australia.

This book was originally printed by Mission Publications of Australia (PO Box 21, Lawson NSW 2783) as a Ngaanyatjarra—English edition. The English text at the bottom of the pages was prepared by Amee Glass and Dorothy Hackett of the Ngaanyatjarra Bible Project, Alice Springs, and the equivalent Ngaanyatjarra text was then prepared in collaboration with Ngaanyatjarra speakers, and printed at the top of the pages.

Using that Ngaanyatjarra—English edition as a model, an expanded English text (not included here) was prepared by Brian and Helen Geytenbeek of Wycliffe Bible Translators. It was translated into Nyangumarta under their supervision, and the translation checked by several Nyangumarta speakers, and substituted for the Ngaanyatjarra text in this edition.

The illustrations are by Jack Finch of Mission Publications of Australia.  
BIBLE OVERVIEW Inland Nyangumarta 18 Mar 1996.

1  
(Title Page)

Nyungurrangu Payipulja Muwarrarrangu.  
Walangkarranguja Yajarnayarninyi Yakujun.

These Are Stories From The Bible.  
From The Beginning They Followed Each Other In This Way.

(Nyangumarta language)

Ngarrka walangkarranguja waninyi, (Japartupa Partanypa Pirlurr Ngalypakata), palinjakun.

NGARRKA:  
Japartu  
Partany  
Pirlurr Ngalypakata

**3**

Ngarrkalu parlparrpa jungkapa kujungurru jini. Wiyirr jinijaninyi kujungurrungupa jungkangapa parlparrja. Palaja pirirripa mirtawa pukun jinipulinyi. Marrngu wiyyirr, warrarnjarrangu ngurnarrijirrija, milpanyinyi nganyjurru wiyyirr nyarrajajirri.

**4**

Palaja pirirrilupa mirtawalu panypanyapululu Ngarrkanga.

**5**

Palajalu marrngurrangu wiyyirr panypanyakata jarrinyiyi Ngarrkaku ngaramarnti. Kurlu jinakatarrangu jarrinyiyi.

**6**

Punjaja Ngarrkalu ngakarna wirtu mangkurtu marlkarri jinaku wiyyirku kurlu jinakatarranguku. Wanka jinijaninyi Nawapa palinymili mirtawapa partanykarrangupa ngarrayarrangu, palarrangujakun. Jinta ngapalu warnan kanyajaninyi.

**7**

Pala mangkurtuja marrngurrangu kurlujartiny ngarrany, panypanyayili yirrkulu Ngarrkanga. Palinyju purlpi wurrarnajanaku, "Jirrja yarrayi warrarnja." Wurrarnayarningu, "Munu jirrja yankulupiyirni, wantulupiyirni nyungungu kunmu. Yarni malapiyirni wirtujina maya, wirtu warnkukapali, kankakurnu, parlparrkartu." Palajunjamarra Ngarrkalu yinyajaninyi warinypa wariny muwarr, ngakumpa jarrinyiyarningu. Palajangarra ngunarrijirri yanayi.

**8**

Walangkarranguja Ngarrkalu wurrarnarningu, "Ngalypa jilamarnajanaku wiyyirku marrngurranguku." Palajunjalu kuwarri warajanga pirirringi wurrarnalu, yiningi ngapingi, Yayipurayamungu, "Yakalaman nyuntumili warrarn walja. Kaja yiji yankuluman, ngajarrirrangumilikarti warrarnkartu. Yananya jurti jilamarnangu ngajulu." Ngarrkamilija muwarrja yana. Punja waninyi palanga warrarnja warinyja.

**9**

Yayipurayamu marlkarri jarrinyaja (1,991 BC), palinymili karluji jamujipta janamili partanykarrangu nyirrnikartija kurrgal jarrinyiyi. Yanayi warrarnkartu warinykartu, Yijipikarti.

Yayipurayamu  
Yayijaka  
Jayikapu

**10**

Punja palanga waninyiyi Yijipingi. Palaja Yijipijalu nyampalirrangulu wily pinapintilu warrkamu jinikinyiyianinyi marrjalu warnkumajirriku, wirlanangulu.

**11**

Punjaja Ngarrkalu ngakarnajanaku Muwujuju, wanka jinaku. Muwujuju kanyajaninyi Yijipiija jalakarti. Ngarrkalu wangalju wirtulu larr pini kujungurru, partijirri kaniny pipurru yanayi, punarranga. Ya-jarniyijaninyi Yijipiija jurljarrangulu mananya walarni jinaku. Ngarrkalu kujungurru walarni jinijanaka, wiyirr yamarnajaninyi.

**12**

Palaja pirranga yanayi. Kujarraja wirlarrraja kajarnayi warnku-martaji wirtumartaji. Palanga Ngarrkalu 10 Muwarr Wirturrangu palinymili yinyali Muwujujungu palarranguku marrnguku. Palaja pirranga partunurrangungu 40-ngi miranu jinikinyijaninyi yijalmarta jilipiyili, nganin-anganinku jilipiyi palinymilija muwarrja. Palaja Muwujuju marlkarri jarrinyi. Ngarrkalu manajanaku Jajuwa nyampali.

**13**

Yayipurayamungu wankanga Ngarrkalu wurrarnala, "Nyuntumilir-rangu kurrngal wantulupiyi. Yakalapiyi nyungu warrarn. Punjaja walarni jilamarnajaninyi nyungukarti." Yartikarra yiji Jajuwalu kanyajaninyi palakartijakun warrarnkartu.

**14**

Jajuwa marlkarri jarrinya ja yakarnayi Ngarrka, panypanyikinyiyili palinymilingi muwarrja. Palajalu Ngarrkalu kulijarturrangu ngakarna-janinyi wirlana wirntji pinaku, yarrana pinakarralupiyili, yarrana jilipiyili palinymilija muwarrja.

**15**

Punjaja (1,050 BC) marrngurrangu panyju karrnyiyalu Ngarrkaku nyampaliku. Wurrarnikinyiya, "Marrnguku karrnyiyirni nyampaliku!" Ngarrkalu manajanaka pirirri kulijartu, yini Juul. Yarti yakarna Ngarrka, warinykurnu yana.

**16**

Juul marlkarri jarrinya ja (1,010 BC) Ngarrkalu mana Tayipiti, nyampali jinijanaku. Palinyja ngarlungu yiji Ngarrka, pinakarrnyikinyalu, jinikinyi Ngarrkamilija muwarrja. Ngurra jini ngapangi, tawunja, Jirujalamungu.

**17**

Palaja (970 BC) Jalaman, Tayipitimili partany, nyampali jarrnyijanaku. Palanga tawunja Jirujalamungu yarni marna wirtujina maya Ngarrkaku. Yamarna miji-mijilu karnukapalilu. Pala maya yini marnayi Timpul.

**18**

Palaja (930 — 603 BC) marlu nyampali jarrnyiyi, manayijaninyi warajapa waraja. Marrngulu yirrkulu panypanyikinyiyili Ngarrkanga. Mungkapa warnku manayijaninyi, marni pinayijaninyi miyu mangun-ykapalirrang, palarrang japiirr marnikinyiyijaninyi, "Tuku jilkulunyur-runganinyi." Nyurra marnikinyijaninyi palarrang, wurrarnikinyiya Ngarrka puru yiji.

**19**

Palajalu punjaja (603 — 586 BC) Ngarrkalu ngakarnajaninyi jurljarrang ngajarri marrjalu wirlanaku. Ngartarniyijaninyi tawunarrang wiyyirr, kamparniyi pala wirtu tawun, Jirujalamu, pala Timpul Ngarrkaku pukun kamparniyi, marrngu wiyyirr kanyayijaninyi kajakarti warrarnkartu, Pa-pilunkarti.

***20***

Papilunja waninyaja (586 — 538 BC) kurlkarri marnikinyiyi Ngarrka. Parnpina wirrirniyijaninyi janamili miyu mangunykapalirrang. Palaja Ngarrkalu walarni jinijaninyi warrarnkart waljakarti.

***21***

Palaja (537 — 516 BC) yarrana yarni marnayi pala tawun Jirujalamupa wupartumartajakun timpul.

***22***

Punjaja (6 BC) Ngarrkalu ngakarna partany walja palinymili, marrngu jarrinyaku. Ngayinya waninyikinyi, ngurlu-ngurli jarrinyi. Palinymililu pipilu, Miyirilu, partany kanya ngapingi, tawunja, Pijiliyamungu, palanggarra ngurli-ngurli miral jarrinyi. Yini marna "Jiyijaji" Ngarrkamilija muwarrja.

***23***

Palaja (26 — 30 AD) Jiyijaji marrngu jarrinyaja yaninyikinyi miranu jinikinyijaninyi marrngurrangu Ngarrkaku, wurrkujartiny ngalypa jinikinyijaninyipa. Palinyju wurrarnikinyijanaku, "Yijalmarta jilkulunyurru Ngarrkanga, yirrkulu jilkulunyurru palinymilija muwarrja."

***24***

Palaja (30 AD) kurlukata yatilarrangu malyparr karrinyiyili, warlirniyi. Jurljarrangulu parirr kujarranykartu yarntarniyi mungkanga. Jiyijaji marlkari jarrinyaja warinyu kawu palinymili ngalpa jini jurntingi. Kujarraja warrukartija Ngarrkalu yarrana wanka jini, turlpanya marlkarija.

***25***

Palaja (30 AD) 40-nji karrpungu Jiyijaji marlumal miral jarrinyikinyijanaku palinymiliku marrngurranguku. Palinyju wurrarnajanaku, "Nga-julu ngakalamarnanyurruku Pirlurr Ngarrkamili Ngalypakata, nyurranga kaninskyurtingi wantulunyurruku. Mimalkulunyurralu palinyku." Palaja Jiyijaji kulpanyalu kanka Ngarrkakarti.

***26***

Palaja (30 AD) Ngarrkamili Pirlurr Ngalypakata milpanyijanaku kaninskyurtiku waninyaku yijalmarta jinakatanga. Palinyju yirrkulu kurlkapirli jilkulinyjaninyi jurtuku, jilkulupiyi Ngarrkamilija muwarrja, miranu jilkulupiyijaninyi wiyyirr marrngurrangu Jiyijajiku. Ngani wurrarpirtiku Jiyijajilu purlpi miranu jinijaninyi palinymilirrang, palangarra miranu jinaku jintaku.

***27***

Palaja (30 AD-ja) muwarr jakul kanganyikinyiyi ngalypakata, "Marlkari jarrinyajalu Jiyijajilu kartuwarra marnanganyjurrinyi. Palajalu yijalmarta jinakatarrangu kajalapiyili ngarrakuny Ngarrkanga, munu jurtu ngakalkulinyjaninyi."

***28***

Punja ngarranyja (30 AD-ja kuwarrikartijakun) Jiyijajingi yijalmarta jinakatarrangulu jakul kanganyi-kinyiyijanaku nyarra muwarr ngunarri-jirri, warrarn-jarrangu wiyyirrja. Kuwarri nganyjurrulu pukun wurralkulunyijanaku wiyyirrja marrngurrangungu muwarr nyarra ngarrany.

***29***

Warajanga karrpungu Jiyijaji kulpuliny palinymilija muwarrja. Palanggarra wanka jilkulinyjaninyi yijalmarta jinakatarrangu marlkarija.

Palaja mujungungu kunmu jilkulinyjaninyi nyarrarrangupa wiyyirr jintya yi-jalmarta jinakatarrangu kuwarri wanka waninyayipa, kanka yankulupiyi palinykarti.

*30*

Palaja kalkulkulinyjaninyi ngarrakuny Ngarrkamilingi warrarnja.

*31*

Palanga palarrangu Jiyijajingi panypanyakatarrangu Ngarrkalu warnta malkulinyjaninyi. Palaja jurtu ngakalkulinyjaninyi, wantulupiyi kaninykurti wikanga wirtungu ngaramarnti.

**PINAKARRULUMAN! NYUNGU MUWARR  
NYUNTUKU**

**Nyungu muwarr nyuntumili.  
Tuku jilaman.**

**Tukulu parrjalaman nyuntulu  
Palaja miranu jilaman wariny**

Unknown if consultant checked.

# 1

Munumpa: Nganurtulu jini jungkapa kujungurru paṛlparr?

Miranu jinakata: Warajalu.

# 2

Munumpa: Nganurtulu jini karrpupa wirlarrapa panikatarrangu wiyyirr?

Miranu jinakata: Palalu warajalu.

# 3

Munumpa: Nganurtulu jini mujungupa wirlujurapa ngapa?

Miranu jinakata: Palalu warajalu.

# 4

Munumpa: Nganurtulu jini kangkarupa maruntupa ngurlarn?

Miranu jinakata: Yijalu palalu warajalu.

# 5

Munumpa: Nganurtulu jinipulinyi walangkarrangu pirirripa mirtawa?

Miranu jinakata: Yijalu palalu nyarralu jinipulinyi. Palinyju jinijaninyi wiyyirngarra yija, paṛlparrjapa jungkangapa kujungurrungu.

# 6

Munumpa: Nganurtu yini paliny?

Miranu jinakata: Paliny marlu yinijartiny. Wurrarnala pala purpjia mirtanyanga yatilja nyampalingi, ngapingi, Muwujujungu, "Ngajumili yini 'Ngaju Ngarramarnti Ngajungarra'." Wariny yini "Ngarrka". Jintalu yini marnayi "Japarti Kankajirri".

# 7

Munumpa: Wunyjurru? Ngarrkalu muwarr pini marrnguku?

Miranu jinakata: Yu. Purpimalu muwarr palinyju yinyajanaku wiyyirrku. Ngalypakata pala muwarr. Marni pini kapuralyja warnkungujirri. Yinyali nyarranga mirtanyanga yatilja, Muwujujungu.

# 8

Munumpa: Wunyjurru? Marrngurrangulu pinakarrinyikinyiyili muwar-ru?

Miranu jinakata: Munu. Palaku malyparr karrinyiyili, panpanyikinyiyili.

# 9

Munumpa: Ngani jini Ngarrkalu?

Miranu jinakata: Wurrarnajanaku, "Yijapa yirrkulu panypanyalupi-jinyurru ngajumilingi muwarrja, marlkarri jarrulunyurru."

# 10

Munumpa: Wunyjurru? Marlkarri jarrinyiyi jintu?

Miranu jinakata: Yu. Piririmartapa mirtawanyjarripa partanykarrangu marlkarri jarrinyiyi.

# 11

Munumpa: Wunyjurru? Marlkarri jarrulamarna ngaju?

Miranu jinakata: Yu. Ngarrkalu wurrarnajanaku, "Yijapa pinakarrinya wirrilaman ngajumili muwarr, marlkarri jarruluman."

# 12

Munumpa: Wunyjurru? Panypanyarnala palinymilingi muwarrja?

Miranu jinakata: Yu, panypanyanpili palinymilingi muwarrja, nyuntu pukun. Ngarrkalu wurrarnajanaku, "Wiyirru kurlujartiny jinayi. Wiyirr yiji ngajungu panypanyakatarrangu."

# 13

Munumpa: Wunyjurru? Ngarrka kulijartiny ngajuku?

Miranu jinakata: Ngarrkanga ngayinyja wiyyirr marrngu. Kuli paliny marrnguku jampa kurlujartiny jinayi.

# 14

Munumpa: Wunyjurru? Marlkarri wirlalaminyi?

Miranu jinakata: Pinakarra! Ngarrkanga ngayinyja nyuntu yija yiji, palinyja ngayinyja marrngurrangu wiyyirr. Munu wirlanaku karrinyijanaku. Palinyngarra marlkarri jarrinyinganyjurruku wiyyirru, wanka jinaku nganyjurruku.

# 15

Munumpa: Ngarrka munu marlkarri jarrinyaka! Wunyjurru marlkarri jarrinyinganyjurruku?

Miranu jinakata: Pinakarra! Ngarrka munu marrngukapali. Marrngu warajajartiny pirlurrjartiny palinyja kaninykurti. Ngarrka wariny. Ngarrka kujarrapa waraja pirlurrarrangujartiny palinyja kaninykurti.

Kujarrapa waraja pirlurr:

Japartupa Partanypa Ngalypakata Pirlurr.

Japartumili yini Japartu Kankajirri.

Partanymili yini Jiyijaji.

Wariny Pirlurr kujarra yinijartiny,

Ngalypakata Pirlurrpa Kurumajirrikata Pirlurr.

Palarrangu kujarrapa waraja pirlurrarrangu Ngarrkanga kaninykurttingi waninyayi. Ngarrka warajajakun yiji, kujarrapa waraja pirlurrarrangujartiny.

Purlpimalu Ngarrkalu ngakarna Jiyijaji jungkakarti nyungukarti, kawujartinyku jarrinyaku. Miral jarrinyi partany, wirtu jarrinyi, marrngu

jarrinyi. Pala Ngalypakata Pirlurr milpanya, kaninykurtingi Jiyijajingi waninyili.

Palajun Ngarrka marrngu jarrinyi, palinymili ngurra jini marrngurran-gungu.

**# 16**  
Munumpa: Wunyjurru? Jinta yinijartiny Jiyijaji?

Miranu jinakata: Yu. Jiyijaji yini marlujartiny. Yinilu palinymilalu miranu jiniyinganyjurrinyi palinyku.

Wariny yini "Yimanyuwil". Palalu wurraninyi, "Ngarrka Waninya Nganyjurrungu".

Wariny yini "Jiyijaji". Palalu wurraninyi, "Ngarrkalu Wanka Jininganyjurrinyi".

Marlumal yini marnayi Jiyijaji "Kurayiji". Palalu yinilu miranu jinan-ganyjurrinyi Jiyijajiku, Ngarrkalu wirrirni nyampali nganyjurruku.

**# 17**  
Munumpa: Walangkarrangu Jiyijaji Ngarrkanga waninyi ngarrakuny. Nganiku Ngarrka yakarna, nyungukarti warrarnkartu milpanya marrn-guku jarrinyaku?

Miranu jinakata: Yija palinyja ngayinyja nyuntu, palinyja ngayinyja marrngurrangu wiyyirr pukun. Palajunjalu marrngu jarrinyi, marlkari jarrinyaku nyuntuku, marlkari jarrinyijanaku wiyyirrku marrngurran-guku. Kartuwarra marnanganyjurrinyi wanka jinaku, Ngarrkalu munu wirlalkulinynganyjurrinyi.

**# 18**  
Munumpa: Ngani? Jiyijajilu kurlujartiny jini?

Miranu jinakata: Munu. Yijalu munu kurlujartiny jinama. Ngarrkamilaku muwarrku pinakarrinyikinalu ngaramarnti.

**# 19**  
Munumpa: Wurrarnajin panypanyakatarrangu Ngarrkanga marlkari jarrulupiyi. Jiyijajilu munu panypanyala Ngarrkanga, munu kurlujartiny jinama. Palajanga nganijalu marlkari jarrinyi?

Miranu jinakata: Munu marlkari jarrima palinymilaku kurlujartinyku. Marlkari jarrinyi nyuntumilaku kurlujartinyku. Marlkari jinajalu kartuwarra marnanta nyuntu, kartuwarra marnajaninyi jinta wiyyirr. Palajalu marlkari jarrinyi.

Nyuntulu kurlujartinyju ngarlu kurlu jinin Ngarrka, pajuju pinin.

Kurlujartinyja nyuntumilija kulilu yirrirnikinyinti, wirlalamanta.

Purlpi Jiyijajilu kartuwarra marnanta.

Yijalmarta jilkulumanpili Jiyijajingi, Ngarrkalu munu wirlalamanta nyuntumilaku kurlujartinyku.

Purlpi wirlarna Jiyijajingarra nyuntumilaku kurlujartinyku, puru ngakanaku nyuntuku.

Yijalmarta jilamanpili Jiyijajingi nyuntulungarra.

Palajalu Ngarrkalu munu kulilu yirrilamanta, nyuntu partany palinymili jilamanta, ngarlu ngalypa wantulumangu.

Ngalypakata Pirlurr palinymili wirlilamangu jurti jinaku ngalypaku.

Munu wirlalamanta. Munu yiji!

Wankanyu ngarramarnti jilamanta!  
Marlkarri jarrinya yankuluman Ngarrkakarti, palinyja kajalaman ngarramarnti.

# 20  
Munumpa: Wunyjurru? Jiyijaji marlkarri waninyi ngarramarnti?

Miranu jinakata: Munu. Kujarraja warrukartija Ngarrkalu wanka jini marlkarrija. Palaja kanka yana Japartukarti, Ngarrkakarti.

# 21  
Munumpa: Ngarrkalu ngalypa yiji jinaja ngajuku.  
Kurlujartiny jinirni.  
Ngarrkalu ngakarna Jiyijaji kartuwarra manaku ngajuku.  
Kuwarringulu munu kulilu yirrilaminyi, ngarlu ngalypa wantulupiji.  
Palinymili partany jininyi.  
Wankanyu jininyi ngarramarnti.  
Ngajuntu wirrirniji palinymili Ngalypakata Pirlurr jurti jinaku ngalypaku.  
Puntajulu wunyjurru jilamarna ngajulu palinyku pikaly jinaku?

Miranu jinakata: Kuwarri Jiyijajingi yijalmarta jinaja, Kurijin yatil japiirr malaman, miranu jilamanta wiyyirku Ngarrkamilaku, ngapanga jilamanta. Palajunjalu jurti jilamanjaninyi wiyyirr jampa kuwarringulu Jiyijaji nyuntumili nyampali, yirrkulu palinyja muwarrja jilaman.

Kuwarringulu nyuntu munu nyuntukapali, marlkarrijakapali wankanyu nyuntu. Kuwarringulu nyuntu marrngukapali warinykapali, kawungu Jiyijajingarra yirrkulu wankanyu nyuntungu. Palinymili Pirlurr Ngalypakata kaninykurtingi nyuntungu yirrkulu ngayiny nyinga malamanta ngalypajartiny jilaman, ngayiny nyinga malamanta karrkanaku kurlu jartinyja. Yirrkulu yakurr malaman, ngalypa jilaman palinymilija nyinga manaja, karrkalaman nyuntumilija. Palajun jinajalu wiyyirr miranu nyuntuku, marlkarrijakapali wankanyu nyuntu, kawungu nyuntungu Jiyijaji wankanyu, nyampali nyuntuku. Nyuntu kuwarringulu kurlumajirrikata waninyaku karrpurrangu karrpungu.

# 22  
Munumpa: Wunyjurru kurlumajirrikata yirrkulu wantulumarna?

Miranu jinakata: Karrpurrangu karrpungu Jayitanju yakurr malamanta warinykurnuku, palinymilingi. Yijapa marlumal kurlu jilaman. Yijapa marlumal kurlu jinaku karruluman. Karrpurrangu karrpungu nyuntulu wurralamapili Ngarrkanga, "Japartukayi, kuwarri ngaju munu kurlujartiny jinaku karrinyarni. Kalkuluminyin nyuntulu kurlungumarra. Tuku jilaminyin."

Jayitanju yirrkulu karrinyi kurlu jinaku. Wurralamangu, "Munu pinakarrinyaku Ngarrkanga! Ngajumilingi muwarrja jilaman!" Jayitan munu nyampali nyuntuku. Nyuntuku nyampali Ngarrkangarra. Pinakarrulumanpalu Ngarrkanga nyuntulu, munu pinakarrulumanpalu Jayitanja. Yirrkulu japiirr malaman Ngarrka, "Kararr jiliminyin kurlungumarra." Yirrkulu Ngarrka Ngalypakata Pirlurr kaninykurtingi nyuntungu waninyangu. Pinakarrulumanpili! Palinyjungarra kararr jilamanta kurlungumarra. Palinyju ngayiny nyinga malamanta ngalypaku, ngalypa jilaman Ngarrkamilingi muwarrja.

## # 23

Munumpa: Yijapa watarrkulu kurlujartiny jilamarna.

Yijapa junturtungu kurlu muwarr kurlkarri malamarna.

Yijapa kurlujartiny muwarr pilamarna.

Yijapa jilamarna kurlujartiny.

Palaja ngani? Wunyjurrulu jilamarna ngajulu?

Palaja ngaju Kurijin?

Miranu jinakata: Yu, yirrku Kurijin nyuntu.

Janyinju wurralamapili Ngarrkanga, "Ngajulu kurlujartiny jinirni.

Nyuntu ngayiny kurlu jinirninti.

Paju karrinyarna.

Kurntanya waninyarnaji.

Jiyijaji kartuwarra ngajumili. Purlpija paliny wirlarnan ngajumilingamarra kurlujartinyamarra. Palajalu munukurra wirlalaminyin jampa kurlu jinajaku. Yarrana jurtukartingi jilipijin."

## # 24

Munumpa: Nganijalu Ngarrkalu pinakarrinyanyi ngaju?

Miranu jinakata: Yijalu Ngarrkalu yirrkulu pinakarrinyangu. Nyuntu palinyja ngayinyja. Yirrkulu nyuntulu muwarr pilamanpalu. Palakungarra karrinyi.

## # 25

Munumpa: Nyanga yirrilamarna Ngarrka?

Miranu jinakata: Munu kuwarri jirtamarralu yirrilaman. Jiyijajilu wurrarnangu, "Yijalmarta jilipijin. Yarti nyuntu marlkarri jarrinya ja wanka jilamarnanta marlkarrija. Palaja Ngarrkanga wanka wantuluman ngarramarnti." Palaja ngalypalu yirrilaman. Wantulumanpili ngaramarnti.

## # 26

Munumpa: Wunyjurru? Jiyijaji kulpuliny nyungukarti?

Miranu jinakata: Yu. Jiyijajilu wurrarna, "Warajanga karrpungu ngaju yarranakanu milpulumarna, janyin." Yu, janyin milpuliny, mujungungu, marrngulu wiyirru yirrilipiyi. Kunmu jilkulinyjaninyi palinymilirrangwi yiyirru ngunarrijirrija warrarnjajirri. Kunmu jinakanu kangkulinyjaninyi kankajirrikarti, Japartukarti.

## # 27

Munumpa: Jintaku ngani?

Miranu jinakata: Ngarrkalu jinta wiyirr wikakarti wirtukarti jurtu ngakakkulinyjaninyi ngaramarnti. Pala wika jakarnajanaku Jayitankupa Jayitamili mirurrurranguku wiyirru. Parnpilkulinyjaninyi palarrangu mirurrurranguku kaninykurti palanga wikanga. Panpanyajarrangu marrngurranguku pukurl parnpilkulinyjaninyi palanga wikanga. Yija puripi kulurnukinyiyarninyi Jayitanja, palinymilirrangwi jiniyarninyi. Palajalu yaninyaku Jayitanmilikarti, waninyaku Jayitanjaku. Palangangarra kaninykurti wantulupiyi ngaramarnti, Jayitanpa palinymilirrangupu palarrangu wiyirru Ngarrkanga panpanyajarrangu. Nyarra wika wirtu

munu jupuliny, kampuliny ngarramarnti. Palarrangu panypanyajarrangu yija-yiji kurluny-kurlunyja wantulupiyi ngarramarntipa ngarramarnti.

### # 28

Munumpa: Karrinyarnajanaku marrngurranguku wiyyirru kajalapiyi Ngarrkanga. Munu karrinyarnajanaku yananyaku palakarti wikakarti. Karrinyarni wurranaku marrngurranguku wiyyirru Ngarrkapa Jiyijajipa Ngalypakata Pirlurr. Wunyjurru jilamarna?

Miranu jinakata: Ngarrkamilirrangu marlumal kunmu jarrulupiyi pinakarrinyaku palinymilaku muwarrku, palaku "Payipul"-ku. Marlumal kunmu jarrulupiyi, nyuntu pukun, miranu jarrulumana Ngarrkamilaku muwarrku.

Kunmulu ngayinya nyurra malkulunyurru Ngarrka, wurralkulunyurru, "Nyuntu ngalypakata yija. Yarranijayi! Nyuntulu wanka jininnganinyi. Ngayinya nganarnanga nyuntu yija." Palajunmartalu pikalyju nyurra malkulunyurru, kurntalkulunyurru pukun.

Kurrgal kurluny-kurlunyja waninyayi. Japirr malkulunyurru palinyju tuku jilkulinyjaninyi. Japirr malkulunyurru nganipa jilkulunyurru janaku.

Warinyarrangu wurrkujartiny. Japirr malkulunyurru ngalypa jilkulinyjaninyi.

Jintapa jinta yiji munumpa waninyayi Ngarrkaku. Japirr malkulunyurru marrngurranguku mankulinyjaninyi ngakalkulinyjaninyi palarranguku jittarranguku, wurratalapiyijanaku paliny.

Palinymilaku muwarrku miranu jarrulaman ngarramarnti. Palaku miranu jarrinyakanu, kurlkarri malaman ngarramarntilu, yijalmarta jinangulu jilaman! Wurralamajanaku jintanga miranu jarrulupiyi Ngarrkaku. Nganipa jarrinya yirrkulu Ngarrkanga nyurra malaman.

### # 29

Munumpa: Yu, nyungu muwarr ngalypakata yiji.

Ngajulu yakurr malamarna palajunmarta jinaku,  
nyarra muwarr wurralamarnajanaku kurrgalja pukun.  
JIPI.

## Bible Story readers A & B

This material has been consultant checked.

### *PUJUNUJALU KAMPURTALU MIRTAWALU YINYALU WARNKU NGARKAKU*

Warajanga karrpungu Jiyijaji palanga mayanga wirtungu kajarnakinyi, mayanga Ngarrkamilingi, Timpulja. Wirtu pakuji warnkupinti palanga waninyikinyi. Marrngurrangulu kanganyikinyiyili warnku Ngarrkaku, wirrirnikinyiyi palanga pakujingi.

Jiyijaji wangka palanga warnkupintingi pakujingi kajarnakinyi. Warnku wirrirnikinyiyi, palinyju parrjarnikinyijaninyi. Jintalu warnkujartinyju kurrgaljartinyju warnku wirtumarta wirrirniyi. Palaja mirtawa kampurta pujunumarta milpanya. Palinymili pirirri purlpi marlkarri jarrinyi. Kujarra wupartujirri warnkujirri wirrirnalu Ngarrkaku. Kujupurru pala. Palajirri Yinganya warnkumajirri pala mirtawa.

Jiyijajilu wurrarnajanaku palinymilirranguku, "Yirrirninyurru pala pujunumarta mirtawa? Wupartu yiji warnkujartiny. Palinyju wiyyirr wirrirnalu Ngarrkaku. Kuwarri warnkumajirri waninyi mayikupa nganikupa paliny.

Palarrangu warinyarrangu warnku kurrgaljartiny. Kurrgalja puru jinta yinyayili Ngarrkaku. Janalu wupartumarta wirrirniyi Ngarrkaku. Palalu pujunujalu kampurtalu mirtawalu wirtumarta wirrirnalu. Palinyju puru wiyyirr yinyalu Ngarrkaku."

## 2

### *PARTANYKARRANGU KANGANYIKINYIYIJANINYI JIYIJAJIKARTI*

Pipilurrangupa japaturrangulu kanganyikinyijaninyi janamilirrang partanykarrangu Jiyijajikarti, japirr marnakinyiyi, "Miranu jinakatakayi, japirr malaman Ngarrka ngalypa jinaku nganarnamilaku partanykarranguku."

Jiyijajimilalu marrngurrangulu warnta marnayijaninyi pipipa japatu. Yirrinakanu ngarlu kurlu jarrinyi Jiyijaji, wurrarnajanaku palinymilirrangunu, "Karrinyarni partanykarrangu ngajukarti milpanyaku. Munu ngampa pinaku nyurralu.

Pikalyju Ngarrkanga yijalmarta jiniyalu, pinakarrinyiyi muwarrku palinymilaku janalu. Yijarla muwarr wurrarnarnanyurruku, nyurralu wiyyirru jilkulunyurru janalukapali, yijalmarta jilkulunyurru Ngarrkanga janalukapali. Munu palajunjalu, munu Ngarrkamili jarrulunyurru."

Palaja warajapa waraja partanykarrangu palarrangu kartingi jini, yampu marna, partanya jurnturtungu kankarni parirr wirrirni, japirr marna Ngarrka, "Partany nyunguku ngalypa jilamanpalu."

## 3

### *JIYIJAJILU PIRIRRI KARNU WURRKUJARTINY NGALYPJA JINI*

Warajanga karrpungu Jiyijaji tawunja waninyi. Palanga pirirri wurrukata, kurlu yiji karnu paliny. Yirrirni Jiyijaji, milpanyili, murtingi jurlpi-jurlpi jarrinalu, ngarlu japirr marna,

"Wanka jiliminyin, karnu ngaju ngalypa jiliminyin. Wunyjurru nyuntulu karrinya?"

Jiyijajilu jirranakanu parirr warlirni.

"Yu, karrinyarnangu ngalypa jinaku. Kapuraly yiji jilamarnanta."

Jampangarra pala wurrku munu jarrinyalu, karnu kapuraly jarrinyi pala marrngu. Jiyijajilu wurrarnala,

"Munu wurralamajanaku ngalypa jinirninti ngajulu. Pipurru yatilkarti yarra. Palinyju yijalu parrjalamanta kawu wiyyirr nyuntu, nyuntu karnu kapuraly. Nyuntu miranu palaku muwarrku nyuntumilaku wurrkuku. Purpimalu Ngarrkalu wurrarnalu Muwujujungu mirlingi yarntanaku. Palinyja muwarrja kukurnjari wankanyu yatilkarti kangkuluman. Palalu yatilju kampalkuliny tikirlkart, jurnpakartijakun. Palajalu marrngurrangulu pala yirrinajalu nyuntuku miranu wantulupiyingu, kapuraly nyuntu, wurrkumajirri."

Palajun wurrarnili Jiyijajilu. Palaja pirirri ngakarna yatilkarti.

Pala pirirri munu jama wanima, wurrarnakinyajanaku marrngungu. Nyarrakurnujirri muwarr jakurl kanyayijanaku,

"Jiyijajilu ngalypa jinijaninyi wurrkuja!"

Palajalu kurrrgal yiji milpanyikinyiyalu pinakarrinyaku Jiyijajiku. Kurrrgalju pukun japirr marnikinyiyi,

"Ngaju pukurl ngalypa jilaminyinkurra?"

Palajalu Jiyijajilu tawun yakarna, pirrakarti yana kujurlku jarrinyaku, muwarr pinaku Ngarrkaku.

## WUNYJURRU YIJA-YIJI WIRTU MUWARR?

### 4

Jinta Juwurrangu yatilarrangu warajanga jarrinyiyalu Jiyijaji ngawu manaku muwarrku, palinyju warinykurnuku muwarrku wurranaku.

Waraja pirirri jananga miranu jinakata Juwumilirranguku purpialku muwarrkurrangu Ngarrkajaku. Palinyju japirr marna Jiyijaji,

"Yu! Miranu jinakata, wunyjurru yija-yiji wirtu muwarr Ngarrkaja?"

Jiyijajilu puntaju karra marnalu,

"Miranu nyuntu nyunguku purpialku muwarrku:

'Ngarrkangarra wirtu nyampali nyuntuku.

Ngarrka ngarlungu jilamanparningu ngarramarntilu, wakanyju nyuntulu ngarlungu jilamanparningu Ngarrka, ngarlulupa pirlurrjupa kurlkapirlili.'

Nyarrangarra wirtu yija-yiji muwarr.

Warinymarninypa muwarr nyarrakapali:

'Nyuntulu ngarlungu jinanparningu.

Palajunmarta ngarlungu jinaku marrnguku wiyyirrku pukun. Ngarlungu jilamanparningu marrngu wiyyirr.'

Ngarrkalu kurrrgal muwarr wirrirninganyjurru, jinta Muwujujapa jinta Ngarrkamilija muwarr pinakatarranguja. Nyuntulu jinajalu nyarralujirri muwarrjujirri yijalu yirrkulu jinanjaninyi jinta wiyyirr muwarr Ngarrkaja."

### 5

#### *JIYIJAJIJA MUWARRJA JUPANYAPULU WANGALPA NGAPA*

Warajanga karrpungu Jiyijajilu wurrarnajanaku pirirrimartanga palinymilirrangungu,

“Yankunyi ngapanga ngunarrikarti.” Palaja yanayi tingkingi. Palanga Jiyijaji tingkingi kupalya jarrinyi yija.

Palaja wangal wirtu yiji jarrinyi, ngapa pintura jarrinyi, ngalpanyakinyi tingkingi, winya jarrinyikinyi pala tingki. Wirnti yiji jarrinyiyi marrngur-rangu Jiyijajimili. Mintu jiniya.

“Nyampalikayi! Yija kunalkulinyganyjurrinyi ngapalu. Jampangarra marlkarri jarruluminyi!”

Jiyijaji kupalyaja wararr turlpanya, wurrarnapulaku, “Wangalkayi! Jupa! Janpakayi! Kaniny jarra!” Palinyjaja muwarrjaja wangal jupanya palangangarra, ngapa kaniny jarrinyi palajun.

Jiyijajilu japiirr marnajaninyi marrngurrangu palinymili, “Nganija wirnti jarrinyikinyinyurru? Nganijalu munu yijalmarta jinimi-jinyurru?”

Ngurnjurnikinyi ya yija. Wurrarnayarninyi, “Pinakarrinyipulalu wangaljupa ngapalu. Yija nyampali paliny ngapakupa wangalku! Nganikapali nyungu Jiyijaji?”

Palaku ngurnjurnikinyi ya. Wirnti karrinyikinyiyili.

## 6

### *JIYAJILU NGALYPA JINIJANINYI 10 PIRIRRIMARTA*

Warajanga karrpungu Jiyijaji jinangu yananyikinyi, tawunkarti wangka jarrinyi.

Palanga pirirrimartalu 10-ju yirrirniyi. Wurrkujartiny palarrangu, karnu jana kurlu yiji. Kajamarta wararr karrinyiyi, marrjalu kamarniyalu, “Jiyijajikayi! Nyampalikayi! Paju karrulumanganaku wurrkujartinyku. Ngalypa jilamannganinyi!”

Puntaju karra marnajanaku, “Yarrayijanaku Ngarrkamilaku yatilarranguku, japiirr malayijaninyi parrjalapiyinyurriyi kawu wiyyirr.”

Palinyja muwarrja yanayi. Marnti jarrinyajanga ngalypa jarrinyiyi.

Warajalu pirirrilu parrjarnarninyi, kawu paliny kapuraly. Palangangarra kulpanya, marrjalu kamarnakinyi, “Ngarrka ngalypakata!”

Murtingi juripi-juripi jarrinyalu Jiyijajingi, karra marnalu, “Yarranijayi! Nyuntu ngalypa jinjin!” Nyarra kulpanya piritri munu Juwu, ngajarri paliny, marrngurrangua warinyja, Jamariya ngurrara paliny.

Jiyijajilu wurrarnajanaku palinymilirrangunga, “Yija 10 pirirrimarta ngalypa jarrinyiyi. Nganija warinyarrangu 9 munu kulpamiyi? Waraja nyungu, ngajarri yiji, kulpanya wurranaku, ‘Ngarrka ngalypa’.”

Palaja palinyja wurrarnala, “Yijalmarta jinin Ngarrkanga ngalypaku. Palajalu ngalypa jarrinyan. Wararr karrulumana, ngalypa yankuluman.”

## 7

### *WURRUKARRAJARTINYU WIRTUJARTINYU MUNU KURLKARRI MARNAMA NGARRKA*

Warajanga karrpungu Jiyijajilu miranu jinikinyijaninyi marrngurrangu kurrngal.

Palanga pirirrilu wurrarnala, “Miranu jinakatakayi, ngalayimili japartu purlpi marlkarri jarrinyi. Palinymili warrarn yinyangalayaku mama-jikupa. Wurrallala mamajingi ngajumilingi palinyju jinta pilkulinyngalayaka pala warrarn, wurrallala palinyja ngajumili yinganyaku ngajuku.”

Jiyijajilu karra marnalu, “Nganurtulu ngaju nyampali jininyi nyumpalaku? Munu ngajulu jinta pinaku warrarn nyumpalamili.”

Palaja wurrarnajanaku wiyyirku, "Pinakarrayi! Munu lirrjalju mananyaku kurrngal warnkupa wirtu wurrukarrapa nganirn-nganirn. Warnkupa wurrukarrapa kurrngaljartiny jarrinya ja nyuntu, munu ngalypa jilamanta warnkulu, munu pikaly jilamanta wurrukarralu, munu wanka yiji kalkulupiyinti." Palaja Jiyijajilu muwarr wurrarnajanaku. "Wariny pirirri warnku kurrngaljartiny. Palinymili warrarn jinjimama yija pukun. Palinyju mayiku wilyki jungkanga wirrirni, jungkaja mayi yurntaraku marlu yiji turlpaniyili palaku pirirriku. Wurrarnarningu, 'Ngajumili mayi kalkunupinti mayarrangu wuparturrangu, munu wiyyir mayi wirrirkarna palarrangungu. Wunyjurru kalkulumarnaji mayi ngajumili wiyyir?'

Ngurnjurnukinyi yiji. Palaja wurrarnarningu, 'Pala kurlkapirli jarriyirni! Yinji pilamarna maya mayi kalkunapinti wuparturrangu. Palaja wirtumarta yiji yarni malamarnajaninyi. Palarrangungu tuku kalkulumarnaji mayipa wurrukarrapa nganirn-nganirn ngajumili wiyyir. Palaja wurralamarnarninyi, "Mayi wirtujartiny yija-yiji ngaju, partunurranguku kurrngalku yiji. Kuwarrija munu warrkamu jarrulumarna. Yirrkulu mayi ngananyangkulumarna, yirrkulu wayin minpirnangkulumarna, pikaly waninyangkulumarna ngaramarnti." Palajun wurrarnakinyirnangu palalu pirirrilu.

Palaja Ngarrkalu wurrarnala palanga pirirringi, 'Ngakumpa nyuntu! Nyungungungarra warrukartingi marlkarri jarrulumana. Kalkurnanparninga warnkupa wurrukarra wirtu. Wunyjurru jilimanjaninyi kuwarri? Warinyju mankulinyjaninyi!' Palaja Jiyijajilu wurrarnajanaku, "Kurrngal marrngu nyarrakapali pirirrikapali waninyiyi. Yirrkulu kakurnayi Ngarrka. Yirrkulu warnkupa wurrukarrapa nganirn-nganirn kuru marnayirningu. Jamirnayajaninyi pujunurrangu mayikupa nganirn-nganirnku. Munu yinganyakata warnku Ngarrkaku. Yirrkulu kalkurnayirningu. Wiyyir palajun jinajarrangu waninyayi nyarrakapali pirirrikapali. Munu pikaly jinakayi Ngarrka."

## 8

*Yini nyunguku muwarrku: JIYIJAJILU PARTUNURRANGU 12 JARRINYA-JALU KURRNGARNIKINYI JANAKU YATILKU NGARRKAMILINGI MAYANGA*

Turlparrarrangu turlparranga kurrngal Juwurrangu marrngurrangu yananyikinyiyi tawunkarti wirtukarti, Jirujalamukarti. Palakarti yananyikinyiyi kunmungu nyurra manaku Ngarrkaku. Palaku Jiyijajimili pipipa japartu yananyikinyipulu pukun.

Jiyijaji partunurrangu 12-jarrinya ja pipilupa japartulu kanyapulu paliny pukurl Jirujalamukarti.

Palanga kunmungu waninyiyi karrpurrangu karrpungu, 8 karrpungu. Palaja pipipa japartu yakarnapulu Jirujalamu janamilikartiku warrarnkartiku kulpanyaku. Jintalu pukurl kurrngalju Jirujalamu yakarnakinyiya. Jiyijaji wananyikinyi Jirujalamungu. Pipipa japartu munampa palaku. Wurrarnakinyipulu paliny jintanga milpanyi.

Karrpungu marnti ngarrany yananyikinyipulu. Warrurl-warrurl jarriyikinyi, pulanyju munu parrjarnamapulu Jiyijaji. Japirr marnakinyipulujaninyi jarnturrangu,

"Yirrirninyurru partany ngalayamili?"

"Munu yirrirnimiyirni."

Partarl kanyjirnikinyipulalu.

Marntungu kulpanyapulu Jirujalamukarti palinyku kanyjinaku. Jarurukartingi Jirujalamungu ngurranga jarrinyipulu. Warinymaljanga kanyjirnikinyipulalu. Yartikarra yirrirnipulu Ngarrkamilingi Wirtungu Mayanga, Timpulja, palanga yirrirnipulu. Jiyijaji miranu jinakatarrangungu kajarnakinyi palanga, pinakarrinyikinyijaninyi, japirr marnakiny-ijaninyi Ngarrkaku.

Palarrangu miranu jinakata ngurnjurnikinyiyalu. Wurrarnakinyi-yarningu, "Payi! Nyungu murrukurru miranu yiji Ngarrkamilaku muwarrku! Punulkujakun paliny. Wunyjurru palajun miranu jarrinyi?"

Jiyijaji yirrinaja wurlka jarrinyipulu palinymili pipipa japatru. Pipilu karra marnalu, "Partany! Nyuntumili japatupa ngaju ngarlu kurlu jarrinalayinga. Yijalu kanyjirnalayinga ngunarrijirri. Nganija nyungungu waninyikinyin?"

Jiyijajilu karra marnapulaku, "Nganijalu kanyjirnikinyijinyumpulu? Munu miranu wanimanyumpulu ngajuku, ngaju yiji waninyaku ngajumilingi Japartumilingi mayanga? Nganija munumpa nyumpulu nyungungarra kanyjilipijinyumpulu?"

Ngurnjurnukinyipulu, munumpa waninyipulu palinymilaku muwarrku. Palaja kulpanyiyi janamili warrarnkartu, ngurrakarti janamilikarti, Na-jirijingi. Jiyijajilu yirrkulu pinakarrinyikinyipulaku.

Pipilu palinymilalu kurlkarri marnakinyi Jiyijajimili muwarrarrangu. Jiyijaji wirtu jarrinyikinyipa miranu jarrinyikinyi, kurlkanga kalkurnukinyi. Ngarrka pikaly jini, marrngurrangu wiyyirr pukurl marru marnayi.

## 9

### *BSOC-B2 Yini nyunguku muwarrku: JURN MILPANYA WURRANAKU NGARRKALU NGAKALKULINY JIYJAJI*

Purlpi yiji Ngarrka muwarr pinalu pirirriku, yini paliny Yayijayiya. Palinyja wurrarnala Ngarrkalu,

"Nyampali ngakalamarnajanaku marrngurranguku. Wariny pirirri walangkarr ngakalamarnalu pala nyampalingi, muwarrjartiny janaku. Pala walangkarr pirirri wantuliny pirranga. Palinyju muwarr pilkulinyjanaku,

'Nganyjurrumili nyampali milpuliny.

Yarni malayalu jurtu ruwurtu.'

Palajun Ngarrka muwarr pinalu Yayijayaku.

Palalu Yayijayiyalu yarntarnajanaku muwarr mirli-mirlingi.

Punjaja yiji pala marrngu kuwarri milpanya. Yini paliny Jurn. Wur-rupirrayi kamalja mampu palinymili. Karnulu kunyji pinapintilu nyikarra kunymarnakinyarninyi. Mayi pirraja nganinyikinyi, wajapipa narnngurla.

Kurrrgal yiji milpanyikinyiyalu pinakarrinyaku Jurnku. Warrarnja Jutiyaja milpanyikinyiyalu, wirtuja tawunja pukurl, ngapija, Jirujalamuju.

Wurrarnakinyianaku,

"Nyurralu panypanyikinyinyurrulu Ngarrkanga. Kurntany jarrayi. Kurlujartiny jinikinyinyurru. Yakalayi. Yakujani jarrayi, Ngarrkakarti milpayi. Palaja Ngarrkalu munu kulilu yirrulkulunyurrinyi, ngarlu ngalypa jarrulunyurruku paliny. Palaja ngapanga jilamarnanyuryinyi."

Palajunmarta wurrarnakinyianaku Jurnju.

Jurnmili muwarr pinakarrinyajalu warajalupa warajalu wurrarnakinyiyalu Ngarrkanga,

"Yijangarra nyuntungu panypanyikinyirnangu. Kurntanya wanin-yarnaji. Nyuntukarti kulpanyaku karrinyarnangu."

Palajunmarta wurrarnakinyiyalu Ngarrkanga. Palaja Jurnju ngapanga jinijaninyi pijungu, ngapingi, Jurtanja.

Jurnju wurrarnakinyijanaku,

"Kuwarrimarta wariny marrngu milpuliny. Paliny yija-yiji wirtu nyampali. Munu ngajukapali, ngaju puru yiji, mujuja. Nyungu wariny nyampali wirtungarra. Ngajulu munu yiji jujika palinymili nyinga manaku. Ngajulu puru ngapanga jinarninyurrinyi. Nyungu warinyju ngakalkulunyurruku Ngarrka Pirlurr."

Palajunmarta wurrarnakinyijanaku Jurnju.

Palaja Jiyijaji milpanyili Jurnkarti tawunja Najarijija, warrarnja Kaliliyija. Palanga Jurnju ngapanga jini Jiyijaji palanga pijungu Jurtanja.

Jiyijaji ngapaja turlpajangka kanka parrjarna. Palanga parlparr laarr jini Ngarrkalu. Ngarrka Pirlurr kaninykurnu milpanyala Jiyijajikarti kurlukukukapali, palinya kajarnala.

Kankajirrija Ngarrkalu muwarr pinalu Jiyijajiku,

"Nyuntu partany ngajumili walja yiji. Ngajungu ngarlungu nyuntu. Ngarlu ngalypa jarrinyarnangu."

## 10

### *BSOC-B3 Yini nyunguku muwarrku: MIRURRULU PARTARL JAKURLIRNIKINYI JIYIJAJI PANYPANYAKU NGARRKANGA*

Ngarrkalu Pirlurrju ngakarna Jiyijaji pirrakarti, Mirurrulu Wirtulu yakurr manaku palinya.

Palanga Jiyijaji mayimajirri waninyikinyi. Karrpurrangungupa warrukartingi 40-ngi munu nganama mayi. Palaja janparr karrinyi. Palanga pala mirurru wirtu milpanyili, Jayitan milpanyili. Karra marnalu mirurru, "Nyuntu wurrarnanparninyi yija Ngarrkamili Partany. Wurralla warnkurrangungu mayi jarrulupiyo." Palajunju yakurr marna.

Jiyijajilu puntaju karra marnalu, "Munu palajun jilamarna. Ngarrkamilingi mirli-mirlingi nyungu muwarr waninyi, 'Mayilu puru wanka kalkuninyi kawujakun. Marrngurrangulu pinakarrinyaku Ngarrkamili muwarrku wiyirru.'"

Palaja Jayitanju kanya tawunkarti wirtukarti, Jirujalamukarti, maya Ngarrkamilikarti wirtukarti. Palanga kankajirringi wararr karrinyipulu.

Wurrarnili Jiyijajingi, "Nyuntu wurrarnanparninyi yija Ngarrkamili Partany. Nyunguja wapakalaman jungkakarti. Ngarrkamilingi mirli-mirlingi nyungu muwarr waninyi, 'Ngarrkalu wurralkulinyjanaku yayinyjilji palinymilingi tukulu nyuntuku kanganyaku. Warlilipiyinti parirru, tuku kalkulupiyinti warnkungumarra, munu warnkulu jina wirrkalamanta.' Palajalu wapakala. Ngarrkalu wanka kalkurnanti."

Jiyijajilu puntaju karra marnalu, "Munu palajun jilamarna. Ngarrkamilingi mirli-mirlingi wariny muwarr waninyi, 'Marrngurrangulu munu yakurr manaku Ngarrka, janamili nyampali paliny.'"

Palaja Jayitanju kanya warnku wirtukarti, kanka kanka kanka yiji pala. Kankajirringulu jurti jinili warrarnarrangu ngunarrikurnujirri, jurti jinili tawunarrangu wiyyirr pukun.

Wurrarnili Jiyijajingi, "Ngajuku murtingi jurlpu-jurlpu jarrulupijin, wurralaman ngajurti nyampali wirtu nyuntuku. Palajalu jilamarnanta nyampali ngurnungurranguku tawunarrangukupa marrnguku wiyyirku."

Jiyijajilu puntaju karra marnalu, "Munu murtingi jurlpu-jurlpu jarlulumarnangu, munu wurralamarna nyuntu nyampali. Ngarrkamilingi mirli-mirlingi nyungu muwarr waninyi, 'Marrngurrangu Ngarrkakujakun murtingi jurlpu-jurlpu jarrulupiyi. Ngarrkakungarra pinakarrinyaku.' Palangarra muwarr Ngarrkaja. Palajalu munu murtingi jurlpu-jurlpu jarrulumarnangu, Jayitan. Yarra!"

Palaja mirurru yana, palaja Ngarrkalu ngakarnajaninyi yayinyjilarrangu palinyku tuku kalkunaku.

## 11

*BSOC-B4Y ini nyunguku muwarrku: JIYIJAJILU WURRARNAJANAKU JANPAMALU MANANYAKATANGA, "YAJALAMINYINYURRU"*

Warajanga karrpungu Jiyijaji ngapamartaji Yintanga Kaliliyingi wararr karrinyikinyi.

Kurrngal milpanyiyili, miranu jinikinyijaninyi Ngarrkamiliku muwarrku. Ngurrku marnakinyiyarninyi palinyku pinakarrinyaku.

Parrjarn-parrjarna, yirrirnipulinyi tingkijirri ngapanga milyanga. Janpamalu mananyakata purlpi katukarnayi, janpa jinikinyiyi parruparrurrangu.

Jiyijaji karntinyi warajanga tingkingi, Jayimanmilingi. Wurrarnala Jayimanja, "Tingki jujiliji janpangamarta." Palanga kajaninyi tingkingi, miranu jinikinyijaninyi tingkingulu.

Miranu jinajaninyi jipi, wurrarnala Jayimanja, "Kawa tingki yintakarti, parruparrurrangu ngapanga wirriliyi janpamaluku."

Jayimanju karra marnalu, "Nyampali, kakarrara partarl warrkamu jarrinyiyirni, munu warajapa manamiyirni janpamalu. Nyuntumilijalu muwarrjalu parruparrurrangu wirrilipiyirni."

Palaja kanyayi tingki yintakarti, Jayimanjupa jintalu janpanga wirrirniyi parruparrurrangu. Janpamalu kurrngal yiji manayi, parruparrurrangu jipi larr kangamiyi.

Parirru muwarr piniyipulaku warinya tingkingi milpanyaku, Jayimikupa Jurnku, Jipitmilaku partanykujirri. Palaja tingkingi kujarranga winya jinikinyiyi janpamalu. Kurrngal yiji janpamalu, purtuly, ngapalu tingkijirri jipi kunamapulinyi.

Palarrangulu janpamalu mananyakatalu yirrirniyijaninyi janpamalu kurrngal yija-yiji. Wurlkakata yiji jarrinyiyi.

Jayiman murtingi jurlpu-jurlpu jarrinyili Jiyijajingi. Wurrarnala, "Nyampali, ngaju kurlujartiny. Yarrajalu!"

Jiyijajilu karra marnalu, "Munu wirnti jarranpili. Purlpi mananyakinyinjaninyi janpamalurrangu. Kuwarri yirrkulu muwarrju mankulumanjaninyi marrngurrangu Ngarrkaku."

Palaja purrirniyipulinyi ngapaja tingkijirri, jungkanga murrulungu yakarniyi tingkipa parruparrurrangu, yanayili Jiyijajingi.

## 12

*BSOC-B5 Yini nyunguku muwarrku: WILYKIKU*

Marrngu yirru milpanyikinyiyalu Jiyijajiku warinyarrangua tawunja. Kurrngal yija-yiji kunmu jarrinyaaja Jiyijajilu wurrarnajanaku muwarr nyungu.

"Pinakarrulunyurru! Pirirri yana wilykiku wirrpa parnpinaku palinymilingi warrarnja, mayi yurntaraku jarrulupiyili.

Jinta wilyki pungkanyiyili jukurtingi parnpinaja. Marrngulu jinalu jurrkarnakinyiyi, wirrujartinyu nganayi wiyyir.

Jinta wilyki pungkanyiyili warnkumarramarranga. Palanga ngapama-jirri. Turlpanyaja, jampa tikirl jarrinyiyi.

Jinta wilyki pungkanyiyili jantaranga. Jantarapa wilyki turlpanyapulu warajanga, jantara wirtu jarrinyiyi walangkarrangu wilykingi, yamarnay-ijaninyi, kiyi marnayijaninyi jantaralu, wilyki munu jarrinyiyili.

Jinta wilyki pungkanyiyili ngalypanga jungkanga. Turlpaniyi ngalypa yiji, wirtu jarrinyiyi yija, mayi marlu yija-yiji jarrinyiyili nyarraku pirirriku.

Pinakarrayi kurlkapirlilu!"

Palaja palinymilirrangulu marrngulu japirr marnayi Jiyijaji, "Nganiku pala muwarr wurrarnan? Ngani palalu muwarrju wurrarnannganaku?"

Karra marnajanaku, "Purlpi wiyyir ngakumpa waninyikinyiyi Ngarrkamili jarrinyaaku marrngu, palinya muwarrja jinaku. Kuwarri nyurra pirnti pilamarnanyurrinyi, ngalypa miranu jarrulunyurru palinymiliku muwarrku. Jintalu marrngulu partarl pinakarrulupiyalu Ngarrkaku. Yirrkulu parrjarniyi, munu yirrirkulu pinakarrinyiyi, munu miranu jarrinyakayi. Palajalu nyungukapalirrangulu muwarrarrangu wurrarnarnajanaku. Pirnti pinirnijaninyi muwarrju nyungukapalilu.

Nyarra muwarr yimpilamarnanyurraku.

Nyarra wilyki Ngarrkamilikapali muwarrkapali. Palarrangu warinypa wariny jungkarrangu marrngukapali warinypa warinykapali.

Jinta wilyki pungkanyiyi jukurtingi. Wirrujartinyu nganayi wiyyir.

Palalu muwarrju wurrarnarnanyurruku nyungu: Palarrangulu wirrujartinyu kurlkarri malkulunyurrinyi mirurruku. Palalu jukurtulu kurlkarri malkulunyurrinyi jintaku marrnguku.

Palarrangulu marrngulu pinakarrulupiyi Ngarrkamili muwarr. Mirurru lu jakurlilkulinyjaninyi kakulupiyi pala muwarr. Pala muwarr munu jarrulinyjanaku. Palajalu munu yijalmarta jilipiyili Ngarrkanga, munu jilipiyi muwarrja Ngarrkaja.

Jinta wilyki pungkanyiyi warnkumarramarranga. Turlpanyaja tikirl jarrinyiyi, munu mayi karrimiyyi.

Palalu muwarrju wurrarnarnanyurruku nyungu: Palalu warnkumarra-marralu kurlkarri malkulunyurrinyi jintaku marrnguku.

Palarrangulu marrngulu pinakarrulupiyi Ngarrkamili muwarr pikalyju. Jampa ngarrany yijalmarta jilipiyili. Palaja jintalu kararr jilkulinyjanaku. Palaja warinykurnu jarrulupiyi, munu Ngarrka yajalapiyi, munu jilipiyi Ngarrkaja muwarrja.

Jinta wilyki pungkanyiyi jantaranga. Jantaralu kiyi marnayijaninyi.

Palalu muwarrju wurrarnarnanyurruku nyungu: Palalu jantaralu kurlkarri malkulunyurrinyi jintaku marrnguku.

Palarrangulu marrngulu pinakarrulupiyi Ngarrkamili muwarr. Yirrku karrulupiyi pikaly jarrinyaaku. Nganirn-nganirn yirrkulu kurlkanga jilkulinyjaninyi warnkupa mayipa wurrukarra. Palaja jampa munu jarrulupiyalu Ngarrkaku pinakarrinyaku. Munu jilipiyi Ngarrkaja muwarrja.

Jinta wilyki pungkanyiyi ngalypanga jungkanga. Mayi karrinyiyili marlu yiji.

Palalu muwarrju wurrarnarnanyurru nyungu: Palalu ngalypalu jungkalu kurlkarri malkulunyurrinyi jintaku marrnguku.

Palarrangulu marrngulu pinakarrulupiyi Ngarrkamili muwarr, ngalypalu kalkulupiyi, yirrkulu nyarraja muwarrja jilipiyi, Ngarrka pikaly jilipiyi ngaramarnti."

## 13

### *WURRKUJA NYUNGU JIYIJAJILU NGALYPA JINI*

Jiyijaji kulpanya tawunkarti, ngapikarti, Kaparnawumukarti. Wurrarnakinyiyarninyi, "Jiyijaji kulpanya!" Kurrgal mayakarti palinymilikarti milpanyiyi, palinyku pinakarrinyaku. Wurrarnakinyijanaku palinyu Ngarrka.

Marrngurrangu palanga mayanga kurrgal waninyikinyiyi, jinta kurrgal jalakartingi ngunarrijirri wararr karrinyikinyiyi, pinakarinyikinyiyalu.

Palanga milpanyiyi marrngu kujarrapa kujarra. Pirirri wurrkjartiny kanganyikinyiyi ngurrinya, manyurla yija paliny, munu marnti yananya. Kanyayili Jiyijajikarti palinyu ngalypa jilkuliny. Partarl ngalpaniyi, kurrgal waninyikinyiyi yiji.

Palaja kankarni mayanga karntinyiyi. Pirla jiniyi Jiyijajimartaji kankarni, wurrkjartiny kaninykurnu jiniyi ngurrinya, Jiyijajingi walangkarr.

Karra marnarningu Jiyijajilu, "Yijalmarta jinijiya wurrkjartiny ngalypa jilamarna." Palaja ngalypalu wurrarnili wurrkjartiny, "Nyuntulu purlpi panpanyakinyinpili Ngarrkanga. Puntaju munu wirlalamarnanta ngajulu, nyuntuku ngalypa wantulumarnangu."

Mayanga palanga kajarnakinyiyi Juwumili miranu jinakatarrangu kujarrapa waraja. Kurlkarri marnakinyiyarninyi, "Munu palajun muwarr pinaku. Mitukata paliny. Ngarrkajakurl palajun muwarr pinaku. Ngarrkakapali Jiyijajilu jinarninyi!"

Janaku miranu Jiyijaji, palajun kurlkarri marnakinyiya janalu. Japirr marnajaninyi, "Nganijalu nyurralu yimpirninyurru ngaju palajunju?

Wurrarnarnalu nyungungu pirirringi, 'Nyuntulu purlpi panpanyakinyinpili Ngarrkanga. Puntaju munu wirlalamarnanta ngajulu.'

Nyurralu wurrarnanyurru palajun munu wurranaku ngajulu. Wunyjurru muwarr pilamarnalu wurrkjartinyku? Yijapa wurralamarnalu, 'Wararr jarruluman, ngurriny mankuluman, jinangu yankuluman'. Palinyja palajun wurranaku ngajulu?

Yu! Kuwarringarra ngalypa jilamarna nyungu wurrkjartiny. Palajalu wantulunyurru ngajuku miranu, ngajungu yija wurrarnaji Ngarrkalungarra, 'Marrngu kurlujartinyja munu wirlalamjaninyi, ngalypa wantulumanjanaku.'

Palaja wurrkjartinyja wurrarnala Jiyijajilu, "Wararr jarruluman, ngurriny mankuluman, ngurrakarti nyuntumilikarti yankuluman."

Palangangarra wararr jarrinyi pala pirirri, ngurriny mana, jalakarti yana pipurru.

Yananya kawanaja wiyyirju parrjarnakinyiya. Wurrarnakinyiya, "Ngalyipa jini! Kuwarrijakun! Munu nyungu yirrirniminyi!"

Nyurra marnakinyiyi Ngarrka. Ngarrkaku muwarr pinikinyiyalu, "Yarranijayi. Yija-yiji nyuntu ngalypa!"

## 14

*Yini nyunguku muwarrku: JIYIJAJILU MAYI WIRTU JINIJANAKA 5,000-KU MARRNGURRANGUKU*

Kurrngalju marrngulu yirrirnikinyiyi Jiyijajilu wurrkujartinyarrangu ngalypa jinijaninyi. Palajalu karrpurrangu karrpungu yajarnikinyiyi.

Warajanga karrpungu Jiyijaji warnkungu karntinyi. Palanga kajarna, marrngurrangu palinymili kajarniyili. Kajanakanu yirrirnijaninyi marrngurrangu kurrgal yiji milpanyiyalu.

Wurrarnarningu, "Marrngurrangu nyungu janparr. Ngajulu mayi yungkulumarnajaninyi." Miranu paliny wunyjurrulu mayi yungkulinyjaninyi. Munu wurrarnamajanaku palinymilirrangungu. Yakurr marna waraja, yini Pilipi. "Wunyjurrulu mayi mankuluminyijanaku kurrgalku nyungurranguku?"

Pilipilu puntaju karra marnalu, "Martumpirri mananyakanyi palamaranguku! Warnku nyungu yangu kalkurnanyi. 1,000 tala kalkurnuminyi, mayi wupartumarta mananyakanyijanaku palamarranguku kurrgalku!"

Yanturulu, Jayimanmilalu marrkalu, wurrarnala Jiyijajingi, "Partany nyungu kalkuninyi 5 martumpirri wuparturrangupa janpamalujirri wupartujirri. Mayipirrayi nyungu wupartu yiji, munukapali yiji. Wunyjurrulu ngarri yungkuluminyijaninyi marrngu kurrgal?"

Jiyijajilu wurrarnajanaku palinymilirrangungu, "Wurraliyijanaku ka-jalapiyi." Palanga warrulymarramarra. Warrulyjangarra kajarniyi nyirrirnipa walangkarr. Marrngu munu wupartumarta, 5000 piririmarta.

Jiyijajilu martumpirri mana. Ngarrkanga wurrarnala, "Nyuntulu nyungu mayi yinyanganinyi. Yarranijayi. Nyuntu ngalypakata!" Palaja pirirringi palinymilingi wurrarna-janaku, "Mayi yuwayijaninyi kajar-nayipa." Palajun janpamalujirri pukurl yinyajanaku. Palanga wiyyirju nganayi mayi marlkaku. Palaja palinymilirrangungu wurrarnajanaku, "Jinta mujupa tukulu yangaliyijaninyi, munu yakanaku."

Palinya muwarrja palarrangu mujurrangu manayijaninyi, 12 mar-tuwaranga winya jiniyi.

Jipi ngananyajalu marrngulu wurrarnikinyayarninyi, "Jiyijajilu mayi wupartuja wirtu jini, ngungku wiyyirr ngananyi nganyjurrulu kurrgalju. Palinyngarra milanya Ngarrkaja, yartikarra Ngarrkalu ngakarnan-ganyjurruku."

Jiyijaji miranu janaku, jakurlinaku karrnyayi paliny janamiliku nyam-paliku jinaku. Palajalu yakarnajaninyi palinyju, yana kujurl paliny warnkumarramarra karti.

## 15

*Yini nyunguku muwarrku: MIRURRULU KANGANYIKINYI PARTANY WARINYKURNU. JIYIJAJILU NGALYPA JINI.*

Jiyijaji warinya warrarnja kulanya piririmartakarti palinymilikarti.

Kurrngalja partijirri kaniny waninyikinyiyi. Juwumilalu miranu jinakatalu kujarrapa warajalu jalpa pinijayaninyi Jiyijajimilirrang. Palaja marrngurrangulu yirrirniyi Jiyijaji, purrpi mirti jarrinyiyili. "Yarranijayi! Milpanyan!"

Jiyijajilu japiir marnajaninyi, "Nganijalu jalpa pininyurrujaninyi?" Warajalu pirirrilu karra marnalu, "Miranu jinakatakayi, ngajumili partany kalkurnu mirurrulu, munu muwarr pinaka. Mirurrulu warlirni, jungkanga parnpirni. Jawaja janga purl-purlpukarra marnala, rirra pajirnarninyi, kawu kararr yiji jarrinyi.

Palajalu kanyarnangu nyuntuku, ngalypa jilaman nyuntulu. Nyuntumilirrangu japirr marnarnajaninyi mirurru jurtu ngakanaku palinyja. Munu. Partarl jurtu ngakarnayi."

Palaja Jiyijajilu wurrarnajanaku palinymilirrangungu, "Nyurralu yija munu yijalmarta jiniminyurrulu Ngarrkanga. Wunyjurrurti? Yirrku mitu yakanakatarrangu nyurra. Ngajukarti partany kangkulupijinyurru."

Kanyayili. Jampa Jiyijaji yirrinajalu mirurrulu warlirni pala partany, jinarn-jinarn pinakata jini.

Palanga jungkanga pungkanya partany, warli-warli kanganyikinyi warinykurnu warinykurnu, janga jawaja warrkirnikinyili.

Jiyijajilu japirr marna jpartu partanymili, "Nyanga palajun jarrinyi?" Karra marnalu, "Partanya. Marlumal mirurrulu parnpirnikinyi wikan-gapa ngapanga, marlkarri jinaku yakurr marnikinyi. Paju karrulumanganaku. Yijapa ngalypa jilaman."

Jiyijajilu puntaju karra marnalu, "Yu, palinyku ngalypa jinaku miranu ngaju. Nganijalu palalu muwarrju karra marnajin, 'Yijapa ngalypa jilaman'? Ngarrkanga yijalmarta jilamanpalu nyuntulu. Palaja japirr malaman nganikupa Ngarrka, palakungarra miranu yiji paliny, wunyjurru jinaku."

Palangangarra jpartumurninyju kamarnalu marrjalu, "Yijalmarta jinarnili Ngarrkanga. Miranu jiliminyinpa yinkuku yijalmarta jinaku." Palaja Jiyijajilu wurrarnili minyirru mirurrungu, "Nyuntu mirurru kurlukata, nyungu partany kurlka ngawu jinin, muwarrku jama jinin. Yakala! Jalakarti yarra! Munu yarrana paliny kangkuluman!"

Mirurrulu kamarna, partany jinarn-jinarn pinakata jinikinyi jungkanga, palaja yakarna, yana ngaramarnti.

Pala partany kutukapali. Kurrngalju wurrarnikinyiya, "Marlkarri yija paliny."

Parirrja Jiyijajilu kanka marna. Palaja wararr karrinyi partany. Ngalypa paliny.

## 16

### *BSOC-B9 Yini nyunguku muwarrku: PIRIRRI MUNU PAJU KARRIMALU YALPUKU PALINYMILAKU*

Warajanga karrpungu Piyitalu jipirr marna Jiyijaji, "Nyampali, yijapa marrngulu marlumal ngajuku yirrkulu kurlu jilipiji. Wunyjurrumal ngajulu puru ngakalamarna paliny? Wunyjurrumal kakunaku palinyku pala jinaji? Paju karrulumarnalu 7-mal?"

Jiyijajilu puntaju karra marnalu, "Puru ngakalamana paliny 7-mal, yu, 77-mal pukun. Yirrkulu puru ngakalamana paliny."

Muwarr wurralamarnangu. Nyunguja muwarrja miranu jarrulumana Ngarrkaku. Palinyju yirrkulu nyuntu puru ngakarnanti. Palajun nyuntulurla puru ngakalamjaninyi jinta.

Kuwarri muwarr wurralamarnangu pirirriku, wirtuku nyampaliku. Paliny kurrngal warrkamu jinakatarrangujartiny. Purlpi warnku yinganyakinyijanaku jampa yinganya kulpanyaku.

Warajanga karrpungu wurrarnajanaku, 'Kulpanya jilipijinyurru warnku ngajumili yinganya!'

Waraja warrkamu jinakata milpanyili nyampalikarti. Palalu pirirru kulpanya jinaku warnkuku wirtuku yiji, milyin tala. Wupartu kalkurnikinyi palinyju. Partarl yiji yinganyaka milyin tala!

Nyampalilu wurrarnajanaku kunymanakatanga, 'Kawayijaninyi nyungu pirirrimili mirtawapa partanykarrangupa wurukarra, paliny pukurl, jalamu jiliyijaninyi warnkuku, warnkurrangu pala yungkulupijinyurru ngajungu!'

Pinakarrinya ja muwarr nyampalimili pala warrkamu jinakata murtingi jurlpi-jurlpi jarrinyalu, ngarlu japirr marna, 'Nyampalikayi, munu warnkuku yungkuluminyin janaku! Mimalapijin! Warnku wiyyirr yiji yungkulumarnanta!'

Nyampali paju karrinyalu. 'Puru ngakarnarninta. Munu nganipa yungkuluminyin.'

Pala warrkamu jinakata yana. Yananyakanu wariny marrngu yirrirni, yalpu palinyku. Purlpi warnku wupartu yinyala jampa palanga yalpumurninyja. Purripi yanalu yalpumurninykartu, warlirni ngalyingulu. Wurrarnala, 'Purlpi yinyarnangu warnku. Kuwarringarra kulpanya jiliji, warnku ngajumili yuwaji!'

Pala yalpumurniny murtingi jurlpi-jurlpi jarrinyalu, ngarlu japirr marna, 'Mimalaji! Yarti yungkulumarnanta!'

Nyungulu marrngulu pajuwayilu wurrarnala, 'Munu mimalamarnangu. Jinmurntungu wirrilamarnanta. Warnku ngajumili ngajuku yinganyaaja milpuluman jinmurntuja.' Pipurrulu jinmurntungu wirrirni.

Jintalu nyampalimilalu warrkamu jinakatarrangulu parrjarnakinyiyipulinyi. Ngarlu kurlu jarrinyiyili. Nyampalikarti yanayi, wurrarniyili. Pala nyampali kuli jarrinyi yija. Wurrarnajanaku, 'Pala marrngu kanganyaaja yuwayi ngajungu!'

Kanyayili. Nyampalilu wurrarnala, 'Kurlukata yiji nyuntu! Munu yinganyakanyin warnku ngajumili, milyin tala. Ngarlu japirr marnanyin ngaju paju karrinyaku nyuntuku. Paju karrinyarnangu, puru ngakarnarninta, wurrarnarninga, "Munu nganipa yungkuluminyin ngaju." Palajun jinamanpalu yalpuku. Nyuntupangarra paju karrimanpalu, puru ngakarnaman pala yalpu nyuntumili.'

Kuwarri jinmurntukarti ngakalamarnanta nyuntu. Palanga wantuluman ngarramarnti. Kulpanya yungkuluminyin ngajumili milyin tala. Palaja jinmurntuja milpuluman.' Wirrilyalu ngakarna jinmurntukarti.'

Palaja Jiyijajilu wurrarnala Piyitanga, "Nganipa kurlu jilamangu marrngulu, munu kuli jarrulumanpalu, puru ngakalamana. Munu palajun jilaman nyuntulu, ngajumili Japartu kankajirringi kuli wantulumanga ngarramarnti nyuntuku, munu puru ngakalamanta nyuntu."

## 17

### *BSOC-B10 Yini nyunguku muwarrku: JIYIJAJILU JALI PINI TANGKI JIRUJALAMUKARTI*

Jirujalamukarti wangka jarrinyiyi, warnkungu wirtungu karntinyiyi, yini Warnku Wulipijartiny. Warnkungu palanga kujarra tawunjirri, yini wariny Pajapayiji, wariny yini Pajani.

Palanga Jiyijajilu kujarra ngakarnapulinyi palinymilirrangaja walangkarr yananyaku. Karra marnapulaku, "Palakarti tawunkarti walangkarr yankulunyumpulu. Jampa milpanyakanu, tangki yirrulkulunyumpulu, wangalangu, kunyamanaja palanga. Munu jarntu jinimiyi pa. Ruwupu yinyji pilkulunyumpulu mungkaja, tangki yakujani kangkulunyumpulu.

Yijapa warinyju japirr malkulunyumpulinyi, 'Nganijalu pala jininyumpulu?', karra malkulunyumpulalu, 'Nyampalingarra nyunguku

karrinyi. Jampangarra kulanya ngakalkuliny." Palajun wurrarnapulaku Jiyijajilu.

Palaja yanapulu, tawunja wangalangu tangki yirrirnipulu, mayamartaji, kunymanaja jalanga mayanga jawapirtingi. Ruwupu mungkaja yinyji pinapulu. Jinta wararr karrinyikinyiyi. Japirr marnayipulinyi, "Nganijalu pala ruwupu yinyji pininyumpulu?" Puntaju karra marnapulu muwarr-jalu Jiyijajimilijalu. Palaja yakarnayipulinyi.

Jiyijajikarti kanyapulu. Kujarrapa warajalu ngurrinyarrangu janamili pirntilji tangkingi wirrirniyi jali pinaku Jiyijajiku. Karntinyili Jiyijaji.

Kurrgalju janamili ngurrinyarrangu jirrirniyalu ruwurtungu walangkarr palinyku. Jintalu parrkarrangu wirrkarnayi ruwurtumartijingi, wirrirnayijaninyi parrka pukurl ruwurtungu.

Karrinyiyalu wirtu jinaku nyampali Jiyijajiku, kingi jinaku janamili. Palajalu palajun jiniyalu.

Jiyijajilu jali pinikinyi tangki, jinta jinangu yaninyikinyiyi nyirrirnipa walangkarr palinymartaji. Kamarnakinyiyi,

"Ngarrka ngalypa yiji! Palinya purlpija muwarrja nyungu piriri ngakarnanganyjurruku, kingi jarryaku nganyjurruku. Nyungu piriri wantulinynganyjurruku kingi ngalypakata, palakapali purlpijakapali nyampalikapali, Kingi Tayipitikapali. Kalkulkulinynganyjurrinyi ngalypa ngarramarnti. Ngarrka ngalypakata yija-yiji." Palajunmarta wurrarnakinyiyi marrjalu.

## Drunkenness being a bad thing

Unknown if this section is consultant checked.

*Genesis 9:20-21*

Nawalu mayiku kalkurnikinyi kurayipi mungkarrangu. Jintalu palajun-marta munu jinamiyi. Yarti minpirni wupartu wayin, yawurr jarrinyi, wurru yinji pirnarninga, karta karrinyi palinymilingi kalikungu kurta. [Walangkarrangu kurta waninyaku ngalypa waninyikinyi. Yatamulupa Yiyipilu kurlujartiny jirnipulu, palajalungarra kurta waninyaku kurntany yiji, kurlujartinyju marru manangamarra. Ngarrkalungarra wurru jinipulaku palakujirri. (Genesis 3:7,21)]

*Genesis 19:30-38*

[Lartamili kurntaljujirri yawurr jirnipulu paliny karta karrinyaku palinyja. Palajun ngarlungka jarrinyipulu pulanymilija japartumurninyja. Murrkangunyamurninyju kanya partany punulku yini marna Muwapu. Nyirtingunyamurninyju kanya partany punulku yini marna Pinami. Yarti punjamartaja Muwapumilipa Pinamimilirrangku marrngurrangu yija yukuny pinakatarrangu jarrinyiyijanaku Ngarrkamilirrangku marrngurranguku.]

*Deuteronomy 21:18-21*

Ngurnipali piririmili pujamu jalypakatapa pinakarrinya wirrinakata. Munu pinakarrinyakata pipi japatku, jampa wirlarnayi yirrkulu munu pinakarrinyaka. Palinymili pipi japatulu kangkulinpulujanaku nyampalirrangukarti janamilingi tawunja. Pulanyju wurralkulinypulujanaku, "Nyungu ngalayamili pujamu jalypakatapa pinakarrinya wirrinakata, munu pinakarrinyaka ngalayaku. Warnku wiyirr jininyipa yawurrkata paliny." Palaja marrngurrangulu palanga tawunja malyalapiyi warnkjartinyju marlkarrikartijakun. Yakujunjungarra kurnta julkulunyurrujaninyi jinta nyarra kurlujartiny jinangamarra. Wiyirrju pinakarrinyajalu wirnti karrulupiyi palajunmarta jinaku pala pujamumurninyukapali.

*Proverbs 20:1*

Nyarra wirtu kari minpinajalu nyuntu marrja muwarr pinakatapa ngakumpakata. Ngawu yiji yawurr jarrinyaku.

*Proverbs 23:19-21*

Pujamukayi, pinakarra! Jurtulu kurlkarri malapa yijanga jurtungu wantuluman. Munu kulunaku jinta wayinku wirtu minpinakatarrangupa lirrjalkatarrangu mayiku. Marrngurrangulu palajunmartalu pujunur-rangu jinayarninyi.

*Proverbs 23:29-35*

Ngarnurtu ngarlu kurlu yija? Ngarnurtu pikalymajirri? Ngarnurtu ngarakuny kulipatininyi? Ngarnurtu ngarrakuny warntakata? Ngarnurtulu kalkuninyi pita watarrkulu pungkanyaja? Ngarnurtulu kalkuninyi pani miji-miji? Nyarrarrangku karikarra waninyayi ngarrakuny, yakurr marnayi wayin warinypa wariny. Nyarra wayin ngalypa yiji parrjanakupa juri yiji yakurr manaku. Munu yiji yirni jarrulumana palaku. Nyarra pajinajalu kulikatalu jurrulu nyuntu yija wurrku jarrulumana, parra-parra wirtu nyarra juntangulu pajinajalu, palajunngarra wayin minpinajalu nyuntu

yija wurrku jarrulumana. Nyuntulu parrjalamanjaninyi wirntiji pinakatar-rangu miyurrangupa muwarr pilaman ngakumpakapali. Nyarra miranu nyurra puwurtuku kujungurrungu wangalpintijartinyku, makanu yiji pala mungka warlirninyipa pala wangalpinti. Pala mungka rurri-rurrinya wangalja ngurnarrikurnujirri. Palajunngarra marrngu nyarra yawurr kurirra-kurirra marnti yananyi. Palaja karra malkuliny, "Wirlarninyiyi, munu parra-parra pinakarrimarna. Munumpa ngaju jampa wirlarninyiyi. Nyanga parril jarrulumarna yarrana minpinaku?"

### *Isaiah 5:11-12*

Turlpanyanyurru marntungu kurnpungu wayinku minpinaku, palaja yirrkulu minpinanyurru warrukartingi... Nyurralu kurlkarri mar-nakanyurru Ngarrka, munu yiji! Munumpa nyurra ngani palinyju jininyi. Palinyju wurrarnanyurru, "Ngajulu wirlalamarnanyurri marrjalu, ngunjul yiji nyurraku mirti jarrinyakupa kuku jarrinyaku."

### *Romans 13:13*

Nganyjurrulu yijalu nganin-nganin jilkunyi jurtulu, nyarra ngalypa wiyyirru yirrinaku kurlumajirri, pirlpanga. Munu kurntany yiji nganipa jinaku, munu yawurr jarrinyaku, munu nganinyaku marlkaku, munu jintamilingi nyupanga karta karrinyaku, munu kurla-kurla jarrinyaku jintanga, munu kulipatinaku, munu mikulu yirrinaku jinta.

### *1 Corinthians 5:11*

...Jintalu marrngurrangulu wurrarnayarninyi Kurijin, kurlujartiny ngar-rany jinayi. Ngurnipali jana kurla-kurlakatarrangu, ngurnipali lirr-jalkatarrangu, ngurnipali ngarluja nyurra marnayijaninyi jinkanajarrangu mangunykapalirrangu, ngurnipali mitulu yimpinakatarrangu, ngurnipali karikatarrangu, ngurnipali ngulyukatarrangu. Munu kulunaku marrngur-rangu palajunmarta jinakatarrangu, munu yiji nganinyaku palarrangungu.

### *1 Corinthians 6:9-11*

Yija yiji nyurra miranu nyarra kurlujartiny jinakatarrangu munu Ngarrkamilingi warrarnja jarrulupiyi. Munu mitu malkulunyurrrarningu. Jinta marrngurrangulu kurla-kurlakatarrangu waninyayi, jintalu ngar-luja nyurra marnayijaninyi jinkanajarrangu mangunykapalirrangu, jinta karta karrinyayijanaku warinymilingi nyupajingi, jintalu piririmartalu yikarnayarninyi, jinta ngulyukata waninyayi, jinta lirrjalkatarrangu, jinta karikatarrangu, jinta mitu yimpinakatarrangu, jintalu kulilu ngulyulu mananyakatarrangu. Palajunmarta jinakatarrangu munu Ngarrkamilingi warrarnja jarrulupiyi. Jinta nyurra palajunmartangarra waninyikinyinyurru, kuwarri nyurra wariny. Nyampalilu Jiyijaji Kuray-ijilupa Pirlurrju Ngarrkamilalu jinta pirnapulunyurrinyi kurlujartinyja, nyuku jirnapulunyurrinyi Ngarrkakungarra, kulurnapulunyurrinyi ngaly-panga Ngarrkanga.

### *Galatians 5:21*

...yawurr jarrinyayi, yawurrja ngawu jarrinyayi, nganin-nganinarrangupa jinayi.

### *Ephesians 5:18*

Munu yawurr jarrinyaku wayinjartiny, pala nyarra ngawu jinakata, kurlkarri manamajirrilu kurlujartiny jilaman. Yijamarta yungkulunyur-rarninyili Ngalypakatanga Pirlurrja, palinyju jipanaku nyurraku jurtungu.

### *1 Timothy 3:2-3*

Kurijin nyampali nyarra wantuliny yija yiji kurlumajirri. Paliny yija yirti kaniny marrngu wantuliny, paliny nyampali waljaku palinykun-garra...munu yawurrkata,...munu kulikata...

***Titus 1:7***

...Kurijin nyampali...yija yiji, munu nyurra-nyurrikata wantuliny, munu pipurru wirrilyakata, munu yawurrkata, munu kulikata, munu warnkuku lirrjalkata.

***1 Peter 4:3***

Kuwarringulu marlkarrkartijakun yirrkulu nyurralu jilkulunyurru Ngarrkamilija muwarrja, munu marrngumilija muwarria, munu nyurramilija ngampankatja pirlurrja. Munumparrangu Ngarrkaku, yirrku karrinyayi kurlujartinyku warinypa warinyku jinaku. Purlpilu yijalmarta jinawayilu nyurralu pukun kurlujartiny jinikinyinyurru, janalukapalingarra. Nyurra kurntanymajirrikata kurla-kurlakatarrangu waninyikinyinyurru, karikatarrangu, wayin minpirnikinyinyurru mayi ngananyikinyinyurru marlkaku yiji, palaja yikarnikinyinyurrarninyi. Ngarluja nyurra marnikinyinyurrujaninyi jinkanaja marnijartiny mangun-yarrangukapali. Yakujunmarta yija-yiji kurlujartiny!